

ЎЗБЕКИСТОН РЕСПУБЛИКАСИ ФАНЛАР АКАДЕМИЯСИ
АЛИШЕР НАВОЙ НОМИДАГИ ТИЛ ВА АДАБИЁТ
ИНСТИТУТИ

АЛПОМИШ

Ўзбек халқ қаҳрамонлик достони



«ШАРҚ» НАШРИЁТ-МАТБАА КОНЦЕРНИ
БОШ ТАҲРИРИЯТИ
ТОШКЕНТ – 1998

Айтувчи: **ФОЗИЛ ЙЎЛДОШ ЎҒЛИ**
Ёзуболувчи: **МАҲМУД ЗАРИФОВ**
Нашргатайёрловчилар:
ХОДИ ЗАРИФ ва ТЎРА МИРЗАЕВ

Ноширлик ва матбаа ишларини амалга оширганлар:

**ИСЛОМ ШОФУЛОМОВ (раҳбар), ОДИЛ РАҲИМОВ,
БОБУР АЛИМОВ, ОТАБЕК ФУЛОМОВ,
НАРИМОН САФАРОВ, ВАЛЕНТИНА ПЛОТНИКОВА,
МАНЗУРА АБДУҒАНИЕВА, БОРИС ЦОЙ,
ФАИП ТУРДИЕВ, ВЛАДИМИР НИКИФОРОВ**

«Алномиши» достонни аждодларимиз ижодий дахосининг бебахо бадний ёдгорлиги. У бугунги кунда ўзбек халқининг миллӣ бирлиги ва маънавӣ уйғониш, ўз-ўзиниангашининг рамзига айланган достондир. Асарнинг тӯла нашри биничи марта амалга оширилмоқда.

АЛПОМИШ

ДОСТОНЛАР ГУЛТОЖИ

Халқ достонлари қадимиятнинг буюк бир эхсони, ўзлари яратилган даврнинг умумий дүнёкараши, айни пайтда жонли анъанавий ижод ва ижро шароитларида халқ рухининг объектив ҳолатини даврлараро ифодалаб, мазмун ва шакл жиҳатидан гоҳ кенгайиб, гоҳ торайиб, аждодлардан авлодларга оғзаки равищда етиб келган адабий ёдгорликлар хисобланади. Зеро, улар халқ миллий тарихининг афсоналар қобигига ўралган қаҳрамонлик воқеаларининг ўзига хос бадиий информасиадир.

Ўзбек халқ қаҳрамонлик достонлари ҳам асрлар давомида яратилди ва уларнинг энг яхши намуналари халқ санъаткорлари – бахшилар томонидан жонли эпик анъаналарда оғзаки равищда бизгача олиб келинди. Бундай достонларнинг қадимий илдизлари саклар, массагетлар, сүғдийлар, хоразмийларга мансуб уруғ ва қабилаларнинг афсона ва ривоятларига бориб тақалса-да, уларнинг каттагина қисми ўзбекларнинг ягона халқ сифатида шаклланишида асос бўлган уруғ ва қабилаларда патриархал-уругчилик муносабатларининг емирилиши ва илк феодал тузумнинг юзага кела бошлини даврларида яратилган. Чунки улар халқимизнинг ўзлигини англашенинг буюк обидалари, унинг ягона халқ сифатида шаклланиш ва бирлашиб сари ташлаган улкан қадамининг шеърият соҳасидаги тенгсиз намуналари сифатида юзага келди. Достоилар гултожи «Алпомиш» халқимиз яратган ана шундай эпик шеърият намуналаридан бири, балки биринчисидир.

«Алпомиш» достони халқимиз орасида жуда кенг тарқалган ва асрлар давомида бахшилар томонидан куйлаб келинган. Шу билан бирга у туркий халқларнинг муштарак достони ҳамдир. Унинг намуналари ўзбек, корақалпоқ, козок, олтой халқлари эпик анъаналарида достон холида, татар, бошқирд халқлари орасида эса, эртак ва ривоятлар тарзида, яна аниқроғи, оралиқ шаклда сақланиб қолган ҳамда бу халқларнинг тил хусусиятларига кўра «Алпомиш», «Алпамис»,

«Алпамиш ботир», «Атиш-Манаш», «Алпамиша», «Алпамиша ва Барсин хилув» каби номлар билан юритилади. Шунингдек, Панжикент атрофлари, Кашикадарё вилоятининг Варғонза, Жейнов кишлакларидан ўзбек достончилик анъаналари таъсирида юзага келган хамда жиддий трансформацияга учраган тожичка ва арабча вариантлари хам ёзиб олинган. Ёзма манбалар орқали бизгача етиб келган ўрта аср ўгуз эноси «Дада Кўркут книгоби»нинг уччини бўйни (достони) — «Бамси Байрак» ўзининг сюжет воқеалари жихатидан «Алпомишиш»га анча якин туради. Бир сюжетдаги бир достоннинг бир неча халқларда мавжудлиги уларнинг миллӣ ўзига хослигини никор этмайди. Чунки бу достонларнинг кадимий тарихий-хайтий асослари бир бўлса-да, уларнинг хар бирин кейинги тараққиётида ўзлари мансуб халқнинг эпик анъаналари доирасида ривожланди, оғзаки ижод ва ижро шароитларида япишда давом этди ва факат кейинги даврлардагина шундай шароитларда фольклоршуносслар томонидан ёзиб олинди. Шунинг учун хам унинг версия ва вариантларига эга бўлган хар бир халқнинг ўзининг миллӣ эноси сифатида муносабатда бўлиши табиий бир ҳолдир.

«Алпомишиш» достони миллӣ версия ва вариантларининг фанда аникланниши ва ёзиб олиниши бир вактда, бир хил даврда рўй берган эмас. Масалан, достоннинг қозок ва қорақалпок вариантлари ўтган асрнинг охирилари ва XX асрнинг бошларнда ёзиб олиниб, нашр этила бошланган бўлса, ўзбек вариантларин анча кеч, 20-йилларнинг бошларнда аникланган. Олтой версияси эса, иккى вариантда 1939 ва 1957 йилларда ёзиб олинган. Ёки тожик версияси 1956 – 1957 йилларда тўрт вариантда ёзиб олиниб, 1959 йилда нашр этилган бўлса, арабча эртакин И. Н. Винников Кашкадарё вилояти Жейнов кишлосидан 1938 йилда ёзиб олган. Энг кўп ёзиб олингани қорақалпок ва ўзбек версиялариди. Қорақалпок версияси саккиз вариантда, ўзбек версияси эса, ўттиздан ортиқ халқ достончисидан тўла холда, парча, баёни тарзда ўттиз беш марта ёзиб олинган. Бу хисоб достоннинг Ўзбекистон Республикаси Фанлар академияси Алишер Навоий номидаги Тил ва адабиёт институти фольклор архивида сакланаётган нусхаларнгагина тегишилди. Бундан ташкари достоннинг бошқа жамғармаларда (масалан, Санъатшунослик институтида), шахсий архивларда сакланаётган нотамом, парча ёки баёни тарзидаги вариантлари хам мавжуд.

«Алпомишиш» достони ўзбек вариантларининг тўпланиши, нашр этилиши ва ўрганилиши тарихи ғоятда кизикарлиди. Бу ўзбек фольклоршунослигининг фан сифатида шаклланиши ва ривожланиши билан бевосита боғлиқидир. 1922 йилнинг ёзида биринчи ўзбек профессори Фози Олим Юнусов Туркистон Маориф комиссариати Давлат илмий кенгашининг Ўзбек билим ҳайъати йўлланмаси билан Сирдарё ва Самарканд вилоятларида илмий сафарда бўлди. Сафар давомида у ўзбек шевалари ва этнографиясига оид материаллар тўплаш билан бир каторда Ҳамроқул бахши ва Фозил Йўлдош ўёлидан «Алпомишиш» достонининг бир кисмий ёзиб олди. Унинг маълумотига караганда, кўлэзма 50 саҳифадан иборат бўлган. Фози Олим Юнусов «Билим ўчоги» журналининг 1923 йил 2 – 3-сонида кичик бир сўз боши билан ўзи ёзиб олган нусхадан парчалар эълон килди. Достоннинг бошланишидан Бойсарининг Кашалтга кўчишигача бўлган кисм Фозил Йўлдош ўғли айтган достондан («Билим ўчоги» журнали, 39 – 44-бетлар), Бойсарининг Кашалтга келганидан Алпомишининг Барчинни излаб йўлга чиқиши ва мозоротда тунашигача бўлган воқеалар Ҳамроқул бахши куйлаган «Алпомишиш»дан (45 – 59-бетлар) олинган. Фози Олим ёзиб олган вариантининг колтаг кисми маълум эмас. У тўплаган бошқа материаллар катори «Алпомишиш» кўлэзмаси хам йўқолган. «Билим ўчоги» журналида эълон килинган парча достоннинг биринчи оммавий нашри хисобланади. 20-йилларда «Алпомишиш» достони ҳакида

ги мuloхазалар асосан Фози Олим нашрии дипрасида бўлди. Масалан, профессор Фирратнинг 1928 йилда нашр этилган «Ўзбек адабёти намуналари» китобида мазкур нашрдан фойдаланилган. Унда Фозил Йўлдош ёзиб олинган кисм кайта нашр этилган (33 – 40-бетлар).

«Алпомиш» достони 1926 йилдан боштаб етакчи халқ бахши таридан тўла равища ёзиб олини боштанди. Дастр.таб шоир Абдулла Алавий Тошкент вилояти Эвалак қишлоқлик Берди бахшидан достонининг бир вариантини ёзиб олди. Бу вариантдан бир парча Фирратнинг юкорида тилга олинган хрестоматиясида (40 – 43-бетлар), унинг каттагина кисми Миёнбузрук Солихов томонидан 1935 йилда «Октябргача бўлган ўзбек оғзаки адабёти (фольклор» тўпламида нашр этилди (86 – 145-бетлар). Бу нусхани тўла равища ушбу сатрлар муаллифи сўз боши билан нашрга тайёрлади ва у 1969 йилда босилиб чиқди. 1926 йилда машҳур фольклор тўпловчи Мухаммадиса Эрназар ўғли атоқли халқ шоирини Пўлкан вариантини ёзиб олди. Ходи Зарифнинг маълумотига караганда, бу вариантининг ёзиб олиниши жараёнига атоқли халқ шоирини Эргаш Жўманубулбул ўғли иштирок этган ва унинг айрим ўринлари унинг оғзидан ёзиб олинган. Шу кунларда мазкур сатрлар муаллифи фольклоршунос З. Хусаинова билан ҳамкорликда ушбу нусхани тўла равища нашрга тайёрлади. Шунингдек, А. К. Боровиков 1928 йилда Ўратепа тумани Каирма қишлоғида яшовчи Мавлон Пирмат ўғлидан достонининг мазмунини ёзиб олди ва уни 1956 йилда «Ўзбекистон Фанлар академияси ахборотлари»нинг 11-сонида ўзбек ва рус тилларида нашр этиди (77 – 88-бетлар).

Достоннинг бадний жиҳатдан энг мукаммал варианти Фозил Йўлдош ўғлидан 1928 йилда Махмуд Зарифов томонидан ёзиб олинган нусхаси хисобланади. Унинг биринчи кисми қисқартирилган холда 1939 йилда Ходи Зарифнинг «Ўзбек фольклори» хрестоматиясида (80 – 128-бетлар) нашр этилди. Худди шу пайтдан бошлаб Фозил Йўлдош ўғли вариантидан парчалар мактаб хрестоматиялари, ўкув кўлламалари, турли тўпламларда мунтазам равища нашр этилиб келинмоқда. Шунингдек, шу йили жиҳдий қисқартирилган холдаги Ҳамид Олимжон нашрни ҳам юзага келди. Шоир Ҳамид Олимжон достонни нашрга тайёрлашда уни карийб ярмига қисқартирган. Аммо бу қисқартириш шу даражада билим ва санъаткорлик билан амалга оширилганки, бу холат достоннинг яхшилтигига путур етказмаган. Шоир достон матнига бирон-бир сўз кўшмаган, достон тилини таҳрир килмаган, балки ундаги мавжуд имкониятлардан миришкорлик билан фойдаланган, яъни узундан-узок монолог ва диалоглардан иборат шеърий матнларни саклаган. Нашрга тайёрловчи олти минг мисрага яқин матнни қисқартирган бўлса-да, достонни ўқиш давомида бу нарса деярли сезилмайди. Шунингдек, шоир нашрга каттагина сўз боши ёзиб, унинг тоявий-бадний хусусиятларини таҳлил этди. Достоннинг яратилган лигига 1000 йил тўлганлиги ҳақидаги дастлабки мuloхазалар ҳам Ҳамид Олимжонга тегишилдири. Шуннинг учун ҳам бу нашр маданиятимиз тарихида катта воеа бўлди ва халқ достонларини нашр этишдаги нжобий тажриба сифатида ўз ахамиятини хануз йўкотган эмас.

1957 – 1958 йилларда мархум Ҳамид Олимжон номидан достоннинг иккинчи ва учинчи нашрлари чоп этилди. Аммо бу нашрларда «асарнинг умумий сюжети ва асосий тоявий йўналиши билан органик боғлиқ бўлмаган, эксплататор синиф-мағуфрасининг таъсири остида бузилган ёки сунъий равища киритилган баъзи сўзлар, неборалар, асарнинг халқчилик асосига зид бўлган айрим тасодифий ходисалардан достонни тозалаш» баҳонасида Ҳамид Олимжон эришган ютукларга барҳам берилди, матнга тоқат килиб бўлмас даражада кўл урилди, достон тили

ўринисиз равища таҳрир килинди ва бу билан ғайрилмий йўл тутилди. Чунончидан достонда «Кўзи қуралтайдай бўлиб» деган жуда чиройли мисра бор. Бу мисра ўринисиз равища «Куралай кўзи чўедай бўлиб» тарзида «таҳрир» килинган. Бу билан достон тилдиага табиийликка зарар етказилган, кофия тизими бузилган (ойдай-тойдай-боидай-қуралтайдай, аммо чўедай эмас). Ёки «Бир камлани жорий қайтар, Коражон» мисраси «Бир сўз айтиб кўнглини кўтар, Коражон» тарзида бузил берилган. Ўринисиз қисқартишишлардан ташқари бундай ўзgartариш ва таҳрир килиш ҳолларин уч издан ошиб кетади. Шу рақамнинг ўзиёк, достон матнига канчалик кўл урилганлигини кўрсатиб турибди. Бу нарса ўз вактида илмий жамоатчиликнинг жицдий эътироозларига сабаб бўлган эди. Шунинг учун хам достоннинг энг муқаммал нусхаси бўлган Фозил Йўлдош ўғли вариантини тўла равища китобхонларга етказиш долзарб вазифа бўлиб келмоқда эди. Бу ишга камина ўзбек фольклоршуносигининг асосчиси, атоқли олим ва мурабабий Ходи Зариф (1905 – 1972) билан ҳамкорликда 1964 йилда киришган эди. Аммо унинг биринчи қисмини тугаллаш билан иш тўхтаб колди. Бунга 1968 йилдан «Булбул тароналари» (Тошкент, 1971 – 1973) беш жилдигини нашрга тайёрлашга кириниш ва устознинг вафоти сабаб бўлди. Кейинчалик камина ишин нихоя сига етказди ва у айрим қисқартишлар билан 1979 йилда «Ўзбек халқ ижоди» кўп жилдиги силсиласида нашр этилди. 1985 йилда қайта босилиб чиқди. 1987 йилда яна бироз қисқартирилган ҳолда «Мактаб кутубхонаси» сериясида чоп этилди. Унинг нисбатан тўла нашри 1992 – 1993 йилларда икки жилда амалга оширилди.

Хамид Олимжон нашри асосида шоир Л. М. Пеньковский достонни рус тилига таржима қилди. Бу таржима 1949 йилда Тошкент ва Москвада М. Шайхзода ва В. М. Жирмунскийлар сўз бошилари билан алоҳида-алоҳида китоблар тарзинда босилиб чиқди. Кейинчалик Л. М. Пеньковский достон таржимасини кайтадан кўриб чиқиб, бироз тўлдириди. Бу таржима Тошкент (1958, 1974), Москва (1958), Ленинград (1982) шахарларида қайта-қайта нашр этилди.

Достон вариантларини ёзиб олиш ишлари 30 – 40-йилларда хам давом эттирилди. Жумладан, 1937 йилда Юсуф Султонов Қўқоннинг Бешкапа қишлоғида яшовчичи Бўри бахшидан, 1938 йилда Шамси Муродов Қизилтепа тумани Кенагас қишлоғида яшовчи Сайдмурод Паноҳ ўғлидан, 1944 йилда Мансур Афзатов Нурота туманининг Қўтирил қишлоғида яшовчи Бекмурод Жўрабой ўғлидан достон вариантларини ёзиб олдилар. 1940 йилда Мунисхон Тошпўлатова қизилтепалик Сайдмурод Паноҳ ўғли вариантидан парчалар, 1945 йилда Қосим Муҳаммадов Шеробод туманининг Чигатой қишлоғида яшовчи Мардонакул Авлиёкул ўғли вариантининг иккинчи қисмини, Ходи Зариф шу вариантдан парчалар ёзиб олдилар. 1951 йилда Охунжон Собиров атоқли халқ достончиси Ислом шоир вариантининг мазмунини ёзиб олди. Бу ўринида шунин алоҳида таъкидлаш керакки, қизилтепалик Сайдмурод Паноҳ ўғли вариантини ёзиб олган Шамси Муродоб ўша пайтда ўн уч ёшда бўлган ва олтинчи синфда ўқиган. Буни ўзига хос жасорат деб баҳолаш мумкин. Афсуски, бу талантли йигитча Иккинчи жаҳон уруши жангоҳларида мардларча ҳалок бўлди. Шамси Муродов кўлёзмасини ушбу сатрлар муаллифи сўз боши билан нашрга тайёрлади ва у 1972 йилда «Одилхон» китоби таркибида чоп этилди.

«Алпомиш» достони нафакат оғзаки равища, балки Хамид Олимжон нашри орқали хам ҳалкимиз орасига кенг тарқалганлигига, мактаблар ва олий ўқув юртлари ўкув дастурлари хамда дарсликларидан муносиб ўрин олганлигига, унинг мотивлари асосида драмалар ва театр спектакллари яратилганлигига қарамай, А. Абдунабиеv ва А. Степанов каби «танқидчилар» хам топилдики, улар

1952 йилда «Правда Востока» газетаси ва «Звезда Востока» журналида эълон киған мақолаларида достонни халқка карши, реакцион асар сифатида баҳолади-лар. Шу йилнинг марта ойин охирида Ўзбекистон Фанлар академияси Тил ва адабиёт институти ҳамда Ёзувчилар уюшмасининг биргаликда ўтказган кенгаши ҳам достоннинг ғоявий мазмунини бузиб, уни «Конли урушларни кўкларга ўтказган зулмини дабдаба билан куйловчи, миллатчиликни тарфиб килувчи, халқка карши асар», – деб баҳолади. Шу тарика халқимизнинг бу севимли достони катли-ом қилинди, уни ўқиши, ўқитиш маън этилди.

Аммо соғдил, ҳақиқий фольклоршунослар бундай ғайри илмий баҳо билан келиша олмадилар. Ходи Зариф, Мансур Афзаловлар 1954 йилдаёк эпос масалаларига бағишилаб Москвада ўтказилган кенгашида сўзлаган нуткларида «Алпомиши» достони бадиий юксак халқчил асар эканлигини асосслаб, уни ўрганиш учун маҳсус илмий конференция ўтказиш зарурлигини таъкидладилар. Шундай конференция 1956 йилнинг сентябрьда Тошкентда ўтказилди. Конференцияда ва 1959 йилда «Об эпосе «Алпомыш» номи билан эълон килинган унинг материалларида достонга нисбатан ҳақиқий илмий баҳо берилди, уни ўрганиш ва нашр этишига йўл очилди. Натижада В. М. Жирмунскийнинг «Сказание об Алпомыше и богатырская сказка», ушбу сатрлар муаллифининг «Алпомиши» достонининг ўзбек варианatlари» монографиялари босилиб чиқди, достон бўйича номзодлик ва докторлик диссертациялари химоя килинди, янги вариантларини ёзиб олишга киришилди. 1954 йилда Фатхулла Абдуллаев Янгиқўрён тумани Фовозон кишлогоғида яшовчи Ҳайдар Бойча ўғлидан, 1955 йилда Зубайдада Ҳусаинова Китоб тумани Қайнарбулук кишлогоғида яшовчи Абдулла шоирдан, Зубайдада Ҳусаинова билан Музайяна Алавия шу туманининг Шотири кишлогоғида яшовчи Ҳамро Эргаш ўғлидан, Мансур Афзалов Шахрисабзда турувчи Зохир Кўчкор ўғлидан, 1956 йилда Охунжон Собиров Дехконобод тумани Корашина кишлогоғида турувчи Умир шоирдан, 1958 йилда А. Мирзаев Гуллистон тумани Кўйботган кишлогоғида турувчи Мурод Отабой ўғлидан, Мансур Афзалов Жарқўрён тумани Жалойир кишлогоғида яшовчи Мамадрайим бахшидан, 1960 йилда Малик Муродов Ниждувон тумани Зажаш кишлогоғида яшовчи Амин Малик ўғлидан, 1962 йилда Тўра Мирзаев Малик Муродов билан биргаликда Хатирчи тумани Ёнбош кишлогоғида яшовчи Эгамберди Олломурод ўғлидан, шу йили Тўра Мирзаев Тожикистоннинг Данғара тумани Кўшқия кишлогоғида яшовчи Ахмаджон Соиназар ўғлидан, М. Афзалов Т. Ашурев билан биргаликда Ҳазорасп тумани Курра кишлогоғида яшовчи Матназар Жаббор ўғлидан, 1963 йилда Тўра Мирзаев Тожикистоннинг Колхозобод тумани Пахтаорол кишлогоғида турувчи Бўрибай Ахмедовдан, 1964 йилда Малик Муродов Янгиқўрён тумани Ораарик кишлогоғида яшовчи Раззок Қозок ўғлидан достон вариантларини ёзиб олдилар. 1968 йилда атоқли шоир-қиссаҳон Рахматулла Юсуф ўғли ўз вариантини ёзиб топширди. Шунингдек, талантли достончи дехконободлик Кодир Раҳимовдан фольклоршунослар Абдумўмин Қаҳхоров ва Абдуолим Эргашев достоннинг иккинчи кисмини «Бева Барчин» номи билан ёзиб олдилар. Тўра Мирзаев 1962 йилда Янгиер тумани Кўшқанд кишлолик Исо Янгибай ўғлидан ва 1963 йилда Тожикистоннинг Данғара тумани Жорубқўл кишлогоғида яшовчи Тўла Ҳайбат ўғлидан достоннинг мазмунини ёзиб олди. 1959 йилда Темур Очилов Зомин тумани Карапчи кишлолик Ёрлакаб Бекназар ўғлидан достоннинг бош кисмнини ёзиб олган эди. Ушбу парчани мазкур сатрлар муаллифи «Ўзбекистон овози» газетасининг 1995 йил 30 сентябрь сонида эълон килди. Шу тарика кейинги 75 йил давомида достон вариантлари мамлакатмизнинг барча вилоятлари ҳамда ундан ташкаридаги

ўзбеклар яшайдиган ҳудудлардан ёзиб олинган. Бу вариантлар сюжет воқеалари жихатидан бир-бираға ўхшаса-да, уларнинг бадиий ифодаси турли-тумандир. Шунинг учун ҳам олимлар уларнинг ҳар бирини мустакил бадиий асар сифатида ўрганиб келмокдалар. Шу кунларда достонни кейинги авлод баҳшилари ҳам куйлаб келмокдаларки, бу нарса унинг жонли оғзаки ижро шаронтларида изчил яшаб келадигандан далолат беради.

Ушбу нашрга атоқли ҳалқ шоири Фозил Йўлдош ўғлидан ёзиб олинган «Алломиши» достони кўләзмаси асос бўлди. Кўләзма Ўзбекистон Республикаси Фанлар академияси Алишер Навоий номидаги Тил ва адабиёт институтининг фольклор архивида 18-инвентарь бирлигига сакланади. Кўләзма 946 сахифадан иборат. Коғоз бичими: 36Х23. Достон шеърий қисмининг ўзи 13715 мисрани ташкил этади. Кўләзманинг дастлабки сахифасида 1927 йил 14 июнь санаси кўрсатилган. Бошқа хеч қандай изоҳ ёки кўшимча маълумотлар кайд этилмаган. Достоннинг ёзиб олинишини ташкил этган Ҳоди Зарифнинг барча асарларида унинг қаламга олинишини ташкил этган Ҳоди Зарифнинг барча асарларида ташкил этган. Тахминимизча, достон кўләзмасининг 16-саҳифасигача бўлган қисми бизга номаълум бўлган шахс томонидан 1927 йилнинг 14 июнида ёзиб олинган. Шундан кейин нима сабабдандир уни ёзиб олиш иши тўхтаб қолган. 1928 йилда эса, достонни ёзиб олиш иши давом эттирилган. Ҳоди Зарифнинг оғзаки маълумотларига кўра, достонни унинг раҳбарлигига Махмуд Зарифов 1928 йилнинг ёз ойларида икки ой давомида Фозил шоирининг Булуңпур тумани Лойка кишлогоидаги уйида ёзиб олган.

Достонни нашрга тайёрлашда қўләзмадаги мати тўла равища сакланди. Факат фонетик жихатдангина (масалан, «Жўк» ўрнида «йўк» тарзида) адабий тилга якинлаштирилди. Шунда ҳам тасвир вазиятига алоҳида эътибор берилди ва асар бадиийлиги билан боғлиқ барча шева хусусиятлар саклаб қолинди. Матнда ти порнографик сўзлар ўрнига кўп нукта кўйилди.

Миллий ифтихоримиз бўлган «Алломиши» достонининг тўла равищада ҳалқи-мизга етказилиши маданий тараққиётимиздаги улкан воқеадир. Истиқлол ту-файли юзага келган кўпдан-кўп имкониятлардан бирининг фольклоршуносликлида ўзига хос равищада воқе бўлишиди.

Тўра МИРЗАЕВ,
филология фанлари доктори, профессор.

БИРИНЧИ ҚИСМ

Бурунги ўтган замонда, ўн олти уруғ Күнфиrot элида Добон-
бий деган ўтди. Добонбийдан Алпинбий деган ўғил фарзанд
пайдо бўлди. Алпинбийдан тағи икки ўғил пайдо бўлди: каттако-
нининг отини Бойбўри қўйди, кичкинасининг отини Бойсари
қўйди. Бойбўри билан Бойсари – иккови катта бўлди. Бойсари
бой эди, Бойбўри эса шой¹ эди, бул иккови ҳам фарзандсиз
бўлди.

Ана энди ўн олти уруғ Күнфиrot элида бир чуфурон² тўй
бўлди. Халойикларни, элатияларни тўйга хабар қилди. Шу тўйга
барча халойиклар йигилди. Бийлар ҳам тўйга келди. Тўйдаги
катталар илгаригидай иззат қилиб, қадимгидай отини ушламади.
Бийлар: «Мазмуни бу одамлар бизнинг келганимиздан беҳабар
қолди», – деб отини ўзи бойлаб, маърака-майлисга келиб ўтира
берди. Бийларнинг кўнглини хушламади, отини ушламади, ости-
га лиbos ташламади; ош тортди, сузган товокни чошламади; ош
тортганда, ошнинг кетини-кўтини тортди. Бу қилган хизматни
бийлар кўриб, илгари иззат кўриб юрган одамлар – бийлар
айти: – Бизлар ўн олти уруғ Күнфиrotнинг бойи ҳам шойи
бўлсан, бизлар келсан, отимизни ушлар эдинглар, кўнглимизни
хушлар эдинглар, остимизга лиbosни ташлар эдинглар, бу дафъа
биздан нима кўтохлик ўтди, бизни бундай беҳурмат қилдинглар.

Бу сўзни эшитиб, ўн олти уруғ Күнфиrot элида пайга бетдан
туриб бир чацанитоб бойбачаси айти: – Эй, Бойбўри билан

¹ Шоҳ.

² Чукбурон – хатна тўй.

Бойсари! Бул тўй ўғиллининг ўелидан кайтади, кизлининг кизидан кайтади, сенинг нимандан кайтади?! Ўзинг ўлсанг, молингга ҳар мероёхўр чиқади, оғзига одам кириб кетади. Сенинг бундан бу ёқдаги ейдиганинг ошнинг кети-қўти бўлади. Биз сенинг давлатингдан бўлиб оламиزمиси?!

Бийлар булардан бу гапни эшишиб, хафа бўлди. Хафа бўлиб, саксон тилла чуфуронга ташлаб, туриб кетди. Бориб чечиб минди бедов отди, иккови уйига етди. Иккови қилди маслаҳатди, бу сўз бу икковига жуда ботиб кетди. Бойбўри туриб айтди: — Бойсари ука, қариганда бизнинг молимиз бесоҳибга чиқди, энди бизлар бир фарзанд тарадди қилмаймизми? Бойсари туриб айтди: — Тортиб олиб бўлмаса, ўғирлаб олиб бўлмаса, сотиб олиб бўлмаса, худо бизга бермаса, қаёқдан қиласиз тарадди?! Бойбўри айтди: — Шу ердан Шоҳимардон пирнинг равзаси уч кунчилик йўл келар экан, ҳар ким бориб тунар экан: давлат талаб давлат тилар экан, фарзанд талаб фарзанд тилар экан, охират талаб имон тилар экан, қирқ кун тунаган киши муродига етиб кайтар экан. Биз ҳам борсак, нарзи-ниёзимизни берсак, Шоҳимардон пирнинг равзасини тунаб, биз ҳам бир фарзанд тилаб кўрсак.

Шунда бу гап бийларнинг икковига ҳам маъқул тушиб, бирбирига: «Рост айтасан», — деб нарзи-ниёзини олиб, бийлар иккови Шоҳимардол пирнинг равзасига қараб жўнамоқчи бўлиб, минди бедов отди, нарзи-ниёзини олиб, уч кун тинмай йўл тортиди. Уч кун йўл юриб, Шоҳимардон пирнинг равзасига етди, олиб борган нарзи-ниёзини шайхларга бериб, бийлар равзани тунаб ётди. Орадан бир кам қирқ кун ўтди, бир кам қирқ кун деганда, равзадан овоз келди: «Эй, Бойбўриман Бойсари, сен бир кам қирқ кундан бери тунаб ётибсан. Худонинг яратган шери мен бўлсам, бир кам қирқ кундан бери бир оёғим билан туриб, сизлар учун орага тушиб, яратган худоларингдан фарзанд тилайман, яратган худоларинг фарзанд бермайман, деди». Бийлар бу овозни эшишиб: «Бизлар бир кам қирқ кундан бери келиб, сизни тунаб ётсан, худонинг яратган шери сиз бўлсангиз, бизлар учун орага тушиб, бирор фарзанд тилаб олиб бермасангиз, бизга пирлигингиз ёлғон, худога шерлигингиз ёлғон. Бор, ундан бўлса, биз ҳам дунёнинг баҳридан ўтдик», — деб таппа тушиб, равзада турбатнинг остида ётди. Қирқ кун ўртадан аниқ ўтди, боз равзадан овоз келди: «Бойбўри, сенга худойим бир ўғил, бир қиз берди, ёлғиз эмас, эгиз берди; Бойсари, сенга худойим бир қиз берди, эгиз эмас, ёлғиз берди. Бундан борсанг, фарзандларни кўрсанг, ҳалойиқларни юйсанг, тўй-томошалар берсанг, тўйда қаландар бўлиб бориб, болаларингнинг отини ўзим қўйиб кела-ман».

Бу сўзни эшишиб, бийларнинг жуда вақти хуш бўлиб, «тилаганимиз қабул бўлди», — деб кўнгли тўлиб, минди бедов отди,

кистаб мазгилига қараб йўл тортди. Вакти хушлиги билан уч кечакундуз ўйл юриб, Бойсин-Қўнгирот элатига етди. Вакти хушлигига халойикни, элни йиғиб, қирқ кечаю кирқ кундуз тўй-томуша бериб ётди. Ана шунда орадан кирқ кечаю кундуз ўтди, тўй тарқаб, ҳар ким ўз мазгилига қараб кетди, қолган меҳмонлар ётди. Меҳмонларни ётқизиб, бийлар уйига қараб қайтди. Уйларига етса, бойбичалар тўшакни соп қўйибди. Бийлар чечиниб, дирдай-кирдай бўп, кўрнага кириб кетди; бойбичалар уни-буни зласлаб, иш қилиб, ўчоқнинг мўрисида айналиб турибди. Бийлар ҳар қайсилари ўз тўшагида, ўз уйларida хотинларига қараб: — Кел-чи, — деяпти, бойбичалари: — Кун совук, қўй-чи, — деяпти... Шунда бийлар қўлини узатди, бойбичаларнинг кўлидан ушлаб, шундай бағрига тортди, булар ҳам чечиниб кўрпага кириб кетди. Кўринг дарвешди, ёди кулочди, бийлар билан бойбичалар топишиди...

Шўйтуб булар ҳам ҳомиладор бўлиб қолди. Ойдан ой, кундан кун ўтиб, тўққиз ой, тўққиз кун, тўққиз соат орадан ўтиб қолди. Бойбичаларнинг ойи-куни яқин етди, бийлар иккови айтди: «Бизлар ҳам бир шоҳлик шавкатини қилсан, овга чиқиб кетсан, фарзандлар ер юзига тушса, суюнчи, деб бир нечалар олдимизга йўлга чиқиб, бизлардан тилла-танга инъом олса», — деб ўйларни йўлаб, бийлар овга жўнаб кетди.

Бойбичаларга шунда тўлғоқ вакти яқин етди; не кампирлар келиб, бойбичани айланиб, тулкини инлатган тозидай бўлиб, бойбичаларни ангниб, ўртага олиб турибди. Бийлар шул вактда овдан қайтди; бу ёқдан шул вактда фарзандлар ер юзига тушди. Бир нечалар бийларнинг олдига чиқиб, суюнчи олди. Бийлар зиёда вакти хуш бўлиб, мазгилига келиб жой олиб, вакти хушлигидан ҳар тарафга хабар юбориб, халойикларни чақириб, тўй-томуша қилмоқчи бўлиб, чоғланиб, созланниб, ўн олти уруғ Кўнгирот элининг катта-кичик бийларини, оқсоқол, арбобларини ийғидириб, тўй қиласиз, деб маслаҳат қилди. Ҳамма мамлакатга овоза бўлиб, элининг, юртининг катта-кичиклари қуллук бўлсинга келиб, дўстлар шодмон бўлиб, душманлар ғамгин бўлиб, ғамгин бўлса ҳам, иложини тополмай, ҳеч кимга (юрагини) ёролмай, булар ҳам қуллук бўлсинга кела берди. Ўн олти уруғ Кўнгирот уруғининг одамлари, эшитган халойиклар гурос-гурос бўлиб кела берди. Шунда катта-кичиклар келиб, бийларнинг оғиздан тўй қиласиз, деганини эштиб, тўйнинг асбобларини тузатиб, қанча сўқим моллар сўйиб, ош-паловларни дамлаб, фукаро, бева-бечоралар тўйиб, шу ажносда ўн олти уруғ Кўнгиротнинг одамбори тўйни қилиб, ҳаммалари жам бўлиб, қирқ кечаю кундуз тўй бериб ётди.

Кирқ кечаю кирқ кундуз бўлгандан кай¹ тўй тарқайдиган

¹ Кейин.

куни бўлди. Бир вақт шунда бийлар қараса, узокдан бир қаландар кўриниб кела берди. Бийларнинг эсига (тушди): Равзада «Қаландар бўлиб бориб, ўзим отини кўйиб келаман», деган овозни эшигтан эди. Шундай қараса, яхши нурли бир қаландар маст бўлиб, қаландардай бўлиб, шул мажлисга қараб кела берди. Халойиқлар ҳам кўрди: тарзи гул юзли, ширин сўзли, бир сиёsatли киши қаландар бўлиб келаётir, ўзга кишиларга бу қаландарнинг ҳоли-ахволи маълум эмас. Равзадаги сўзлаган овозни эшигтан сабабли Шоҳимардон пирим шул киши бўлмаса, — деб бийлар ўрнидан туриб, олдига пешвоз чиқиб, салом бериб, зиёрат қилиб, мажлисxonага бошлаб олиб келди. Шунда фарзаандларнинг учовини ҳам олиб келиб, Шоҳимардон пирининг этагига солди. Шоҳимардон пири Бойбўрининг ўғлининг отини Ҳакимбек кўйди, ўнг кифтига беш қўлини урди. Беш қўлини ўрни дор бўлиб, беш панжанинг ўрни билиниб қолди. Қизининг отини Қалдириҷоийим кўйди. Бойсарининг қизининг отини ой Барчин кўйди. Ана шунда Шоҳимардон пири Ҳакимбекка ой Барчинни аташтириб, бешкирти қилиб: «Бу иккови эр-хотин бўлсин, Ҳакимбек билан ҳеч бир киши баробар бўлолмасин, омин оллоҳу акбар», — деб фотиҳани бетига тортди. Шоҳимардон пири туриб жўнаб кетди, одамларнинг кўзидан фойиб бўлиб кетди. Шу ерда ўтирган халойиқлар: «Бийларга худо берган экан, пирининг дусосин олган экан», — деб гаплашиб қолди. Балки шу ерда ўтирган катта-кичикларнинг ҳам меҳри қадимгидан зиёда бўлди. Ана шўйтиб, бийларнинг тўйлари ҳам тарқаб кетди. Ҳамма юртдан, элдан келган одамлар ҳам кетди, ўз мазгилига етди. Бийларнинг ўз-ўзлари, ўзига қараганлари қолди.

Шунда болалар кундан-кун ўтиб, ойдан-ой ўтиб, бирдан иккига кириб, иккidan учга кириб, буларнинг тили чиқиб, элга эниб, тили чиққандан кай, элга энгандан кай, тутиб учовини ҳам мактабга қўйди. Булар мактабда ўқиб юриб етти ёшга кирди. Бурро¹ саводи чиқиб, хат ўқиб-ёзадиган мулла бўлди. Шунда Бойбўрибий: «Энди ўғлим саводи чиқиб, мулла бўлди, ўғлимга энди шоҳлик, сипоҳилик илмини ўргатайин», — деб мулладан чиқариб олди. Бойсари ҳам Бойбўрига таассуб (қилди)². Бул ҳам ой Барчин қизини мактабдан чиқариб олди. Чиқариб олиб, «Кизимга Кўкқамиш кўлида кўй соғдириб, чорвадорлик илмини ўргатайин, кўй соғмоққа уста бўлсин», — деди.

Шунда Ҳакимбек етти ёшига кирган. Алпинбий бобосидан колган ўн тўрт ботмон биричдан бўлган парли ёйи бор эди. Ана шунда Ҳакимбек шул ўн тўрт ботмон ёйни кўлига ушлаб, етти яшар бола кўтариб тортди, тортиб кўйиб юборди. Ёйнинг ўкияшиндай бўлиб кетди. Аскар тоғининг катта чўққиларини юлиб

¹ Ҳошияда бурро сўзидан кейин саводхон сўзи кўшиб кўйилган.

² Қўлэзмада солди.

ўтди, овозаси оламга кетди. Буни эшитган душманлар: «Бу бола зўр бўпти, назар топибди, буларга ҳеч ким баробар бўлолмайди, етти яшар бола шундай ишни қилами?» — деб хафа бўлиб ётди. Дўстларинг вакти хуш бўлиб юрди. Шунда барча халойиклар йиғилиб келиб айтди: «Дунёдан бир кам тўқсон алп ўтди, алпнинг бошлиғи Рустами Достон эди, охири бу Алпомиш алп бўлсин. Тўқсон алпнинг бири бўлиб санага ўтди», — деди. Охири Алпомишбек алп бўлиб, тўқсон алпнинг бири бўлиб сана-га ўтиб, алплик отини кўтариб, етти ёшида Алпомиш от қўйилди. Ана шундай бўлиб, бу ердаги одамлар ҳам тарқаб кетди, ҳар ким ўз мазгилига етди.

Кунлардан бир кун Ҳакимбек китоб ўқиб ўтириб, баҳилдан, сахийдан гап чиқиб қолди. Бойбўрибий шунда ўғли Алпомишдан: — Киши нимадан баҳил бўлади, нимадан сахий бўлади? — деб сўради. Унта ўғли туриб айтди: — Вакти-бевақт бирорвоннига меҳмон келса, отини ушлаб, жоий бор бўлса, кўнглини хушлаб жўнатса, бул ҳам сахий; агар жоии бор туриб, жой иўқ, деб кўндирамай жўнатса, бул одам баҳил. Вакт-бевақт киши бир мозоротнинг қабатидан ўтса, чап оёғини узангидан чиқариб, мозордаги одамларнинг ҳақига дуо қилиб ўтса, бул ҳам сахий, агар ҳар ким мозордан ўтганда, чап оёғини узангидан чиқармай, мозоротнинг ҳақига дуо қилмай ўтса, бул ҳам баҳил. Кишининг моли закотга етса, закот берса, бул ҳам сахий экан. Агар закот бермаса, бул ҳам баҳил экан. Бу сўзни Бойбўрибий Ҳакимбекдан эшитиб, фикр килиб: «Мен ўн олти уруғ Кўнғирот элининг ҳам бойи бўлсам, ҳам шоий бўлсам, мен кимга закот бераман. Менинг давлатимда ёлғиз иним Бойсари баҳилликка чиқиб кетмасин», — деб, ўз кўнглида: «Бойсарибий укам менга закот берса керак экан», — деб ўйлади. Ўйлаб: — Бойсарига боринглар, Бойсари ўзи розичилиги билан бир чичқоқ улоқни закот деб менга берсин, закот ўрнига ўтар-да, Бойсари баҳил бўлиб, баҳилликка чиқиб кетмасин, — деб ўн тўрт маҳрамни буюрди.

Бойсарибий ўн минг уйли Кўнғирот эли билан кўчиб бориб, Кўкқамиш кулида элибойлик қилиб, молларини семиртириб, яйловда яйлаб етиб эди. Ўн минг уйли Кўнғирот элининг соп — деган бойбаччалари билан йиғилиб, бир ерга жамъ бўлиб, бир баҳмал ўтовни тикиб, шул ўтовнинг ичидаги ҳамма бойбаччалар билан қимиз ичиб, шағал маст бўлиб, ўз кайфу сафоси билан ўтириб эди. Ана шунда (отининг бўйнига) тилла кутос тақилган ўн тўрт маҳрам Бойбўридан Бойсарини сўраб бориб қолди. Шундаги бойбаччалар буларнинг келганини кўриб-билиб, эшикка чиқиб, маҳрамларнинг отини ушлаб қолди. Маҳрамларни ичкарига олиб кирди. Бойсарибий буларга жой кўрсатди. Маҳрамлар келиб жавоб-савол қилиб ўтириди. Бойсарибий булардан ўйл бўлсин қилиб, савол сўради. Маҳрамлар саволга жавоб бериб айтди:

— Биз акангдан келган закотчи бўламиз, бугун бизлар сенинг молингни закот қиласиз. «Закот қилинглар, берса, закотини олиб келинглар», деб юборган, — деди. Бу сўзни маҳрамлардан Бойсари эшитиб, кўнглига оғир олиб айтди: — Эй, бизнинг молимиз шу вақтгача закот бўлмаган, энди акамиз ўғилли киши бўлиб, дарров бизнинг молимизни закот қиласиган бўлибди-да! Закот деган гапни эшитиб, бу гап ботиб кетиб, олдидаги ўзининг одамларига буюрди: — Ушла, бачча гарларни, — деди. Бойбаччалар маҳрамларни битта-битта ушлаб қолди. Еттовининг қорнига қозик қоқиб ўлдирди. У еттовининг қулок, бурнини кесиб, ўзларига егизиб, отига чаппа мингизиб, отнинг устига тортиб бойлаб: «Мана буни закот деб айтади», — деб Кўнгиrot тарафига қараб ҳайдаб юборди.

Шунчалик ишни қилса ҳам Бойсарибийга закот деган гап ниҳоятда ўтиб кетган экан: — Энди бизнинг ўз элимизда сиғинди бўлиб, ўз акамизга ўзимиз закот бериб (юрадиган бўлсан), бул элда бизнинг турнилигимиз қолмади, — деб ўн минг уйли Кўнгиrot элига қараб: — Эндиғи маслаҳат нима бўлди? — деб сўраб, бир сўз деб турган ери экан. Бойсари сўзи:

Ох урганда кўздан оқар селоб ёш,
Маслаҳат бер, ўн минг уйли қариндош,
Барчинойим бўй етгандир қаламқош,
Золим билан ҳаргиз бўлманглар йўлдош,
Кўнгиrot элдан молга закот келиби,
Маслаҳат бер, ўн минг уйли қариндош!
Курсин Ҳакимбеги мулла бўлиби,
Безакот молларни ҳаром билиби,
Кўнгиrot элдан молга закот келиби,
Маслаҳат бер, ўн минг уйли қариндош.
Дардли кўл дардимни кимга ёраман,
Айролик ўтига бағри пораман,
Муна элда сиғинди бўп тураман,
Ўз акамга қандай закот бераман?
Маслаҳат бер, ўн минг уйли қариндош!
Хазон бўлиб боғда гуллар сўлиби,
Шум фалак бошима савдо солиби,
Бойбўридан молга закот келиби,
Маслаҳат бер, ўн минг уйли қариндош!
Худо дейин, яратганга жилайин,
Ўз акама қандай закот берайин,
Бошқа юртда жузъя бериб юрайин,
Маслаҳат бер, ўн минг уйли қариндош!
Бойбўридан бизга маҳрам келиби,
Закот дебди, бир бидаҳат килиби.

Муна элда мен ҳам бекман, тўраман,
Хар на қисмат ёзилгандан биламан,
Азалий тақдирға нима иш қиламан,
Ўз акама қандай закот бераман?
Ўз акама ўзим закот бергунча,
Калмоқ бориб жузъя бериб юраман.
Маслаҳат бер, ўн минг уйли қариндош!
Худой дейик, яратганга жилайик,
Яратган раҳмондан мақсад тилайик,
Омин деса фариштаю малойик,
Катта-кичик, турган энди халойик,
Ўз акама қандай закот берайик.
Сен эшигтан Бойсарининг тилини,
Акам бизга миннат қилди улини¹,
Сабил килиб кетай Бойсин элини,
Маслаҳат бер, ўн минг уйли қариндош!
Жафо тиги бугун жондан ўтади,
Бойбўрининг сўзи бизни ўртади,
Закотчилар жабр кўриб кетади,
Маслаҳат бер, ўн минг уйли қариндош!
Закот деган бир шумликни килибди,
Бойбўридан ўн тўрт махрам келибди,
Закот деган гапни маълум қилибди.
Устима кийганим яшил-кўк эди,
Бундай сўзлар илгарида йўқ эди,
Бойбўридан бундай сўзлар кеп эди,
Маслаҳат бер, ўн минг уйли қариндош!
Закот деган бул элларда йўқ эди.

Ана шунда Бойсарий бу сўзларни айтди. Шу турган ха-
лоинқлардан ҳеч бир сазо чиқмади. Шу мажлисида бир Яртибой
оқсоқол дегани бор эди. Мажлисли кун бўлса, тўрдан жой тег-
май, пиёладан чой тегмай, бўсағаининг олдида ковушга жой бер-
май, ковуш билан аралашиб, ит йиқилиш бўлиб, пойга бетда ётар
эди. Тўрда ўтирган каттаман деб юрганларнинг ҳеч бир кайсиси-
дан гап, сазо чиқмагандан кай, пойга бетдан Яртибой ўрнидан
туриб, маслаҳат шул-да, — деб Бойсарининг сўзига жавоб бериб,
Бойсарига қараб, бир сўз деб турибди. Яртибой сўзи:

Маслаҳат бермаймиз Бойсарийга,
Осилмаймиз Бойбўрининг дорига,
Биринг ака, биринг ука, Бойсари,
Маслаҳатни, шоҳим, ўзинг биласан.

¹ Улини.

Худо дейик, яратганга жилайик,
Нор кесар олмосни белга чолайик,
Шохим, сизга не маслаҳат берайик?!
Лодон қүнглинг ҳар ҳаёлга бўласан,
Муна элда ўзинг улуғ, тўрасан.
Ҳар на қиласанг, шохим, ўзинг биласан.
Маслаҳат деб ўзинг хафа бўласан,
Ҳар на гапни, шохим, ўзинг биласан.
Бойсаридан элга закот келибди,
Бу гап сенга қаттиқ савдо бўлибди,
Яртибой дер шундай жавоб берибди,
Одамлар қўнглига оғир олибди,
Закот деган гапи ўсал бўлибди.
Маслаҳатни, шохим, ўзинг биласан,
Бу тургандан сўраб нима қиласан,
Биринг ака, биринг ука, Бойсари,
Нима бўлса биздан яхши биласан.
Сен эшитгин Яртибой нолишини,
Кўздан тўкма бунда селоб ёшини,
Йигибсан олдингга қанча кишини,
Билолмадик Бойбўрининг ишини.
Маслаҳатни, шохим, ўзинг биласан.
Биз ҳам бу гапларни оғир оламиз,
Оғир олган билан нима қиласамиз,
Шохим, сизга не маслаҳат берамиз?!
Фам билан сарғайиб гулдайин дийдор,
Бир нечалар ўз ҳолидан бехабар,
Жавоб беролмайин катта-кичиклар,
Сўз айтиб турганни Яртибой дерлар,
Аввал биздан сўз сўрамоқ не даркор?!
Жавоб беролмайди турган одамлар,
Нима десанг, ўзингдадир ихтиёр,
Маслаҳатни, шохим, ўзинг биласан.
Биз билмаймиз Бойбўрининг ишини,
Маслаҳатга йигиб шунча кишини,
Ким маслаҳат берса кесар бошини,
Маслаҳат бермаймиз Бойсарибойга,
Осилмаймиз Бойбўрининг дорига.
Қасд айласа билмагани билдирап,
Дўст йиғлатиб, душманини кулдирап,
Ким маслаҳат берса тайин ўлдирап,
Қизил гулин хазон қилиб сўлдирап,
Ханжар чекиб кора бағрин тилдирап,
Ажал етса паймонасин тўлдирап,
Маслаҳатни билса тайин ўлдирап,
Ҳар на десанг, ўзингдадир ихтиёр.

Бойсарибий Яртибайдан бу сўэни эшитиб, тагин ўзи бу турган одамларга қараб, бир сўз деди. Бойсарининг иккинчи сўзи:

Кулоқ солинг Бойсарининг тилига,
Кўчидай кетай мен ҳам Кашал элига.
Давлат кўнса бир чибининг бошига,
Сўмурғ қушлар салом берар қошига,
Банда кўнар тангри қилган ишига,
Кулок солинг Бойсари нолишига,
Қалмоқ бориб, кўнсанам Чилбир дашига.
Калма шаҳодат мусурмоннинг тилига,
Азамат бош берар диннинг йўлига,
Туарим йўқ Бойсун-Кўнғирот элига.
Ўз элим деб яна бунда турганча,
Ўз акама ўзим закот берганча,
Ўз акамдан бундоқ хўрлик кўрганча,
Қалмоқ бориб жузъя берсам бўлмайми?
Фарид бўлиб кўздан ёшним тизилди,
Дийда гирён бўлиб бағрим эзилди,
Ичим куйиб, юрак-бағрим эзилди,
Закот дейди, менинг кўнглим бузилди.
Бойсари дер билмаганим билдириди,
Дўст йиғлатиб, душманини кулдириди,
Закот деган гапни акам чиқариб,
Менинг тоза улсизлигим билдириди.
Ўз акама қандай закот берайин,
Ўз акама ўзим закот берганча,
Бошка юртда сифинди бўп юрайин,
Қалмоқ борсам, жузъя бериб кўрайин.
Закот деса мен ёнаман, учаман,
Закотни бермайман, Кашал кўчаман.
Аввал олло, дуюм наби бўлса ёр,
Кариндошлар, менда бўлса ихтиёр,
Қалмоқ элга кўчидай кетмагим даркор.
Билдингларми менинг қаттиқ кунимни,
Бий оғамдан кўрдим қаттиқ зулмни,
Сабил қилиб кетай Бойсин элимни.
Кўплик қилса бунда ~~турмай~~ кетайин,
Мусофирилик юртда қонлар ютайин,
Ўз акама мен сифинди бўлганча,
Бу ўлкадан бошимни олиб кетайин.
Танҳо ёйлаб қолсин ~~Кўнғирот~~ элига,
Мен борайин қалмоқларнинг кўлига.
Бу охимни бир оллога еткариб,
Мусофирилик юртда умрим ўткариб,
Акам қўйди менга зулм ўткариб,

Мен кетайин бундан бошимни олиб,
Үртәнган ўтларга жонимни солиб,
Улсизман-да, кетай Қалмоқ ~~јөртүн~~-ахтариб,
Мусофирилик юртда куним ўткариб.
Мен кетайин ўз бошимни қуткариб.
Танхो даврон суриб Бойсин элига,
Мени солди айроликнинг хилига,
Кун кўрарман бориб қалмок қўлига.
Хазон бўлса боғда гуллар сўлмайми,
Ўз элимда сиринди бўп юргунча,
Бўлак юртда қун ўтказиб бўлмайми?!
Жаҳонни сайил¹ этсам, юриб кўрарман,
Ўз акама ўзим закот берганча,
Қалмоқ бориб жузъя бериб юрарман.
Аскар төғнинг бошин чалгандир туман,
Энди менинг бунда турмогим гумон,
Қалмоқ элга мен кетарман бул замон.
Кариндошлар, эшит айтган сўзимни,
Ёш тўлдириб бунда икки кўзимни,
Улсизлигим акам бунда билдириб,
Акам таъна қилди менинг қизимни.

Бойсаридан бу сўзни Яртибой эшитиб, Яртибой ҳам Бойсари-
бийга қараб, бир сўз деди. Яртибой оқсоқолнинг иккинчи сўзи:

Ушбу дамнинг дамларини дам дема,
Бошинг эсон, давлатингни кам дема,
Сен кетар бўлсанг Қалмоқ юртига,
Бул элатни қолар деб ҳам ғам ема,
Қайда кўчсанг, бизлар бирга борамиз,
Қайда борсанг, сенинг билан бўламиз,
Қайси элга борсанг, бирга юрамиз,
Жаҳонни сайл этиб ўйнаб-куламиз,
Болаларни жаҳонгашта қиламиз,
Қайда борсанг, бирга-бирга борамиз,
То ўлганча сизинг билан бўламиз,
Бойбўрини бизлар нима қиламиз.
Ҳамма ҳам сендайин кўзини ёшлаб,
Закот деб чиқарди бир ишни бошлаб,
Қайси элга борсанг, юргин сен бошлаб,
Кетармиз Бойсинни буларга ташлаб,
Бойбўрибий қолсин кўнглини хушлаб.
Айролик ўтига бағри порамиз,



Кайда кўчсанг, бирга-бирга борамиз,
Кандай бўлсанг, биз ҳам шундай бўламиз,
Қалмоқ борсанг, юра бергин, борамиз.
Хазон бўлиб боғда гуллар сўлади,
Бунда колган одам тайин ўлади,
Феъли костиб закот деб ҳам турибди,
Колганинг молини тортиб олади,
Бул Бойбўри ажаб ишни қиласди,
Бул элат сенинг билан бўлади,
Кайда борсанг, бирга-бирга боради.
Кайда борсанг, бирга кўчиб борамиз,
Ҳар на қисмат ёзилганин кўрамиз,
Қалмокинг юртида бирга юрамиз,
Фам емагин бирга-бирга борамиз.
Бойбўрининг бунда кўнглини хушлаб,
Кўнғирот юртини ўзига ташлаб,
Кетар бўлсанг, юра бергин йўл бошлаб,
Кўчар бўлсангт, кўча бер ~~иғлини~~ хушлаб.
Ўн минг уйли элат бирга борамиз,
Сен ~~ниш~~ бўлсанг, биз ҳам шундай бўламиз.
Яратган раҳмондан мақсад тилайик,
Омин деса фариштаю малойик,
Кайда кўчсанг, биз ҳам бирга борайик,
Элдан элни хўб бир юриб кўрайик,
Бундан туриб энди бирга жўнайик,
Кўнғирот элни Бойбўрига берайик,
Элдан элни бизлар кезиб кўрайик,
Ҳар юртларда мусофир бўп юрайик,
Бизлар сенга хизматкор бўп турайик,
Кайда борсанг, бирга-бирга борайик,
Ўн минг уйли элат бирга жўнайик,
Кўнғиротни биз бўшатиб берайик.
Оҳ тортиб, инграбиб Бойсари шунқор,
Бойбўридан кўнгли оғриб одамлар,
Ўн минг уйли элат сенга хизматкор,
Қалмоқ кетсанг, бирга борар бул эллар.
Бундан барча бизлар бирга борамиз,
Қалмокнинг даврида даврон сурамиз,
Қалмоқ элда жайлов олиб юрамиз,
Курсин Бойбўрини нима қиласми?
Сен эшигтгин Яртибой нолишини,
Ёлбориб худога солди ишини,
Эргаштиргин бундан қанча кишини,
Ёмон билдик Бойбўрининг ишини.
Бирга кўчсак, бирга-бирга борамиз,
Сен қаерда бўлсанг, шунда бўламиз.

Яртибой оқсоқол бу сүзни айтди. Яртибой оқсоқолнинг айтган сўзи ўн минг уйли Кўнғирот элининг катта-кичигининг барига маъкул тушди. Ҳаммаси: — Яртибой оқсоқол рост айтади, — деди, — Бойбўрининг феъли кетди, ўн инисини билмади, Бойсари гига закот солди, бу ўз инисидан закот олса, бизлардан тортиб олса ҳам олади, бунинг феъли қайтгани маълум бўлди. Бойсари кўчиб кетса, бизларни сира қўймайди, тортиб олса ҳам закотни олади; энди Бойсари кўчса, бизлар ҳам кўчиб кетайик, Бойсари ўлиқ ерда — ўлик, тирик бўлса — тирик; энди Бойсин-Кўнғирот юртини Бойбўрига бўшатиб берайик, Бойсин-Кўнғирот юртини бир ўзи ёйлаб олсин, — деди.

Ўн олти уруғ Кўнғирот элидан ўн минг уйли экин экмоқни билмайдиган элибойлар айрилиб, Бойсарига қўшилди. Булар ҳаммаси бой, қўйли, туяли, молининг сони йўқ эди; буларнинг ичидан моли йўқ деган камбағалининг қирқ минг туси бор, қўйининг сони ададсиз, ўзлари ҳам билмас эди. Ўра-ўра, бир кўра, икки кўра, ўн кўра қўй, деб санагани шул эди. Йилки, молларини бир уюр фалон тўқайда юрибди, икки уюр фалон тўқай ерда юрибди, дер эди. Сонини санамоқни ҳеч қайсиси билмас эди. Булар қишдан ёзга экин экмай, мол бойлик қиласи эди. Шунинг билан овқатларини ўтказар эди. Бойсарибойнинг йилқисининг сони шул эди: тўқсон тўқай йилқиси бор эди. Тўқсон тўқай дегани йилқиси ҳар ерларда, тўқайларда, тоғларнинг дарасида, тўқайли ерларда ёйлаб юрас эди. Тўқайларда йилқиси ёйилиб юргани учун Бойсарибойнинг тўқсон тўқай йилқиси бор, дер эди. Лекин йилқисининг, молининг сонини ҳеч билмас эди. Шул ўн минг уйли Бойсин-Кўнғирот элининг ҳаммаси ҳам бой эди. Моли кўп эди.

Буларнинг ҳаммаси Бойбўрининг Бойсарига закот бер деганини эшишиб, бу бойларга бу иш жуда оғир келди. «Энди Бойсари кўчса, биз ҳам кўчамиз», — деб ҳаммаси чўпонларига, йилқичиларига, туячиларига, ҳамма даҳмардаларига кўчамиз, деб одам буюрди. «Бу ердан, бу Бойсин яловидан, бу тўқайлардан, бу яловлардан қўйларингни, туяларингни, йилқиларингни — ҳаммасини ҳайданглар. Қалмоқ юртига, Кашал элига қараб йўл бошлаб юра берсин», — деб хабар юборди. Ҳаммаси Бойсун-Кўнғирот элини ташлаб, ўзлари Бойбўрига бериб кетмоқчи бўлиб, ҳаммалари маслаҳат қилиб, Кашал элига қараб, Қалмоқ юртига жўнаб кетмоқчи бўлиб, добирлашиб, кўчиб кетмоқчи бўлиб, ҳаммаси бирдан — катта-кичик, ёш-қари — бари бир-бирига хабар қилиб, кўча бер, деб вағир-шагир қилиб, уйларни бузиб, туяларга ортиб, аёллари ҳам ўз юки-ёбини бўғиб, бўғчабўйларини чоғлаб, туяларга ортиб, тўполон бўлиб, шовқин-фаларул бўлиб қолди. Ўн минг уйли Кўнғирот талотўп бўлиб, ҳаммаси Кашал элига, Қалмоқ юртига қараб, ҳа, деб кўча берди Молларни, қўйларни, йилқиларни, туяларни — ҳаммасини ўз одамларига.

га ҳайдаттириб, жүнатиб юбора берди. Ана шунда ўн минг уйли Күнғирот эли Бойсарий бошлиқ – ҳаммаси юки-ёбини, тангатиллаларини, хазина-дафиналарини ҳам түяларга юклаб, ортиб жүнай берди. Ҳаммаси бирдан күчіб, қаққайиб, ўн минг уйли эл Бойбўридан араз уриб, Қалмоқ юртига, Кашал элига қараб, Бойсин-Күнғирот элини ташлаб, Бойсари билан бирга кўчиб жүнай берди. Аёлларига ҳам яхши отларни олиб келиб тортди. Бу аёллар – хотинлар ҳам отларни миниб, чоғланиб, булар ҳам жўнамоқчи бўлиб, Барчинойга, энасига қараб турди.

Ана шунда Барчинойнинг энаси Барчинойни ҳам жўнатмоқчи бўлиб, Барчиной учун бир тўруқ йўрга отни табладан олиб келиб, узангилари тилладан, айиллари ҳам тилладан, ҳамма ассобларини яхши созлаб, эгарлаб, устига тилла жабдуқлардан солиб, айил-пуштанларини тортиб, устига майнин, тоза, мулоим баҳмал парқувлардан солиб, тилла юганларни бошига солиб, жуда отни чоқлаб, отнинг жиловидан энаси ушлаб, олиб келди. Ана шунда Барчиной энасининг бул отни етаклаб олиб келганини кўриб, Барчиной шундай қараса, ўн минг уйли кўнғирот элиниң ҳаммаси кўчиб, талотўп бўлиб, шовқин қилиб, жўнаб кетиб бораётиди. – Бу нима гап, нима учун кўчиб бораётиди, менга нимага бу отни олиб келдингиз? – деб энасига қараб, Барчиной бир сўз деб турибди:

Абзаллаб келтирдинг ҳайвон тўрингди,
Бул кўчишинг, эна, менинг шўримди(р),
Бой отамман бий бобома не бўлди?
Ўйилмай куймасин кулбаи хонам,
Ох уриб йифлади мендайин санам,
Қалмоқда қолар-да гулдайин танам.
Хўжа келса чиқар мурид назири,
Хотин бўлмасмикан эрнинг вазири?!
Эр деганнинг ақлин олмас бўлурми,
Алдаб-сулдаб йўлга солмас бўлурми,
Бой отамман бий бобома не бўлди?
Эна, эшит, менинг айтган сўзимни,
Заъфарондай сўлдирмагин юзимни,
Қалмоқ бориб кўлдан берма қизингни,
Бой отамман бий бобома не бўлди?
Худойим сақлагай бандани омон,
Тушиб бошимизга қайгули туман,
От абзаллаб олиб келдинг, энажон,
Яна қайтиб элни кўрмагим гумон.
Йифлатдинг, энажон, мендай санамни,
Келиб кўролмайман мактаб жўрамни.
Бунда турмай, Қалмоқ элга борарсан,
Қалмоқлардан кўп зулмни кўрарсан,

Бориб сүнгра күп пушаймон қиласан.
Яна баҳор бўлса очилар гуллар,
Гулни кўрса, маст бўп сайрап булбуллар,
Мунгайиб йиглайди мендай гажакдор,
Кўп жафони солар бизга қалмоқлар.
Бой отамман бий бобома не бўлди,
Насиҳат қилмабсан, эна, муштипар.

Ана энди Барчинойнинг энаси Барчинойдан бу сўзни эшитиб,
Барчинойга тасалли бериб, Барчинойга караб, насиҳат бериб,
бир сўз деди:

На сабабдан, болам, кўнглинг бўласан,
Жаҳонни сайл этиб ўйнаб-куласан,
Яхши, ёмон элни юриб кўрасан,
Ахир бир кун Бойсин элга келасан,
Мактаб жўранг билан ўйнаб-куласан.
Кўп яшагин, кўп йилгача ўлмагин,
Лодон кўнглинг ҳар хаёлга бўлмагин,
Мунгайиб энангни хафа қилмагин.
Аввало олло, дуюм наби бўлса ёр,
Кўнглингни бўлмагин, болам, муштипар,
Хадди борми зулм қилиб қалмоқлар,
Мунгайиб йиглама, болам, гажакдор.
Жоним болам, эшил айтган дотимди,
Сен келиб кўрарсан ўсган юртингди.
Элат билан бирга-бирга борасан,
Неча вақтлар қалмоқ элда юрасан,
Ахир бир кун яна қайтиб келасан,
Хафа бўлиб, болам, кўнглинг бўласан.
Болам, эшил менинг айтган сўзимди,
Хафа қилдим, болам, сендей қизимди,
Отлантирай сендей сарвинозимди,
Элат билан бирга юрмок лозимди(р).
Мунгайиб йиглайди сендей зулфакдор,
Бир нечалар ўз ҳолидан бехабар,
Ўйнатиб мингсанг-чи, бундайин тулпор,
Сенга ҳамроҳ ўн минг уйли элат бор.
Бу элатда бордир қанча санамлар,
Сенга ҳамроҳ бўлиб кетар кўп қизлар,
Кўнглингни бўлмагин, гул юзли дилбар,
Отлангин сен, жоним болам, гажакдор.
Кўп хафа қилдим сендей боламни,
Обод қилиб юргин кулбахонамни,
Диккат қилма, болам, мендай энангни.
Болам, сенинг билмаганинг билдирай,

Хол бўлсин деб оқ юзингни тилдирай,
Ҳар на десам, айтганима кўндирай,
Келгин, болам, бул йўргага миндирай,
Болам, сени шоду хуррам кулдирай.
Кокилларинг эшилгандир тол-тол,
Ҳар толига берса етмас дунё мол,
Магар душман келса бўлғай-да поймол,
Бу сўзларга, жоним болам, кулоқ сол.
Сенинг кўнглингдагин отанг билмади,
Кўп гапирдим отанг қабул қилмади,
Жоним болам, отланмасанг бўлмади,
Ўн минг уйли элат қўчиб боради,
Ўн минг уйдан ҳеч қайсиси қолмади.
Элат билан болам, бирга борасан,
Тақдирингда нима борин кўрасан,
Ўлмасанг, бир куни қайтиб келасан,
Кўнғирот элда ўйнаб даврон сурасан.
Ох уриб тўкарсан кўздан ёшингни,
Келиб кўтарсан-да деиги-душингни,
Кўнғирот элда қолган қариндошингни,
Бир кун келиб қиласан ўтиришингни.
Учкур каби қанотингдан қайрилиб,
Югрук эдинг, туёғингдан тайрилиб,
Ўн олти уруг Кўнғирот элдан айрилиб,
Сен борарсан Қалмоқ элга йўл юриб,
Неча кун туз насиб қалмоқда кўриб,
Ахир бир кун яна Бойсинга келиб,
Ўз элингда чалкиб давронни суриб.

Бу сўэни айтиб, айтганига кўндириб, алдаб-сулдаб Барчи-
нойни бил йўргага миндириб, ана шунда Барчиной энасидан бу
сўэни эшитиб, иложини тополмай, ноилож, ночор бўлиб, элнинг
кўчиб бораётганини кўриб, неча каниз-қизларни ўзига ҳамроҳ
қилиб, кирқин канизлари билан ҳар қайсилари ўзларига яраша
отларига минди. Барчинойим тўриқ тулпор бедов отига минди,
ўн минг уйли элат кўчиб жўнай берди. Ана буларнинг — ўн минг
уйли Бойсин-Кўнғирот элининг жўнашини Фозил шоир Йўлдош
ўғли шундай жўнатади. Бойсин-Кўнғирот элининг жўнаши шул:

Чечанлар эплайди гапнинг эпини,
Шул замонда олтмиш норни чўгариб,
Орта берди Барчин сулув сепини.
Кўнғирот элнинг шундайғача кўпи бор,
Бойсарининг икки жилдав тўпи бор,
Ҳар кўчганда тўп бўшатиб жўнади,
Қаторга тиркалган лўк билан норча,

Устига юклаган қирмизи парча,
Камликни күрмаган сатта бойбачча,
Йўл-йўлакай улоқ чопиб боради.
Ошиқнинг фахмидир қоронғи кеча,
Йигласам, холима йиглар бир неча,
Хафа бўлиб борар Барчин ойимча,
Жафо тортиб бораёттир бир неча.
Бойлигидан бедов отни бойлаган,
Тангқа юриб Кўкқамишни ёйлаган,
Чўпонлар қур ҳайтлаб қўйни ҳайдаган,
Бойсиндан Кашалга қараб жўнаган.
Калма шаҳодат мусурмоннинг тилига,
Азамат бош берар диннинг йўлига,
Етсак деб боради Қалмоқ элига.
Фам билан сарғайиб гулдайин дийдор,
Кўргани йўқ қандай элдир қалмоқлар,
Орасида тўқсон довон тоги бор,
Беллардан ошади ул замон бойлар,
Қалмоқ юртга етсак дея ўй ўйлар,
Сабил бўлиб қолди бу ўстган жойлар.
Қаба фалак бошга солди зулм, деб,
Элибойлар бундан қўчиб боради,
Қолди энди ўйнаб ўстган элим, деб.
Айролик ўтига бағрини доғлаб,
Бораёттир Қалмоқ элни сўроқлаб,
Элибойлар бундан турмай жўнади,
Нечадир, белдан ошиб боради,
Куни билан юрса, оқшом қўнади,
Хар куни бир тоғдан ўтиб боради.
Тайрилмай бошидан тожи-давлати,
Бойлар излагани Қалмоқнинг юрти,
Узок ерда қолди ўстган элати.
Яна баҳор бўлса очилар гуллар,
Қаватига ҳамроҳ бўлган қирқинлар,
Элат билан бирга Барчин зулфакдор,
Хафа бўлиб борар гул юзли дилбар,
Хар замон сўз айтиб неча канизлар,
Суксур каниз бирга бўлиб муқаррар,
Кеча-кундуз йўл олгандир бу бойлар,
Бораётган ҳар қайсиси тўради(r),
Кўкқамиш қўлидан чикиб боради.
Қалмоқ юртин излаб булар боради,
Хар на кисмат, ёзилганин қўради,
Хориган йўлларда булар қўнади,
Кўкқамишдан кети узилмай боради.
Ўтар дунё ўтарини ўйлади,

Тангқа тайлаб Олатовни ёйлади,
Қалмоқнинг юртига талаб айлади,
Юрсак етармиз, деб бойлар ўйлади,
Кўкқамишдан бойлар чиқиб жўнади,
Хар на қисмат, ёзилганин кўради.
Қалмоқ юртга борсак дейшиб боради,
Бойбаччалар бедов отни минади.
От чопиб бойлар чўлни кўради,
Моли-давлатини йўлга солади,
Йўл тортиб, шу замон чиқиб жўнади,
Бедов минган от-абзалин шайлади,
Чўпонлар қур ҳайтлаб қўйни хайдади.
Баҳорда очилар тоғнинг лоласи,
Бойсаридир бу элатнинг тўраси,
Узок ердир бу Қалмоқнинг ораси,
Қалмоқ юртга талаб қилиб жўнади.
Бир нечалар кўриб ақили шошиб,
Бир нечалар юрур йўлдан адашиб,
Бойбўриман бул Бойсари ўрлашиб,
Ададсиз молини ҳайдаб боради,
Фуқаронинг экинини талашиб.
Фам билан сарғайди гулдайин дийдор,
Кўч билан биргадир бул замон бойлар,
Мамлакатни босиб ададсиз қўйлар
Етган жойга бул ажаб талон тушди,
Бу бойлар денгу-душдан адашди,
Қалмоқнинг юртини булар излашди,
Неча довон, баланд тоғлардан ошиди.
Жафо тортиб бораётир бир неча,
Қалмоқни билмайди, тиллари гачча,
Хафа бўлиб борар Барчин ойимча.
Бойсун-Қўнғирот элдан мен ҳам кетдим, деб,
Қалмоқлардан балки жафо тортдим, деб.
Барчиннинг ўйини билмайди бойлар,
Узоқ ерда қолди бу мазгил-жойлар,
Мусоғир бўлдик деб неча ўй ўйлар.
Дахмарда, сардорлар молини ҳайдар.
От чопса гумбурлар тоғнинг дараси,
Ботирни ингратар найза яраси,
Олтойчилик йўлдир Қалмоқ ораси,
Бораётган Бойсун-Қўнғирот тўраси.
Бошида бор эди зардан жигаси,
Ёз бўлса яйлови Аму ёқаси,
Мусоғир бўп Қалмоқ кетиб боради,
Ўн минг уйли Бойсун-Қўнғирот тўраси.
Ёмон билиб Бойбўрининг сўзини,

Бермас бўлиб бунда Барчин қизини,
Чўлларда сарғайтиб гулдай юзини,
Ёш тўлдириб бийлар жоду кўзини.
Айролик ўтига бағрини доғлаб,
Олтойчилик йўлга кетди бу бойлар,
Мусоғифир бўп, Қалмоқ юртин сўроқлаб.
Булар ҳам бир ўз юртига тўради (р),
Бойсарининг икки жилдав тўпи бор,
Намойишга тўп бўшатиб боради.
Неча бир жойларга талонлар тушиди,
Молнииг олди Қалмоқ юртга стишиди,
Тўқсон тоғдан кети узилмай мол ошди,
Молнинг олди Чилбир чўлга стишиди.
Мол бошқариб бойлар кетиб боради,
Кўз юбортиб ҳар тарафга қаради,
Ададини киши билмас бу молнинг,
Кўкқамишдан кети узилмай боради.
Жафо тифи бугун жонидан ўтиб,
Ўн минг уйли әлат борар йўл тортиб,
Мамлакатни бир ғовур-тўзон тутиб,
Бораётир узоқ йўлни чангитиб.
Нечовлар буларни кўриб ҳовлиқиб,
Бир нечалар элдан чиқиб довриқиб:
«Бизнинг элга қандай одам келди, деб,
Бул ўлкага бежой талон солди», — деб.
Бораётган шундайин бойлар эди,
Қалмоқ юрти бундан бехабар эди,
Ўн беш кунлик йўлда майса бор эди,
Экинни сира кўрмаган бойлар эди.

Ана шунда бойлар кўчиб жўнади, моллари Кўкқамиш кўлидан чиқиб бориб, тўқсон тоғдан ўтиб, юрту жаҳонни тўзон, чанг килиб, молнинг олди неча кун йўл юриб, бул орадан олти ой ўтиб, олти ой деганда, бойлар тўқсон тоғдан молларини ўтказиб, қалмоқ юртига етказиб, ўзларининг бир хил бойлари шул молларнинг олдини олиб, йўл бошқариб келаётган эди, бир вақтида бойлар қалмоқ юртига неча довонлардан ошиб етиб келди, қалмоқ юртига, Чилбир чўлига стишиди. Шу чўлда, Тойчихон мамлакатида, қалмоқ юртида, Тойчи вилоятида, Чилбир чўлида, ўн беш кунлик йўлида экиннинг майсаси бор эди. Бул бойлар ётган элибой, экинни билмайди. Бу бойлар бу экинни кўриб: «Қалмоқларнинг ерлари қўнғурсалқин бўлар экан», — деб шу майсаларга, экиннинг устига Туркистондан ошган молларни рўпара ёғдириб, бошқариб, экинларни едириб юбора берди. Шул вақтда моллар билан бирга келаётган қора уйлар Чилбир чўлини, Ойна кўлини ёқалаб кўна берди. Бул бойларнинг келишидан қалмоқ шохи бехабар эди.

Оқсоқол, арбоблари ҳам бехабар эди. Лекин Чилбир чўлига бойларнинг моли келаётир, майсаларни оёқ ости қилиб, чигирткадай босиб, қопқора бўлиб, еб кетиб бораётир. Майсаларнинг чангини чиқариб, тупрогини осмонга совуриб бораётир. Шунда ҳам бу Бойсин элининг бойларининг мол, қўйлари ҳали ҳам Кўкқамишдан чиқиб келаётир. Бир ёғи Қалмоққа етди, кети ҳали ҳам Кўкқамиш кўлидан чиқиб, ода бўлган эмас. Моллари шундай чиқиб, кўчлари ҳам молларига аралашиб, Қалмоққа қараб жўнаб, неча тоғлардан, неча кирлардан, неча бир довонлардан ошиб кетиб бораётир. Ана шунда олдидаги бойлар Қалмоқ мамлакатига, Чилбир чўлига, Ойна кўлига етиб, кўлни ёқалаб қўниб ётири, молларини майсаларга, экинларга қўйиб, экин-майсаларни егизиб, қўниб ётаётир. Булар шу Чилбир чўлида, Ойна кўлида қўниб, сувлаб, моллари ўтлаб қўниб ёта берсин, саришталарини ола берсин, эндиги сўзни Қалмоқ юртидан эшитинг.

Ана шунда Қалмоқ юртларининг оқсоқол, арбобларидан беш юз оқсоқол, арбоблари «Бу йилги экинларнинг ниҳоли яхши эмиш», — деб экинларини кўрмоқчи бўлиб, Қалмоқдан чиқиб эди. Шундай қараса, Туркистон эли тарафидан кўп мол ошиб келаётибди, осмоннинг қора булутидай босиб келаётибди. Ўн беш кунлик йўлдаги майсанни обдол талагандай, илон ялагандай қилиб, чангини чиқариб, олди ернинг ўтини еб келаяти. Оқсоқол, арбоблар айтди: «Бу молнинг адади йўқ, беадад кўп мол экан. Бунинг олдига рўпара бўлсак, равоҷдай қип бизни ҳам кемириб еб кетса ҳам ажаб эмас. Шунча мол, шунча эл бизнинг элга келибди. Ойна кўлни ёқалаб, кўп эл қўнибди. Қалмоқ подшоси бехабар қолибди. Келе, Қалмоқшоҳга борайик, бекорга бу ерда аҳмоқ бўлиб тўпланиб турмайик, ўзимизни гаранг қилмайик, бориб Қалмоқшоҳга билдирайик». Бу сўзни ўйлаб, оқсоқол, арбоблар қайтиб кетди, Қалмоқшоҳнинг давлатхонасига етди. Бул экинни егизиб қўйган бойларнинг устидан дотқа бўлиб, қилган тирикчилиги — экишидан айрилиб, Қалмоқшоҳга қараб, бир сўз деб турган экан:

Аё шоҳим, сизга айтар арзим бор,
Олмадайин сўлган гулдай тарзим бор,
Туркистондан бир бой кўчиб келибди,
Бу бойлардан, шоҳим, бўлдинг бехабар.
Обло менинг ақли-ҳушим олибди,
Шум фалак бошима савдо солибди,
Бизинг элга қаттиқ талон қилибди,
Давлатини кўрдим жуда ғолибди(р),
Аслин билсанг, Туркистондан келибди,
Экиннинг барини нобуд қилибди.
Учқур эдинг, қанотингдан қайрилдинг,
Югрук бўлсанг, туёғингдан тайрилдинг,

Биз овқатдан, сен сурсатдан айрилдинг.
Хазон бўлса боғда гуллар сўлади,
Бола-чақа тайин очдан ўлади,
Элимизни қимматчилик олади,
Сендей шоҳим бул бехабар қолади,
Сурсатингни қайдан топиб беради?!
Чойракорлар чиқмоқчин бўп туради.
Шундай номдор бойлар элга келибди,
Ойна кўлни ёқалаб эл қўнибди,
Чилбир чўлни моли босиб қолибди,
Бизинг эллар бунда абгор бўлибди,
Экиндан айрилиб дехкон қолади,
Оқсоқоллар билиб хабар беради,
Фуқаронгнинг бари очдан ўлади,
Дехконларнинг ҳоли танг бўп қолади,
Фуқаролар нима илож қиласди,
Элатчувлаб экинини кўради,
Еб қўйган сўнг нима илож қиласди?!
Арз айтгани ҳамма сенга келади,
Чиқимингни қайдан топиб беради,
Бойларнинг ҳисоби қандай бўлади?!
Сендей шоҳим бул бехабар қолади,
Туриб ўйла, юртинг хароб бўлади,
Оқсоқоллар шундай хабар беради,
Чувуллаб фуқаро, ҳалки келади,
Подшоликка одам тўлиб қолади,
Мехнаткаш дехқоннинг бари келади,
Бойларнинг устидан арз қип туради.
Фуқароси жуда абгор бўлибди,
Бир нечаси узоқ йўлдан келибди,
Бойларнинг зарбидан дод деб турибди,
Экиндан айрилиб бунда келибди,
Бу бойлардан оша жабр кўрибди,
Чувуллашиб ҳамма арз қип турибди:
«Жуда бизлар бунда абгор бўлдик, деб,
Экишдан айрилиб, сизга келдик, деб,
Бола-чақа йиглаб қолди, ўлдик, деб,
Ҳамма дехқон сизга арзни қилдик», — деб.

Бу сўзни эшитиб, Қалмоқшоҳ оқсоқол, арбобларига қараб, муртини бураб: — Кўрдингларми, қаёқдан келибди? — деб сўраб, бир сўз деб турган экан:

Давлатимнан шоли-шолдам ўрайман,
Сиёсат қип арбобларга қарайман,
У бойларни мен ҳам сендан сўрайман.

Қайси әлдан келиб талон солибди,
Менинг мамлакатим абгор қилибди,
Мендан беихтиёр бунда юрибди,
Билдингларми қайси әлдан келибди?
Элни абгор қипти, зулм қилайнин,
Қайси юртдан келганини билайин,
Улуғ, катта-кичи, сендан сүрайин,
Қайси юртдан бунда кепти, билайин,
Ул бойларга қаттиқ азоб қилайнин,
Молини сизларга олиб берайин,
Гунохкор қип мен зиндонга солайин.
Хар на деб сүйласам, ани қилинглар,
Миргазаб, жаллодлар бунда келинглар,
Бундан турмай, Чилбир чүлга боринглар,
Ул бойларни хүб оралаб күринглар,
Сүраб каттасини аниқ билинглар,
Сүнгра тортиб уни бойлаб олинглар,
Давлатимга уриб, ҳайдаб келинглар.
Додлаганман эшитманглар сүзини,
Билиб бойланг каттасининг ўзини,
Мен ўяйин у бойларнинг кўзини.
Ул бойларга каттиқ азоб берарман,
Бошин кесиб мен ҳам дорга иларман,
Ундайин кишига азоб берарман,
Фуқаронинг вақтин хушлаб туарман,
Моли-давлатини олиб берарман.
Ҳаялламай, жаллод, энди боринглар,
Тақал қилмай тезроқ бориб келинглар!
Обло унинг ақли-хушин олибди,
Ҳеч кимдан сўрамай элга келибди,
Мехнаткашга жуда азоб берибди,
Давлатига бойлар мағрур бўлибди,
Экишдан айрилиб ҳамма қолибди,
Эшитаман юрга моли тўлибди,
Мендан беижозат бунда келибди.
Беижозат кепти, бўлди гуноҳкор,
Мехнаткаш дэҳқонлар – бари даъвогар,
Ҳаялламай бориб келгин, жаллодлар.
Отга солди арпа билан ийирди,
Қор ёққанда карвон солар чийирди,
Жаллодларни ул бойларга буюрди,
Қилган иши дэҳқонларга қийинди(р),
Хайдаб келгин, мен солайин ўйинди.
Обод қилиб турай бунда элингни,
Гуноҳкорга солмоқ даркор зулмни.

Бу сүзни Қалмоқшохдан эшитиб, беш юз миргазаб, жаллод отланиб, чөгланиб, Чилбир чүлига, Ойна күлига қараб кела берди. Ўн минг уйли эл оз бўлами, Ойна кўлни ёқалаб ўтирган, ҳаммаси бир-бирига ўхшайди. Ўзбак халқ, ҳеч белгиси йўқ, қайсиси катта эканини билмади. Каттаси шул-да, деб қария-чолларини ҳайдаб кета берайин деса, унинг ҳам ҳисобини топмади, шунча элда ким катта эканини билмади. Ногоҳон жаллодлар қаради, бир ерда баҳмал уй тикилаяпти. Кўрди: кигизларини баҳмалдан ёптирган, бўсаға, ён ёғочларини кумуш-олтиндан чоптирган. Бу уй Бойсарининг уйи эди. Беадад бойлиги ошиб кетган эди, кигизнинг ўрнига уйига баҳмал ёпган эди. Оралаб юриб, жаллодлар бул уйни кўриб: «Албатта бу элнинг каттаси шул-да, ўзбакларнинг каттасининг белгиси шундай бўлади экан, ҳеч кимнинг уйи бунга тўғри келмайди, балки подшоликларда ҳам бундай салтанат қилмайди, шул уйга борайик, шул уйнинг эгасини топиб олайик, Қалмоқшохнинг ёнига ҳайдаб борайик, каттаси шул экан, деб турайик», — деб Бойсариникига қараб юрди. Бойсари уйининг олдига борди. — Келган бой! — деб жаллодлар довуш қилди. Бойсари уйнинг тўрида эди. — Лаббай, — деб жаллодларнинг олдига туриб кела берди. Жаллодлар Бойсарини кўриб, отдан тушиб, сийнасини доғлаб, икки кўлини орқасига боғлаб, бошига қор-ёмғирдай қамчи ташлаб: — Юр буёқقا, — деб туртиб ҳайдай берди. Бул элга янги келган, ҳеч кимдан шашти қайтмай юрган одам — Бойсари бу зулмни кўриб, кўнгли бузилиб, жаллодларга қараб, бир сўз айтиб турган экан:

Ўз элимда шохнинг ғамин еб эдим,
Мен ҳам Қалмоқ элга борсам деб эдим,
Куш питага сиғингандай бўп эдим,
Кочган қушман, паноҳ берар деб эдим,
Қалмоқ шоҳни химоятим деб эдим,
Орқа тутиб бу юртларга кеп эдим.
Ўз жонимга ўзим қилдим зулмди,
Бунда келиб мен бойлатдим кўлимди,
Кимга айтай энди ўлар ҳолимди,
Эй жаллодлар, меҳрибонлик қил эмди.
Химоят деб келдим, бўлдим гуноҳкор,
Бундай менга азоб берма, жаллодлар,
Қамчи уриб, зулм қилма, хунхорлар,
Не сабабдан мен бўлибман гуноҳкор?!
Раҳминг келмай кўздан оққан ёshima,
Аччик қамчи урма азиз бошима.
Даврон суриб юрдим Бойсин элима,
Хозир келиб банди бўлдим қўлинга,
Қараб раҳминг келсин менинг ҳолима.
Эл ичинда қўлим бойлаб ҳайдама,

Кариганда қилма мени шарманда.
Мендейми ночорга азоб берасан,
Зулм қилиб мени ҳайдаб борасан.
Фариблиқда менинг күнглим бўлмагин,
Мусофири, менга зулм қилмагин,
Бир гап билан келдим Қалмоқ элинга.
Хозир банди бўлиб тушдим қўлинга.
Калимайи-шаҳодат келар тилимдан,
Мусофири, не иш келсин қўлимдан,
Келиб фойда қилмадим-ку элимдан.
Не сабабдан бундай ишни қиласан,
Ўзим турсам мени бойлаб урасан,
Бекорига менга азоб берасан,
Нима гуноҳ қилганимни биласан?
Мунча ҳам сиёsat қилма, жаллодлар,
Мусофири бой нега бўлди гуноҳкор?
Бу сўзларни айтган Бойсари номдор,
Гуноҳимни маълум қилгин, жаллодлар!
Элингнинг расими шундай бўлама,
Мусофири кўрса бойлаб урама?!

Шундай Бойсарига қараб, гуноҳкор бўлганини билдириб,
жаллодлар ҳам бир сўз айтиб турган экан:

Бизлар билдик ўз элингдан келибсан,
Хеч кимдан сўрамай бунда қўнибсан,
Бу элатга жуда азоб қилибсан,
Элнинг экинини егизиб қўйибсан,
Дехқонларни сен яланғоч қилибсан,
Килган ишинг ўзинг билмай юрибсан.
Меҳнаткашлар шоҳ қошига боргандир,
Устингдан чувуллаб арз қип юргандир,
Фуқаро арзини тинглаб билгандир,
Тойчи шоҳим кўп сиёsat қилгандир,
Тойчихон амриман жаллод келгандир,
Катта билиб сени бойлаб олгандир,
Бизлар жаллод, хоннинг амрин тутамиз,
Амр этмаса сени бойлаб нетамиз?!

Тойчихон қошига ҳайдаб кетамиз.
Бойлаганга бойлар хафа бўлиби,
Бундан катта сенга азоб туриби,
Кўп дехқонлар бул даъвогар бўлиби,
Экишидан ҳамма айрилиб қолиби.
Килган ишинг ўзинг билмай юрасан,
Дехқонларга нима жавоб берасан,
Туриб ўйла армон билан ўласан,

Үзинг билмай хўп ишларни қиласан,
Кўпнинг ўртасига тушиб қоласан,
Мехнаткашга бир кўпкари бўласан,
Молингдан айрилиб ўзинг ўласан,
Бул ишинга шундай жавоб кўрасан,
Бола-чақанг кўрмай ғариб қоласан,
Хайдаб борсак, икки бошдан ўласан.
Қалмоқ шоҳим сенга зулм этади,
Бошиング кесиб сени дорга тортади,
Молу давлатингни талон этади.

Бу сўзни жаллодлардан эшитиб, Бойсари ҳам жаллодларга караб, бир сўз айтиб турган экан:

Мен берайин қатор-қатор норимни,
Нор устига юклаб берай заримни,
Мен берайин манглайимда боримни.
Жаллодлар, эшиггин айтган сўзимди,
Кўлим чечиб озод қилгин ўзимди,
Мундай кунда менга ўлим лозимди(р),
Мол етмаса берай Барчин қизимди,
Ҳали ҳам бир озод қилгин ўзимди.
Жаллодлар, қулоқ сол бу нолишима,
Қаба фалак оғу қўшди оshima,
Хайдаб бориб етма менинг бошима,
Нима деб сўзласанг, мен ҳам қилайин,
Тўксон қўра қўйим бордир, берайин.
Тўқайдан йилқилар барини олсин,
Экишига молим ҳисоблаб кўрсинг,
Камлик қип етмаса, қизимни олсин,
Ул дехқонлар ё даъвогар бўлмасин.
Лодон кўнглим ҳар хаёлга бўлибман,
Гуноҳкор бўлганим энди билибман,
Элибойман, мен ҳам аҳмоқ бўлибман,
Илгарида мен экишин ўт деб юрибман,
Дехқонлар экишин ўт деб юрибман,
Билмасликдан гуноҳкор бўп қолибман,
Жаллод, сенга миннатдорлик қилибман.
Хаёлингга бадфеълик келмасин,
Армон билан бир мусофир ўлмасин,
Хайдаб борма, шоҳинг мени кўрмасин,
Сиёsat қип қаттиқ азоб қилмасин.
Термилтмагин, жаллод, менинг кўзимди,
Арза билан шоҳга билдирир сўзимди,
Қандай бўлса ҳайдаб борма ўзимди,
Гуноҳкор бўлибман, ўлмак лозимди(р).

Бу сүзни Бойсаридан эшитиб, жаллодлар: «Рост айтади шул бечора, экинни ўт, деб билмай егизиб қўйибди, қанча фуқаро устидан арз қип турибди, хайдаб борсак, агар Қалмоқшоҳга тўғри қилсак, Қалмоқшоҳ гапига кулоқ солмай, бунинг бошини кесиб, дорга тортади; буни ҳайдаб бормай, шунинг сўзини бир арза қип тутайик, агар қабул тутса, ҳайдаб бормай, шу ердаёк қўйиб кетайик», — деди.

Жаллодлар Бойсарининг ҳалиги сўзини арза қип, икки миражазабдан жўнатди. Миражазаблар арзани оп кеп, Қалмоқшоҳга тутди. Қалмоқшоҳ бу арзани ўқиб кўриб айтди, жуда димоги хам чор бўлиб кетди: — Мени ҳимоят тутиб келган одам бўлса, қаторда нори ҳам ўзиники, нор устида зари ҳам ўзиники, барча давлат — моли ҳам ўзиники, бизга даркор эмас, Барчин қизи ҳам ўзиники. Яйловига Чилбирнинг чўлини бердим, сувловига Ойналининг кўлини бердим. Етти йилгача моли безакот, бетер-гов юра берсин. Ҳар ким мусофири бойларга таадди қилса, боши — ўлимда, моли — таловда, ўз ихтиёрида юра берсин, — деди.

Бу сўзни эшитиб, оқсоқол, арблолар: — Сен бундай беклик қилдинг, ул бева-бечораларнинг экинини егизиб қўйган, беш кун, ўн кундан кейин солик, сурсат деб (сўрайсан). Ҳеч нима бўлмаса, одамларнинг кўрпасини сотдириб оласанми? — деди. Шунда Қалмоқшоҳ туриб айтди: — Ҳали йил эрта, тари-тармоқ эксанг ҳам овқатлигинги олиб қоласан; бу йилги берадиган ҳар нима подшолик чикимдан ҳам ўтдим, — деди. Шунда фуқаро дехқонлар ҳам димоги чор бўлиб, тари-тармоқ экканни кўш чиқариб кетди. «Ҳар нима олганимиз ўзимизга бечиким тегадиган бўлди», — деб юриди. Бойларнинг ҳам димори чор бўлиб: «Ҳўп ери кўнғирсалқин, ўтлок келади экан, молни икки семиртиб сотамиз экан», — деб буларнинг ҳам димоги чор бўлиб, ҳаммаси ҳам жойлашиб қолди. Нима бўлса, Қалмоқшоҳдан вақти хуш бўлиб, ана энди булар бунда жойлашиб турсин, ҳар қайсиси ҳам ўз кунини ўтказмақ билан турсин.

Тойчи вилоятинда, Қалмок музофотинда бир Сурхайил деган кампир бор эди. Жуда ҳаддили зўр кампир эди, бу кампирнинг етти ўғли бор эди, еттови ҳам номдор алп эди. Каттасини Кўкал-дош дер эди, ундан кичкинасини Кўкаман дер эди, Кўққашқа дер эди, Бойқашқа дер эди, Тойқашқа дер эди, Кўшкулоқ (дер эди), кенжатойини Қоражон дер эди. Шу еттовига тир қилгани Қалмоқшоҳ ҳар мамлакатлардан алпларни олиб келиб, тўқсон алп қилиб, Кашал горидан жой бериб, буларни тўқайистонда бокиб ётар эди. Ул алплар қандай алп: ёйандоз, мерган алп, ҳар қайсиси тўқсон ботмон темирдан совут кийган, ҳар кунига тўқсон ширбознинг этини таътил қилган, бош-бошига ҳар қайсиси подшоҳликдан ҳар ойда беш юз сўм мояна олган хўб бирланчи зўр полвондир. Бул алпларнинг ҳар қайсисининг подшоҳликдан

кирқ қиз хизматкори бор, бу ёқдан, у ёқдан, овдан келса, жойини солиб, хизматини қилиб турадиган қызлар. Бойсарининг қизи Барчинни булар күргани йўқ. Шул вақтларда Барчин ҳам баркамол, бўйи етган, ҳар ягрини ўн беш қарич келади. Пирнинг назари билан пайдо бўлган, бу ҳам алп. Орқаварон эшитиб, шумусофири бойларда бир қиз бор эмиш, деб булар ҳам ўзавонда маслаҳат қилади: гоҳ бири олмоқчи бўлади, гоҳ бари олмоқчи бўлади, гоҳ ҳаммаси ўртага олиб хотинли бўп қолмоқчи бўлади. Неча вақтлар кўрмаси шу маслаҳатни қилиб юради.

Кунлардан бир кун алпларнинг энаси Сурхайил мастан Қалмоқшохнинг давлатхонасига бориб, ўғилларининг орқасидан Қалмоқшоҳга хурмати кўп, Қалмоқшоҳ гапини қайтаролмайди, алпларнинг энаси Сурхайил мастан Қалмоқшоҳга қараб, бир сўз айтиб турган экан:

Шоҳим сенга арзим баён қилайн,
Каттамсан-да, бир гап келди, сўрайин,
Чилбир чўлни томоша қип келайн.
Ўзбаклар мазгили қандай, қўрайин,
Яхши-ёмонини онгниб билайн,
Рухсат берсанг, мен ҳам турмай борайин,
Ул бойларнинг молин бож қип олайн,
Шу сўзни, сultonим, сендан сўрайин,
Жавоб бергин ўзбакларга борайин,
Қандай экан бир ҳангама қилайн,
Хеч зулм қилмайман, бориб келайн.
Жавоб берсанг, бундан турмай бораман,
Сайил этиб, элларни кўриб келаман,
Кўрганимни сизга жавоб бераман.
Бунда сарғаймасин гулдайин дийдор,
Жуда номдор эмиш ул келган бойлар,
Донгдорларни кўрмоқликка ҳаққим бор,
Фарзандларим муна элда зўрабор,
Шоҳим дедим, ҳурмат қилдим мукаррап.
Дардли қул дардимни кимга ёрайин,
Ҳасратимдан элдан эл ахтарайин,
Бебош бўп кетмасин, бойни кўрайин,
Бир озироқ чиким солиб олайн,
Ёмонини бориб тергаб кўрайин,
Бирор эмас, уч-тўртта бўп борайин,
Бориб каттасига меҳмон бўлайин,
Кўрганимни келиб хабар берайин,
Жавоб беринг, энди мен ҳам борайин.

[Қалмоқшоҳ] ул бойларнинг ихтиёрини ўзига берган эди. Бу сўзларни Сурхайил мастандан эшитиб, борма деб бу кампирга

айтолмай, ночор жавоб берди. Ўғилларининг зўрлигидан Қалмокшоҳ ҳам ҳазар қилас эди. «Энди ихтиёрим ўзимда бўлди», — деб кампир қайтиб, мағилига келиб, ўзига тобе қариндош тўқиз кампирни бирга олиб, ўзи билан ўнта бўлиб, йўлга чиқиб, йўл юриб, бели буқрайиб, қулоги тикрайиб бораётсиб эди. Кенжатой ўғли Коражон ўн уч маҳрами билан йўлда от ўтлатиб ётиб эди. Коражон қаради, тўқиз кампирни эргаштириб, энаси Чилбир чўлига қараб бораётсиб. Коражон кўриб: «Бу энаси қурғур нимага бораётсиб экан. Бу Чилбир чўлига борар, бизларни орка қилиб баланд-паст гапиравар, кўп одамларни ҳам хафа қиласар, нима бўлса мусофири-да, бойларнинг кўнглини озор қиласар. Буни қайтариб юборайин. Бул имонсизларга бойларнинг мазгилида нима бор, булардан яхши гап чиқами, бир кўнгли қоралик орттиравар; ўғилларидан гап қочган-да, деб Қалмокшоҳ ўпкалаб юрар, бу баччағарлар зўрлигига инониб, менинг ҳукмимни ҳам бузди, деб юрар, нима бўлса қайтариб юборайин», — деб ўйлаб, энасининг олдига чиқиб, йўл бўлсин қилиб, энасидан савол сўраб турган экан:

То ўлганча сўйлаб қолган тил бўлсин,
Узунли-қисқали тўнинг мўл бўлсин,
Хар кимсага фарзанд берса, ул бўлсин,
Қаватингда тўқиз кампир энажон,
Ўнта бўлиб, эна, сенга йўл бўлсин?
Не сабабдан меҳнат тортиб келасан,
Меҳнат тортиб, эна, қайда борасан?
Кулоқ солгин Коражоннинг тилига,
Эна, қайтгин, борма Чилбир чўлига,
Оралама ўзбакларнинг элига,
Эна, сен ҳам қайтгин келган йўлинга.
Сўз айтарман, эна, сенга бир алвон,
Яхшилик сўз айтиб турур Коражон,
Эна, қайтгин, борма Чилбир чўлидан.
Менинг сўзим, эна, оғир олмагин,
Бу гапларни, эна, ҳазил билмагин,
Хаёлингни ҳар тарафга бўлмагин,
Қайтгин, эна, ул бойларга бормагин.
Фам билан сарғайди гулдайин дийдор,
Коражоннинг айтган сўзи шу бўлар,
Бир нечалар аҳволидан бехабар,
Кўй-чи, эна, ҳалак бўлиб нима бор?!
Кампирларни, эна, ҳамроҳ қилибсан,
Бир шумликни, эна, ўйлаб юрибсан,
Кўнгилингга ул шумликни олмагин,
Бориб шу бойларни ҳалак қилмагин,
Қайтгин, эна, келган йўлдан қолмагин.

Хориб-чарчаб, эна, ҳалак бўлсан,
Борган ерни бесарамжон қиласан,
Ёмон бўлсанг, сен имонсиз ўласан,
Кайтгин, эна, бориб нима қиласан.

Бу сўзни эшитиб, Қоражоннинг аччиғи келганини билиб,
Қоражоннинг ақлини олиб, кўнглидаги гапини билиб, бир сўз
айтиб турган экан:

Худойим сақлагай бандани омон,
Туриб ўйла яхши йўлга бораман,
Ўзбакларга сени куёв қиласан,
Ўзбакларнинг яхши қизи бор бўлса,
Аташтириб рўмол бериб келаман.
Йўлдан урма, Чилбир чўлга борайин,
Назар солиб ўзбакларни кўрайин,
Ўзбакларнинг яхши қизи бор бўлса,
Боши бўшми дейин, аввал сўрайин.
Яхши қизлар агар боши бўш бўлса,
Келин қилиб, бирор рўмол ўрайин.
Уйлантирсам, сенга хабар берайин,
Боришли-келишли бўлиб юрайин,
Болаларни тоға-жиян қилайин.
Ўн уч маҳрамингман йўлда турибсан,
Тенгинг йўқ, жон болам, бўйдоқ юрибсан,
Энангнинг хаёлин ёмон билибсан,
Кўнгилингга неча сўзни олибсан,
Мени қайтарсам, деб хаёл қилибсан.
Мени билсанг, сенинг учун бораман,
Элнинг бошдан-оёғини кўраман,
Сенга лозим бир қиз топиб оламан,
Кенжатоим, сени яхши кўраман,
Мен бировга сени куёв қиласан,
Кўнгилимда борин айтиб бераман,
Энанг мен-да, яхшиликни кўраман,
Сенинг учун кўп хизматлар қиласан.
Бад олма энангнинг айтган сўзидан,
Обберай ўзбакнинг сулув кизидан,
Куёв бўп сузилиб турсанг, Қоражон,
Болам, томир бўлсак ўзбак элидан.

Бу сўзни эшитиб, Қоражоннинг димоги чоғ бўп, энасининг
юришидан кўнгли тўлиб: — Эна, шу гап кўнглингда бўлса, сен
келганча мен шу ерда турман, битган-битмаган хабарини
қайтарда менга билдириб ўтасан, — деб Қоражондан жавоб
тегиб, кампир ҳам йўлга кирди. Бул бораёттандаги сўзи:

Жўраларин бирга олиб,
Тўқиз кампир ҳамроҳ бўлиб,
Юрмоққа баридан голиб,
Шул замонда йўлга кириб,
Чилбир чўлига йўл юриб,
Жўралари кейин қолди,
Сурхайил мастан йўл олди.
Ул бойларга борсак, дейди,
Қандай экан билсак, дейди,
Бориб меҳмон бўлсак, дейди,
Бекнинг қизин эшитгандир,
Сулувлигин кўрсак, дейди.
Тўқиз кампир кейин қопти,
Халлослаб йўл тортди.
Не гап келади ўйига,
Кирк кари бўз кўйлак бўлмас
Курғур айёрнинг бўйига.
Бораётир шундай қараб,
Бойсарининг уйин сўраб,
Хеч ким бўлмас бунга тараф.
Бир неча билмас тилини,
Уйлантирмақчин улини,
Кўрсам дейди, йўл тортади,
Мусофири бой мазгилини.
Кичаб юрар қолган кампир,
Неча ишдан бўлиб ғофил.
Узокдир сойлар дараси,
Кўринмас кампир қораси,
Жуда ҳам бир қичаб кетди
Алп Қоражоннинг энаси,
Уйламакчун Қоражондай боласин.
«Кўнгилда борини мен ҳам билай, деб,
Ўзбакларнинг ҳаммасини кўрай, деб,
Агар сулув, яхши қизи бор бўлса,
Қоражон улимга олиб берай», деб.
Бу гапларни ўйлаб энди ўйига.
Яқинлади Бойсарининг уйига.
Бораётган шундайин айёр эди,
Бойсарида тўққиз кўпак бор эди,
Кўпаклари бул айёрни кўради,
Чопиб келиб бул ўртага олади.
Хар қайси ҳар ёқдан тортиб боради,
Айикдай чинқириб кампир қулади,
Бойқадами эмчагидан олади,
Изикути қувукقا чанг солади,
Айикдай чинқириб кампир қулади,

Түккиз күппак ўртага оп талади.
Жұда ҳам кампирнинг ақили шошди,
Дирдай бўлиб иштон-кўйлакдан тушди,
Хар тарафга кучук тортиб талаши,
Кучуклар олдинда ўртага тушди.
Бу кампирни ҳеч бир одам билмади,
Ҳеч ким келиб бундан хабар олмади,
Бул ахволда бўлганини билмади,
Устидаги кийимидан қолмади.
Кампир қулақ бунда сулаб ётади,
Кийимининг барин йиртиб отади,
Балки кампир ярадор бўп ётади.
Зўр итлар олдинда бул кампир ночор,
Катта кучукларга бўлди гирифтор,
Ҳеч ким бўлмади-ку бундан хабардор,
Кўп талаб кучуклар қилди ярадор,
Чинкириб бул кампир довшин чиқарап:
— Ҳазон бўлиб боғда гуллар сўлдими,
Ажал етиб паймонаси тўлдими,
Кучуклари ўртага олиб талади,
Бойсарининг бойбичаси ўлдими?
Мехмон келди, ҳеч бир одам билмади,
Ит талади, уй эгаси кўрмади.
Жафо тифи бул кун жондин ўтдими,
Айролиқ ханжари бағрин йиртдими,
Ҳеч довушни эшитмайди ҳалойиқ,
Бу ёкнинг одами бир ёқ кетдими?
Мендайин ночорнинг кўнглин бўлади,
Бул ишидан бойлар зарар қиласди,
Кучуклардан кўп аланглаб қолади,
Бойларнинг кучуги жабр қиласди.
Тур! — деган довушни энди эшитиб,
Үйдан туриб бул бойбича қаради.
— Қандай одам? — дейди, энди келади,
Кампирнинг ҳолидан хабар олади,
Шул замон бойбича етиб келади,
Бул кампирга меҳрибонлик қиласди,
Кампирнинг ҳолини келиб кўради,
Абгор қилиб кўп кучуклар талади,
Итидан айириб энди олади,
Кампирнинг кўнглини энди сўради,
Кампир жуда дирдай бўлиб қолади.

Кампирнинг ялангоч бўп қолганини кўриб, бойбича уйига

бориб, янги кийимлар олиб келиб, кампирнинг устидаги кучук

йиртган кийимларини чечиб олиб, янги кийим кийдириб, бойби-

ча кучукларини уриб, кампирнинг димофини чоғ қилиб, уйига эргаштириб борди. Барчин қирқин канизаклари билан ўтириб эди, бу кампирни кўриб, қандай бўлса мусофиричлик юрт-да, кампирни иззат қилиб, ўрнидан туриб, таъзим қилиб ўтириди. Барчинни кампир кўриб: «Бизнинг Коражонга лозим киз экан», — деб ўтириди.

Не паллада боронағи тўққиз кампир жўраси етишди, булар-нинг олдига одам чиқиб, итга талатмай олиб борди. Мехмонлар кўришиб, ўтириди. Бойбича меҳмонларга ош тараддуд килди, зиёфатга палов пишириб, паловни дамлаб: «Энди меҳмонлар билан гаплашиб ўтирайин», — деб бойбича ҳам кеп ўтириди. У ёқдан, бу ёқдан гап ташлашиб, беш-тўрт оғиз гап бошлишиб, шунда кампир бойбичага қараб, шу қизингнинг боши бўшми, — деб сўраб турган ери:

Қозонда қайнаган ширбоз гўшмиди,
Шул қизингнинг агар боши бўшмиди?
Боши бўшми дейин, сендан сўрайин,
Келин қилиб бирор рўмол ўрайин,
Коражонга аташтириб борайин.
Мехмон бўлиб бирор гузарим тушди,
Итинг кўп талади, кўп нашам учди,
Шул қизингни кўриб кўнглим хушди(р),
Албатта қизингнинг бул боши бўшди(р).
Бойбича, эшитгин айтган сўзимди,
Кўнглинг бўлиб хафа қилма ўзингди,
Келин қилиб кетай сенинг қизингди,
Сенинг қизинг Коражонга лозимди(р).
Қизингнинг бошида таралган очи,
Коражон ҳам йигитларнинг меърожи,
Менинг айтган гапим бунда билсанг-чи,
Коражонни куёв қилиб олсанг-чи,
Расми-қаъданг менга маълум қилсанг-чи.
Нима деб амр этсанг ани берайин,
Ўзбак бойлар расимингни сўрайин,
Коражоннинг вақтин хушлаб турайнин,
Қизингман икковин бирга қилайнин.
Ошикнинг фаҳмидир коронги кеча,
Йигласанг, холингга йиглар бир неча,
Бу сўзима жавоб бергин, бойбича.
Сенинг қизинг тарзин кўрдим, ойимча,
Коражон ҳам ёмон эмас, бекбачча,
Иккови ҳам ўйнаб юрсин ҳар кеча,
Кизинг билан рўзгор қилсин ўлганча,
Бу гапларни ҳазил билма, бойбича.
Бир облога етгай анинг ноласи,

Турган ерим бойнинг кулбахонаси,
Мен бўламан Қоражоннинг энаси.
Неча кизлар Қоражон деб интизор,
Ўзига тенг кўрмас болам зўрабор,
Сен қизингни берсанг, кўнгли хуш бўлар.
Сенинг қизинг Қоражонман баробар,
Ўйнаб-кулса, болам, Қоражон шунқор,
Қоражоннинг айтган қизи шунда бор.
Келин қилиб борсам, кўнгли топилар,
Неча маҳрам Қоражонга хизматкор,
Шул қизингни сенинг бермагинг даркор.

Кампирдан бу сўзни эштиб, бойбича ҳам бир сўз деб турган
екан:

Қозонда қайнаган ширбоз гўш эмас,
Тўрда ўтирган қизнинг боши бўш эмас.
Қизим домот бобосининг улига,
Мол бергани Бойсин-Қўнғирот элида.
Хабар борса, бек Алпомиш келмайми,
Келса Қоражондай ўғлинг ўлмайми,
Қурғур кампир, тек ўтиранг бўлмайми?!
Ҳар ким ўз элида бекми, тўрами,
Қарчифай қарфага емтиқ берами,
Кайсар келса, алплар омон қолами?!
Бир куни бу ердан хабар бормайми,
Бўлган гапни Кўнғирот элда билмайми,
Олтойчилик йўлдан шунқор келмайми,
Қалмоқнинг элига қирғин солмайми,
Қурғур кампир, тек ўтиранг бўлмайми?!
Ҳазон бўлиб боғда гуллар сўлибди,
Обло сенинг ақли-хушинг олибди,
Ҳаёлингга шундай сўзлар келибди,
Қалмоқлардан билсанг Ҳаким голибди(р).
Ҳакимбек киргандир ўн тўрт ёшига,
Қалмоқ тоб бермайди бул савашига,
Чидай олмас Ҳакимбекнинг ишига,
Бир балони сотиб олма бошинга.
Оти Ҳаким, билсанг ўзи зўрабор,
Душман чикиб бўлолмайди баробар,
Қоражон ўғлингни сенинг ўлдирав,
Бу сўзларни айтиб сенга нима бор,
Ўз йўлингга юрсанг бўйми¹ муштипар?!
Обод бўлар, билсанг, Бойсиннинг юрти,

¹Бўлмайдими.

Учар қушдан ўтар бул минган оти,
Мингни чопар кўлда кескир пўлати,
Кўрса душманларнинг қолмас токати,
Асли ўзи Кўнгирот элнинг бекзоди,
Шул қизимнинг бул аташган домоти,
Шул бўлади бир юртнинг валламати,
Сендан зулм кўрсак, бунда келмайми,
Душманларга бир қиёмат килмайми,
Иш кўрсатиб, келиб ёрин олмайми,
Ўз юртига бориб даврон сурмайми,
Мастонмисан, жўн ўтиранг бўлмайми?!

Бу сўзни эшитиб, кампир ҳам бойбичага қараб, бир сўз деб турган экан:

Мехмон бўлдим сендайғачоқ носокка,
Пут кўтардинг исломдаги...
Олтойчилик йўлдан куёв бўлами,
Шундан келиб сенинг қизинг олами,
Келса бул аллардан омон қолами?!
Бойбича, билмадинг айтар сўзингди,
Термилтмагин бунда икки кўзингди,
Тортинмай бера бер Барчин қизингди,
Барчин қизинг Коражонга лозимди(р),
Ҳазил билма менинг айтган сўзимди.
Коражонни куёв қилиб олсана,
Муна элга эркин бўлиб юрсана,
Холинг билиб яхши сўзлаб кўрсанा,
Коражонни ўзингники қилсана,
Ўйланмай биз билан куда бўлсана,
Яхши сўзман Коражонга берсана.
Бермасанг, энаси айтиб бормайми,
Айтган сўзинг ул Коражон билмайми,
Гапингни кўнглига оғир олмайми,
Аччиғланиб от ўйнатиб юрмайми,
Махрамиман келиб қизинг кўрмайми,
Сиёсатман келиб тортиб олмайми,
Ундан кейин юзинг туман бўлмайми,
Тортиб олмоқ ул қўлидан келмайми?!

Бу сўзни эшитиб, бойбича ҳам бир сўз деб турган экан:

Эрисин, тоғларнинг қори эрисин,
Ер остида душман тани чирисин,
Илойим Коражон ўғлинг курисин.
Сен эшигин менинг айтган сўзимни,

Ўғлинг оолмайди Барчин қизимни.
Менинг сўзим ола бердинг қиёма,
Кўлингдан келганин қилгин, аяма!
Қоражонни менга улгу қиласан,
Ўзинг айёр, бир имонсиз, ўласан,
Носоқи сўз бунда айтиб турасан,
Бу мазгилда, кашири, нима қиласан?!

Бу сўзларни айтди унга бойбича,
Қулок соп эшитиб Барчин ойимча,
Ўрлашма, деб ора тушди бир неча.
Бойбичаман кампир анча ўрлашди,
Бир-бириман тура келиб ушлашди,
Иккови тура кеп шундай тирашди,
Тўқиз кампир туриб орага тушди.

Кампирлар буларни айириб қўйди. Мехмонлар ўтиради. Мехмонларни булар ўтқизиб, кўлини ювдириб, дастархон солди. Уч товоқقا ошни сузиб, оп кеп меҳмонларнинг олдига қўйди. Бир товоқ тўртовара бўп қолди. Боғона Коражоннинг энаси зехни койиган, икки гуруч олиб оғзига солди. Бу ёқдаги кампирлар агар уч гуруч олиб оғзига солса, ҳадди йўқ, бошини кесади. Коражоннинг энасидан қўрқанидан булар ҳам икки гуручдан олиб оғзига солди. Уч товоқ ошдан йигирма гуруч камиб қолди. Бўлдик, деб узата берди. Товоқни бериб, фотихани юзига тортиди, меҳмонларни жўнатди. Коражоннинг энаси қарамай илгариди қичаб кетди. Тўқиз кампир корама-қора, булар ҳам кетиб бораяпти, ўзавонида тўнғиллашиб кетиб бораяпти: «Алла нима ейдиган ош бўлган экан. Худо олгур, ўғлингни уйлантирмай ўлгур, ошни егандан кейин ҳам уруш қилмади. Хўп кўрганли бойлар экан. Бул бўлмай, ўзимиз қидириб келсак ҳам шулла қип сийлар экан, эсиз ош қолди, худой олгур ошнинг устида кўнгли коралик қилди. Унга билдиримай, тафи бир қидириб келамиз-да», — деб бораяпти. Коражоннинг энаси илгарида кетди. Коражон ўйлга қараб ётиди.

Қараса, энаси келаяпти, энасини кўриб Коражон: — Қалай, қалай, эна? Бўри бўп келаяпсанми, тулки бўп келаяпсанми? — деди. Энаси айтди: — Болам, мен борган ердан ҳам тулки бўламанми, бўри бўп келаётубман, сени уйлантириб, бу кўйлакларни куда-андаликка кийиб келаётубман. Коражон айтди: «Энам бизни кўрганли ердан уйлантирибди. Энамнинг бош-оёқ сарпойини қилиб юборибди». — Эна, бўри бўлганингдан гапир, — деб турибди. Қилган ишидан билдириб, кампир Коражонга қараб, бир сўз деяпти:

Кулок солгин мендай энанг тилига,
Ораладим мусофири мазгилига,

Мехмон бўлдим Бойсарибой уйига.
Назар қилиб мазгилига қарадим,
Келин килайин деб аввал сўрадим.
Бойсарининг яхши қизи бор экан,
Оти Барчин, ўзи зулфақдор экан,
Бир неча кўрмакка интизор экан,
Атлас кўйлак хўб бир енги тор экан,
Қирқин қизлар унга хизматкор экан.
Ўн тўрт яшар экан, айни камоли,
Бошида пирпирлар ловдон рўмоли,
Ойдайн барқ урар анинг жамоли,
Одами балқитар тегса шамоли,
Бойсарининг шундай қизи бор экан.
Бойбичани кўп ағдариб сўрадим,
Боши бўш эканин тоза синадим,
Сенга аташтириб рўмол ўрадим,
Шу бугун қалиқقا боргин, Коражон.
Ўзбакнинг расими шундай бўлади,
Аташтирган куни қуёв боради.
Шу бугун уялиб, болам, бормасанг,
Эртан сенинг важинг ўтмай қолади,
Ўзбак қизи тайин айниб қолади,
Расимини менга айтиб беради,
Болам, сенга энанг хабар қилади.
Кечга қолма, жоним болам, эрта бор,
Суксурой деган бир сенинг янганг бор,
Куёв келса, бўлармиз деб хабардор,
Жуда ҳам тайинлаб қолди кўп қизлар,
Қандай бўлса, жоним болам, эрта бор.
Оти Барчин экан, ўзи гажақдор,
Ўйнаб-кулиб тарқар кўнглингдан губор,
Бахмал уйда сенга қарап санамлар,
Ўзбак қизлар бари бўлар хизматкор,
Махрамингни олиб болам бирга бор,
Кечга қолма, нима бўлса, эрта бор.
Энангнинг сўзини ҳазил билмагин,
Сен паналаб қоронғида юрмагин,
Куёвман деб сен уялиб турмагин.
Бахмал уй белгили, болам, тикка бор,
Оting ушлаб бари бўлар хабардор,
Кўнғирот қизининг бари йигилар,
Ҳаммаси ҳам хотинингга хизматкор,
Болам, сенинг ёринг бир мохи дилбар,
Жамоллари анинг ойга баробар,
Қандай бўлса, кечга қолмай, эрта бор.

Бу сўэни энаси айтди, энасидан Коражон эшилди, Коражон туриб айтди: — Эна, сенинг бу гапинг қандай бўп кетди, наҳояти бир рўмол ўратиб келгансан, унинг кейинидан биз зингкийиб қалликқа борганимиз айб бўлмайми, юрт кулмайми бул қилган ишингга? Энаси туриб айтди: — Ўзбакларнинг ўзининг расми экан, расми-қаъдасини ўзлари билдириди. Аташтирган куни куёв боради экан. Агар мол берганим йўқ деб шул куни ўйланиб бормай қолса, қизини айниб олади экан, уялган одам хотиндан куруқ колади экан. Уларнинг занги-расми шундай бўлади экан. Қандай бўлса, кечга қолмай, эртароқ бор, — деб энаси ўтиб кетди.

Коражон маҳрамларига айтди: — Бир нечанг жаҳонни сайл этиб юрган, бир нечанг рўзгор кўрган, бир нечанг жаҳонгашта ҳам бўлган, биз ўзбакка куёв бўлдик, ўзбаки расм қилиб борайик, ўзбакнинг куёви не тартиб бўлади экан, ҳеч қайсинг кўрибидинг? Маҳрамлар айтди: — Ҳайит-арафада ўзбакнинг куёвини кўрар эдик. Шийдам бўлиб юрар эди. Салла ўраб, кийиниб турар эди. Хотинлар куёв, деб бир нимасини олар эди, хайтовур ўзбакнинг куёви шундай бўлар эди.

Бу сўэни эшилди, Коражон: — Эса ўзбаки расм қилайик, — деб телпакни ташлаб, янги лиbosлар кийиб, бошига салла ўраб, чотаётир, сира шийдам бўлмайди, фарпайиб кетаётир, сира ўзбак хоҳлайдиган бўлмаётир. Бурун-сўнг салла ўрагани йўқ, шийдам-лаб ўрамоққа ўнгайи келмаётир. Коражон айтди: — Биз ўзбак хоҳлайдиган бўлмадик. Маҳрамлар: — Сизни ўзимиз созлаймиз, — деб тўқсон ботмон темирдан совут кийган алп Қоражонни маҳрамлар отга миндириб, ўн тўрт отнинг якка жиловини олиб, тип-тикка қилиб зингкийтиб, чориб ташлади: — Ана энди ўзбак хоҳлайдиган шийдам бўлдингиз, — деди.

Самарқанднинг миноридай зингкийиб, бути селанглаб, отнинг остига аймасиб, ўн уч маҳрамини бирга олиб, Коражоннинг қалликқа жўнаб бораётган ери:

Коражон бек йўлга кирди,
Маҳрамларин бирга олди,
Чилбир чўлига йўл юрди.
Билган энасин сўзини,
Кўрмакчин сарвинозини,
Олмакчин бийнинг қизини.
Боради шундай зўрабор,
Остида пишқириб тулпор,
Маҳрамлар бўлиб хизматкор,
Бундан бехабар ўзбаклар,
Энасидан билиб шунқор,
Бориб кўрсам дейди дилбар,
Бундан бехабар кўп қизлар,

Ойна күлни ёқалади
Қоражон бекдай айдахор.
Сира күрган йўқдир мундай,
Бу қандай юрган зўрабор,
Хайрон қолди ўзбак эллар.
Бедов отга қамчи чотди,
Уйларига бурилмай ўтди,
Кўп элни оралаб кетди,
Бойсарининг мазгилига
Қоражон яқинлаб етди,
Хали куёв бораяпти,
Бойсарининг ўйин кўриб,
Хар ёкка тенгсалиб ўтди.
Томошага элу халқни қаратди,
Энасин сўзига аҳмоқ бўлибди,
Бойсарининг мазгилига борибди,
Хеч ким хабар олмас бунинг ҳолидан,
Ўз шаънига куёв бўлиб юрибди.
Кийгани гулгун қирмизи,
Қарамайди кўп канизи,
Бехабар ўзбакнинг қизи,
Уйландим деб ҳалак бўлган,
Сарсон Коражоннинг ўзи.
Бунда ўйнаб-куларман, деб,
Ўзбак қизин оларман, деб,
Келиб эди ҳалак бўлиб,
Сулув киз-да, кўрарман, деб.
Ул энаси аҳмоқ қилган,
Чандиб ўзни боғлаб олган,
Жуда шийдам бўларман, деб
Дами қайтиб бунда келган.
Юрибди Коражон полвон,
Қизлар кўриб алвон-алвон,
Хар ёқдан йирилиб келган:
«Бундай юрган қаңдай полвон,
Ўзин бойлаб аҳмоқ қилган,
Билмаймиз не ишда юрган».
Қоражонбек отин бурав,
Уйни айланиб кўп юрар,
«Янгамиз топмади хабар,
Агар билса чопиб келар,
Отни ушлаб хизмат қилас,
Бий қизига олиб борар».

«Янгамиз кўрмай қолди. Мазмуни қизлар бехабар бўлди», —
деб кўп айланиб юрди. «Ана, бир қалмоқ ўзини чориб бойлаб

юрибди-ю», деб кулди. Қоражон күп ҳалак бўлди. Анадай пас-
қам ерга бориб, отдан тушиб, маҳрамларга айтди: — Мени чечиб
кўйинглар, жуда дамим қайтиб кетди. Энаси тушкур бизни алдаб
кетган экан.

Отланиб Кашал форга қараб кетди. Алларнинг қошига етди.
Алларнинг ичига бориб, отдан тушиб туриби. Алларнинг зўри,
тўқсон алпнинг зўри Кўкалдош полвон: — Қоражон, сен
қаёқдан келдинг? — деди. Қоражон айтди: — Биз ўзбакнинг
қизидан, қаллик ўйнаб келаётимиз. Кўкалдош алп туриб айт-
ди: — Жувормак, ўлармисан, бир бало қилармисан, акангнинг
кўзи тирик турганда чечангга қандай қалликка борасан?! Кўшку-
лок деган алп туриб айтди: — Биз қалинидан қутулиб кўйган
қизга туртиниб бориб нима қиласан, бекор ахмоқ бўласан,
офайнини билмай, тийина берсанг, жувормак ўласан, ахмоқ бўп
нимага борасан?! Бу сўзни айтиб, аллар ўтириб, ароқ-шароб
ичиб ўтириш қилди. Файзи сахар вақтида ароқка шағалмаст
бўлиб, (Кўкаман алп) Кўқдўнонни миниб, бир ўзи айрилиб,
кўлга овга чиқиб кетди. Кўлда юриб чошкада овдан қайтди.
Кўлни ёқалаб келаяпти.

Барчин Суксурой деган канизи билан қурут ёядиган сўрининг
остида ўтириб эди. Барчин шундай қаради: кўрди, Кўқдўнонни
ўйнатиб, бир қалмоқ келаётир. Самарқанднинг миноридай зинг-
кийиб, бути аймашиб кетган зўр қалмоқ. Барчин: — Ҳаддили зўр
қалмоқ экан, бизни кўриб, айланишиб юрмасин, — деб ўрнидан
туриб, хиром бўлиб, уйига кириб бораётуб эди. Кўкаман алпнинг
кўзи Барчиннинг сафрисига тушиб қолди. Кўкаман алп отнинг
жиловини тортди, ўз кўнглида бу сўзни ўйлаб бораяпти: «Булар
ётган элибой, бу қизларга бурилиб борайин, булардан бориб
қимиз сўрайин. Қимиз берса, шу қизнинг бирорини оламан, сув
берса, куруқ қоламан, пешонамни шу ердан синаб кўраман,
қандай бўлса, бир ёқли бўламан», — деб бурилиб бориб, қизлар-
га караб, қимиз сўраб турган ери экан:

Устингга кийганинг гулгун қирмизи,
Ақлимни олади жодугар кўзи,
Кўп бўлади элибойнинг қимизи,
Бор бўлса, йўқ дема, ўзбакнинг қизи.
Яна баҳор бўлса очилар гуллар,
Гулни кўрса маст бўп сайдар булбуллар,
Малойик сувратли, гул юзли дилбар,
Қимиз сўраб мендай полвон интизор,
Албатта йўқ дема, турган санамлар,
Давлатимдан шоли-шолдам ўрайман,
Гул тарзим сарғайиб сенга қарайман,
Бор бўлса, йўқ дема, ўзбакнинг қизи,
Бир коса қимизни сендан сўрайман.

Шовқимга иргийди араби тулпор,
Кимиз сүрдим, юрагимда дардим бор,
Кимиз дори деди менга табиблар,
Албатта йўқ дема, қадингдан дилбар.
Кимиз сўраб маҳтал бўлди зўрабор,
Элибойда қимиз деган кўп бўлар,
Албатта йўқ дема, турган муштипар.
Кўкаман дер Кашибордан келаман,
Кўлларни сайр этиб бунда юраман,
Ёқалаган элибойни кўраман,
Элибойда қимиз бор деб биламан,
Сизларга айланиб бунда келаман,
Кимиз дейман, маҳтал бўлиб тураман.
Устингга кийганинг яшилман кўқди(р),
Дардимнинг дориси қимиз бўлибди,
Ул сабабдан маҳтал бўлиб турибди,
Хаяллатмай жўнат мендайин бекди,
Сўраганда қимиз бермай не бўпти?!

Сендейин ойимни яхши кўраман,
Кўнглум тортиб қимиз сўраб келаман,
Кимиз берсанг, жуда дуо қиласман.
Дардманман, дардимдан фориг бўламан,
Кимиз сўраб кўп айланиб тураман.

Бу сўзни эшитиб, Барчин ҳам Кўкаманга қараб, бир сўз деб
турган экан:

Майдон бўлмай, бедов отлар чопилмас,
Кўп чопилса, хаса тулпор собилмас.
Кетгин, қалмок, мундан қимиз топилмас.
Хар ким ўз элинда бекми, тўрами,
Сумбуланинг ярми ўтиб боради,
Аҳмок қалмок, энди қимиз бўлами?!

Қалмок, эшиш энди сўйлаган тилни,
Эгам онсот қилгай бунда мушкулни,
Билсанг, отам қўяберган қулунни.
Дардли қул дардимни кимга ёрайин,
Кимиз сўраб мен ҳам қайди борайин,
Йўқ қимизни қайдан топиб берайин?!

Хазон бўлмай боғда гуллар сўлмаса,
Эгам менинг ақли-хушим олмаса,
Сенга берай десам қимиз бўлмаса,
Кетгин, қалмок, қайдин топиб берайин.
Кимиз сўраб кўп ҳаяллаб турасан,
Бўлак ердан сўра, нима қиласан,
Неча сўзни менга лопи урасан,

Кетгин, қалмоқ, бекор ҳалак бўласан.
Отам давлатида ўйнаб-куламан,
Ёлғончи дунёда даврон сураман,
Сўзинга қайтариб жавоб бераман,
Йўқ қимизни қайдан топиб бераман?!
Кўп айналиб энди бунда турмагин,
Қимиз йўқдир, ўзингни ҳалак қилмагин.

Бу сўзни эшитиб, Кўкаман ҳам бир сўз деб турган экан:

Майдонда минардим бул тўбичноқти,
Хафа қилма, ойим, мендай ғўчchoқти,
Чайиб бергин саба билан кўнакти.
Қимиз сўраб келдим мендайин номдор,
Қимиз дори деган неча такконлар,
Чайиб бергин саба билан кўнакни,
Яхшиликман айтган сўзим шул бўлар.
Сен ҳам бир-бировнинг кўрар кўзисан,
Балки ширин тилда сўйлар сўзисан,
Мен биламан Бойсарининг қизисан,
Қимиз бермай, кўнглим наза қиласан,
Сўз эшитгин менинг айтган тилимдан,
Аччиқлансан ҳар иш келар қўлимдан,
Мусофири бўп келдинг Бойсин элингдан,
Чиқиб энди қимиз бергин қаддингдан,
Вақти хуш бўп кетсин Кўкаман полвон.
Мендай мард қолмасин келган йўлидан,
Қимиз ичиб кетсин қизнинг кўлидан.
Ўзбакнинг қизисан, турган гажакдор,
Қимиз учун кўп бўлганман интизор,
Қимиз берсанг, менинг кўнглим топилар,
Бераойсанг, ойим, бизга не бўлар,
Кўнглингга оғир олма сендейин дилбар,
Сенга айтган гапнинг салти шу бўлар,
Йўқ демагин, сендан қимиз топилар.
Қалмоқ элда мен белгили тўраман,
Душман кўрсам шўр иш — favfo соламан,
Ғанимларнинг кўрсам бошин оламан.
Тўқсон алпнинг мен ҳам бири бўламан,
Дардим бор-да, қимиз сўраб келаман.
Мендайин шунқорни хафа қиласан,
Қандай бўлса сен кўнглингни бўласан,
Кетмайман, бир кося қимиз берасан!

Бу сўзни Кўкаман алпдан эшитиб, Барчин канизига айтди:
— Бу қалмоқ қимизни биздан ирим билан сўраяпти. Бир жом

сув бергин, биздан сувдай совнб кетсин, умидини узиб кетсин. Бу сўзни эшитиб, канизи ўрнидан туриб, жомни олиб, тиниқ сувни солиб, Кўкаман алпга узатди. Кўкаман алп косани кўриб, кимизми, деб қаради, сув эканини билиб, ўз кўзи билан кўриб, аччики келиб, канизнинг билагига қамчи билан солди. Жом жингирлаб ерга тушиб қолди. Суқсур каниз Кўкаман алпдан бу зулмни кўрди. Кўнгли бузилиб, ўз ҳолига бир сўз деб турган экан:

Эрисин, тоғларнинг қори эрисин,
Ер остида душман тани чирисин,
Илойим мусофири юрти курисин.
Кулоқ солмас менинг айтган тилима,
Аччиқ қамчи урди бадбаҳт қўлима,
Муштипарман, қарамади ҳолима,
Мусофири муз қалмоқларнинг элида,
Элдан кўчиб бизлар бунда келганмиз,
Қалмоқлардан кўп таадди кўрганмиз,
Худо қилганига рози бўлганмиз,
Қамчи ўтиб конлар йиғлаб қолганмиз,
Мунғайиб йиғлайди мендай муштипар,
Бу юртларда балки бизлар хору зор,
Аччиқ қамчи мени урди қалмоқлар.
Кутимадик бундай қайфу зулмдан,
Муштипарман, не иш келсин қўлимдан,
Бир гап билан чикиб ўсган элимдан,
Кулоқ солмас ҳеч ким айтган додима,
Қалмоқлар қамчиси тегди этима,
Кўнглим бўлиб бунда йиғлаб тураман,
Йиғлаганман нима илож қиласман,
Ҳар гап бўлса, тақдиримдан кўраман,
Мунглуқман-да, нима илож қиласман.

Каниздан бу сўзни эшитиб, Кўкаман бир сўз деб турган экан:

Арзим эшит ўзбак қизи,
Ақлимдолар жоду кўзи.
Мен сени оларим бордир,
Сенинг Бойсари отангни
Бул дорга иларим бордир,
Сенинг ҳам тукқан энангнинг
Бошини юларим бордир,
Тўқсон алпни қуда килиб,
Эргаштиб келарим бордир.
Мен сени зўрликман оларим бордир,
Дўланиб кўйинингга киарарим бордир,
Новвосдай бўп сени суарарим бордир.

Билгин, Кўкаманинг кўнгли қабарди.
Агар билсанг, аллар хабар топади,
От ўйнатиб, бари йигилиб келади,
Қора кунни ўзбакларга солади,
Ўзбакнинг кўлидан нима келади?!
Зўрлик билан сени тортиб олади,
Сени олиб тайин менга беради,
Алп Кўкаман билганидай қиласди,
Ундан кейин ҳолинг қандай бўлади?!
Кўкамандай алпнинг кўнглин бўласан,
Сурхайл энамга келин бўласан,
Мазгилимда чалқиб даврон сурасан,
Шунда менинг зўрлигимни биласан,
Қалмоқ элда хўп бир ўйнаб-куласан,
Бизнинг билан энди бирга борасан.
Аччиқлансан отга қамчи чотарман,
Қиличимга қирмизи қон қотарман,
Элибойнинг барин изиллатарман,
Зўрлик билан сени олиб кетарман.
Ўйнаб-кулиб бориб бирга ётарман.

Бу сўзни эшитиб, Барчин ҳам Кўкаман алпга қараб, бир сўз
деб турган экан:

Хар сўзимни ола бердинг қиёма,
Қўлингдан келганин қилгин, аяма.
Мени олмоқча ҳаддинг борми, қалмоқлар,
Ўз йўлингга бора бергин, бадбаҳтлар.
Оти Алпомиш ёрим бордир,
Чакасда шунқорим бордир,
Элда зўраборим бордир,
Қатордаги норим бордир.
Чилла кирганда маст бўлган,
Хатапга бошини урган,
Не зўрларнинг додин берган,
Қўнриотда қайсарим бордир.
Хабар борса, бек Алпомиш келмайми,
Хоним келса, сендан қалмоқ ўлмайми,
Ҳолинг билиб тўғри юрсанг бўлмайми?!
Келса келар Қўнриот элдан Алпомиш,
Келмаса, мен тақдиримдан кўярман,
Эркак либосини ўзим киярман,
Бор кучимни билагима жиярман,
Кирқ мингини бир деб санаб қиарман.
Мени олмоқ ҳаддинг борми, бадбаҳтлар!
Барчин сулув дейди менинг ўзимди,

Лоф урган қалмокқа ўлим лозимди(р).
Киларман, қалмоқлар, сенинг ишиңгни,
Мунглук дема, мен кесарман бошиңгни,
Сулатай, душманлар, гавда-лошиңгни,
Килолмай қоларсан бунда ишиңгни.
Бул охимни бир оллога еткариб,
Бундай кунда ҳожатимни биткариб,
Бора бергин ўз йүлингга, қалмоқлар,
Мен оларман ўз бошимни қуткариб.
Ўзбакнинг кизи деб бунда турмагин,
Кетгин, бадбаҳт, келган йўлдан қолмагин,
Аччиқландим, армон билан ўлмагин,
Кетгин, бадбаҳт, бунда ҳаял қилмагин.

Бу сўзни Кўкаман алп эшитиб, ҳеч кимдан бундай катта гап эшишган йўқ эди, отнинг бошини буриб, йўлга кириб, аччиғига чидай олмай, отнинг устида айикдай чинқириб кетиб бораёттир. Бориб, алларнинг ичida, Кашиб горида кўзини ёшлиб, ўзини отдан ташлиб, отасига кингирилк¹ қилган боладай, оёғини ти-пирчилатиб, йиглай берди. Буни кўриб, Кўкалдош акаси: — Менинг эсонлигимда сенга кимдан таадди ўтди. Агар подшоман, деб Қалмоқшоҳ таадди қилса, от устидан бориб, шоҳнинг қизини сенга олиб берайин, — деб кўнглини сўраб, бир сўз айтиб турган экан:

Ў, кимдан таадди ўтди, Кўкаман,
Ёлғон айтма, ростин айтгин Кўкаман,
Ёлғон айтсанг.....
Ўтирик сўз сўйламагин бул замон.
Аччиқ билан мен отимни минарман,
Нор кесар олмосни белга бўғарман,
Файрат билан Қалмоқшоҳга борарман,
Подшоҳман деб шоҳинг қилса таадди,
Қалмоқшоҳнинг тандан бошин юларман,
Зўрлигимни бориб маълум қиларман.
Шоҳнинг қизин сенга олиб берарман,
Шоҳнинг Товқа қизин олиб берарман,
Ким таадди қилса, турмай борарман,
Ундай зўрни билганимдай қиларман.
Ёлғон айтмай, ростин айтгин бул замон,
Таадди қилганга бермасман омон,
Бориб солай унга қоронғи туман,
Қизи бўлса, олиб берай шул замон.

¹Кийиклик.

Ох уриб, тўкилиб кўзингдаи ёшинг,
Нега хафа бўлиб келдинг эмиқдошим,
Қандай гапга сенинг гангиган бошинг.
Бундай кунда сенинг ҳолинг сўрайин,
Акангман-да, қариндошлиқ қилайн,
Қандай одам бўлса мен ҳам борайин,
Моли-мулкин бориб талон қилайн,
Кизи бўлса, сенга олиб берайин,
Тўғри гапир, кўнглингдагин билайн.

Бу сўэни эшитиб, Кўкаман Кўкалдошга қараб, сир-ахволини билдириб, бир сўз айтиб турган экан:

Кулоқ соп эшитгин айтган нолага,
Банда кўнар ҳақдин келган чорага,
Бедов чопсанг сувсиз қойим далага,
Бегуноҳ шоҳимни қўшма орага.
Сен эшитгин Кўкаманнинг сўзини,
Сарғайтирма мендай ининг юзини,
Ўлайин, олмайман шоҳнинг қизини.
Жафо тифи букун жондан ўтибди,
Айролик ханжари бағрим йиртибди,
Ўзбак қиздан бир таадди ўтибди,
Мендай ининг жуда конлар ютибди.
Киз холиман неча лопи сўзлади,
Гапи ўтиб, бағрим кесиб тузлади,
Ул сабабдан мендай ининг бўзлади.
Кўнглим сўраб меҳрибонлик қиласан,
Кўнглим сўраб менга раҳбар бўласан,
Шул ўзбакнинг қизин олиб берасан.
Ўзбак қизин олиб бергин, кўрайин,
Сенинг раҳбарлигинг мен ҳам билайн,
Бўлмаса бу юртда қандай юрайин?!
Бошимдолиб, ака, бундан жўнайин.
Сўз сўзладим, аввал қулоқ солгандир,
Ул қиз сўнгра менга изза бергандир,
Мендай ининг шунга хафа бўлгандир,
Кўнглин хурсанд қилсанг мендай полвонди,
Ўзбак қизин ининг олмоқ бўлгандир.

Бў сўэни эшитиб, Кўкалдош полвон: — А жувормак, аканг-нинг кўзи тирик турганда, чечангга бориб тегинсанг, шундай таадди қиласи-да, пўқ ейсанми унга бориб, — (деди). Шул вактда Коражон келиб: — Биз қаллиқ ўйнаб юрган қизга сен туртиниб бориб (юрибсанми? — деди). Кўшқулоқ алп (айтибди): — Биз қалинидан кутулиб, қалин молини бериб, олмоқчи

бўлиб юрган қизга ҳар қайсинг нимага борасан уриниб?! Кўк-
кашқа деган алп келиб, Кўкаманинг бир муштлади: — У қиз
билин биз ваъда қилиб, ул тегмоқчин, биз олмоқчин бўлиб, ҳар
қайсинг нимага борасан уриниб?! Алпларнинг ҳар қайсиси ҳам
кўтарилиб: «Сенми, ўзбакнинг қизини оладиган», — деб ҳар
қайсиси бир муштлаб ўтаётир. Ҳар алпнинг мушти текканда,
Кўкаманинг устига тоғнинг чўққиси қулагандай бўлиб ётири.
Алплар яна бир кўтарилиб босилди. Кўкалдош алп туриб айтди:
— Бундай далада чатоқ қилиб юрганимиз бўлмас, юринглар,
тўқсонимиз ҳам борайик, ўзбакнинг қизини ё биримиз олайик,
ё баримиз олайик. Ўртада жовлик хотинли бўп қолайик, — деб
жовлик отланди. Отини миниб, Кашал горидан жўнаб, Тўқайис-
тонни оралаб, Чилбир чўлига чиқиб, кўп элга қараб, Бойсари-
никини сўраб, алплар бориб қолди. Хаммаси Бойсарининг уйи-
нинг теварагида жам бўлди. Алплар тўпланиб турди. Тўқсон
алпнинг зўри Кўкалдош: — Келган бой! — деб чакирди. Бойса-
ри уйда ўтириб эди: «Оббо, келган бойданоқ қулогимиз тинма-
ди», — деди. — Лаббай, — деб уйидан чиқди. Тўқсон алпнинг
зўри Кўкалдош туриб айтди: — Келган бой, сенинг бир қизинг
бор экан, қани, биримизга берасанми, баримизга берасанми?
Биримиз олайикми, ё баримиз олайикми, ё ўртада хотинли бўп
қолайикми? Шу сўзга нима жавоб айтасан? Бу сўзни эшишиб,
Бойсари нима жавоб айтарини билмай, хаёли қочиб, нашъаси
учиб, ўйланиб: — Ҳой алплар, эртан чошкагачайин муҳлат бе-
рингизлар, эртан чошкада айланиб келингизлар, ё бирингизга
берайик, ё барингизга берайик, бир бир ўйлашиб кўрайик, —
деди.

Эртан чошкагачайин муҳлат бериб алплар қайтди. Бора ту-
риб алплар айтди: — Бу тўқсонимиз бир ерда ётсақ, тонг отганча
мен оламан, мен оламан, деб тўбалашиб чиқармиз. Бирори: —
Ўнта-ўнта бўп кетайик, — деди. Бирори айтди: — Бешта-бешта
бўп кетамиз. Бирори айтди: — Учта-учта бўп кетамиз. Бирори: —
Иккита-иккита бўп кетамиз, тонг отганча ҳангама қип ётамиз, —
деди. Бирори: — Хўп биласан экан. Битта-битта бўп кетамиз,
иккита-иккита бўп кетсан, ора очар қиласидиган одам йўқ, зўри
кам зўрини бўғиб ўлдириб қўяди, битта-битта бўп кетамиз, —
деди. Бу гап ҳаммасига маъкул тушди. Қофотон тони дер эди.
Қофотон тоғининг тўқсон дараси бор эди. Тўқсон алп Қофотон
тоғининг тўқсон дарасига кириб кетди. Ҳар қайсиси бир дарада
бир-бирига ёнашмай, айиқдан чинкириб юриди.

Энди Бойсари семиз қўйларни сўйиб, ўн минг уйли Кўнғирот
элининг одамиман деганини жийиб, шўрвасига тўйиб, гўштини
корсонга соп, олдига оп кеп қўйиб: — Бурунги қунимиз ҳам
тузук экан, ишимиз соп зўрга тушди. Эртан чошка алплар келса,
нимага жавоб берамиш? — деб қариндошларига қараб, Бойсари
маслаҳат сўраб, бир сўз деб турган экан:

Ох тортганда күздан оқар селоб ёш,
Барчинойим бўй етгандир, қалам қош,
Маслаҳат бер, ўн минг уйли қариндош.
Алплар келса, нима жавоб бераман,
Азали тақдирга нимиш қиласман,
Тонг отганча муҳлат олиб тураман,
Қалмоқларга қизим қандай бераман?
Юрагим тўлгандир дийдаи ғамда,
Барчинойни тенгкурига қўшмасам,
Маҳшар куни Барчин қўли ёқамда.
Кўрдим бунда алплар жуда зўрабор,
Бунинг билан бўлолмасам баробар,
Эрта чошка бунда келади алплар,
Бир маслаҳат, қариндошлар, беринглар.
Ўз элимда мен ҳам юрган тўраман,
Бунда келиб мусофирилик қўраман,
Бу алпларга қандай тўғри бўламан,
Қалмоқларга нима жавоб бераман?
Каттиқ бўлди бул менинг кўрган ишим,
Фалакка етгай-да йиглаб нолишим,
Мусофирилан, энди гангиди бошим,
Катта-кичик, турган бул қариндошим,
Захар бўлди бул менинг ичган ошим,
Ҳамманг менинг элда юрган сирдошим.
Маслаҳат бер, энди сендан сўрайин,
Бадбахтларга қандай жавоб берайнин,
Азал қисмат тақдиримдан кўрайин.

Бу сўзни эшитиб, турган халойиқлардан ҳеч сазо чиқмади.
Бир Яртибой оқсоқол дегани бор эди. Бойсарига караб, Яртибой
бир сўз деб турган экан:

Хон Бойсари, эшит айтган сўзимди,
Бул элларга бошлаб келган ўзингди,
Тортинмай бера бер энди қизингди,
Ҳазил билма менинг айтган сўзимди.
Бу алпларни куёв қилиб оламиз,
Муна элга тоза эркин бўламиз,
Болаларни тоға-жиян қиласмиз,
Қариндош бўп биз катнашиб юрамиз,
Эллининг зўри алплар экан, биламиз,
Муна элда бизлар даврон сурамиз,
Маслаҳатни сенга шундай берамиз.
Бу юртда белгили экан бул алплар,
Алпларга муносиб сенинг қизинг бор,
Бул алпларни куёв қилмоғинг даркор,



Тортинмай қизингни, шоҳим, бера кўр.
Жаҳонни сайл этиб бунда келгансан,
Алпнинг сўзин билиб хафа бўлгансан,
Кўнглингга оғир олиб юргансан,
Сенинг нафинг алплар қилган, билмайсан.
Агар алплар олағойса қизингди,
Зўр қиласи бу элатга ўзингди,
Бу алпларга бера бермоқ лозимди(р).
Муна юртда катта бўлиб юрасан,
Хаёлингни ҳар алвонга бўласан,
Не сабабдан, шоҳим, хафа бўласан,
Бу зўрларга сен қизингни берасан,
Чин бермасанг, икки бошдан ўласан,
Сен кўрқкан сўнг айтганини қиласан,
Бекор сен ўзингни абгор қиласан.
Аччиғланса ўяр икки кўзингни,
Зўрлик билан олар сенинг қизингни,
Юз дод қилсанг, эшитмайди сўзингни.
Кўрдингми сен, алплар шундайин қайсар,
Ҳар қайси ишқирган шундай айдахор,
Бул элатда ким бўлар сенга раҳбар,
Барчинни алпларга бермоғинг даркор,
Яртибойнинг насиҳати шул бўлар.

Бу сўзни Яртибойдан эшитиб, Бойсарининг кўнгли бузилиб,
бу ҳам бир сўз деб турган экан:

Юрагим тўлгандир дийдаи ғамда,
Мусоғирлик элда бўлдим шарманда,
АЗоб тортди ширин жоним бу танди,
Хузур кўрмай мусоғирлик маконда.
Юрагимда кўпdir аламли дардлар,
Менинг қизим — сенинг синглинг, номардлар.
Қизинг бер деб менинг кўнглим бўласан,
Суягимни ёнган ўтга соласан,
Калмоқлардан бадтар изза қиласан.
Хафа фалак солди бошимга зулм,
Мусоғирман, кирқ газ чўқди кўнгилим,
Бемахал етмади қайтайин ўлим,
Харобат қип мен гулистон мазгилим.
Сўз сўзлашиб мен баробар келмасам,
Мен ўрлашиб унга жавоб бермасам,
Қазом етиб бундай кунда ўлмасам,
Кариндошдан ҳеч бир нажот кўрмасам,
Хафа бўлдим, сўзга кулоқ солмасам,
Бермайман деб мен баробар келмасам.

Фарид бўлдим келиб Бойсин элидан,
Хеч иш келмас мендай бийнинг кўлидан,
Хафаликдан дикқат бўлиб ўлдимман.
Тонг отган сўнг битар алплар мухлати,
Зиёдадир Бойсарининг кулфати,
Маслаҳат бермади турган улфати,
Колмади Бойсарибийнинг тоқати.

Бу сўзни Бойсари айтди. «Шу қариндошлардан нима маслаҳат чиқар экан», — деб Барчин келиб, тинглаб туриб эди. Қариндошларининг гапирган сўзларини эшитиб, отасининг кўнгли бузилганини билиб, Барчин ҳам бир сўз деб турган экан:

Жуда ҳам гангиди, бой ота, бошинг,
Маслаҳат берди-ку қавми-қардошинг,
Кўп йиғлама, жоним отам, дарвишим.
Эшиитмагин қариндошлар сўзини,
Куёв қилсан тўқсон алпнинг ўзини,
Қариндошлар бера берсин қизини!
Сен ийғладинг, ота, кўнглим бузилди,
Дийда гирён бўлиб бағрим эзилди,
Хафа қилма, ота, мендай қизингди,
Кўя бер алпларга менинг ўзимди.
Қалмоқларга жавоб бермоғим даркор,
Хафа бўлсанг, менинг кўнглим бузилар,
Ул алпларга мен бўларман баробар,
Хафа бўлма, ота, ўзимга бошқар,
Жазосини кўриб кетсин қалмоқлар.
Ярашиқقا мен зулфимни тараарман,
Қалмоқларга гапирмоқка ярарман,
Нима деса, ота, жавоб берарман,
Хафа бўлманг, ота, кўнглинг сўрарман.
Менинг учун кўп жафони кўрасан,
Булардан маслаҳат сўраб турасан,
Хўб маслаҳат берди, ота, биласан,
Гапига қандайин қулоқ соласан,
Изза бўлиб энди кўнглинг бўласан.
Хаёлинга қийин бўлгандир ишинг,
Мен биламан жуда гангиган бошинг,
Хафа бўлма, жоним отам, дарвишим.
Хар на деб амр этсанг, ани қилайин,
Қаерда амр этсанг, бориб турайин,
Бул алпларга ўзим жавоб берайин.

Бул сўзни Барчиндан эшитиб, ўн минг уйли Кўнғирот ҳазар килди: — Бу ҳам ўзбошимча жувормак, алпларга баланд-паст

гапирап, бунинг касофатига ҳаммамизни оёқ-ости қип босиб кетар. Жавоб бергич бўлса, бизнинг ичимиздан чиқиб, холис ерда туриб жавоб берсин, — деди.

Ўн минг уйли Қўнғиротдан чиқариб, Барчиннинг ўтовини кўтариб, хўй, анадай овлоқ тепанинг бошига тикиб кўйди. Бул ўтова кирқин канизлари билан Барчин ўтириди. Куннинг бурни билан Қоғотон тоғининг тўқсон дарасидан тўқсон алп йифилиб, жам бўлиб, чошкада зинкийиб, Бойсариникига йифилиб кеп туриби: — Қани келган бой, маслаҳатни қаерга қўйдинг, биримизга бермоқчи бўлдингми, баримизга бермоқчи бўлдингми? Бойсари туриб айтди: — Биз маслаҳат қип, йил ағдариб кўрдик, қизимизнинг йили чичқон экан, ёши ўн тўртга чиқсан экан, бизнинг ўзбакнинг расми шундай бўлади: киз ўн тўртга чиқсан сўнг ўз ихтиёри ўзида қолади, бизнинг айтганимизга кўнмай, тепанинг бошига ўтовини тикиб ўтириби, ўзига борингизлар, ўзидан сўрангизлар, бирингизга тиями, барингизга тиями, ўзидан сўраб билингизлар.

Шунда қалмоклар дўғилиб, Барчиннинг устига қараб бора берди. Бора бергандаги сўзи:

Боради отлари ўйнаб,
Бир нечаси чечан сўйлаб,
Менга тегарми, деб ўйлаб,
Бир нечаси муртин бураб,
Узангига оёқ тираб,
Боради Барчинга қараб,
Бийнинг қизин кўрармиз, деб,
Ҳаммаси ҳам олармиз, деб,
Бораётир бу қалмоклар
Биз хотинли бўлармиз, деб.
Бийнинг қизи бизни кўрар,
Агар тегса ҳузур килар,
Бирорвимизни хоҳлаб олар.
Барчин турур ҳурдай бўлиб,
Тиши гавҳар дурдай бўлиб,
Жамоллари ойдай бўлиб,
Мисли асов тойдай бўлиб,
Сағрилари ёйдай бўлиб,
Бир минг қўйли бойдай бўлиб,
Кўзи қуралайдай бўлиб,
Кўрганларнинг кўнгли тўлиб,
Канизлар билан жам бўлиб,
Ўйин, кулги, даврон сурисиб,
Кўнгилдан губорин олиб,
Канизлар кўп хизмат қилиб,
Бий қизи деб ҳурмат қилиб,

Сүксуройим күнглиң олиб.
Хаммалари бирдай бўлиб,
Боғдочилган гулдай бўлиб,
Чаманда булбулдай бўлиб,
Ўтириб эди сухбат қуриб,
Қалмоқ борди шердай бўлиб.
Барчиной қалмоқни кўрди,
Канизлар кўп шошиб қолди,
Қалмоқ алплари тўпланди.
«Бийнинг кизи ўтиргандир,
Келганимизни билгандир,
Бизни ихтиёр қилгандир.
Ўзидан бир сўз чикар», деб
Қалмоқ сўзламай тургандир.
Ийманиб бунча канизлар,
Парво қилмас Барчин дилбар,
«Ўзи бизга сўз қотар», — деб
Умид қилгандир қалмоқлар,
Қарамайди санам қизлар,
Холин билмайди бадбаҳтлар.
«Бирорвимизни хоҳлар», — дейди,
Тенгсалиб юрур қалмоқлар,
Ҳалак бўлгандир бадбаҳтлар,
Писанд қилмай ўтирибди,
Ўзбак кизи Барчин дилбар.

Қалмоқлар: «Ё бирорвимизга тегар, ё баримизга тегар, ўзидан бир сўз чикар», — деб то тушнинг олдигачайин тенгсалиб кўрикдан ўтиб юрибди. Неча марта кўрикдан ўтди, тўқсон алпнинг зўри Кўкалдош: — Бир ахмоқ қилмаганинг бизлар қолибмидик, ё биримизга тег, ё баримизга тег, бир жавоб айт, биз шуйтиб тенгсалиб юрамизми? — деди. Бу сўёни эшишиб, Барчин бир сўз деб турган экан:

Эшигин, қалмоқлар, айтган тилимман,
Мени олар келмас сенинг қўлингнан,
Бадбаҳт қалмоқ, қолма келган йўлингнан.
Мени олмоққа ҳаддинг борми, қалмоқлар,
Ўз йўлингга бора бергин, ахмоқлар.
Мени оларман деб хаёл қилмагин,
Кетгин, қалмоқ, келган йўлдан қолмагин.
Унга қурбон мендай ойимнинг жони,
Менинг тўрам, билсанг, Бойсин сultonи,
Оти Ҳакимбекдир, элда даврони,
Кўп айланма бунда, қалмоқ, бемаъни.
Хабар етса алп Алномиш келмайми,

Қалмоқларга қиёмат кун бўлмайми,
Армон билан сендан аллар ўлмайми,
Холинг билиб, тўғри юрсанг бўлмайми?!
Менманликман баринг бунда келасан,
Келган билан мени нима қиласан!
Сўз айтқичи сенга мендай муштипар,
Билсанг, мен ҳам, қалмоқ, сенга баробар.
Лочиндай айналма бунда, аҳмоқлар,
Бора бергин ўз йўлингга бадбаҳтлар.
Ҳар замон тўпланиб бунда келасан,
Аҳмоқ, қалмоқ, мени нима қиласан!

Бу сўзни эшитиб, Кўкалдош алп туриб айтди: — Бу ўзбакнинг қизининг дами баланд экан. Кўкаман! Тушиб судраб чик бу ёққа! Кўкаман алп отдан тушиб, отни уйнинг белдовига илдириб, боғана қимиз сўраб аламзада бўлган, уйнинг ичкарисига кирган, Барчиннинг канизлари қўркиб, уйнинг тўрида тўпланиб турган. Барчин ибо қилиб тескариб қараб туриб эди, Кўкаман алп Барчиннинг бурумидан ушлаб, пойгага қараб торта бошлади. Барчин ўзини ўнгариб, қўлини узатди, бир қўли Кўкаманнинг ёқасига етди, бир қўли билан белборидан тутди. «Э, Шоҳимардон пирим», — деб кўтариб, чалқарамон қилиб ерга қўйди. Чап тиззасини кўкрагига қўйиб турди. Оғзи-бурнидан дирак-дирак қонкета берди. Кўкалдош алп туриб айтди: — Кўкаманга каранглар, бу кўринмай, бу ёққа чиқмади. Ўзбакнинг қизи билан айланнишиб қолдими? Шундай келиб, бирори от устидан қараб, Кўкаманин кўриб: — Эй, ўзбакнинг қизи Кўкаманин босиб ўлдириб қўйибди, — деди. Бу сўзни эшитиб, бир кам тўқсон алп отдан ташлайдерди. Барчин алларнинг аччиқ билан отдан тушганини билиб, қараб кўрди, алларнинг зўри Кўкалдош эканини билди: зўрликномига бошида тилла жигаси бор, остида суворага миниб юрган саман йўргаси бор. Бошидаги саржифани кўриб, алларнинг зўри эканини билиб, алларга қараб, олти ойга муҳлат сўраб, бир сўз деб турган ери экан:

Устима кийганим менинг яшил кўк,
Фариблиқда бўлармикан кўнгил тўк,
Саман отли, саржифали бек йигит,
Бир олтойга сиздан мухлат сўрайин.
Калма шаҳодат мусурмоннинг тилига,
Бизлар қолдик айрилиқнинг ҳилига,
Мусофириз муна қалмоқ элига,
Хозир музтар бўлдик қалмоқ кўлига,
Мол берганим Бойсин-Кўнгиrot элига.
Бир олтойга сиздан мухлат сўрайин,
Кўнгиrot элга арза бериб кўрайин,

Олтойгача мен йўлига қарайин,
Келса келар Кўнғирот элдан Алпомиш,
Келмаса, мен тақдиримдан кўрайин,
Сўнгра мен ҳам бировингман бўлайин.
Бир олтойга сиздан мухлат сўрайин.
Олмадайин сўлган гулдай тарзим бор,
Муштипарман сизга айтар арзим бор.
Сизга ҳамроҳ бўпти неча йигитлар,
Мухлат сўраб мендай ойим арз қилар,
Бир нечалар ўз ҳолидан бехабар,
Сен экансан, қалмок элда зўрабор,
Мендай қизнинг айтган сўзи шул бўлар.
Аввал обло, дуюм наби бўлса ёр,
Мусофирик мунга элда хору зор,
Мухлат сўраб турган мендай гажакдор,
Олтой мухлат беринг давлатли шункор.
Бу гап энди Кўкалдошга хуш келар,
Бул алпларнинг димоги кўп чор бўлар,
Алпларга ёқимли Барчиннинг сўзи,
«Одамни англади ўзбакнинг қизи,
Ақлингни олади бу жоду кўзи,
Чирпиллаб ўтириди сўйлаган сўзи,
Қошида хизматкор неча канизи.
Айтар сўзин билмас эди бир неча,
Тар хинали келган, ўзи ойимча,
Ўйнаб-кулсанг булар билан ўлганча,
Хасратидан жафо тортар бир неча.
Сўз сўзласа, одам ақлин олганди,
Нечовлар етолмай ҳалак бўлганди,
Айтган сўзи бизга маъқул келганди,
Балки яхши билди мендай полвонди,
Шундай ойим билан қилсанг давронди,
Балки сўзи кўнгли бордай бўлганди».

«Бизда кўнгли бор экан», — деб Кўкалдош алп вақти хуш бўлиб: «Алпларнинг ичида мени хоҳлагандай бўлди, балки меннинг зўрлигимни ҳам би-ди, бизга кўнгил қилди», — деб. — Бор олти ойга мухлат, — деб юборди. Ҳадди йўқ, ўзга алплар ҳам «Олти ойга мухлат», — деяпти. Кўкаманин кўя берди, бул ҳам ўрнидан туриб: «Олти ойга мухлат», — деб бораяпти. Олти ойгача алплар бурулмас бўп қайтди, йўлда алплар чақчақлашиб бораяпти. Бир нечаси айтади: — Қалай, Кўкаман, шу ўзбакнинг қизини олиб берсак, оларсанми, шунинг билан ҳам ватан-рўзгор қиласанми, чап тиззаси кўкрагингга тегса, оғзи-бурнингдан қонинг кетиб ўларсанми? Кўкаман алп туриб айтди: — Сизлар тарз аҳмоқсизлар, мен сизларнинг қайсингдан камман, тўқсон ботмон

төмөрдан совут кийсам, түқсон ширбознинг этини таътил қилсан,
түқсон алпнинг бири бўлсан, шу ўзбакнинг қизи айтади хар
сўзининг ўралида:

Оти Алпомиш ёrim бордир,
Элда зўраборим бордир,
Қатордаги норим бордир,
Шундайин қайсарим бордир.
Чилла кирганда маст бўлган,
Хатапга бошини урган,
Душманларнинг додин берган,
Элда зўраборим бордир, —

деб ўзбакнинг қизи хар сўзининг ўралида айтади, лекин бунинг
норининг бори ҳам рост, элдаги зўрининг бори ҳам рост, бунинг
мояси шундай, нори ким қандай?! Бундай тегина берсанглар, бир
кунлари шунинг нори келар, бошимизга бало бўлар, бизга чич-
қон ини минг танга бўп қолар. Менга солсанглар, шунинг олти
ойи ҳам курсин, ҳамишаги бўйдоқчилигимиз-да, шу ўзбакнинг
кизини чўртта қўйсак дейман, — деди. Алплар бу сўзни айтиб,
мазгилига қайтиб кетди.

Барчин ўн минг уйли Кўнғиротнинг йигитидан ўн йигитни
сайлаб олди, отасининг тўқсон тўқай йилқисидан ўн отни сайлаб
олди, отларни совутиб, тамом қилди. Шунда шундай арза ёзди
Барчин: «Олти ойчилик йўлга келдим, қалмоқнинг элига кел-
дим, зўр ёвнинг қўлида қолдим, олти ойга муҳлат олдим, мендан
умиди бўлса, Алпомиш келсин, бўлмаса, жавобимни берсин».
Арзани ўн бойбачага топширди, отларни эгарлаб, чоклаб, яхши
бор, — деб дуо килиб, бир сўз айтиб турган экан:

Кечани мунааввар қилар тўлган ой,
Савашли кун тортилади парли ёй,
Бандам десин, раҳм айласин бир худой,
Кашалда талащда қолди Барчиной.
Борсанг, салом ўйнаб-ўсган эллара,
Кўкқамишдай мазгил жойим, чўллара.
Қалмоқлар йиглатди мендай санамди,
Юрагимга тўлган дофу аламди(р),
Албатта сўранглар мактаб жўрамди.
Муғойиб сўз айтар мендай муштипар,
Кеча-қундуз шабгир тортинг, хизматкор,
Жиловдоринг бўлсин имом, чилтанлар,
Бойсин юртда қолган қавму қардошим,
Бул элда сел бўлди менинг кўз ёшим,
Мусофирилик юртда гангиди бошим,
Менга ҳамдам бўлолмади ҳеч кишим.

Мендейин мунглиқнинг кўнглини бўлади,
Қалмоқ бари қайғу, зулм солади,
Олти ойга Барчин муҳлат олади,
Қалмоқ элда мусофирир бўп жилади.
Бир олтойга зўрдан муҳлат сўради,
Бойбаччалар хизмат қилиб боради.
Ошикнинг фаҳмидирир қоронғи кеча,
Йигласам, холима йиглар бир неча,
Кечакундуз тинмай юринг, бойбачча,
Борсанг, салом ўйнаб-ўсган эллара.
Кечакундуз тинмай йўлни олинглар,
Бий бобома бул хабарни беринглар,
Катта-кичик ҳамма дуо қилинглар,
Элда қолган қариндошни кўринглар.
Сўз айтар сизларга мендайин санам,
Қалмоқда қолмасин гулдайин танам,
Қалмоқнинг зулмидан йиғлади энам.
Худойим кечиргай қилган хатомни,
Хафа қилдим Бойсаридай отамни,
Сен бориб кўрарсан Кўнғирот элимни,
Бошимдан кўтарсин қайғу, зулмни.
Кўнғирот элда бордир неча сирдошим,
Ҳамдам бўлиб бирга юрган йўлдошим,
Оға-иним, элимда денги-дўшим,
Хизмат қилинг, онсот бўлгай бул ишим.
Бу сўзни айтиб Барчин дуо қиласи,
Улуғ-катта бари йиғилиб келади,
Кўл очибуларга дуо қиласи,
Элчи бўлиб Кўнғирот элга жўнади.
От белига чопар минди,
Барчиннинг арзасин олди,
Ҳамма дуо қилиб қолди,
Арзачилар йўлга кирди.
Кўнғирот элга йўлни бошлаб,
Бедов боради ангифишлаб,
Чопарларнинг кўнглини хушлаб,
Қамчи ургандир қулочлаб,
Остидаги араби отлар
Йўлда юрар яшин ташлаб.
Бедов отга қамчи чотди,
Урган қамчи симдай ботди,
Чопарлар қистаб йўл тортди,
Неча адр, белдан ўтди,
Чопарлар қилиб ғайратди,
Кечакундуз шабгир тортди,
Кўрсак дейди Бойсин юртди.

Бўлиб Барчинга хизматкор,
Яқин бўлар узоқ йўллар,
Бораётган ўн диловар,
Шуйтиб йўл тортди чопарлар.
Неча дарбанд, белдан ошди,
Гоҳ йўлларда ақли шоши,
Гоҳларда йўлдан адашди,
Яна қайтиб йўлга тушди,
Неча бел, тоғлардан ошди.
Ҳавода бор ёруғ юлдуз,
Дарёда ўйнайди қундуз,
Йўл юради кеча-қундуз.
Бедовлар селдаланг отди,
Чув-ха, деди, қамчи тортди,
Остидаги араби отлар
Кунба-кун бўйнин узатди,
Совиб қорсокдайин қотди,
Йўлларнинг танобин тортди,
Не йўлларни тўзон тутди,
Гоҳи кечалар йўл тортди,
Барчин деб қилди гайратди,
Ахтаради Бойсин юртди,
Тинмайин чопар йўл тортди.
Узокдир Кўнғирот ораси,
Ёмон тоғларнинг дараси.
Билмайди юртдан хабарди,
Чарчатади чопарларди,
Тўқсон белдор тоги борди(р).
Юриб ўтиб бораёттир
Неча бир қия йўлларди.
Излагани Кўнғирот хони,
Чарчайди мингган ҳайвони,
Дам бермакка фурсат қани?!
Қалмоқнинг зулми бемаъни.
Барчин кўнглин олсак, дейди,
Муддатига борсак, дейди,
Бекка кўриниш берсак, дейди,
Кеча-қундуз юрсак, дейди,
Чарчаса отни урсак, дейди,
Биз ҳам инъом олсак, дейди,
Эли-юртлар қандай экан.
Юриб бориб кўрсак, дейди.
Кўнғиротта қараб боради,
Кўнғиротнинг юртин сўради,
Барчинойга хизмат қилиб,
Арза кўтариб боради.

Жафо қилган күп баччалар,
Йўл тортади бойбаччалар,
«Муддатига еткизмасак,
Хизматимиз бекор бўлар,
Қалмоқлар Барчинни олар,
Сўнгра бул иш кийин бўлар.
Олтойчилик йўл дейдилар
Қалмоқман Кўнгирот ораси,
Дуо қилиб қолиб эди
Бойсарининг мунглиқ боласи.
Қалмоқлардан жафо кўрган,
Қаттиқ кунда йиглаб қолган,
Ҳакимбекка арза берган,
Бойбаччалар хизмат қилган».
Шу сўзни айтиб йўл тортди,
Сувсиз чўлга тушиб кетди,
Ташна бўп чопар йўл тортди.
Кўринмас мазгили, эллар,
Одамзоддан йўқдир хабар,
Сувсиз энди узок йўллар,
Шундай қип чопар йўл олар.
Бораётган валламатлар,
Бошдан кетса аломатлар,
Биз билмаймиз элдан хабар,
Оқшом-кундуз тинмай юрар.
Шундай қип чопар йўл тортди,
Қамишзор кўлларга етди.
Бунда отга дам берибди,
Бир дам фароғат қилибди,
Қашантириб мингган отди,
Айил, пуштанини тортди.
Мўлжал-муддат ўтмасин, деб
Чопар қистар мингган отди.
Қарамас отнинг бетига,
Чидай олмас ғайратига,
Қамчи ургандир отига,
Етсак дейди элатига.
Шуйтиб чопарлар йўл тортди,
Жафо тифи жондин ўтди,
Айролик бағрини йиртди,
Тўзон қип йўл юриб кетди,
Неча тогдан турмай ўтди,
Ола деган тоқقا етди,
Отларнинг мазаси кетди,
Жуда тенгсалиб йўл тортди,
Энди кўрди Бойсин юртди.

Ола төгдан энкайгандир,
Күнгирот элатин күргандир,
Вақтими хушлаб юргандир,
Шундай қилиб юриб кетди.
Түқсон кеча-кундуз ўтди,
Отларнинг мазаси кетди,
Булар тепсиниб гайратди,
Оралади бул элатди,
Шундай қип қилди меҳнатди.
Бойбўриникига етди.

Отлар корсоқдай қотган, тўқсон кеча-кундуз йўл тортган,
балки чопарлар от билан била битган, Күнгирот элига Бойбўри-
нинг давлатхонасига етган, от устидан туриб салом берди. Булар-
ни кўриб, Бойбўри айтди: — Булар қандай одам экан, беадаблик
 билан салом берди менга. Чопарлар боғонағи аризани чиқариб
 берди. Аризани ўқиб кўриб билди, келган Барчиннинг чопари
 экан. Ўн маҳрамни буюрди, чопарларни битта-битта отдан кўта-
 риб олди, чопарларга хизмат қилди, бул аризани ҳеч кимга
 билдиримай, олиб бориб сандиққа солиб ташлади. Чопарлар ий-
 гирма кун ётди, хўб иззат-икром қилиб, қилди зиёфатди, кўп
 қилди хизматди. Берган аризасидан ҳеч шобир бўлмади. Чопар-
 лар жўнаймизга тушиб, чопарларга зару зебар инъом бериб, хуш
 келибсан қилиб, ўйлга солиб, чопарга шундай гап тайин қил-
 ди: — Бундан кетганча, Күнгирот музофотидан ўтганча, Қалмоқ
 вилоятига етганча, ё бир ўтингчига, ё бир подачига, ё чўлда юрган
 чўпонга «биз Барчиннинг чопари бўлар эдик», — деб оғзингдан
 чиқарсанг, одам буюраман, кейинингдан кувиб етади, бошингга
 қамчи чотади, баданингни бўздай қилиб йиртади, оп келиб дорга
 тортади, оғзингдан чиқармай кетгин, — деб бу сўзни тайнилаб,
 чопарларга айтиб турган сўзи:

Ҳакимбекни сўраб арза берибди,
 Билдим Барчин той-талаща қолибди,
 Қалмоқлардан кўп бир азоб кўрибди,
 Унга бойбаччалар меҳнат қилибди,
 Хизмат қилиб ўнта чопар келибди.
 Чопарлар, эшитгин айтган ноламни,
 Обод қилган бунда кулбахонамни,
 Барчин учун юбормайман боламни.
 Қайтай, қилса қалмоқ қаттиқ зулмни,
 Баҳор бўлса тар очилган гулимни,
 Барчин учун юбормайман улимни.
 Майдон бўлса бедов отлар чопилар,
 Чопиб келса банот жуллар ёпилар,
 Бормасин, ўслима хотин топилар.

Хеч кимга бермайин кетгайсан хабар,
Сен билдирмай түғри кетгин, чопарлар.
Сўзимни кўнглингга оғир олмагин,
Юришинг биронга маълум қилмагин.
Кўп яшасин, бунда беклар ўлмасин,
Келганинг бек Алпомиш билмасин,
Бирон билиб яна хабар бермасин,
Юришинг хеч элга маълум бўлмасин.
Бирон билса, Алпомишга билдиран,
Дўст йифлатиб, душманимни кулдиран,
Кўнғиротнинг хонин қалмоқ ўлдиран,
Ўғлимга жанжалли қизлар не даркор?!
Холинг билиб түғри кетгин чопарлар.
Билган сўзим сенга фиғон этарман,
Билдирсанг, кувалаб сенга этарман,
Хайдаб келиб сени дорга тортарман,
Холинг бил, чопарлар, бўлгин хабардор!

Бу сўзни эшитиб, чопарлар «сира ҳам оғзимиздан чиқармаймиз», — деб йўлга кирди. «Хўб гапни гапирди, хоҳи бор, хоҳи борма, биздан бир хизмат-да, бизнинг борган-бормаганинг билан нима ишимиз бор, кетса, сенинг келининг кетади, қалмоқ олса, сенинг инингнинг қизини олади, биздан кетадигани бир йўл юрган хизматимиз-да», — деб чопарлар йўлга равона бўлди. Булар жўнаб кетди. Жўнаганига ҳам неча кун ўтди. Булар жойлашиб ётди.

Бойбўрининг Култой деган йилкичи қули бор эди. Алпомишига энчи бир тарлон бияси бор эди. Бир ярғоқ қулун туғди, бул тулпор, деб Бойбўрига он кеп берган эди. Неча йилдан бери таблада бокувли турган эди. Чопарлар келиб кетгандан кейин табладаги от сафриси тошиб, ёли қулоғидан ошиб, юлдузни кўзлаб, паракъос бойлаб ўйнай берди. Бойбўри: «Шу ёмонлагурнинг ўйнагани ҳам яхшилик эмас», — деб сафрисига уч-тўрт таёқ тушириб, табладан чиқариб, Култойнинг қошига йилқиларга он бориб, кўшиб юборди. Йилқиларга кўшиб қайтди.

Алпомишининг Калдироҷ деган синглиси бор эди. Қирқин канизлари билан бир сандикни очиб кўраётib эди, бир хатчиқди: бул хатни ўқиб кўрди, Барчин чечасининг хати. — Туновги ўн чопар бул хатни олиб келган экан, буни билдирмай отам сандикқа солиб кўйган экан. Юринглар, бек акама борайик, бу хатни берайик, қанча файрати бор экан, синайик, — деб Ҳаким-бекнинг қошига келди. Бу хатни шундай берди, бир маҳрам олди. Шу вақтларда Ҳакимбек ўн тўрт ёшга кирган, маст бўлган нордай кўпик сочиб ўтирган, неча маҳрамлар хизматида турган. Бу хатни ўқиб кўрди, хатда айтиби: «Олтойчилик йўлга келдим, тўқсон алпда той-талаща қолдим, олти ойга муҳлат олдим,

мендан умиди бўлса, Алпомиш келсин, бўлмаса жавобимни бер-
син» деган хат. Бу хатни ўқиб кўриб: «Олтойчилик йўлда бўлса,
қалмоқнинг элида бўлса, зўр ёвнинг кўлида бўлса, бир хотин
оламиз, деб сандириб ўламизми», — деб хатни тиззасининг
остига босиб ўтириди. Қалдирғоч ойим акасига қараб, бир сўз
айтиб турган экан:

Менинг билан ҳамроҳ бўлган бу қизлар,
Бирга келди бунда энди канизлар,
Ака, сенга айтадиган арзим бор,
Талаш бўпти бийнинг қизи зулфакдор.
Савашли кун тортилади парли ёй,
Мўмин қулни бандам десин бир худой,
Фамли одам тортар экан охувой,
Кечасини ёруғ қиласар тўлган ой,
Кашалда талашда копти Барчиной.
Мард йигитнинг ёри талаш бўлами,
Эр йигитнинг ёрин қалмоқ олами,
Барчин чечам талаш бўлиб қолами,
Сендай беклар бул бехабар турами?!
Келар дебди, сендан умид қилибди,
Олти ой қалмоқдан мухлат олибди,
Инсоф кип бадбахтлар мухлат берибди,
Умид тортиб сенга арза қилибди,
Хат кўтариб ўн бойбачча қелибди,
Англамай отама хатни берибди,
Отам хатни бул сандикқа солибди,
Энди билиб синглинг олиб келибди,
Мунглук синглинг сенга арз қип турибди,
Қалмоқларда чечам жабр кўрибди.
Ака, айтган сўзим оғир олмагин,
Нар-мода ишини бунда қилмагин,
Бу ишдан бехабар бўлиб турмагин.
Сен бормасанг, ёринг қалмоқ олади,
Барчин йиглаб нима илож қилади,
Сўраганда излаб борсанг бўлади,
Зўр бўлган қалмоқлар унда қолади,
Шундай қип эр йигит ёрин олади.

Бу сўзни эшитиб, Ҳакимбек нар-мода деган гапни қўнглига
оғир олиб, қизларга қараб, нар-мода деган гапнинг маъноси
ним, деб сўраб турган экан:

Жафо тифи бу кун жондин ўтади,
Айролик ханжари бағрим йиртади,
Нар-мода деб қизлар кимни айтади?

Давлатимдан шоли-шолдам ўрайман,
Кече күрган тушим кундуз жўрайман,
Гул тарзим сарғайиб сенга қарайман,
Нар-мода маъносин сендан сўрайман.
Юрагима тушди доги-аламлар,
Синглим билан бирга келган санамлар,
Сенга айтган мен ҳам бундайин сўзлар,
Қўнгирот элда ўйнаб-кулган кўп қизлар,
Синглим билан бирга келган канизлар,
Нар-мода деб менга сўзладинг сўзлар,
Нар-мода маънисин айтгин, сен қизлар.
Нар-мода дегангага хафа бўлибман,
Нима гап эканин билмай турибман,
Қўнглима мен ҳам оғир олибман,
Ёмон сўз деб жуда ҳадик қилибман.
Нар-мода дегангага кўнглим бузилди,
Дийда гирён бўлиб бағрим эзилди.
Нар-мода деганинг кўнглима келди,
Кўп қизлардан аканг уялиб қолди,
Эмикдошим, сенинг гапинг не бўлди?
Мендайин акангни хафа қиласан,
Нар-мода деб мени силкиб соласан,
Сен менга нах уриб, лопи урасан,
Жуда ҳам акангни номард биласан,
Канизларни ҳамроҳ қилиб юрасан,
Бундай бўлсанг, сен жувормак ўласан,
Нар-мода эканим нима биласан,
Нар-мода деб мени айтиб турасан.

Бу сўзни акасидан эшитиб, Қалдирғоч ойим бир сўз айтиб
турган экан:

Хар ким ўз элида бекми, тўрами,
Нар-модалар сендан камроқ бўлами,
Марднинг ёри той-талашда қолами?!
Мард бўлиб майдонди кунда юргаган,
Йилқичидан бедов сайлаб минмаган,
Олмос пўлат белга қайраб чолмаган,
От асбобин шайлаб Қалмок бормаган,
Қалмокларга қаттиқ кунлар солмаган,
Той-талашда қолган ёрин олмаган,
Ўз элида бир хил гапни билмаган,
Жаҳоним сайл этиб бунда юргаган,
Нар-модалар сендан ортиқ бўлами?
Бу сўзимни нега оғир оласан,
Ёринг кетса, қандай элда юрасан,

Тирик юрмай, ака, сен ҳам ўласан.
Яхшилик шул, гапни оғир олмагин,
Мұхлат яқын кепти, кечга қолмагин,
Сарсон бўлиб, бунда ўйланиб турмагин,
Эрта юр, ишингни кечга қўймагин,
Хабар кепти, ака, бундан жўнагин.
Мен эшитдим чечам арза тилидан,
Ажиратиб олгин золим қўлидан,
Хабар олгин мусофиirlар ҳолидан,
Жўна, ака, Бойсин-Қўнғирот элидан,
Олис деб қайтмагин бундай йўлидан,
Нимиш келсин мунглук чечам қўлидан.
Ёзган хати унинг шундай бўлиди,
Тўқсон қалмоқ кунда йигилиб келиди,
Қалмоқнинг юртида улар гариби(r),
Ул алплар ҳам кўп таадди қилиди,
Ул сабабдан бунда хабар келиди,
Ака, сендан бормоқ лозим бўлиди.

Бу сўзни эшитиб: — Яёв борамизми эса? — деди. Қалдириоч ойим: — Тўқсон тўқай йилкинг бор, яёв бориб, мингани оёқ-улов топмай ётибсанми? Эгар-абзални олсанг, йилкига Қултойнинг қошига борсанг, кўнглингта ёққанини хоҳлаб миниб кета берсанг, — (деди). Бу сўзни эшитиб: — Хайр эса, — деди. Қалдириочайим эгар-абзални, совут-қалконни, ёв-ярок, асборни айил-иуштанга солиб, ўхшатиб бўғиб, кўтартириб юборди. Кўтариб бораётиб эди, бой отаси овдан келаётиб эди, олдидан чикиб қолди, қараса, ўғли кўтаришиб бораяпти, отаси ҳадик олиб, бир сўз сўрайапти:

То ўлганча сўйлаб қолган тил бўлсин,
Фанимнинг шавкати келиб эл бўлсин,
Кўрар кўзим, болам, сенга йўл бўлсин?
Эгар, абзал, анжом олиб келасан,
Кўтаришиб бунда ҳалак бўласан,
Йўл бўлсин, жон болам, қайда борасан?
Бирорлардан бирор сўзни билдингми,
Йўқса, болам, овға талаб қилдингми,
Олис юртга, кўзим, бормоқ бўлдингми,
Хабар бер, жон болам, қайда борасан?
Белингга бойлабсан заррин пўтангни,
Худойим кечиргай қилган хатонгни,
Хафа қилиб кетма мендай отангни,
Хабар бергин, кўзим, қайда борасан?
Сен эшитгин, болам, айтган додимни,
Сабил қилиб кетма музофотингни,

Миндирайн сенга бедов отимни,
Шоду хуррам қилай бул фарзандимни,
Болам, айтгин менга борар юртингни.
Мен биламан абгор бўлиб келасан,
Бир нечадан бир ёмон сўз биласан,
Тараддинг шул, олис юртга борасан,
Халак бўлиб йўлда нима қиласан,
Кўтар кўзим, болам, қайдা борасан?

Бу сўзни эшитиб: — Эй, закот олмай ўлинг сиз бир, — деб ўтиб жўнай берди. Бойбўри: «Оббо, бу жувормакка бирор билдирган экан», — деди. Сойма-сой уриб кетди. Бойбўри уйига етди. Келиб сандикни кўрди, сандик очилиб қопти, боғанаги кўйган хати йўқ. Тағи минди бедов отди, сой билан панараб йўл тортди. Алпомишга кўринмай кетди. Алпомишдан бурун Култойга етди. Култойга туриб айтди: — Алпомиш келяпти, Кашалдан келган хабарни бирор билдирибди, бул иш ёмон бўпти, лекин ўзи зўр-ку, зўр бўлса ҳам, жуда кўркок, сал дўқдан ҳам кўрқади ўзи, уриб-сўкиб, йилқи бермай, дўқлаб қайтариб юборгин. Култой айтди: — Сендан амр бўлмаса, Алпомишга йилқи бераманими?! — Албатта шуйта кўр, — деб Култойга Бойбўри тайнинлаб қайтди. Бул гапдан бехабар орқаланиб Алпомиш борарапти. Култойга яқин етди. Култой Алпомишни кўриб, кўнглини хушлаб, йилқи боқадиган қайки таёфини кўлга ушлаб, жуда шамиён қайтариб, дўқлаб, бу сўзни айтиб, Алпомишга қараб айтиб туртан сўзи:

Қаерларга қилдинг талаб,
Хароми полвон ўпкалаб,
Момонг... энанг...
Сўз айтади мендай ночор,
Бу йилкиларда ниманг бор?
Сенинг бу юришинг бекор,
Сенга тегмайди йилкилар,
Кет энди сендай энағар,
Юришингдан йўқdir ҳабар,
Бу йилкиларда ниманг бор?
Тўкайин сенинг ёшингни,
Билмайсан мендай кишингни,
Турсанг ёрарман бошингни,
Қилайин сенинг ишингни,
Кет энди турмай, энағар.
Хазон бўлиб боғда гуллар сўлдими,
Обло сенинг ақли-хушинг олдими,
Бойбўри ўлиб, моли сенга қолдими?!
Гап эшит айтган тилимдан,

Кет энди, қолма йўлингдан,
Ҳеч иш келмайди қўлингдан,
Айрилма ўсган элингдан.
Сен менинг қошима келма,
Ҳалак бўлиб бунда турма,
Бу ерда бир ниманг борма?
Сен ўзингни абгор қилма,
Бу сўзимни ҳазил билма,
Бир зўрнинг қўлида ўлма,
Бекорига сарсон бўлма,
Узоқ йўлга талаф қилма,
Ёшсан сен, овора бўлма,
Кет энди, сен йўлдан қолма.

Алпомиш бу сўзни эшитиб, Қултойга қараб, бир сўз деб турган экан:

Бобо, сиру ҳолим маълум қилайин,
Сиздан энди бир бедовни сўрайин,
Бедов миниб қалмоқ элга борайин,
Қалмоқ элдан ёрим олиб келайин,
Жавоб бергин, бобо, мен ҳам жўнайин.
Хабар билдим, ёрим талаш бўлибди,
Кашал юртдан бизга элчи келибди,
Барчинойим ул ўргада қолибди,
Мендай ўғлинг, бобо, бормок бўлибди.
Қалмоқ элга мен ҳам бориб келайин,
Бориб мен уларнинг кўнглин сўрайин,
Қалмоқларман қайтмай саваш қилайин,
Бийнинг қизин ажиратиб олайин,
Ўйнаб-кулиб яна элга келайин,
Ўз юртимда келиб даврон сурайнин,
Сен эшиитгин мендай ўғлинг сўзини.
Ажратиб келайин бийнинг қизини.
Сачратиб борсам миниб бир тулпор,
Ўзима ёр, бобо, сенга хизматкор,
Сенга менинг айтган арзим шу бўлар,
Бунда турмай Кашал бормогим даркор.
Рухсат берсанг, жафо тортиб бораман,
Қалмоқларман қон тўкишиб кўраман,
Олис юртга сафар қилиб бораман,
Бундан борсам, бийнинг қизин кўраман,
Йилқи берсанг, шоду хуррам бўламан,
Бобом дейман, меҳрибонлик қиласман,
Бобо, сени иззат қилиб юраман,
Бир йилқи бер, бобо, миниб бораман,

Тақдиримда нима борин кўраман,
Кетган ёрим талаб айлаб бораман,
Насиб қилса, ёрим олиб келаман.

Бу сўзни эшитиб, Қултой ҳам бир сўз деб турган экан:

Хазон бўлмай боғда гуллар сўлдими,
Обло сенинг ақли-хушинг олдими,
Ажал етиб ё паймонинг тўлдими,
Бойбўри ўлиб, моли сенга қолдими,
Ё, энагар, ажал ҳайдаб келдими?
Мендайин бобонгнинг кўнглин бўласан,
Тур, йўқол, энагар, тайин ўласан,
Бу ерда селайиб нима қиласан?
Кўп турмагин мендай бобонг қошига,
Чидай олмассан бобонгнинг ишига.
Бу сўзни айтиб марднинг ақлин олади,
Уч-тўрт таёқ қайқайтириб солади,
Еган таёкларинг йилки бўлади!
Ҳакимбекнинг кўзи аланглаб қолади,
Жуда ҳам бир таёқ ўтиб боради.
Билмади-ку бобосининг ишини,
Пок бўлмаса ёра ёэди бошини.
Шундай дўклиб Қултой қилди сиёсат,
Таёқ еган бекда қолмади тоқат,
Ўлдирап қайтмасам, дейди валламат.
Таёқ еб Ҳакимбек харба килмади,
Бобосининг қилган ишин билмади,
Таёқ ўтиб танда тоқат қолмади.
Бул бобоси кўп сиёсат қилади,
Жуда айналтириб анча уради,
Бобом урди деди, қайтиб жўнади,
Кўтариниб қайтиб кетди йўлига.
Илойим бир Қултой кули курсин, деб
Ўлар вақти хўп бўкириб ўлсин, деб,
Кетди бундан бул имонсиз колсин, деб,
Жуда менга қаттиқ азоб беради,
Бул имонсиз аямайин уради,
Мен кетмасам таёқ ўтиб боради.

Алпомиш Қултойнинг қошидан қайтди, кўтариниб бораётиб
эди, «Булаг-шулай, деб Қултой дўклиса, акам қайтиб кеп кўяр-
дан ҳам тоймас; ўз кўзимиз билан жўнатиб юборайик», — деб
кирқин каниzlари билан Қалдироҷойим келаётиб эди, олдидан
чикиб қолди. Алпомиш ерга караб бораётиб эди. Шундай бошини

күтариб қаради, қарши манглайига канизлари билан синглиси
кеп копти, қызларни кўриб, уялган киши бўлиб, эгар-абзалини
ташлаб юбориб, йўл устида ёнбошлаб ётди. Қалдирғоч ойим
устига бориб, бу сўзни айтиб туриби:

Айтган сўзниң поёмини билсанг-чи,
Кўз куюги, эй, нар-мода ўлсанг-чи.
Кечакундуз ҳакқа фифон этмаган,
Киличига қирмизи қон қотмаган,
Ўз молига ўзин важи ўтмаган..
Кул деганга қаҳр қилмас бўлурми,
Йилқичидан бедов минмас бўлурми?
Кул деганинг бошин олмас бўлурми?
Култойнинг дўқидан қайтиб келасан,
Сўраганда нима жавоб берасан,
Сен хам одамман деб қандай юрасан,
Уялиб ёнбошлаб йўлда қоласан.
Билсанг, Култой йилқи боқар хизматкор,
Кўп дўқлабди-аҳволидан бехабар.
Сен сўрасанг, улар сенга жавобгар,
Бу юришинг, бек ака, қандай бўлар?
Одам кўрса, юришингга қулади,
Бу юришинг элга гап бўп қолади,
Жўнатмоқ бўп мендай синглинг келади,
Бу юришинг, ака, айиб бўлади.
Ётмайин ўрнингдан энди турсанг-чи,
Буйтиб турмай энди ғайрат қилсанг-чи,
Бизи минан бирга-бирга борсанг-чи.
Бу сўзларни айтиш шундай муштипар.
Ўринидан тургандир давлатли шунқор.
Ох урганда хаста кўнглин хушлади,
Эгар-абзалини йигиб ушлади,
Шул замон эгнига қоқиб ташлади,
Култой қулга тафи йўлни бошлади.
Йўлга тушиб Култойқулга қаради,
Урган ерда ҳали Култой туради,
Қайтай деса, бул синглиси келади,
Тафи урармикин деб кетиб боради,
Бу қызлар билмайди Ҳакимбек ўйин,
Ҳакимбек илгари, синглиси кейин.
Култойқулга бирга кетиб боради,
Ҳакимбек қызлардан илгари ўтар,
Илгари ҳаллослаб энди йўл тортар,
Таваккал қип бораётир муқаррар.
«Кандай бўлса, Култойқулга борай, деб,
Қайта бошдан тафи сўйлаб кўрай», деб.

Култойнинг қошига яқинлашиб борди. Синглиси анча канизлари билан кейин қолди. Култой ҳам Алпомишни кўрди, боғона-ғи урган ерда Култой зинкийиб турди, яқинлаб борди. Култой тағи дўқлаб, бу сўёни айтиб кела берди:

Бобонгнинг сўзини ҳазил биласан,
Сен гарбачча, нега айналиб келасан,
Сен энағар, билдим тайин ўласан,
Нимишинг бор, тағи нега келасан?!
Яна бирор йўлда кўнглинг бўлдими,
Тағи сенинг таёқ егинг келдими?
Сиёсат қип Култой яқин келади,
Бек Алпомиш индамайин туради,
Хар гап бўлса, тақдиридан кўради,
Тағи келиб Култой буни уради,
Уч-тўрт таёқ айлантириб солади,
Бунда келган одам тайин ўлади,
Алпомишга таёқ ўтиб боради.
Таёқ ўтди, хаста кўнглин хушлади,
Кўтарган нарсасин ерга ташлади,
Култойкулнинг белбоғидан ушлади.
Жафолар солгандир тандаги жонга,
Хазон бўлса, зоғлар қўнар гулланга,
Таёқ ўтиб эди бундай султонга,
Култойкулни чирпиб отди осмонга.
Отиб кеп юборди давлатли шункор,
Култойкул ҳавода кўринмай кетар.
Давлатли хон шундай кўкка қаради,
Олчи-чикка бўлиб энди айланиб,
Култойкул осмондан тушиб келади.
Кўқдан келаринда Култой не дейди:
— Армон билан ўлдим ғаминг е, — дейди.
Ерга тушиб Култой бобонг ўлмасин,
Йилқиларинг боз боқувсиз қолмасин.
Хар не деб амр этсанг, ани қиласин,
Жуда илдамидан ушлаб берайин,
Ерга тушиб мен ҳам нобуд бўлмайин.
Бу сўзларни айтиб ҳаводан етди,
Узалиб Култойнинг белидан тутди,
Чалқарамон килиб ерга қўйибди,
Тиззасин кўкракка қўйиб турибди.

— Бобо қани ушлаб беринг! — Кўя бер, ўғлим, ушлаб берайин, — деди. — Йўқ, ётган ерингда ушлаб берасан! — деди. — Турсасам, қайтиб ушлаб бераман, — деди. — Эса мени нимага бунча урасан? Култой ҳам заҳар чол эди. Ётган ерида

bir қурхайт тортди, тўқсон тўқайдаги йилқи йифилиб қошига етди, ҳамма йилқилар жам бўлиб турибди. Добонбий бобосидан колган қўриқни Ҳакимбекнинг кўлига берди. Ҳакимбек қўриқни кўлига олди. Бу қўриқни йилқиларга солмоқчи бўлди. «Саман сарига туш, ё олапоча тўрига туш, шапақнинг зўрига туш», — деб қўриқни солди, ёллари эшилган ипакдай бир чипор отнинг бўйнига тушди. Кўнглидаги бўлмай, отдан кўп кўнгли тўлмай: «Кўп нозик учради», — (деб) бу отни кўйиб юборди; яна қўриқни солди, тағи шунинг бўйнига тушди. «Бир бало қиласанми, ё ёмонлаб ўласанми, менга дардисар бўп қоласанми», — деб кўйиб юборди. Қайтариб тағи қўриқ солди, тағи шу чипорнинг бўйнига тушди. «Тақдирдаги шул экан-да», — деб белбогини отининг бўйнига солиб, эгар-абзалининг қошига етаклаб кела берди, эгар-абзалининг қошига бориб, уёқ-буёғини кўра берди. «Қандай бўлар экан», — деб ўйланиб туриб эди, Қалдирғочойим хам канизлари билан кела берди. Акасининг тарзига қаради. Акасининг айтгани бўлмай, отдан кўнгли тўлмай, хафа бўлиб турганини билди. Отнинг тизгинини акасининг кўлидан олиб, сағрисини силаб, уёқ-буёғига қараб, «Йилқида юрган ҳар отлар бор, юлдузни кўзлаган, не отлардан қўрикка кемай, менинг тақдирим шундай ёмон отга қолган», — деб турганини Қалдирғочойим билиб: — Хафа бўлма, бу отинг балки тулпор чиқар, ёмон дема, бул отинг назаркардадир, буни мингган одам кўп ерларни кўради, мақсадини ҳақдан топиб қолади, — деб акасининг кўнглини кўтариб, қуллу бўлсин қилиб, бир сўз айтиб турган экан:

Ўзи шундай келган экан човкар кўк,
Қуйруғидан берисинда кири йўқ,
Минганларга бўладакан кўнгил тўқ,
Буни минсанг, ака, сенга душман йўқ.
Минганда ирғиди бу аргумоғинг,
Эгар қошга солсанг олтин садоринг,
Боргандан тегади бодом қобогинг,
Куллу бўлсин, акажон, аргумоғинг,
Чопар от ўйнатиб бундан борасан,
Буни минсанг, ака, йўлли бўласан,
Қалмоқларнинг жуда додин берасан,
Борганданоқ Барчинойни оласан,
Яна қайтиб ўйнаб даврон сурасан,
Бу отингдан кўп хосият кўрасан,
Куллу бўлсин, акажон, аргумоғинг.
Ёмон дема, ака, Бойчиборингни,
Кўнгилдан чиқаргин сен фуборингни,
Сен билмадинг бу асл тулпорингни,
От учун бўлмагин сира кўнглингни.
Боргандан оларсан кетган ёрингни,

Назаркарда билгин бу тулпорингни.
Минсанг, тангрим берар мақсадларингни,
Обод қылсанг келиб кирдикорингни,
Манглайн силагин бул тулпорингни.
Отинг асли назаркарда бўлади,
Бир нечалар синамайин қолади,
Қамчи урсанг учар күшни олади,
Бундай от ҳар кимда кайдан бўлади?!
Миниб кўрсанг, ака, кўнглинг тўлади,
Сенинг отинг жуда белдор тўлади(р),
Кичов бўлса, олис йўлни олади,
Бул отдан, акажон, кўнглинг тўлади,
Қалдирғочнинг сўзи шундай бўлади,
Бефаросат одам нима билади,
Узоқ йўлни яқин қилиб юради,
Ахир бориб отдан кўнглинг тўлади,
Тулпорман деганлар кейин қолади,
Сенинг излаганинг шул от бўлади.
Остингда ўйнаса шундайин тулпор,
Хеч бир душман бўлолмасин баробар,
Ганимларнинг додин берар жонивор,
Назаркарда билгин, ака, Бойчибор,
Қолмайди кўнглингда заррача губор,
Барчин чечам бул йўлингга интизор,
Кичасанг, етказар назари Чибор,
Шундай тулпор миниб бормоғинг даркор.
Хеч бир ишни қилолмайди қалмоқлар,
Кўрганларнинг кўнгли тўлар жонивор,
Бийнинг қизи, борсанг, бўлар хизматкор.

Қалдирғочойим акасига бу сўзларни айтиб, отни эгарлаб берайин, деб турган ери:

Оша элга ошган тотар хўрликни,
Бек Алпомиш қиласи бугун эрликни,
Бисмилло, деб солди отнинг устига
Кимхоби майиндан бўлган терликни.
Мард бўлганлар қарайдакан дурбини,
Усталар ишлатар пўлат кирғини,
Шул замонда солди отнинг устига
Зарлию зарбобдан бўлган чиргини.
Чиргининг устидан қўйди белликни,
Боз устидан солди жаҳалдирикни.
Муллалар ўқиди зеру забарни,
Усталар чопади теша-табарни,
Бисмилло, деб солди отнинг устига

Тилла корсон, қоши олтин эгарни.
Эл күчириб Олатовдан ошириди,
Сирин айтмай душманлардан яшириди,
Иккови ҳам тилладандир узанги,
Яркиллатиб икки ёкқа тушириди.
Кишишман ёз ўртаси хишишай саврди(р),
Ёмон одам мудом қиласар фовурди,
Лоф айтганга ботмондан ҳам овириди(р)¹
Бисмилло, деб солди отнинг устига
Чочоғи зумратдан зарли давирди.
Гана-гана бандаларинг жойилди(р)²,
Худо қилган ишга банда қойилди(р),
Ой Қалдирғоч тортди отнинг белидан
Сирти ипак, ичи майин айилди.
Чув, десанг, ўзади осмонда күшдан,
Хеч камлик бўлмаса йўрга юришдан,
Бисмилло, деб тортди отнинг белидан
Ўн саккиз қуббали чағатой пуштан.
Абзалининг бари ола қайишдан,
Сағрисига ташлаб карки қуюшқон,
Хар қуббаси келган катта таркашдан.
Отлантиримоқ бўлди шундайин бекни,
Гарданига ташлаб ўмулдирикни.
Абзаллаган отни кўриб кувонди,
От бошига солди тилла юганди.
Отни силаб кўп парвариш қиласади,
Парақкос қип оти ўйнаб туради.
От сағрисин бул канизлар силади,
Бойчиборни хўб абзаллаб бўлади,
Ой Қалдирғоч олиб келган либосни
Кийгин, дейди, Ҳакимбекка беради.
Киз бола шум бўлар, шундай ўйлабди,
Шул замон кийгизди майин кўйлакди,
Боз бостириб кийди бул киш телпакди.
Юракдан кечириб оҳ билан войни,
Кийгизди устига яхши сарпойни.

Шундай қилиб, кийинтириб, кескир қиличларни белига
бойлаб; Арпали қўлидан отлана берди. Алномишининг Алпин-
бий бобосидан қолган ўн тўрт ботмон биринчдан бўлган парли-
сари ёйи бор эди. «Мабода душманнинг юргида ёй тортишади-
ган кун бўларми, одам билмайди, керак бўп қоларми», — деб

¹ Оғирдир.

² Жохилдир.

ёйни эгарнинг қошига солиб олди. (Қалдирғоч) акасини отлантириб, от-анжомини чоқлаб, яхши бор, деб бул сўзни айтиб турди:

Қайда борсанг, Шоҳимардон ёр бўлсин,
Ўникимом, чилтон жиловдор бўлсин,
Душманларинг кўрса сени зор бўлсин,
Соф бориб, саломат келгин, бек оға.
Мен мунглукман, кўзда селоб ёшимди(р),
Бундан бориб олгин гул бувишингди,
Кўнгирот элда қилгин ўтиришингди,
Эсга олгин мендай эмиқдошингди.
Эшитгин қулоқ соп айтган нидога,
Ишингни солғанман қодир худога,
Соф бориб, саломат келган, бек оға.
Худойим сақлагай бандани омон,
Фарид қулга эгам бўлгай меҳрибон,
Хонаси́лло¹ duo қилдим бул замон,
Соф бориб, саломат келгин, Алпинжон.
Эмиқдошим, эшит айтган тилимди,
Соф-саломат қалмоқ бориб кел энди,
Келиб обод қилган кирдикорингди,
Йиглатмагин эна, ғамхўрларингди,
Сен бориб оларсан излаб ёрингди,
Келиб обод қилгин ўсган шаҳрингди.
Остингда иргиса араби тулпор,
Бу ўйлда кўрмагин, акажон, хатар,
Сенинг дуогўйинг мендай муштипар.
Эл кўчириб Олатовдан оширдим,
Улуғланиб остоная бош урдим,
Боргин, эмиқдошим, ҳаққа топширдим.

Бу сўзни эшитиб, Ҳакимбек Қултой бобоси билан, Қалдирғоч синглиси билан хўшлашиб, бир сўз деб турган экан:

Мен кетарман ёрим излаб,
Бу жароҳат бағрим тузлаб,
Ёлғизман, бўтадай бўзлаб,
Бобом Қултой, хуш қол энди.
Кетсин мендан оҳу войим,
Обод бўлсин мазгил-жойим,
Дуо қилган қиблагойим,
Отам Қултой, хуш қол энди.

¹ Холисанлилло.

Ёр савдоسى келди ғолиб,
Мен кетарман бошим олиб,
Билмам неча кун йўл юриб,
Қалмоқ борарман ахтариб,
Қалмоқ бориб ёрим кўриб,
Отам Қултой, хуш қол энди.
Бизман бирга ҳамдам бўлган,
Бир эмчакни бирга эмган,
Акам деб эргашиб юрган,
Умид тортиб бунда келган,
Мунглик синглим, хуш қол энди.
Сенга етгай аканг сўзи,
Чўлларда тўрт наркас кўзи,
Сарғаймасин гулдай юзи,
Излаганим бийнинг қизи,
Жоним синглим, хуш қол энди.
Жаҳонни сайл¹ этиб юрсам,
Душманларнинг додин берсам,
Яна қайтиб элга келсам,
Эмишдошим, сени кўрсам,
Кеп юртима эга бўлсам,
Бунда келиб даврон сурсам,
Эмишдошим, хуш қол энди.
Бундан кетсам бедов миниб,
Ошсам тоғлардан йўл юриб,
Яхши, ёмон элни кўриб,
Душман кўрсам саваш қилиб,
Душманларнинг додин бериб,
Неча кун қалмоқда туриб,
Қалмоқларга келсам ғолиб,
Шахрига ғалағул солиб,
Мен кетсам ёрим ахтариб,
Кетган юртларини кўриб,
Қариндошлар ҳолин сўриб,
Мени кўрса шодмон бўлиб,
Катта-кичик хурсанд бўлиб,
Барининг вақти хуш бўлиб,
Бир нечаси ёрдам бериб,
Бунда қолинг дуо қилиб,
Мехрибонлар, хуш қол энди.

Бу сўзни эшитиб, Қалдириҷоҳийм ҳам бир сўз деб турган
экан:

¹ Сайр.

Бир нечук номардга күнгил бермагин,
Лодон күнглинг ҳар хаёлга бўлмагин,
Кўп яшагин, кўп йилгача ўлмагин,
Йўлда номардларни ҳамроҳ қилмагин.
Кулоқ солгин мендай синглинг нолишига,
Эгам раҳм айласин кўзда ёшига,
Ёмонни йўлатма отнинг қошига,
Банда кўнар тангри қилган ишига,
Аччиқ қилиб урма отнинг бошига.
Кулоқ соп эшииттин айғон нидога,
Ўлим навбат етар шоҳу гадога,
Соф бориб, саломат келгин, бек оға.
Ёринг билан бўлсин элда сухбатинг,
Тоймасин бошингдан тоҷу давлатинг,
Сен келганча обод бўлсин элатинг,
Сен кетган сўнг қолмас менинг тоқатим,
Юз алвон ўйнайди мингандада отинг,
Ярқиллар белингда кескир пўлатинг,
Қўлга тегсин излаган паризодинг.
Сендай акам меҳнат тортиб боради,
Ўлмаган дунёнинг ишин кўради,
Кетган элнинг бари хизмат қиласди.
Барчин чечам ҳар кун йўлга қаради,
Олтойгача сенга интиқ бўлади.
Сен етмасанг, қабоҳат кун бўлади,
Агар етсанг, бари хурмат қиласди.
Сенинг билан бирга бўлиб туради,
Соф бориб, саломат кел, деб қолади.

Ҳар қайсиси билган сўзини айтиб, омонлашиб, хўшлишиб,
йўлга кириб, йўлда айтиб бораётган сўзи:

Дубулға бошда дўнгуллаб,
Карк кубба қалқон қарқиллаб,
Тилла поянак урилган,
Узангиларга ширқиллаб.
Бедов отлари диркиллаб,
Олғир қушдайин чаркиллаб,
Кўлда наизаси сўлкиллаб.
Юрмакчин узоқ йўлига,
Қарамай ўнгу сўлига,
Етсам деб ёрнинг элига.

Силтаб юради Бойчибор,
Яқин бўлар узок йўллар,
Йўл юрар давлатли шунқор,
Қалмок юртини ахтарар,
Ёлғиз кетди бундан шунқор.
Ҳакимбек қилди гайратди,
Қилади отга шиддатди,
Чу, ха, деди, қамчи чотди,
Изғор чўлни тўзон тутди,
Йўлнинг танобини тортди.
Қир келса қилпиллатди,
Арна келса ирғитди,
Ўр келса ўмганлатди,
Шуйтиб Ҳаким йўл тортди.
Қўрсам деб кетган элинини,
Излаб ёрнинг мазгилини.
Тоғларда бордир зарангি,
Эгнида бордир парангиги,
Ойлар ҳам тошдай қоронғи.
Охи чекиб ҳар дам кундуз,
Йўл юргандир кўп қулотуз,
Ё кеча тинмайди кундуз.
Ҳай, равшан кўзларин ёшлаб,
Ғанимининг сирини фошлаб,
Қамчи уради қулочлаб,
Остидаги Чибор оти
Олиб қочди сувлук тишлаб,
Суриб боради ангишлаб.
Айроликқа бағрин доғлаб,
Ёрнинг юртини сўроғлаб,
Шунқор белин маҳкам бойлаб,
Неча гапни йўлда ўйлаб,
Ёлғиз борди айҳайлаб.
Бек Ҳакимнинг баҳрин очди,
Оти суриб олиб қочди,
Неча бир тоғлардан ошди,
Йўлларда мавж уриб тошди,
Ҳар тарафга аланглашди,
Қўрганларнинг ақли шошди.
Қалмок элга борсам, дейди,
Бийнинг қизин қўрсам, дейди,
Лабдан болин сўрсам, дейди,
Борганимдан олсам, дейди,
Куёв бўлиб турсам, дейди,
Кичаб йўлни юрсам, дейди,
Мен отимни урсам, дейди,

Хаялламай борсам, дейди,
Ўйнаб даврон сурсам, дейди,
Талаш қылган у зўрларнинг
Жазосини берсам, дейди,
Иш кўрсатиб келсам, дейди,
Бориб андай қилсам, дейди,
Барчинойман юрсам, дейди,
Борганимдан кўрсам, дейди,
Қайтиб элга келсам, дейди,
Юртга эга бўлсам, дейди.
Боради элнинг тўраси,
Гумбурлар тоғнинг дараси,
Урушли кун бўлган вақтда
Ингрантар найза яраси,
Бораётиб хон қаради,
Кўринди бир тўп қораси.
Бул корани Ҳаким кўрди,
Кўрингани узок йўлди(р),
Бўлжаёлмас¹ майдон чўлди(р),
Кўринган қора ким бўлди?
Қистайди Бойчибор отди,
Қиласр отга сиёsatди,
Кун пешин ҳаддига етди,
Тўрт кечакундуз йўл тортди,
Кўринг шундай валламатди,
Ул корага яқин етди.
Кўн пора-пора бўлган вақтда
Бек Ҳаким етиб бориби.

У қора боғонағи келган ўн чопар эди. Ўн чопар Ҳакимбекни кўриб: «Оқ юзли-обрўли бўлдик», — деб отдан тушиб, таъзим қилди. Бул чопарларни кўриб: — Сизлар аста-аста кета беринглар, — деб ўта берди. Ҳакимбек илгари ўтиб кетди, чопарлар кейин қолди. Ўз ихтиёрича юриб, кўнглида «Бирор кечак оқшом-лайдиган ер бўлса», — деб бораётиб эди, караса, бир ерда ёруғчикиб туриби. Отнинг бошини буриб юборди. Ёруғ чиқиб турған ерга борди. Борса, бир кўхна мозорот экан. Бу чилтанларнинг бир мазгилгоҳ жоий эди. Ҳакимбек чилтаннинг мазгилгоҳ жоий эканини билмади. «Кеч қолган одам мозоротда ётади, дегич эди. Шул мозоротда ётсаммикан, ё шу ердан кетсаммикан?! Бехуда одами йўқ мозоротда ётишлигим қандай бўлади экан, бехуда ётсам, бу ўликларнинг мен билан иши бўлмаса, меҳмон келди, деб мендан хабар олмаса. Шу ёруғ чиқиб турған ерга бир

¹ Мўлжаллай олмас.

savol қиласын. Мен буларга ўзимни билдирайин», — деб савол
килиб турған экан:

Мени билсанг құнғиротларнинг оғаси,
Бошимда бор эди зардан жигаси,
Ез бүлса, яйловим Аму ёкаси,
Мен бўламан Бойсин-Қўнғирот тўраси.
Ассалом алайкум, ахли қубурлар,
Бир кеча мазгил-жой сиздан сўрайман,
Осмонда арвоҳлар, кўкда малаклар,
Бир кеча мазгил-жой сиздан сўрайман.
Бедовимнинг баданинда тер борми,
Давлатлининг юрагида чер борми,
Бирор кеча кўниб ўтар ер борми?
Хориди остимда тулпор, бедов от,
Ўз элимда мен ҳам юрган валиммат,
Сўз сўрадим бунда ётган мозорот,
Ётсам мен бир кеча соғу саломат.
Кўп йўл юриб менинг сўлган тарзим бор,
Излаб юрган элда сарвинасиз бор,
Ахли қубур, сенга айтар арзим бор.
Тўра бўлиб ўз юртимни сўрайман,
Сиёсатман элу халққа қарайман,
Куйган қулман гапни гапга улайман,
Бир кеча мазгил-жой сиздан сўрайман.
Кечакундуз ҳаққа фифон этайин,
Фалак сарсон қилди мени, қайтайин,
Мозоротга савол қилиб ўтайин,
Бир кеча бу ерда кўниб ётайин.
Узок йўлда меҳнат тортиб юраман,
Рухсат берсанг, мозоротлар, қўнаман,
Сўрасанг, гапингга жавоб бераман.
Мени билсанг, қалмоқ элга бораман.
Рухсат берсанг, бу мазгилга қўнаман,
Бирор кеча фароғатни оламан,
Элдан чикқан мен ҳам шунқор бўламан,
Парвоз қилиб бунда учиб келаман,
Қаерда жой бўлса бориб қўнаман,
Ёлғиз юриб кўп йўлларни оламан,
Хориб-чарчаб бемаҳалда келаман,
Бир кеча ётмоққа толиб бўламан,
Бу сабабдан мазгил сўраб тураман.
Ёлғиз юриб бўтадайин бўзлайман,
Ғаним кўрсам, кесиб бағрин тузлайман,
Аслим шердир, бир мазгил-жой излайман.
Ассалом алайкум, ахли қубурлар!

Мендай тўра маҳтал бўлиб туради,
Тун қоронғи, бевақт бўлиб боради,
Кўнар фурсат энди яқин келади,
Гўристондан бу мазгил-жой сўради,
Бул ёриқдан бирор чиқиб келади,
Келаётган одамзотни кўради.
«Қандай одам?» — деб бунга қаради,
Неча сўзни Ҳаким бундан сўради:
— Худойим сақлагай бандани омон,
Фариб қулга эгам бўлгай меҳрибон,
Мозоротда юрган одам саргардон,
Ётоқ жой сўраган мен ҳам сарсонман,
Бу сўзларни айтиб турган Ҳакимхон,
Қандай одам сен, келасан бул замон?
Менга хабар бергин сен ҳам наслингдан.
Давлатимдан шоли-шолдам ўрайин,
Қандай жонзот эканингни билайн,
Агар душман бўлсанг, бошинг олайн,
Сени мозоротнинг бири қиласин,
Хабар бергин сиру ҳолинг билайн.
Рози бўлиб мен ҳам тақдир ишина,
Одам бўлсанг, бери келгин қошима,
Душман бўлсанг, қилич солай бошинга.

Ул ёриқдан чиқкан киши: — Бу ерда отингизга жой бор,
ўзингизга жой йўқ, — деди. Ҳакимбек: — Отимизга жой бўлса,
ўзимизга жой бўлмаса, бекор экан-да, — деб туриб эди, яна бир
киши чиқиб: — Берман хайдай беринг, ўзингизга ҳам жой бор,
отингизга ҳам жой бор, — (деди). Бу ер чилтанларнинг мазгил-
гоҳ жойи эди. Шоҳимардан пири чилтанларнинг сухбатида эди,
шу вақтда равзага жўнаб кетиб бораётуб эди. Шоҳимардан пири
чилтанларга айтди: — Бул бачча бизнинг муридимиз бўлади,
буғун сизларга меҳмон бўлди, кўнглини наза қилмай, вақтини
хушлаб жўнатингизлар. Шу гапни айтиб Шоҳимардан пири жў-
наб кетди. Чилтанлар кўнглини хушлаб, отнинг жиловидан уш-
лаб, Бойчиборни таблага тортиб ташлаб, Ҳакимбекни чилтанлар
сухбатига бошлаб, бекнинг вақтини хушлаб ўтириди. От қоқиб,
йўл юриб борган одам, чилтанлар сухбатида ўтириб-ўтириб уйку
олиб кетди. Чилтанлар: — Бу бачча Шоҳимардан пирнинг мури-
ди экан. Бизнинг сухбатимизда бўлди, вақтини хушлай олмадик,
— деди. Чилтанлар илми каромат билан Чилбир чўлидан, Ойна
кўлидан, баҳмал ўтовда ухлаб ётган еридан, Барчиннинг руҳини
олиб келди танидан. Алпомиш мунда ухлаб ётиби, ухлаб ётган
еридан бунинг ҳам руҳини танидан олди. Алпомишнинг руҳи
билан Барчиннинг руҳини ўртада бир ерга қўйди. Бир коса
шароби антахур чилтанлардан Барчиннинг руҳига тегди. Бар-

чиннинг руҳи шаробни қўлига олиб, Алпомишни кўриб, бир ўзи
ичгани кўнгли бўлмай, Алпомишнинг руҳига олинг-олинг қилиб,
бу сўзий айтиб турган экан:

Олинг, аллаёр-аллаёр,
Келинг, аллаёр-аллаёр,
Бўлинг, аллаёр-аллаёр.
Коса ушлаб қўлим толди,
Бийнинг қизи маҳтал бўлди,
Кўнглингиз кимдан қолди,
Боқолмай юрдик сабилди,
Хон тўрам, сизга не бўлди,
Олинг, аллаёр-аллаёр.
Шундай бўлди Барчин сўзи,
Кийганим гулгун қирмизи,
Ақлингдолар жоду кўзи,
Қаватида йўқ канизи,
Коса берар бийнинг қизи,
Кўнгирот бекнинг сарвинози,
Бойсин элнинг добулбози,
Келинг, аллаёр-аллаёр,
Коса берар ойимчалар,
Боғдочилик гулгумчалар,
Жафо қилди кўп гаччалар,
Халак бўлган бекбаччалар,
Коса берган ойимчалар.
Узатдим коса оз — тўлмас,
Олмасангиз сира бўлмас,
Ичмасангиз ойим қўймас,
Бўлинг, аллаёр-аллаёр.
Кўлим толди, косани олинг,
Узок турмай яқин келинг,
Келиб менинг ҳолим билинг,
Тақдир этса, даврон суринг,
Бу сўзимни, хоним, билинг.
Яқин кел менинг қошима,
Понза рўмолим бошима,
Кўл узатгин оқ тўшима,
Бўлинг, аллаёр-аллаёр.
Кўнгирот элдан бундан келган,
Ёрин излаб ҳалак бўлган,
Хали ёринг дучор келган,
Қаддингдан айланай, полвон,
Қалмоқлардан жафо кўрган,
Ёринг ҳам интизор бўлган,
Барчинойим янги кўрган.

Бўлинг, аллаёр-аллаёр.
Бахорда очилган гуллар,
Гулга сайраган булбуллар,
Қўнғирот элдан келган шунқор,
Коса бериб мендай дилбар,
Янги сизга келдим дучор.
Бунча бизни ҳалак қилманг,
Баччадай кўнгилни бўлманг,
Ўзингизни олис билманг,
Ер овлоқдир, ҳадик олманг,
Бўлинг, аллаёр-аллаёр.
Фамли кун тортдим охувой,
Бандам десин кодир худой,
Хўб бир овлоқдир мазгил-жой,
Бу ерда ўйнаб-кулгудай,
Бул кеча даврон сургудай,
Хаялламай тез бўлгудай,
Бўлинг, аллаёр-аллаёр.

Барчиннинг руҳидан бу сўзни эшитиб, Алпомишининг руҳи
ҳам бир сўз айтиб турган экан:

Сенинг кўнглинг бизда бўлса,
Қўнғирот элдан Қалмоқ элга
Келмам, аллаёр-аллаёр.
Сенинг берган шаробингни
Олмам, аллаёр-аллаёр.
Сенинг учун аброр бўлиб,
Мен ўтларга жоним солиб,
Янги мен ҳам сени кўриб,
Бу мазгилда дучор келиб,
Сен гажакдор коса бериб,
Ичмайман косангни олиб.
Сенга еткай бекнинг сўзи,
Арзим шулдир бийнинг қизи,
Ақлимдолган қора кўзи,
Олмам, аллаёр-аллаёр.
Сенинг берган шаробингни
Ичмам, аллаёр-аллаёр.
Тархинали, нозик белинг
Кучмам, аллаёр-аллаёр.
Мен ҳам Қалмоқ элга бориб,
Душманларнинг додин бериб,
Қалмоқ элда ишлар қилиб,
Мард бўлиб майдонда туриб,
Килган ишим барча кўриб,

Дўсту душман қойил бўлиб,
Шул куни шаробинг олиб,
Шунгачайин, бийнинг қизи,
Ичмам, аллаёр-аллаёр.
Шул кун бўлса, бўлар даврон,
Хозир иш қилмайман пинҳон,
Кўп мени қичама, жонон,
Олмам, аллаёр-аллаёр.

Бу сўзларни икковининг руҳи бир-бирига айтди, кечаси файзи сахар вақтига етди. Чилтанлар Барчиннинг руҳини олиб кетди, Чилбир чўлида, Ойна кўлида, баҳмал ўтовда, ухлаб ётган ерида Барчиннинг руҳини ҳам танига киргизиб қайтди. Алломишининг руҳини ҳам танига киргизди. Эрта-мертан тонг отди. Оқшом кўрган одамлар йўқ, бир ўзи қопти. Қадимгидан сертаграддуд бўлиб, бийнинг қизини тушида кўриб: «Оқ қубба келган, қизил чиройли, хўб баркамол, яхши қиз экан», — деб отланиб ётибди.

Барчин ҳам канизларига кулиб ўтирибди: — Бий бобомнинг ўғли тушибма кирибди, икковимиз бир ерда ўтирибмиз, пок бўлмаса, ит йиқилиш бўлайлик деб қоппиз, анча гаплашибмиз, — деб вақти хуш бўп ўтирибди. Алломиши тушида ёрини кўриб, йўлда кичаб бораётгандаги сўзи:

Бойчибор отини миниб,
Кетди шундай йўлга кириб,
Чилтанинг сухбатин кўриб,
Боради вақти хуш бўлиб,
Бедов отга қамчи уриб,
Барчинойим деб ахтариб,
Ёрини олмоққа толиб,
Хар замонда гайрат қилиб,
Адир йўллар ҳавор бўлиб,
Олис юртни яқин қилиб,
Бораётибди йўл юриб,
Хар замон чўлда ох уриб,
Қалмоқ юртини ахтариб,
Етсам деб Чилбир чўлига,
Олмос пўлати белида,
Кўп қичар олис йўлига,
Етмоққа ёр мазгилига,
Душман чиқолмас йўлига.
Қайда бўлур ёр мазгили,
Яқин қолди қалмоқ эли,
Кўринади Чилбир чўли.
Чилбир чўлга назар солар,

Губор-коралар күринар,
Яйлаб ётган элибойлар,
Аниқ эмас мазгил-жойлар.
Бедов отга қамчи уриб,
Хар ерда молларни күриб:
Яқин деб вақти хуш бўлиб:
«Энди етиб келдим, дейди,
Қалмоқ юртинг кўрдим, дейди,
Мен ёримни олдим, дейди,
Агар душман дучор келса,
Қайтмай саваш қилдим, дейди.
Жазосини бердим, дейди,
Кетган элга келдим, дейди.
Чилбир чўлин билдим, дейди,
Чўпонларга келдим, дейди,
Энди етиб қолдим», — дейди,

Қалмоқ элида, Чилбир чўлида бораётиб эди. Бир ерда тўқсон
кўра кўй ёйилиб ётибди. Бу тўқсон қўра кўй Бойсарининг кўйи
эди, тўқсон кўра кўйнинг чўпонининг маҳмаданасини Кайкубод¹
кал дер эди. Кайкубод саришин-қилтоб кал эди. Кайкубодга
қараб, шул орага бир элибой келдими, деб Алпомиш сўраб
турибди:

Ассалом алайкум, чўлда чўпонлар,
Устига кийгани эски чопонлар,
Қафаноқقا тўйиб ётган гуппонлар,
Шул орага бир элибой келдими?
Бир облога етқай аниңт ноласи,
Қирқ мингча бор ҳайдаб юрган галаси,
Унда эди Қўнғирот элнинг тўраси,
Шул орага бир элибой келдими?
Фамили кулнинг ўйлайдиган ўйи бор,
Давлатманднинг гургумадор тўйи бор,
Бир белгиси баҳмал ёпган уйи бор,
Чангтароги фўла, абжуш чийи бор,
Шул орага бир элибой келдими?
Фам билан сарғайган гулдай юзи бор,
Қўтонида кўй-кўзининг изи бор,
Бир белгиси ой Барчиндай қизи бор,
Шул орага алп қизли бой келдими?
Хар гапимнинг бордир шукрилиллоси,
Беш юз норга юк бўлади тилласи,

¹ Қўллэзмада Қайкибат.

Шундай бойнинг бизмиз қуёв боласи,
Бу элга тортимли бойлар келдими?
Олис йўлдан келиб бунда қарайман,
Давлатим бор, шоли-шолдам ўрайман,
Шул бойларни, чўпон, сендан сўрайман.
Хазон урмай боғда гуллар сўлдими,
Сўлган гулга булбул келиб қўндими,
Қилган ишим ҳаққа қабул бўлдими,
Мендай беклар савол сўраб турдими,
Хабар бергин, бунда бойлар келдими?

Бу сўзни эшитиб, Алпомишга қараб, Кайкубод ҳам бир сўз
деб турган экан:

Кулоқ солгин чўпон айтган нолишига,
Яхши кўнар тангри қилган ишига,
Чопар кетди Кўнғирот Алпомишига,
Сўраганинг Бойсарибой бўлмасин.
Кирқ мингча бор ҳайдаб юрган галаси,
Унда экан Кўнғирот элнинг тўраси,
Энди бўлди одамнинг бечораси,
Сўраганинг Бойсарибой бўлмасин.
Фам билан сарғайган гулдай тарзи бор,
Кўтонида кўй-қўзининг изи бор,
Белгиси шул Барчинойдан қизи бор,
Сўраганинг Бойсарибой бўлмасин.
Ошиқнинг фахмидир қоронги кеча,
Йигласа, холига йиғлар бир неча,
Талашиб ётибди тўқсонта гачча,
Талаш бўлиб ётир Барчин ойимча,
Сўраганинг Бойсарибой бўлмасин!
Хар гапингнинг бўлса шукриллоси,
Беш юз норга юк бўлади тилласи,
Шундай бойнинг бизлар чўпон боласи,
Сен бўлмагин ўзбек элнинг тўраси?!

Сўраганинг Бойсарибой бўлмасин.
Бунда Бойсарини сўраб турасан,
Ҳар на десант, гапга жавоб берасан,
Сени билдим, олис йўлдан келасан,
Бойсариникини сўраб борасан,
Бойсарининг бир якини бўласан.
Олмос пўлат айрилмайди белингдан,
Қаҳрлансанг ҳар иш келар қўлингдан,
Бойсари деб кепсан ўсган элингдан,
Созандалар созин чертар қўл билан,
Ёмон одам куйдиради тил билан,

Сени билдим, Бойсарини сўрадинг,
Бора бергин ёлғизоёқ йўл билан.
Хар тарафга кўз юбортиб қарайсан,
Бунда келиб Бойсарини сўрайсан,
Бойсарини кўрмокка толиб бўласан,
Шул йўл билан кетсанг, тўғри борасан.
Тарзингга қарайман бир лочин шунқор,
Остингга минибсан назари тулпор,
Сен бўлибсан ё бировга харидор,
Бойсарига йўлиқкудай ишинг бор,
Йўл кўрсатар сенга турган чўпонлар.
Шу йўлдан бурилмай тўғри борасан,
Кўлни ёқалаган элни кўрасан,
Ҳеч ёққа чиқмасанг, тўғри борасан,
Бойсарининг баҳмал уйин кўрасан,
Кеч бўлса ҳам юрсанг, етиб коласан,
Сўраб бориб баҳмал уйга кўнасан,
Бойсари қариндошни бориб кўрасан.

Бу сўзни чўпонлардан эшитиб, Алпомиш айтди: — Кун бе-
вақт бўлди, бемаҳал борган меҳмоннинг иззати, обрўйи бўл-
майди, бугун мен сизларнинг қўшхоналарингда ётайин, эртанги
сўнг туриб кетайин. Бу сўзни эшитиб: — Шу йўловчи бизга
айланা берди, Кўнғиротдан келаётган Алпомиш езнамиз чиқиб
колса ҳам ажаб эмас, — деб чўпонлар кўнглини хушлаб, Бойчи-
борнинг жиловидан ушлаб, езнасини меҳмон қила бошлаб, ости-
га шим билан кебанакни тўшаб ташлаб, зиёфатга қўйни сўйди. —
Чарчаб келгансиздир, езна, суюниб ўтиринг, — деб хуржуни
билан унни оп кеп қўйди. Езнасини меҳмон қилиб сийлади.
Бойчиборни оқ шувоққа бойлади, Алпомиш бу гапни айтди: —
Кайқубод, Чибор отим сенга омонат, омонатга қилмайсан хиёнат.
Мен ётиб ухлайман, эртанги сўнг топиш қиласан соғу саломат.
Кайқубод ҳам отга хабардор бўп ўтирди. Алпомиш чўпонларнинг
қўшхонасида ухлаб ётди. Кечаси файзи сахар вақтига етди,
сахар вақти чўпонларнинг қўшхонасида ётиб бир туш кўрди.
Излаб бораётган Барчин ёри, бул ҳам баҳмал ўтозда ётиб, субҳи
садик тукқан вақтда бир туш кўрди. Кашал горида, тўқсон
қалмоқнинг ичидаги Коражон алп ҳам бир туш кўрди. Учовининг
туши олдин-кейин, дўғилиш кўрди. Аввал Алпомишнинг туши:
Бир кусармас пири тушида бу сўзларни айтиб билдириди:

Ҳакимбек кирганди ўн тўрт ёшига,
Мехмон бўлди чўпонларнинг қўшида,
Ул кечаси файзи сахар бўлганда,
Расули худони кўрди тушида.
Маст уйқуда ётиб эди бу шунқор,



Фафлатдан күзини очди Искандар,
Күзига күрінди расул пайғамбар,
Бу сұзларни расул пайғамбар айтди:
«Адашган умматин шафқатдорингман,
Таниб қолгин, расул пайғамбарингман,
Умматларни мудом ійлігін солурман».
Бу сұзларни әшиитиб Ҳаким шу замон:
«Пайғамбарим, әшиитинг оху зоримни,
Сабил қылмам әлда кирдикоримни,
Хали ололмайман Барчин ёримни,
Күролмадим Шоҳимардан пириимни».
«Фам ема, умматим, — деди пайғамбар, —
Остида дуддули, белда зулфикор,
Жиловида Бобо Қамбар жиловдор,
Фамингда отланди Шоҳимардан пирлар,
Файратингдан бүзлаб кетар қалмоқлар,
Хеч ким бўлмас сенинг билан баробар,
Сенга тақдир қилди Барчин зулфакдор».
Бу сўзни әшиитди ётган Искандар,
«Раҳм айлаб юборди хол қилган жаббор,
Хамма пирлар бўлди сенга мададкор,
Кўнглиндан кетади бир зарра губор»,
Бу сўзларни айтиб расул пайғамбар.

Бу сўзни ётган ерида маълум қилиб кетди. Эрта-мертан тонг
отди. Барчин ҳам кўрган тушини Суқсурой канизига айтиб ту-
рибди:

Хазон бўлиб боғда гуллар сўлгандা,
Жон жасаддан бир бекарор бўлганда,
Зиён ётиб, раҳмат тошар бўлганда,
Раҳмат дарё айни тошиб келганда,
Туш кўрибман файзи саҳар бўлганда.
Қибла бетдан бир ой туғиб келади,
Ойнинг гирдин тўртта юлдуз олади,
Тушимнинг табгири қандай бўлади?
Бу тушни кўргандир мендай муштипар,
Ер юзини тутиб кетди айдаҳор,
Ёмон деманг, яхши жўранг, канизлар.
Бул тушни кўргандир мендай қаламқош.
Қўркқанимдан кўтардим уйқудан бош,
Келаётир маст туюман¹ айдаҳорлар аралаш,
Ёмон демай, яхши жўранг, канизлар.

¹ Туя билан

Чўлларда кўринди қирқта айдаҳор,
Кирқ айдаҳор бир бургутни кўтарар,
Шул бургут келиб тушди қошима,
Қанотининг учи тегди бошима.
Бир нечалар ушлаб турди қўлимнан,
Айдаҳорлар тишлиб турди тилимнан,
Қайсар йўлбарс пайдо бўлди кейинимнан,
Қочсам, қўймай маҳкам қисди белимнан,
Ёмон демай, яхши жўранг, канизлар.
Бахмал уйнинг чангтароги ўйилди,
Мендайин ойимнинг зулфи ёйилди,
Орқамдаги чочбовматим туйилди¹,
Солиб қўйган бул тўшагим жийилди,
Ўйлаб қўрсам, қўрган тушим қийинди(р),
Бул тушнинг табгири, қизлар, не бўлди?
Ёмон демай, яхши жўранг сабилди.

Бул сўзни Барчиндан эшитиб, Суқсурой канизи тушининг табгирини айтиб турибди:

Хафа бўп мунгайма, сендай муштипар,
Бу тўшингга бўлмайсанми харидор,
Қибла бетдан бир ой туғиб келсалар,
Ой эмасдир, ул ҳам расул пыйтамбар,
Ой гирдинда тўртта ёруғ юлдуз бор,
Юлдуз эмас, тўрт чориёр муқаррар,
Ер юзини тутиб кетса айдаҳор,
Маккадин Машрикка кулли эранлар.
Бул тушни қўрганди сендай қалам қош,
Қўрққанингдан уйқудан кўтарсанг бош,
Кела ётса маст туюман айдаҳорлар аралаш,
Мадинада ўттиз уч минг сахоба,
Фотма дер, Зухра дер, канизи дарға,
Раҳм айлаб юборди хол қўйган обло,
Бул тушнингга бўлмайсанми харидор.
Чўлда қўрган бўлсанг қирқта айдаҳор,
Кирқ айдаҳор қирқ чилтан пирлар бор.
Кўтарган бургуги бобонг Чибори,
Устида қарчигай Ҳаким шунқори,
Шул бўлар, бувишим, тушинг табгири,
Эртан чошқа келар бобонгнинг ули.
Бойчибори ем емайми қўлингнан,
Вакиллари савол сўпар тилингнан,

¹ Тугилди.

Кочсенг, нега сени қўйсин Алпомиш,
Бахмал уйда маҳкам қисар белингнан.
Бахмал уйнинг чангтарори ўйилса,
Мен билувда тўқсон қалмоқ сўйилса,
Сендайин ойимнинг зулфи ёйилса,
Тўқсон алпнинг қони ерга куйилса,
Тўранг келиб душманнинг додин берса.
Хафа бўлмай, мудом ўйнаб-кулгин-чи,
Каддингдан, бувишим, берман келгин-чи,
Шукрилилло, яхши тушни кўрибсан,
Бу тушингта, ойим, бергин суюнчи.
Тушингнинг табгири шундай бўлади,
Эртан чошка қайсар тўрам келади,
Сенинг кўнглингдаги бўлиб қолади,
Сендай ойим бунда ўйнаб-кулади.
Тушин айтиб суюнчини сўради,
Суюнчига Барчин тилла беради,
Суксуройнинг вақти хуш бўп қолади,
Тушининг табгирин шундай жўради,
Ҳаммаси ҳам ўйнаб-кулиб туради,
Келмаса ҳам келгандай бўп қолади.
Энди келар дейди, умид қиласади,
Уйдан чиқиб шундай йўлга қаради,
Тушни жўраб вақти хуш бўп туради,
Барчинойнинг вақти хуш бўп боради.

Суксур канизи эртан чошкада бобонгнинг ўғли келар, деб тушининг табгирини жўради, Барчиннинг ҳам жуда димоги чоғ бўп қолади, келмаса ҳам келгандай бўп, кулиб-ўйнаб туради.

Алпомиш чўпонларнинг қўшхонасидан отланиб келаётиб эди. Тойчи вилоятида, Қалмоқ музофотида, Чилбир чўлида Муродтепа деган тепаси бор эди, ҳаддили баланд тепа эди, устидан қанотли күш учиб ўтолмас эди, ҳар қандай одам чиқиб, оёқ ости қилиб кетолмас эди. Шул тепани кўриб, Алпомиш ирим чекиб: «Шу тепага отимни солайин, иркилмай тепага отим чиқиб кетса, боргандан ёримни оламан, чиқолмаса, бориб нима қиласан, борган билан бекор аҳмоқ бўламан, пешонамни шу ердан синаб кўраман», — деди. Отни тепага тўғри қилди, туёғидан чилтанлар ҳами берди, қирқ минг отнинг дубири пайдо бўлди. Алпомиш кўнглида ёрини олмаса ҳам олганча бўлиб қолди. Тепанинг устига чиқиб қараса, ўн минг ўйли Кўнгиротнинг эли кўриниб турибди, отни қовдонга қўя бериб, тепанинг бошида ёнбошлаб, Бойсарининг уйига тиклаб ёта берди.

Бононағи туш кўрган Коражон қалмоқ номоз вақти ўрнидан

калима айтиб турди. Коражоннинг калима айтиб турганини бир кам тўқсон алп кўриб: «Ошпичок, қалампир, Коражон тентак бўп қопти», — деб бир кам тўқсон алп: — От торт, — деди. Кўлга қараб овга чиқиб кетди. Коражон ўн уч маҳрами билан чўлга қараб овга чиқиб кетди. Бул Алпомиш тарафга қараб бораяпти. Қовдон еб ётиб, хоннинг Чибор оти шундай қаради: Қалмоқ тарафидан ўн тўрт қора отнинг кўзига кўринди. Бул қорани кўриб, отнинг чайнаб ётган қовдони ҳам томоғидан ўтмай қолди. Отнинг кўнглидан кечгани шул бўлди, кўнглига шундай келди: «Бу келаётган отлар тулпор бўлса, устига мингани душман-коғир бўлса, Алпомиш мени миниб қочса, кейинидан қувиб етса, бир шўрнинг ёлғиз ўғли ўладиган бўлдида». Хоннинг Чибор оти тоза тингнаб қаради. Қараса, ўн тўрти ҳам тайпанглаб ўйртиб келаётир, туёғи ерни туртиб келаётир. Бул отларни кўриб: «Қувсам, етаман экан, қочсан, кутулиб кетаман экан, устима минган мардимни, чин ажал қамсаб келмаса, фалокатдан озод кип кетаман экан», — деб қарсиллатиб қовдонни ура берди.

Коражон Муродтепанинг остига келиб қолди. Шундай тепа-нинг бошига қаради. Тепанинг бошида Юсуф талъатли, Рустам сифатли, бир ҷовкар отли бирор ёнбошлаб ётибди. «Бу бизнинг Қалмоқ вилоятининг одами эмас, бундай йигитлар Қалмоқ юртида бўлса, беклиқда, подшоликда бўлар эди. Илгаридан ҳам бирди-ярим кўзима тушар эди. Магар қирқ чилтан билан расул пайғамбар мени мусурмон қилиб, қавм-қариндошини тушимда руҳима қўрсатиб, мени дўст қилган, Кўнғиротдан келаётган Алпомиш деган комилбачча шул бўлмаса», — деб Алпомишга қараб, бир сўз деб турган экан:

Остингда юз алвон ўйнайди отинг,
Душманни ўртайди шоҳлик шавкатинг,
Йўл бўлсин, бекбачча, қайда борасан?
Остингда бедовинг ҳаллослар қушдай,
Аччиғинг чиллали музлаган қищдай,
Норкалла келгансан чўйда қўшмушдай,
Норкалла полвоним, қайдин бўласан?
Юрагингда бордир фусса-аламинг,
Хуржунингда балки қуръон-каломинг,
Сипоҳи сатангим, қайдин бўласан?
Мударис эшоним, қайда борасан?
Кийғир деган күш ўтирас қиёда,
Жасадинг бор Рустамдан ҳам зиёда,
Файратингдан шоҳлар юрар пиёда,
Хабар бер, бекбачча, қайда борасан?
Тепанинг бошида сенга қарайман,
Борар жойинг мен ҳам сендан сўрайман.

Жамолинг ўхшайди осмонда ойга,
Кошиңгни ўхшатдим эгилган ёйга,
Жасадинг ўхшайди бўз қарчигайра,
Ёнбошлиб ётишинг минг қўйли бойга,
Бойбачча сифатлим, қайдин бўласан?
Бино бўлдинг қайси гавҳар донадан,
Сендай йигит бино бўлмас энадан,
Парвоз қилдинг қайси мазгилхонадан,
Баланд парвоз хоним, қайдин келасан?
Мундай бўлди менга ҳақнинг фармони,
Сени тукқанларнинг борми армони,
Душман кўрса кетар энди дармони,
Аслинг одам десам, беҳишт фильмони,
Қарчигай чангалим, қайдин бўласан?
Мен билмадим ўйнаб-ўсган юртингни,
Англамайман келган мамлакатингни,
Янги бунда кўрдим сендай мардимни,
Қоражон дейдилар менинг отимни,
Баланд билдим сенинг сиёсатингни,
Хабар бер, бекбачча, қайда борасан?

Қоражондан бу сўзни эшитиб, Алпомиш ҳам Қоражонга қараб, бир сўз деб турган экан:

Мени билсанг, Кўнгиротларнинг ораси,
Бошимда бор эди зардан жигаси,
Ёз бўлса, яйловим Аму ёқаси,
Мени билсанг, Кўнгирот элнинг тўраси.
Кўқамиш кўлидан суксур учирдим,
Суксурни излаган лочин бўламан,
Боғларим зумратдан, чангалим пўлат,
Бойсиндан куюлган шунқор бўламан.
Бойлигидан бедов отни бойлаган,
Тангқа тайлаб Олатовни ёйлаган,
Камбағали кирқ минг гала ҳайдаган,
Шул галада бизнинг бир моя келган,
Моянинг йўқчиси, нори бўламан.
Ҳасратидан ғамга тўлдим оҳ уриб,
Олтойчилик йўлдан келдим ахтариб,
Чилла кирмай, чирқилларман маст бўлиб,
Чайқарман хатапга бошимни уриб.
Жафолар соларман тандаги жонга,
Хазон бўлса зоғлар кўнар гулшанга,
Ажалли касратки тегар илонга,
Индан чиқиб пишак билан ҳазиллар
Магар ажал қамсаб келса чичқонга,

Қалмоқ күрсам отаман-ку осмонга,
Қалмоқларга келган бало бўламан.
Бойсин-Кўнғирот дейди ўсган элимни,
Бадбаҳт қалмоқ, эшит айтган тилимни,
Соларман бошингга қаттиқ зулимни,
Кўп сўрадинг сен менинг мазгилимни.
Асли Кўнғирот дейди менинг юртимди,
Лақабим Алпомиш, отим Ҳакимди(р),
Не биласан, сен сўрайсан юртимди,
Коражон деб хабар бердинг отингди.

Коражон Алпомишдан бу сўзни эшитиб, Коражон мусурмон бўлган, Алпомишининг сўзини кўнглига оғир олган, Коражон айтди: «Қандай бўлса, кўтарилма, лоппи ўзбак экан». «Қалмоқларга келган бало бўламан» дегани Коражонга ботиб кетган эди. Алпомишига қараб, Алпомиши синаб, бир сўз деб турган экан:

Учирган суқсуринг Ойкўл қўнибди,
Тўқсон ғажир ўртага олиб турибди.
Ёш ўғлонсан, бекор ҳалак бўласан,
Ғажирлар иложин қандай қиласан?
Бекор ҳалак бўлиб бунда келасан,
Ғажирлар чангиди тайин ўласан.
Холинг билмай, сен ҳам сарсон бўласан.
Ҳар бир сўзни бунда лоппи урасан,
Ўлар йўлга юрган тентак бўласан,
Осмондан тушгандай бўлиб келасан,
Англамайсан, кўтарилиб турасан,
Лоф уриб сен ҳам менга қарадинг,
Моячам деб сўнгра мендан сўрадинг,
Сўрадинг, моянгдан дарак берайин,
Билганимни сенга айтиб берайин.
Нор, моянг юрибди Чилбир дашида,
Минг беш юз тиллалик овсар бошида,
Кўрдим тўқсон алпнинг той-талошида,
Нор, моянг шу кунда довриқ устида.
Мундайғачоқ шунғут ўзбак бўласан,
Тўқсон алпдан хоназодни оласан,
Жуда ҳам бир ўзбак йўлли бўласан,
Нор, моянгни кўрсанг, завқ қип қоласан,
Нор, моянгни болалатиб борасан.
Алплар билан, кўрсанг, саваш қиласан,
Айрилиб моянгдан сарсон бўласан,
Бул алпларни нима илож қиласан,
Йўлиққан сўнг сен зўрлигин биласан,
Бекор ҳалак бўлиб бунда келасан.

Бу сўзни Қоражондан эшитиб, Алпомиш кўнглига оғир олиб:
«Тўксон тоғдан ўтиб, бунинг учун меҳнат тортиб, бул қалмоқлар-
нинг алпи билан аралашиб қолиб, балога йўлиқиб юрган экан, бу
қалмоқ менга билиб гапиргандир, бориб шарманда бўлгунча,
бормай, шу ерданоқ қайтиб кета берсаммикан», — деди. Алпо-
миш кўнглига оғир олганини билиб, танимаган киши бўлиб, мен
сенি бирорвга ўхшатиб турибман, деб (Қоражон) бир сўз айтиб
турган ери:

Билдим кўнғиротлик зотингни,
Малакдайин суратингни,
Қовдон еган отингни
Мен бирорларга менгзадим.
Моячам деб сўрганингни,
Галман жавоб берганингни,
Рустам каби мужгонингни
Мен бирорларга менгзадим.
Ширин суханли тилингди,
Билагингдаги зўрингди,
Панжаси узун қўлингди
Мен бирорларга менгзадим.
Калласи катта бошингни,
Ҳак деб чиққан нолишингни,
Бургутдай ўтиришингни
Мен бирорларга менгзадим.
Жасаду тана, тўшиングни,
Имо билан кулишингни,
Қийилган қалам қошингни
Мен бирорларга менгзадим.

Алпомиш бу сўзни эшитиб, аҳмоқ қалмоқ, мени сен кимга
менгзадинг, — деб, бул ҳам бир сўз сўраб турган экан:

Билсанг кўнғиротлик зотимни,
Малакдайин суратимни,
Қовдон еган отимни
Қалмоқ, сен кимга менгзадинг?
Бадбаҳт, сен кимга менгзадинг?
Моячам деб сўрганимни,
Галман жавоб берганимни,
Рустам каби мужгонимни
Аҳмоқ, сен кимга менгзадинг?
Ширин суханли тилимди,
Билагимдаги зўримди,
Панжаси узун қўлимди
Қалмоқ, сен кимга менгзадинг?

Бургутдай ўтиришимни,
Калласи катта бошимни,
Менинг юрган юришимни
Аҳмоқ, сен кимга менгзадинг?
Жасаду тана, түшимни,
Имо билан қулишимни,
Қийилган қалам қошимни
Оҳ тортгандা нолишими
Қалмок, сен кимга менгзадинг?
Аҳмоқ, сен кимга менгзадинг?

Алпомишнинг аҳмоқ, бадбаҳт, деган сўзи Қоражонга жуда ўтиб кетди, ғайрати ғайратга етиб, ўтдай тутаниб кетиб, баданинг туклари совут-қалқонини тешиб ўтиб, таги ўзига тасалли бериб, бу сўзни айтиб турибди:

«Инжилма, кўнглим, сабр очар,
Бесабрдан давлат қочар,
Давлат эшигин сабр очар,
Инжилма, кўнглим, сабр айла.
Келма мени, малъун, босиб,
Килма жаннатни бенасиб.
Очилмайин гулинг сўлсин,
Малъун шайтон, бўйнинг синсин,
Мени бунча шердил қилма,
Дўст бўлганимни не билсин.
Келмагин, малъун, янашиб,
Кетибман ақилим шошиб,
Менман бўлибман адашиб,
Бу сўзларга ақлим шошиб,
Кетмайин дарёдай тошиб,
Инжилма, кўнглим, сабр айла».

Қоражоннинг Алпомишга қараб, айтиб турган сўзи:

Билдим қўнфиrotлик зотингни,
Малакдайин суратингни,
Қовдон еган отингни
Бойчиборларга менгзадим.
Моячам деб сўрганингни,
Галман жавоб берганингни,
Рустам каби мужгонингни
Алпомишларга менгзадим.
Ширин суханли тилингди,
Билагингдаги зўрингди,
Панжаси узун қўлингди

Бойсариларга менгзадим.
Калласи катта бошингни,
Билдим мен қилган ишингни,
Бургутдай ўтиришингни
Бойбўриларга менгзадим.
Ҳак деб чикқан нолишингни,
Жасаду тана, тўшингни
Кунтуғмишларга менгзадим.
Имо билан кулишингни,
Кийилган қалам қошингни
Калдирғочларга менгзадим.

Бу сўзни эшитиб: — Ахмок қалмок, илгари мени қўрибмидинг, ё менинг билан ҳамсуҳбат бўлибмидинг, ё бизинг қўзини боқиб, бизникида етим-метим юрибмидинг? Бойсарини ўз элингда кўргансан, мени бу ерда кўриб турибсан, отамни ҳам дала-даштда кўрсанг, кўргансан, сен етим юрмасанг, уйдаги энамни, синглимни қаёқдан билдинг? — деди. Коражон айтди: — Мен сенинг кўрганим йўқ, сенинг билан ҳамсуҳбат бўлганим йўқ, мен ҳам хотинингга талашиб ётган тўқсон алпнинг бири бўламан. Кулфи дилимни худо очди, мусурмон бўлдим. Кирқ чилтан билан расул пайғамбар қавму қариндошингни тушимда кўрсатиб, сенинг билан мени дўст қилди. Ул сабабдан биламан. — Дўст бўлган бўлсанг, эса яқин бўп қолган экансан, тепанинг устига чиққин, кўришайик. Коражон айтди: — Бу тепанинг устига чиқадиган камолга етишганим йўқ, сен тепадан тушгин, мен кўришайин.

Отни етаклаб, тепадан тушиб кела берди. Коражон маҳрамларига амр қилди: — Дўстим билан кўришгин, — деб. Маҳрам халки нозик келади, кўл учидан кўришаётир. Қалайсан, деб сиқинкираб юборди, маҳрамларнинг панжаси бир-бирига ёпишиб, қапишиб, янчилиб кетди. Коражон билан Алпомиш ёйди кулоҷди, иккови ҳулқи муҳаббат билан кўришиди: — Қалайсан, дўстим, омонсанми, — деб сиқинкираб юборди, Коражоннинг етти қобирғаси синди, иши тинди, таппа туши ётиб қолди. Алпомиш айтди: — Нима қилди, дўстим? Коражон сир бермаган киши бўлиб: — Бола кунда тутадиган қўёнчик қасалим бор эди, шул шу вақт тутиб қолди, — деди. Алпомиш айтди: — Белгили касал бўлса, тузалиб ол эса. Коражон айтди: — Ростингни айтгин, шул кўришганингми, ё уришганингми? Алпомиш айтди: — Нима қилдинглар, уришаман, кўришганим эди. — Кўришганинг шул бўлса, уришганинг қандай экан, — деб Коражон бир сўз деб туриби:

Кўлин қисиб маҳрамимни қочирдинг,
Белим қисиб қовурғамни шиширдинг,

Армон билан
Дүстим, сенинг зўриғингга қойилман.
Сендай беклар Қўнғирот элдан келади,
Шўри қисган сенга дучор бўлади,
Бу сенга йўлиқкан қалмоқ ўлади,
Сенинг билан ким баробар бўлади?
Остингда иргииди бу аргумоғинг,
Эгарнинг қошида олтин садофинг,
Боргандан тегади бодом қобогинг.
Иргитсанг Бойчиборингни,
Боргандан оласан Барчин ёрингни,
Ўлдирасан бунда душманларингни,
Мен ҳам кўрдим сендай зўраборимни.
Фам билан сарғайди гулдайин дийдор,
Бир нечалар ўз ҳолидан бехабар,
Хеч ким бўлмас сенинг билан баробар,
Янги бўлдим сендай полвонга дучор.
Бекор аҳмоқ бўлиб юрур қалмоқлар,
Сендай зўрга сира бўлолмас дучор,
Дучор бўлса, ўлиб кетар шўрлилар.
Улар ҳар қайсиси юрур лоф уриб,
Аҳмоқ бўлиб, бекор элни кулдириб,
Сени кўрса колар ҳолини билиб.
Мехнат тортиб бизнинг юртга келасан,
Қандай душман бўлса, додин берасан,
Зўрикни ўтказиб ёринг оласан.
Аччиклансанг, ҳар бир ишни киласан.
Оting Ҳаким экан, ўзинг зўрабор,
Бизнинг юртга келган сендай айдахор,
Хеч бир алллар бўлолмайди баробар.
Мен эшиитдим, дўстим, сенинг тилингди,
У тегмаса, сен қилмайсан зулимди,
Боргандан оласан Барчин гулингди,
Ўйнаб-кулиб, дўстим, даврон сур энди.
Мен ҳам эдим тўқсон алпман баробар,
Яхши ишман мен кўришдим мұқаррар,
Йўқ эди кўнглингда бир зарра ғубор,
Сенга қойил бўлдим мендайин номдор.
Бизнинг юртда сенга йўқдир баробар,
Аҳмоқликда ўлиб кетар қалмоқлар.

Бу сўзни эшитиб, Алпомиш бир сўз деб турган экан:

Бу сўзларни менга айтиб турмагин,
Алп Қоражон, менга хийла қилмагин.
Кофиримисан, сенинг ўзинг мусурмон,

Сен динингдан баён айла бу замон.
Сендайин ночорнинг кўнглини бўларман,
Хийла қилсанг, сенинг додинг берарман,
Шумлик қилсанг, балки бошинг оларман,
Бир калмани жорий айтгин, Қоражон,
Хийла қилсанг, қабоҳат кун соларман.
Тангри бир, расул барҳақ, деб калма айтсанг,
Калити шул: очар жаннати ризвон,
Имон ҳамроҳ қилиб ўтсанг дунёдан,
Хизмат қилар сенга ҳур билан филмон.
Кофири бўлсанг, борар жойинг жаҳаннам,
Калма айтиб дарров бўлгигин мусурмон,
Хийла қилсанг, мен ҳам бошинг оларман.
Ҳолинг билиб, менга ҳийла қилмагин,
Айёрлик кип, кофири бўлиб юрмагин,
Бу сўзимни, қалмоқ, ҳазил билмагин.
Ажал келса, тебранади танда жон,
Кетгай бошимиздан қайгули туман,
Мўмин қулга эгам бўлгай меҳрибон,
Бекорига ўлиб кетма, Қоражон,
Калма айтиб билдири менга бу замон.
Сен билмайсан менинг қилар ишимни,
Кўздан тўкай мунда сенинг ёшинингни,
Душман бўлсанг, мен кесарман бошингни,
Калма айтиб сен чиқаргин довшингни.
Қалмоқни аҳмоқ, деб аҳмоқ бўлмагин,
Хийла қилиб бул олдимда турмагин,
Бехуда ўзингни абгор қилмагин,
Бир калмани жорий қайтар, Қоражон,
Сен беҳуда кофирлика ўлмагин.

Бу сўзни эштиб, Қоражон калма жорий айтиб, иккови бў-
лакдан кўришиб, дўст бўлиб, Алпомишни меҳмон қилмоқчи бў-
либ, чодирига эргаштириб бораётгандаги сўзи:

Азаматлар олмос бойлар дастига,
Беклар минди бедов отнинг устига,
Давлатли шунқорни олиб жўнади.
Фамли қуллар тортадикан охувой,
Ўн тўрт ботмон биринчдантир парли ёй,
Эгарнинг қошига солиб боради,
Кўрган қалмоқ бунга ҳайрон қолади.
Қоражон югурни хизмат қилади,
Маҳрамлари йўл бошқариб боради.
Давлат қўнса бир чибиннинг бошига,
Семурғ қушлар салом берар қошига,

Етсам дейди яна гул бувушига,
Беклар рози бўлар тақдир ишига.
Эшитгандир Ҳакимбекнинг сўзини,
Кучук босмас йўлбарс-шернинг изини,
Эси бор билади гапнинг тузини,
Излаб келган Бойсарининг қизини.
Бораётган Кўнғирот элнинг ботири,
Коражоннинг қирқ аймоқли чотири.
Шовқимға ирғийди араби тулпор,
Бораётган шундай давлатли шункор,
От чопади йўл бошқариб маҳрамлар,
Чодирга бошлади Коражон қайсар,
Билла бўлган Ҳакимбекдай дўсти бор.
Хар тарафга қушдай бўйлаб қаради,
Қалмоқ юртин назар солиб кўради,
Тўқайистон ерда кетиб боради,
Тўқайни оралаб йўлни юради.
Коражонбек бошлаб кетиб боради.
Не гап келар одамзоднинг ўйига,
Остидаги Чиборини ўйнатиб,
Етди Коражоннинг мазғил-жойига.
Коражонбек мазғилига етади,
Югуриб бекка хизмат қилиб ётади,
Канизлар йигилиб бари етади.
Мехмон бўлмоқ бўлди ўзбакнинг ўзи,
Келди Коражоннинг қиркта канизи.

Канизларига Коражон: — Отдан тушириб ол, — деб амр килди. Канизлар қўлтиғидан ҳамин¹ бериб, отдан тушириб олмоқ бўлиб, Алпомишининг шўхлиги келиб, канизларга салмолини солиб, канизларнинг ўн беши майиб бўлиб, ўн бешининг бути айрилиб, заиф бўлиб, бари ҳам шундай бўлиб қолди. Коражонникида Алпомиш меҳмон бўлиб ўтирди. Коражоннинг энасининг кўзи тушиб, Коражонга қараб, бир сўз деб турган экан:

Коражонбек, болам, бежо қилибсан,
Зўр ўзбакни қайдан топиб келибсан,
Англамайин, болам, дучор бўлибсан,
Душманни уйинга меҳмон қилибсан.
Нега, болам, бундай ишни қиласан,
Одамхўр ўзбакни топиб келасан,
Сўнгра, болам, кўп пушаймон қиласан, .

¹ Хоми.

Бу ишингдан наф топмайин қоласан.
Лодон кўнглинг ҳар хаёлга бўлмагин,
Бул ўзбакка меҳрибонлик қилмагин,
Дўст тутиб сен бул қошида турмагин.
Оша юртдан келган экан зўрабор,
Бундай меҳмон, болам, сенга не даркор!
Аччиғланса, болам, сени ўлдирап,
Бу энангнинг насиҳати шу бўлар,
Ҳар на деса, айтганига кўндирап.
Сурхайил дер эшит айтган сўзимни,
Коражонбек, ахмоқ билдим ўзингни.

Шунда Коражон энасидан бул сўзни эшитиб, бул ҳам бир сўз
деб турган экан:

То ўлгунча яратганга рост бўлдим,
Ўз феълимдан чўпу хасдан паст бўлдим,
Худони ўртага солиб дўст бўлдим.
Келган меҳмон сенинг ўғлинг бўлади,
Ундан десанг, эна, кўнглим қолади,
Худога урдириб, оси бўлади,
Дўстнинг меҳри жуда иссиқ келади,
Ҳар ким қайтса, худога оси бўлади,
Худо қилган ишга бандади кўнади,
Мазгилига ўғлинг айтиб келади,
Зарул эмас, сени нима килади,
Дўст отини бунда тутиб туради,
Ўй дема, энажон, айб бўлади,
Кўнгиротнинг шунқори келиб кўнади,
Эшитса, кўнглига оғир олади.
Бундай сўзни, эна, сўзлаб келасан,
Сен менинг дўстимни душман биласан,
Бундай бўлса сен имонсиз ўласан,
Кўй, бетовфиқ гапни нима қиласан,
Кимни кўрсанг, ғаним билиб юрасан,
Кўнглингга маъқул деб сўйлаб келасан,
Эна, мудом гап еталаф юрасан.
Бошдан бошга сен тинмаган балосан,
Аёл-эркак кўрсанг, чаток қиласан,
Хамиша, энажон, шундай бўласан,
Ўз феълингга тўғри юрсанг, ўласан,
Шу сўзни кўнглингга маъқул қиласан,
Ким кулиб гапирса, яхши кўрасан,
Шундайғачоқ гап ташигич бўласан,
Кариганда ирвогарлик қиласан,

Ўзинг шундайғачоқ юрган балосан,
Бу сўёни гапириб нима қиласан?!

Алпомиш Қоражонникида меҳмон бўлиб ётди, Қоражон қилди зиёфатди, югуриб қилиб ётири хизматди. Эрта-мертан тонг отди, кун чошка ҳаддига етди. Алпомиш туриб айтди: — Қоражон, бизнинг бунда келиб ётганимизни Бойсари не билсин, сен Бойсариникига томон бориб келсанг, бир хабарини билиб келсанг, қизини бизга берадигандай бўлса, жовчи бўлиб келсанг, қандай бўлса, менинг келганимни бир билдириб келсанг. Қоражон: — Мен қандай от миниб борайин? — деди. — Майлинг, қандай от миниб борсанг, — деди. — Сенинг отинг чарчаб келган, ўзимнинг отимни миниб бора қолайин, — деди. — Сен ўз отингни миниб борсанг, ҳамишаги келиб талашиб юрган қалмоқ, — деб ишонмайди. Белгим шул: менинг отимни миниб боргин. — Хайр, — деб Қоражон Бойчиронни миниб олди, қамчи билан кўйиб-кўйиб юборди, қамчи ўтиб кетди, хоннинг Чибори лўқиллаб йўртди. Қоражоннинг... узилиб кетди. Қоражон отнинг жиловини торти: «Бу ёмонлаурга бир бало бўпти, ўзида асли ёмон мол экан, менинг ишимни ўсал кипти, шуни ҳам мол деб миниб кепти». Қоражон тўхтаб, Алпомишга қараб, бир сўз айтиб турибди:

Юрап бўлсанг, сенга майдон йўлмиди,
Ғанимнинг шавкати сенга элмиди,
Сенга тегадиган Барчин гулмиди
Қўнғирот элдан минган отинг шулмиди?
Қай ўйингман шуни миниб келасан,
Бу чўбирни қандай миниб юрасан,
Шу от билан ёрни қандай оласан?!

Беҳуда, бек дўстим, ҳалак бўласан,
Ҳали ҳам кета бер, нима қиласан,
Бу душманлар билса, тайин ўласан.
Ошикнинг фаҳмидир коронги кечा,
Йиғласам, холимга йиғлар бир неча,
Тўқсон тўқай йилқиси бор, бойбачча,
Қўнғирот элда минган отинг шулмиди?
Устингга кийганинг яшил, кўқмиди,
Бундай кунда сенга кўнгил тўқмиди,
Минсанг бундан ўзга йилқинг йўқмиди?
От деб сен ҳам шуни миниб келасан,
Ҳалак бўлма, дўстим, ёрдан қоласан,
Хатарли кун сен ҳам қандай қиласан,
Бекорига ахмоқ бўлиб юрасан,
Қўнғирот элда сен ҳам бексан, тўрасан,
Олти ойлик йўлдан бунда келасан,

Сен ёрингни, дўстим, қайтиб оласан,
Хали ҳам кета бер, нима қиласан.
Бу сўзимни, дўстим, оғир олмагин,
Ҳалак бўпсан, келган йўлдан қолмагин.
Дўстим, умид қилма Барчин ёрингдан,
Армонман айрилма ўсган элингдан.
Бул от билан ҳеч иш келмас қўлингдан.
Қалмок билса, билмаганинг билдирад,
Бул отингман кўрса, сени ўлдирад,
Бундай ёмон чўбир сенга не даркор?
Сенда бордир шоҳлик шавкат, кирдикор,
Миниб кўрдим ёмон экан Бойчибор.
Гуруллаб йигилса бунда қалмоқлар,
Бул от билан бўлолмасанг баробар,
Шундай кунда тайин сени ўлдирад,
Албатта сен бундан кетмоғинг даркор,
Хийли бўлдим, сўзни ҳазил билмагин,
Бойчиборинг қурсин, бунда турмагин,
Кет энди, ёрингдан умид қилмагин.

Бу сўзни Коражондан эшишиб, Алломиши ҳам бир сўз деб
турган экан:

Сен эшиитгин мендай мард нолишини,
Кўздан тўкма бунда селоб ёшини,
Бежой бурдинг Чиборимнинг бошини,
Кирқ кун кейин туширдинг-ку, Коражон,
Бек дўстингнинг битиб турган ишини.
Бурилмайин бора берса Бойчибор,
Борганидан тегар эди зулфақдор,
Бежой бурилгандир назари Чибор,
Кирқ кун кейин тушиб қолди бул ишлар,
Бул ишлардан алп Коражон бехабар.
Қулоқ солиб эшит гусали доққа,
Миндирганман шундайин тўбичоққа,
Бойчиборим хўр бўлдим деб йиглайди,
Сендағачоқ тил билмаган қалмоққа,
Бир қалмани жорий қайтар, Коражон,
Сўнгра отим олиб учсин фалакка.
Беҳуда отима жабр қилмагин,
От назари, аччиқ қамчи урмагин,
Сен ўзингни абгор қилиб юрмагин,
Қалма қайтар, отни кейин бурмагин,
Бул отим назари, ёмон билмагин,
Сен ҳам энди хаёлингни бўлмагин,
Бора бергин, жовчиликдан қолмагин.

Бу сўзни эшитиб, Коражон калма жорий айтди, хоннинг Чибор оти йўлга кириб кетди. Коражон боғона отни мингандекан вақтда Коражоннинг кўнглига кеп эди: «Шунинг отини бўлса олдим, динидан қайтиб, қалмоқларнинг ичига кетсам», — деб эди. Шундай гап кўнглига кеп эди, ул сабабдан от юрмай ётиб эди. Коражон: «Минган оти шундай назари, албатта дини бар-ҳак», — деб сидки билан калма айтди, хоннинг Чибор оти йўлга кириб кетди. Коражон ҳам чин кўнгли билан мусурмон бўлиб, жовчиликка жўнаб кетди. Коражон жовчи бўп борајти. Барчиннинг устида алплар кўп талаш қилган эди, олармиз, деб қалмоқлар юрган эди, Барчин олти ойга муҳлат олган эди, муҳлатидан икки соат қолган эди. Кун тушга яқинлаб борган эди, кун киём бўлган сўнг, қалмоқларнинг тани бўлиб кетар эди. Туш кўрганда бобонгнинг ўғли чошкада келар, деб эди. Айтган мўлжалидан ўтиб кетди. Безовта бўп йўлга қарайти. «Бу тушнинг табгири тўғри келмади», — деяпти. «Армон билан файдидин бўлдим», — деб Барчин канизларига қараб, бир сўз айтиб турган экан:

Дардманман, дардимни кимга ёраман,
Айролик савдога бафри пораман,
Қўл кўтариб дуо қилинг, канизлар,
Энди мен файдидин бўлиб бораман,
Азали тақдирга нимиш қиласман,
Бошикаста шўрман, қайда бораман,
Қалмоқ келса, нима жавоб бераман,
Файдидинман қандай ўйнаб куламан?!
Тил билмаган элга кетиб бораман.
Мувойиб йиглайди мендайнин санам,
Ўйилмайин куйди бул кулбахонам,
Қалмоқларда қолди гулдайнин танам,
Қўл кўтариб дуо қилгин, қирқинлар.
Айролик савдога бағримни доғлаб,
Мен қолганман қаттиқ кунда қон йиглаб,
Келмади бобомнинг ўғли сўроғлаб.
Бул жафо жонимдан ўтди,
Билмайман, хонга не бўпти,
Келар вақти кечка тортди,
Кўп қизлар хафа бўпти,
Қалмоқлар муҳлати битди.
Жафо тушиб танда жонга,
Мен қолганман қаттиқ кунда,
Шармандаман муна элда,
Энди қолдим файдидинда,
Худо деб йиглай ҳар кунда,
Умрим ўтсин ислом динда.

Келмади бобомнинг ули,
Не бўлади кўрган куни,
Йиғлай беринг, қирқин қизлар,
Куриди Барчиннинг шўри.
Хабар келмаса элидан,
Нимиш келар бундай кунда
Мунглик шўрлининг қўлидан.

Бу сўзни эшитиб, Суксур каниз Чилбир чўлига қаради, Чилбир чўлидан отнинг дубири келади, Коражон билан Бойчиборни кўради, бу сўзни Барчинга айтиб туради:

Кўнғирот элдан бобонг ўғли келибди,
Тўқсон алп зўрига дучор бўлибди,
Армон билан бобонг ўғли ўлибди,
Минган оти ўлжа бўлиб қолибди,
Тўрангнинг отини душман минибди,
Йиғлай бергин, қиёмат кун бўлибди.
Бек Алномиш ўз юртида тўрами,
Ўлмаса отини душман минами?!
Мазмуни ўлибди давлатли шунқор,
Қалмоқнинг қўлида қопти Бойчибор,
Чибор миниб келаётир қалмоқлар,
Бу юришда тўранг топибди хатар,
Худо дегин, йиғлай бергин, муштипар.
Бойчиборни Суксур каниз кўради,
Устида зингкийган қалмоқ балоди(р),
Бойчиборни жуда қичаб келади,
Билмаймиз ҳолимиз қандай бўлади?
Кўнғирот мулки бўлиб қопти бесойиб,
Айрилдинг тўрангдан чочингни ёйиб,
Йиғлай бер, бувушим, энди сарғайиб.
Нима бўлса битта қалмоқ келади,
Бунда келса билганидай қиласи,
Кирқин қизлар бундачуввлаб қолади,
Зўрлик билан сени келиб олади,
Энди бизга қиёмат кун бўлади.
Кирқин қизлар бари чикиб қаради,
Келаётган бу қалмоқни кўради.
Ҳаммаси чувуллаб ҳайрон бўлади,
Барчинойни бул ўртага олади,
Кўл кўтариб дуо қилиб туради.

Бу сўзни Суксур каниздан эшитиб, Барчин ҳам бир сўз деб турган экан:

Хар нарсаны айта берма сўзинга,
Дўсту душман кўринар-да кўзинга,
Илойим қум қуйилсин оғзинга.
Бу сўздайтиб Барчин сулув туради,
Жапсар ёриб Чилбир чўлга қаради,
Бойчирман Коражонни кўради,
Кўп пушаймон қилиб ойим жилади.
Энди менинг ширин жоним керакмас,
Молу мулку хону моним керакмас,
Фасли баҳор — гулистоним керакмас.
Энди менинг ширин жоним керакмас.
Кўролмадим Бойсин-Қўнғирот хонини,
Олсин эгам берган ширин жонини.
Бий бобомнинг мулки бўлди бесойиб,
Йиглади Барчиной чочини ёйиб,
Канизларман бирга туриб сарғайиб.
Хазон уриб боғнинг гули сўлгандир,
Ажал етиб паймонаси тўлгандир,
Мени излаб бобом ўғли ўлгандир,
Кариндоши бул бехабар қолгандир,
Кўнғирот элдан менинг учун келгандир,
Бул алпларга келиб дучор бўлгандир,
Бу қалмоқлар қилганича қилгандир,
Бадбахтнинг зулмида тўрам ўлгандир.
Бу сўзни айтиб ойим йиглаб турганди,
Бошида бўлмадим келган полвонди,
Оталари бехабар бўп қолганди,
Бу бадбахтлар қандай азоб берганди.
Худо деб йигладим мен ҳам мувойиб,
Тўрамнинг ўлиги бўлди бесойиб.
Узок ўлда меҳнат қилиб юрганди,
Хийламан қалмоқлар ишни қилганди,
Кўролмадим фариб ўлган полвонди.

Бу сўзни айтиб туриб эди, Коражон ҳам жовчи бўлиб бориб
колди. Муртини бураб, узангига оёғини тираб, баҳмал уйга
қараб, Бойсарини сўраб, бир сўз айтиб турган экан:

Фамли қуллар ўйлайдиган ўйдами,
Давлатмандлар гургумали тўйдами,
Алп қизи бор Бойсарибой уйдами?
Савлат билан мен салламни ўрайман,
Назар солиб бул элларга қарайман,
Алп қизи бор Бойсарини сўрайман,
Юрт оғаси Бойсарибой уйдами?
Шовқимга ирғиди араби тулпор,

Бир нечалар юришимдан бехабар,
Бўлиб келдим мен ҳам хонга хизматкор,
Алп қизи бор Бойсарида ишим бор.
Бойсари мазгилин келиб кўраман,
Йўлиқса ишимни айтиб бераман.
Ёд этиб йиглайман қодир худойди,
Бунда келиб кўрдим бул мазгил-жойди.
Алп Коражон Бойсарини сўрайди,
Хар тарафда турган халқлар қарайди,
Коражон қошига ҳеч ким келмайди,
Сўзига ҳеч одам жавоб бермайди,
Не ишда юрганин ҳеч ким билмайди,
Ул ҳайтовур Бойсарини сўрайди.
Бизга келди деб қизлар йиглайди,
Коражоннинг кўнглидагин билмайди.
Алп Коражон ўз ишини билади,
Кўнглида шумлик йўқ, тўғри келади,
Жовчи бўлган, Бойсарини сўради.
Кўрганлар кўнглига шумлик олади:
«Бул бир ёмон ўйда келган балоди»,
Ҳамма бундан ҳадик олиб қолади,
Сўзига Барчиной жавоб беради.

Коражонга қараб, Барчиннинг айтган сўзи:

Ўлжа қилиб миниб кепсан човкар кўк,
Фариблиқда мингандарга кўнгил тўқ,
Сўраганинг Бойсарибой уйда йўқ.
Фамли қуллар ўйлайдиган ўйдадир,
Давлатмандлар яхши мазгил-жойдадир,
Менинг отам чўпонларман кўйдадир.
Устима кийганим кимхоб кўк эди,
Сенга ўлжа бўлган Ҳакимбек эди,
Сўраган Бойсаринг уйда йўқ эди.
Калма шаҳодат мусурмоннинг тилига,
Бизлар қолдик айролиқнинг ҳилига,
Отам кетган Бойсин-Қўнғирот элига,
Қайтган бўлса уч ойчилик йўлига,
Мусофириз бизлар қалмоқ кўлига.
Отам олточчилик йўлга боргандир,
Ўз элида қариндошин кўргандир,
Бепарво бўп отам унда юргандир,
Барчиной сўзингга жавоб бергандир.
Сендай қалмоқ бир шумлик қип келади,
Жуда бизга қаттиқ ишлар қилади,
Мен билувда от эгаси ўлади.

Сендей қалмоқ бой отамни сўради,
Уч ойдан кай отам бунда келади,
Уч ойгача, қалмоқ, ҳалак бўлмагин,
Мухлатим битди деб қичов қилмагин,
Тўқсон қундан бери сен ҳам келмагин,
Кета бергин, келган йўлдан қолмагин,
Кўп яшагин, кўп йилгача ўлмагин,
Яхшилик кўр, ёмонликни кўрмагин,
Сен бизларга бирор залал қилмагин,
Бой отам келганча бунда турмагин.
Хийламан Бойсарини сўраб турибсан,
Бир куни Бойсари отам келар-да?!

Барчин билан сўзни Қоражоннинг кўнглида бир шумлиги бор, ёмон ўйда келган, таги бир уч ой муҳлат олиб кўраман-да, — деб айтаётган эди. Барчиннинг кўнглидаги гапни Қоражон билмай айтди: — Бизга отанг бўлмаса ҳам майли, биз ўзинг билан гапириша берамиз, биз аҳмоқ бўлиб, йўл чангитиб дамба-дам келиб юрмаймиз. Сен тегадиган бўлсанг, у оладиган бўлса, шул бўлади. Бекорига нимага келади, деб, «Жовчиликнинг шаъни шул, бира-тўла битириб кетаман», — деб Барчинга бир сўз айтиб турган экан:

Остимда бедовим ўйнар юз алвон,
Олмос пўлат белда, эгнимда қалқон,
Бу давлатни менга бергандир раҳмон,
Жовчи бўлиб сенга келди Қоражон.
Устингга кийганинг гулгун кирмизи,
Сўзимни англагин ўзбакнинг қизи.
Қулоқ солиб турди Барчиннинг ўзи,
Атрофида турган қанча канизи.
Бизникида ётири давлатли шункор,
Дўстимнинг отидир муна Бойчибор,
Дўстим учун бўлиб келдим хизматкор,
Ҳар на сўзинг бўлса, бизга айтакўр,
Сўзингни опборар Қоражон номдор,
Жовчи бўлиб айтган сўзим шул бўлар.
Хаёлингга бошқа гаплар келмасин,
Бир нечалар сени йўлдан урмасин,
Келишимни душман қалмоқ билмасин,
Мени қалмоқ деб кўнглингга келмасин.
Ҳазил билма Қоражоннинг тилини,
Хоҳлайсанми бий бобонгнинг улини?
Ҳар на деганингни айтиб бораман,
Қандай сўз сўзлассанг, мен ҳам биламан,
Хозир ўзим яхши хизмат қиласман,

Нима деб сўрасанг, жавоб бераман,
Қандай десанг, хонга айтиб бораман.

Бу сўзни эшитиб, Коражонга қараб, Коражонни синаб, бир
сўз айтиб турган экан:

Устима кийганим яшил кўк эди,
Ўз элинда шоҳнинг ғамин еб эди,
Курсин Алпомиш, кўнглим йўқ эди,
Яхшимасдир, курсин кўзи кўк эди,
Тўқсон алп ичинда кўзга босганим,
Ростин айтсан, Коражондай бек эди.
Давлатимдан адрес, кимхоб кияман,
Ҳақдан келган ишга бўйним ияман,
Алпнинг зўри Коражонга тияман.
Боғбон бўлиб қизил гулни тераман,
Канизим ияртиб мудом юраман,
Коражонбек билан ўйнаб-куламан,
Ростин айтсан, бирга ватан қиласман,
Алп Коражон билан даврон сураман,
Коражонга тегсан дейман юраман.
Алларнинг сардори Коражон номдор,
Бўлакнинг зўрлиги бу ерда бекор,
Олса Коражонда энди ихтиёр,
Сенинг ҳам ўзингда менинг кўнглим бор.
Бўлак одамларни нима қиласлан,
Мудом мен ҳам сенинг билан бўлайн.
Мени бошқаларга ўнглаб турмагин,
Хар кимни сен менга дучор қиласгин,
Менинг кўнглим сенда, кўнглинг бўлмагин.
Икковимиз бирга-бирга юрамиз,
Бунда туриб ватан-рўзгор қиласиз,
Бу дунёни шундай бўлиб қўрамиз,
Болали-чақали бўлиб қоламиз,
Коражонбек, сизни ихтиёр қиласиз,
Бирга бориб мазгилингни қўрамиз,
Канизларни биз хизматта соламиз,
Гапим шулдир, сизи билан бўламиш.

Бу сўзни Барчиндан эшитиб, Коражон айтди: — Сен мени
кўйгин, бундай қиласа, инсофга келгин, меҳнат тортиб Алпомиш
кепти, қандай бўлса, қуруқ қолмасин, шунга теккин. Агар сенинг
кўнглинг сидки қалмоқда бўлса, қалмоқларнинг мендан бошка
бир кам тўқсон алпи бор, шуларнинг бирига теккин, сен мени
кўйгин, бўлмаса, бокиб юрган сабилингни бошингга қалпоқ қи-
либ кийгин, — деб хаёли қочиб, нашъаси учуб, отнинг бошини

буриб, йўлга кириб, ўзавонида калма айтиб жўнай берди. Бунинг чини билан мусурмон бўлганини Барчин билиб, Коражонга қараб, бир сўз деб турган экан:

Кўзима кўринмас баландман дасти,
Бир нечук сўзларнинг тегар шикасти,
Ҳазиллаб айтаман, тўрамнинг дўсти,
Шундайин йигитнинг бормикан эси,
Мундайғачоқ ахмок бўлгани неси,
Боғонағи сўзимни айтманг тўрама.
Кўнгилига оғир олиб қолмасин,
Мен шўрлидан кўнгли чўчиб юрмасин,
Нима бўлса бу сўзимни билмасин.
Сиз эшитинг мендай ойим нолишини,
Берман буринг Бойчиборнинг бошини,
Биломадим мен бекларнинг ишини.
Мен ҳам сизга яхши хизмат қиласин,
Тўрам кепти, билиб хурсанд бўлайн,
Бери келинг юришини сўрайин,
Тоза билиб вактим хушлаб турайин.
Неча вақтлар бизлар бўлдик интизор,
Билмасдан сўйлаган сўзларим бекор,
Коражонбек, сизга айтар арзим бор,
Оtingни ушласин кирқин канизлар,
От бошини буринг сиздай зўрабор,
Чакирганда сенинг келмоғинг даркор,
Бехуда қолмасин мендай гажакдор.

Бу сўэни эшитиб, Коражон зингкийиб бурилиб келди. Барчин отнинг жиловидан ушлаб, кўнглини хушлаб, Коражонни меҳмон қила бошлаб, остига либос ташлаб, зиёфатга бир кўйни сўйди, гўштни осиб, шўрвасига ҳам тўйди. Гўштини пишириб, корсонга солиб, Коражоннинг олдига олиб келиб қўйди. Тўклини гўштини чайнаб, суюгини пуркиб юбориб, Коражон ҳам қайқайиб ўтира берди. Коражон туриб айтди: — Қани, Барчин, Алпомиш бўлса келди, алпларнинг муҳлати бўлса битиб қолди, сен нима жавоб айтасан? Барчин айтди: — Алпомиш келса, кепти-да, Алпомиш келди, деб мен Алпомишнинг этагидан ушлаб кета берайинми? Бул алплар ҳам умид билан олти ойга муҳлат берган. Ҳар ким майдонга от солади, отини ўздирган одам олади. Ҳар кимнинг ўз кўнгли ўзидан қолади. Менинг тўрт шартим бор, шул тўрт шартимни қилган кишига тегаман. Ҳоҳи Алпомиш қилиб олсин, ҳоҳи қалмоқларнинг бири қилиб олсин, шул сўзимни хон тўрамга айтиб бор, — деб бир сўз айтиб турган экан:

От чопса гумбурлар тоғнинг дараси,
Ботирни ингратар найза яраси,
Келган бўлса Кўнғирот элнинг тўраси,
Қирқ кунлик йўл Бобохоннинг ораси,
Бобохон тоғидан пойга қиламан.
Кўздан ёшин мунчоқ-мунчоқ тиздирса,
Қўшқанотнинг қўйруғини сўздирса,
Бобохондан пойга қилиб ўздирса,
Оти илдам бойбаччага тегаман.
Мендайин ойимнинг ҳолин билганга,
Оша юртдан меҳнат тортиб келганга,
Душманларга қора кунни солганга,
Ёй тортишса, ёйи синмай қолганга,
Мен тегаман шул ёйандоз полвонга.
Мендайин ойимнинг ҳолин билганга,
Мени излаб оша элдан келганга,
Ғаним кўрса қиёмат кун солганга,
Оша юртдан излаб ҳалак бўлганга,
Минг қадимдан¹ танга-пулни урганга,
Мен тегаман шул қирағай мерганга.
Саваш бўлса, бул шубаниб чиқканга,
Кураш қилиб тўқсон алпни йиққанга,
Мен тегаман нор билакли полвонга.
Шул сўзимни айтиб боргин тўрамга,
Зоф ҳам бўлса қўна берсин гулшанга,
Баб-баробар қилдим яхши-ёмонга,
Мен тегаман тўрт шартимни килганга.
Айтиб боргин излаб келган сultonга,
Отин тоблаб кира берсин майдонга,
Хабар бергин бари қалмок душманга,
Талаб қилса бари келсин майдонга,
Хеч қайси ҳам қолмасин-да армонда.

Бу сўзни Барчиндан эшлитиб, Коражон айтди: — Бул ўйни
сен ўнграй топдинг, аёллик қилиб, мен шуни дейман, деб Алпо-
мишнинг этагидан ушлаб ўтирганда, ҳодиса ишлар пайдо бўлар
эди. Бул ишинг бинойи бўлди, — деб Коражон отланиб бораётib
эди, бир кам тўқсон алп келаётib эди, Коражоннинг олдидан
чиқиб қолди. Тўқсон алпнинг зўри Кўкалдош туриб айтди: —
Коражон, қаёқдан келаяпсан? Коражон айтди: — Ўзбакнинг
қизиникидан келаяпман.

— Ўзбакнинг қизининг муҳлати битди, учрадингми, нима
жавоб айтди?

¹ Кадам.

— Ўзбакнинг қизига учраб келаётирман. Ўзбакнинг қизининг айтган сўзи шул бўлди: «Пойга қиласман, отини ўздирганга тегаман; курашда алларнинг барини йикқанга тегаман; ёй тортишса, ёйи синмай қолганга тегаман; минг қадимдан танга-пулни урган кирағай мерганга тегаман», — деди.

Бу сўзни эшишиб, Кўкалдош алп айтди: — Ўзбакнинг қизининг кўнгли менда, пойга бўлса, ўзиб келмоқ Кўқдўононнинг тани; кураш бўлса, тўқсон алпнинг бирини кўймасдан йикмоқ факирнинг тани; ёй тортишганда ҳам менинг ёйим синмай қолади; минг қадимдан танга-пулни депти, беш юз қадимдан танга-пулни ураман, минг қадимга борган сўнг, чоғлаб қўйиб юбораман, бу ёғини мужмалтоб қилиб оламан. Сен бу остингдаги олачани қаёқдан олдинг? — деди.

— Кўнғиротдан Алпомиш деган дўстимиз келган экан, бул шунинг оти.

— Алпомиш келдими?

— Келди, — деди.

— Шул юртлардан шул отини миниб, хотин олиб кетаман деб аҳмоқ бўлиб юруми?

— Шул отни миниб келган экан, — деди.

Кўса синчи деган синчиси бор эди, синчисига айтди: — Тушиб ўзбакнинг отини кўр қани. Тушиб Бойчиборни кўрди; қаричлаб кўрди: сафрисининг устидан қулогининг ўртасигачайин тўқсон олти қарич чиқди, айил тортуви олтмиш уч қарич чиқди. Сафрисини силаб, бурнидан найда қўйиб, дурбин билан қараб кўрдиким, кўлтиғида тўрт ярим газ қаноти буклам-таклам бўлиб ётири.

— Қандай экан ўзбакнинг оти? — деди.

— Ўзбакнинг оти андай экан, ўзбакнинг қизига бурилмай қўя кўй, — деди.

— Чинингни айт, — деди.

‘Отни таъриф қилиб, чини шул, деб бир сўз айтиб турган экан:

Йилқичинда ўзи келган синлидир,
Тўбишқон түёкли, марол беллидир,
Аросат кунинда ажаб ҳоллидир,
Киммат баҳо экан ўзбакнинг оти.
Минганларнинг ҳақдин етар мақсади,
Кўлтиғида тўрт ярим газ қаноти,
Асиш тулпор экан ўзбакнинг оти.
Ўзи шундай келган экан човкар кўк,
Қуйруғидан берисинда кири йўк,
Қандай бўлса минганларга кўнгил тўқ,
Мен биламан илдамликда мини йўк.
Кимтиса ўтади осмонда қушдан,
Белига ярашган карк қубба пуштан,
Хеч камлик бўлмаса йўрға юришдан,

Умид қилма ой Барчиндай бувушдан,
Асил тулпор экан ўзбакнинг оти,
Буни минган Кўнғиротларнинг бекзоти.
Ўн икки ой сен отингни боқтирсанг,
Йўл-йўлакай йўлга гулмих тўқтирсанг,
Авайлаб ўзади ўзбакнинг оти.
Бедов миниб, от абзалинг шайлласанг,
Пойга қилиб кўп шумликни ўиласанг,
Пойганинг бошида тортиб бойласанг,
Ўн беш кун илгари берман ҳайдасанг,
Бўшалса ўзади ўзбакнинг оти.
Аввал қулоқ солгин айтган тиллара,
Сенга тақдир қилмас Барчин гуллара,
Чопа берсанг олтойчилик йўллара,
Ингранса ўзади ўзбакнинг оти.
Қалмоқ элда от бўлмайди баробар,
Умид узуб кета бергин қалмоқлар.
Ўзбакнинг қизи деб ҳалак бўласан,
Оting ўзолмаса нима қиласан?
Бир ўзбакдан изза бўлиб қоласан,
Бехуда уриниб аҳмоқ бўласан.
Бул от назаркарда, тоза биласан.
Каердан чопишсанг, аввал келади,
Тенг бўламан деган отлар ўлади,
Барчинойни ўзбак оти олади,
Бошқа от мингандар ҳалак бўлади.
Ўрлашганман не ишни қилади,
Фойдаси йўқ, фариллашиб юради,
Бекорга ўзини аҳмоқ қилади,
Бари гап майнага¹ йифилиб келади,
Асил тулпор бунда пайдо бўлади.

Бу сўзни эшитиб, Кўкалдош алпнинг аччиғи келиб: — Мендан бирон вақтда сен жодирим бўлиб, ўзбакни илгаридан ҳам кўриб, ўзбакка йўлиқиб, сиёсатга отимни таъриф қил, деб сенга уч-тўрт танга берган эканда, чокдан бирон нарса олиб таъриф қилдинг, — деб аччиғи келиб, синчнинг икки кўзини ўйиб олиб қўйди. — Ҳамма вақт ўзбакнинг оти менинг отимдан ўзганда, сенинг кўзи-нгнинг хунини бераман. Юринглар, Алпомишнинг устига бора-миз, — деди. Қоражон ҳам қўшилди, тўқсон алп жам бўлди. Ҳаммаси йифилиб, тўкилиб, Алпомишнинг устига бориб қолди.

Алпомиш чодирда ўтириб эди, шундай қаради, ҳар қалмоқлар келаяпти: калласи кападай, танаси тепадай, бутлари селанг-

¹ Мия.

лаб отнинг остига аймасиб кетган. Алпомиш ўтирган ерида сиёsat билан қарди. Бир кам тўқсон алп отдан таппа-таппа ташлаб, қўл қовуштириб таъзим қилди; акли шошиб қолди, табгиридан адашиб, Кўкаaldoш алп Кўкдўоннинг устида бир ўзи қолди, Алпомишга қараб, бир сўз айтиб турди:

Гап эшиит, ўзбак, тилимдан,
Колмагин келган йўлингдан,
Умидинг узгил жонингдан,
Умид қилмагин ёрингдан,
Айрилма кирдикорингдан,
Нима иш келар қўлингдан?!
Сўз айтади мендай аллар,
Менга бўлмайсан баробар,
Бул хотинимда ниманг бор,
Кет энди сендей баччағар.
Тоғ бошини чалар туман,
Чангалима бўлсанг дучор,
Ўзбак, қутулмофинг гумон.
Устингга отлар соларман,
Ер билан яксон қиласарман,
Ўзбак қизини оларман,
Билганимдайн қиласарман.
Ҳазил билиб турма мени,
Ким аҳмоқ қип юборди сени?
Келганинг қалмоқ мазгили.
Кет, ўзбак, тайин ўласан,
Тур йўқол, нима қиласан.
Кўкаaldoш дейдилар мени,
Кўп сарсон қиласарман сени,
Менга маълум қизнинг ҳоли.
Олсам деб умидинг борди(р),
Ҳазил билма қалмоқларди,
Бу гапимни англаб билсанг,
Барчинойнинг кўнгли борди(р).
Неча марта савол қилган,
Тегаман деб ваъда берган,
Ўзбак қизин олмоқ бўлган,
Билгин бул Кўкаaldoш бўлган.

Бу сўзни эшитиб, Алпомиш ҳам Кўкаaldoшга қараб, бир сўз айтиб турган экан:

Тикилсам қурийди дарёнинг гуми,
Наъра тортсам қулар қўргоннинг тими,
Бунча сўзни лоф урмагин бемаъни,

Отим Ҳаким, мен ҳам Бойсиннинг хони.
Кетган одам излаб бунда келами,
Келган одам сендан камрок бўлами,
Ўзи ўлмай, киши ёрин берами,
Ҳеч бир элда сендай тентак юрами,
Лоф уриб ўзини бозор солами,
Лоф билан қўлидан бир гап келами?!
Бешайин чиқмайди марднинг довуши,
Урушли кун Рустамдайин бул иши,
Қайсардайин бордир аниг саваши,
Шундай кунда ўлмоқ гуппининг иши.
Майдонда лоф уриб ул кун келади,
Қўтарилганини бирор билади.
Айналтириб бир қайсар солади,
Аҳмоқ бўлиб сендай қалмоқ ўлади,
Лоппининг жазосин шундай беради.
Фариблиқда ҳаққа фигон этарман,
Нор кесар олмосни белга чотарман,
Қиличима кирмиз конлар қотарман,
Дучор келганингни кўкка отарман,
Иш кўрсатиб, ёрим олиб кетарман.
Жафолар соларман тандаги жонга,
Хазон бўлса зоғлар қўнар гулшанга,
Ажали касратки тегар илонга,
Ҳазиллашма, қалмоқ, мендай султонга,
Сен мард бўлсанг, чиқа бергин майдонга,
От-потингман отайинми осмонга?!

Алномиш дер сенга бермайман омон,
Қалмоқларга солайнин охир замон.

Бу сўзни эшитиб, Кўкалдош ҳам бир сўз деб турибди:

Ўзбак, эшит менинг додим,
Ерни босган сиёсатим,
Бу юртда қолар жасадинг,
Қайтиб сен отасан отим,
Кимга келади қувватинг?!

Сен ҳам, ўзбак, ажаб депсан,
Гуппи сўз ўрганиб кепсан,
Неча сўзни лоф урибсан.
Қиласман ер билан яксон,
Сўз айтарман алвон-алвон,
Элингдан чиқибсан, полвон,
Мендан қутулмоғинг гумон.
Умид қилмагин ёрингдан,
Одам бўп чиқиб шаҳрингдан,

Бўйнингни узай танингдан.
Мен ҳам бўлсан марди майдон,
Омон кетмайсан бу жойдан,
Сендей неча полвон келган,
Келиб бу юртларни кўрган,
Ҳаммаси қўлимда ўлган,
Қолгани пушаймон қилган,
Боши гангиг, чўлда сарсон,
Элин топмай, гаранг бўлган,
Ҳар ким ҳам дўғилиб қўрган,
Ким менга баробар бўлган?!
Ўзбошимча бу Коражон
Сени бир кун топиб келган,
Бу юришинг бўлар ёлғон.
Мени билсанг шундай полвон:
Не эрлар кеп саваш қилган,
Бу тўқайлар қонга тўлган,
От остида калла қолган,
Ҳаммаси қўлимда ўлган.

Бу сўзни Кўкаaldoшдан эшитиб, Коражон ҳам бир сўз деб турган экан:

Эмишдошим, ака, бундай қиласан,
Бир ўзбак деб сўзни лофи урасан,
Сен тилингни тортиб сўйла бу замон,
Ўзбак муфум, армон билан ўласан.
Бул ўзбакни алп Коражон билади,
Чангалласа, тонни талқон қиласан,
Сен тилингни тортиб сўйла, бек оға,
Аччиғланса, мулкинг яксон бўлади.
Ўзи оғир, билмас айтган додингни,
Ўт кўйиб кўйдирар, қалмоқ, юртингни,
Холин билмай ҳар ким ҳалак бўлади,
Ким бунга тегинса тайин ўлади.
Англамайди кўпинча айтган сўзингни,
Агар билса, ўяр икки кўзингни,
Яқинласанг, ўлдиради ўзингни.
Ўрлашганман, ака, нима бўлади,
Бир ҳодиса иш бўп бунда қолади,
Бекор керишганлар ахмок бўлади,
Барчинойнинг айтган шартин қиласан,
Шарт битирган одам ёрни олади.
Тўрт шарт буюргандир унда зулфакдор,
Коражонга тайин қиласан муқаррар,
Шул шартнинг пайида бўлмоқли даркор,



Бекор гапнинг нима кераклиги бор!
Элу халқقا юриб хабар берайин,
Хамма ҳам эшитсин, ани кўрайин,
Ким олади, ким қолади, билайин.
Ўртадаги ўзбак қизи у дилбар,
Унинг учун бекор ўрлаш не даркор?
Жонни сотиб ўзиб келар бедовлар,
Оting ўйса, ўзингдадир ихтиёр,
Бунинг учун ўрлашиб ётмоқ не даркор,
Оти ўзганга тегар Барчиндай дилбар,
Бундайин беҳуда сўзлар не даркор.
Пойганинг пайида энди бўлайик,
Қалмоқшоҳга бориб хабар берайик,
Элу халқقا юриб жарчи қўяйик.
Халойик эшитмай яна қолмасин,
Эшитмаган кўп пушаймон қилмасин,
Билмадик деб ичин уриб юрмасин.
Отини совутиб майдонга келсин,
Ўртадаги ўзбак қизини кўрсин,
От боққанлар чопиб пойгани қурсин,
Оти ўзган олар, ҳалоли бўлсин.
Бу сўзни Коражон туриб гапирсин,
Хамма одам эшитиб буни тан берсин,
Кўкалдош ўртада ўрлашиб турсин,
Кўпдан қолмай, бу ҳам пойгага юрсин,
Оти ўйса, Барчин шуники бўлсин.

Коражоннинг сўзи ҳаммасига маъқул бўлиб, «Коражон рост айтди», — деб, буёқдаги қўл қувуштириб турган қалмоқлар: —
Ёш бачча экан бул ўзбак ҳам, — деди.

Бир нечаси: — Бир ўзбак-да, — деди.

Бир нечаси айтди: — Жуда ҳаддили муфум зўр ўзбак-да,
Кўкалдошдан ҳайқмади, тилини тортмай гапирди, сўнгги навбатда Коражон ора тушди, бўлмаса, Кўкалдошни бир ёқлик қиласа эди, хили иш бошлаб турар эди, — деб ҳар қайсиси ҳар сўзни гапириб ётди.

Энди Коражон бош бўп, пойганинг ҳаракатини қилаяпти. Ҳат ёзиб, Қалмоқшоҳга хабар юборди. Бир маҳрам ҳатни олиб кетди, ким йўлиқса, хабар бериб бораяпти. Қалмоқшоҳнинг давлатхонасига етди. Бир хизматкор ҳатни олиб, Қалмоқшоҳга тутди, Коражоннинг маҳрами қайтди. Бул ҳатни Қалмоқшоҳ ўқиб кўрди. Сайис хизматкорига буюрди: — Отларни тобла, хўб парвариш қилиб қара, манглайларини сила, ўзбакнинг қизи пойга бўлади, насиб этган олади. Жуда яхши қиз таърифи келади, отини ўздирган одам олади, — деб қишлоқларини, бозорларини чактирта берди, ҳар тарафга хабар қила берди.

Қалмоқшохнинг амри шундай бўлади,
Хар элга жарчилар хабар қиласди,
Кишлоқларга юриб хабар беради,
«Отига ишонган одам боради,
От ўздирган бийнинг қизин олади»,
Эшигтганлар отни тоблаб кўради.
Билмаганга юрур шундай билдириб,
Шўхлик қилиб бир нечани кулдириб,
Элу ҳалқقا юриб хабарни қилиб,
Жарчилари ҳар бозорни чақириб.
Ҳазон бўлмай боғда гуллар сўлиби, •
Кўнгиротдан ҳам бунда одам келиби, •
Тўқсон полвон кўп бир чатоқ килиби, •
Бойсарининг қизи пойга бўлиби, •
Бизнинг юртга шуйтиб хабар келиби, •
Яхши қиз деб овозаси келиби. •
Мард йигитлар от совутиб боради, •
Оти илдам Барчинойни олади, •
Қалмоқ юрти кўп ғалоғул бўлади. •
Хар ким ўз ҳолига отин кўради, •
Оти ёмон кўп иркилиб қолади, •
Кўрайлик, деб катта-кичик келади. •
Кашал форда катта йишин бўлади, •
Ойнали кўлига одам тўлади, •
Алплар, бул ҳам шердай бўлиб айналиб, •
Элатидан келган отга қаради. •
Пойгага боргудай отни айриб, •
Шул замон мирзалар хатлаб туради. •
Пойганинг бошчиси Коражон сардор, •
Тўсат-тўсат келаётир қалмоқлар, •
Ўн минг уйли Кўнгирот ҳалқи қаради, •
Томошамон Ойна кўлга тўлади. •

Пойгага қўшиладиган отдан қалмоқларнинг подшосидан ҳам уч от келди: бири олапоча тўрик от, бири бир шапак от, бирори ўн бир минг тангага олган саман от. Қалмоқнинг юртидан Барчиннинг пойгасига йигилган от тўрт юз тўқсон тўққиз от бўлди. Бойчибор билан тўп-тўғри беш юз бўлди. Синчилар беш юз отдан бўлагини кўриб қайтариб юборди: — Бу отлар бўлмайди, бу узоқ йўл, бул отлар йўлда қолади, ичи қўйиб бекорга ўлади, эгаси ҳам сарсон бўлади, — деди.

Пойгачилар ҳар кунига от совутиб, ёлғон пойга қўйиб келади. Бойчибор отларнинг чангини кўрмай қолади. — «Ўйинда ўзган чинда ўзади» деган гап бор, ҳазил пойгада отнинг чангини кўрмай қолади. Чин пойга бўлган сўнг қандай келади? — деб қалмоқлар боронағи кўр бўлган синчига изза беради. Зўрни зўр

билади, валини вали билади, тулпорни тулпор билади. Тойчи ўлахатида Кўкаaldoшнинг Кўкдўони тулпор эди, ўзидан ғолиб Бойчирни кўриб, ваҳм босиб, емини олмай қолди. — Менинг отим касал бўлдими, дарди ёмон ўсал бўлдими, кўзинг бўлмаса ҳам, кўлинг билади, бизнинг отни бир кўриб берсанг, — деди. Синчи Кўкаaldoшга қараб, бир сўз айтиб турган экан:

Алп Кўкаaldoш, эшит айтган сўзимни,
 Зўрлик билан ўйдинг икки кўзимни,
 Саргайтирдинг менинг гулдай юзимни.
 Ўзидан ғолибни отинг кўргандир,
 Бул пойгадан ўзолмасин билгандир,
 Ваҳм босиб емин олмай қолгандир,
 Отингнинг ғолиби Чибор бўлгандир,
 Ўзингнинг ғолибинг Ҳаким полвондир,
 Шутиб отинг ўйлаб ваҳм қилгандир.
 Хоҳи боргин, хоҳи қўйгин, қалмоқлар,
 Бекорига ҳалак бўлма, аҳмоқлар.
 Ўзбакнинг қизидан умид қиласан,
 Холинг билмай сарсон бўлиб юрасан,
 Бехуда отингга зулм қиласан,
 Ололмайсан, сарсон бўлиб келасан.
 Фам билан саргайди гулдайн дийдор,
 Сенга айтган менинг сўзим шул бўлар,
 Бойчорман отинг бўлмас баробар,
 Ҳали ҳам сен ҳалак бўлма, қалмоқлар.
 Бобоҳон торига сен ҳам борасан,
 Кўп жонингни кийнаб сарсон бўласан,
 Сарсон бўлган билан нима қиласан,
 Бир куни зингкийиб ўзини қиласан,
 Элга келиб сен шарманда бўласан,
 Кўзим ўйиб менга изза берасан,
 Ўзбакнинг қизини қайтиб оласан,
 Элда юрган сен ҳам аҳмоқ балосан,
 Борсанг сен, сарсон бўп бир кун келасан.

Бу сўзни эшитиб, ўлса ҳам бул тўғри гапирмайди, энди бул ўзбакнинг ёрдамини олиб, гапирмоқ билан бўлди бунинг иши, — деди.

Кўкаaldoш отланиб, ҳамма пойгачилар жам бўлиб, Алномишнинг танидан Қоражон пойгага бормоқчин бўлди. Саксон тилла савдо қилиб Бойчирни олди. Қариндошсиниб қалмоқлар Қоражонни айнитди: — Бул отинг бунча пуллик от эмас, синчининг пора олиб гапирганига аҳмоқ бўлдинг, ўзбакнинг ёмон чўбирини баланд олдинг, бир четини ўзинг ҳам кўрдинг.

Алномиш айтди: — Дўстим, қариндошларинг айнитган би-

лан айнима, бир суриниб турар, сувдай оққан йўрға бўлар, нима десанг, айтганингни қилас, отдан жуда кўнглинг тўлар, — дейётир. Коражон ҳам: — Бир савдо-да, айнимайман, — деб ётири. Қалмокларга кўз-кўз қилиб, шундай иш бўлиб, Коражон Бойчиборни миниб, пойгачиларга аралашиб турибди.

Алпомиш ўз юртидан келган отга бафир босиб қолган. Откўзидан ғойиб бўладигандай бўлди, шу шаҳарда қоладигандай бўлди, якка мозор бўп ўладигандай бўлди. Коражонга қараб: — Бир келар мўлжалингни айтгин, — деб сўраб турган экан:

Коражонбек, мен ҳам сенга қарайин,
Бир келар бўлжалинг сендан сўрайин.
Тойрилмасин бошда тожи давлатинг,
Белингда ярқиллар кескир пўлатинг,
Ўйнаиди остингда Бойчибор отинг,
Неча кундир сенинг келар муҳлатинг?
Ўз элингда сен ҳам бексан, тўрасан,
Жаҳонни сайл этиб ўйнаб-куласан,
Кўп қалмоқман ёлғиз кетиб борасан,
Хабар бергин, неча кунда келасан?
Сен кетган сўнг қолмас менинг тоқатим,
Бойчибор эди-ку менинг улфатим,
От кетган сўнг қолмас менинг кувватим,
Неча кундир сенинг келар муҳлатинг?
Бебош қалмоқ бўлди сенинг ҳамроинг,
Бундай кунда гапни гапга улайнин,
Бир келар бўлжалинг айтгин, билайнин.
Фам билан сарғаяр гулдайин дийдор,
Бул сенинг остингда кетди Бойчибор,
Хар гап бўлса, сенда бўлди ихтиёр,
Отга залал еткизмасин қалмоқлар,
Албатта хабардор бўлгин, Коражон.
Бориб обод қилсан мамлакатимни,
Дўстим, деб миндирдим сенга отимни,
Айтиб кетгин сен ҳам бир муҳлатингни.
Кўп қалмоққа ёлғиз ҳамроҳ бўласан,
Нима бўлса созигарлик қиласан,
Айтиб кетган неча кунда келасан?
Саломат бўлсин-да Бойчибор отинг,
Шундай бўлди менга қилган хизматинг,
Неча кундир сенинг келар муҳлатинг?

Бу сўзни эшитиб, Коражон келар муҳлатини айтиб, бир сўз деб турган экан:

Остимда ўйнаса араби отим,
Мен кетсам қолмайды, дўстим, токатинг,
Борув қирқ кун, қайтув беш кун, бек дўстим,
Кирқ беш кундир, дўстим, келар мухлатим.
Жаҳонни сайл этиб ўйнаб кулмасам,
Нор кесар олмосни белга чолмасам,
Қирқ беш кунда Бобохондан келмасам,
Ҳам отингни, ҳам дўстингни ўлди де,
Якка мозор бўлиб шунда қолди де.
Ҳар гап бўлса, яратгандан кўрарман,
Қўлимдан келганча хизмат қиласман,
Ярашиққа от кокилин ўрарман,
Насиб этса қирқ беш кунда келарман.
Ҳар талабинг бўлса, ҳақдин тилагин,
Кирқ беш кунда бул йўлима карагин.
Фамли қулга эгам бўлгай меҳрибон,
Иш бўлмас қудратли ҳақдин бефармон,
Мен келганча дуода бўл, бегижон,
Бу сўзларни айтиб ўтар Қоражон,
Хамроҳ бўлди менга беш юзта душман,
Ёлғиз-да деб сен қилмагин пушаймон.
Булар ҳам қариндош, бирга борарман,
Қалмоқларман кўп ўрлашиб кўрарман,
Қўлимдан келганча хизмат қиласман,
Беш юзининг бири бўлиб юрарман,
Нима бўлса эҳтиёт қип кўрарман,
Ёмонининг йўлда додин берарман,
Насиб этса қирқ беш кунда келарман,
Хафа бўлма, дуода бўл, бек дўстим.
Хаёлингни ҳар тарафга бўлмагин,
Яхшилик кўр, ёмонликни кўрмагин,
Мен келганча, дўстим, хафа бўлмагин.

Бул сўзларни айтиб, пойгачилар жўнаб кетди. Алномиш чо-
дирда ўтириб қолди. Қирқ беш кунда келар, деб вактини хушлаб
турди. Энди Барчиннинг қирқин канизлари билан Суксурой
деган канизи бош бўлиб, Алномишга овқат олиб, қирқин қизлар
товоқ кўтариб, дастурхонга солиб, чодирга олиб келиб қолди.
Келса, пойгачилар жўнаб кетибди. Алномишга қараб, Суксур
каниз бу сўзни айтиб турибди:

Хаён бўлиб боғда гуллар сўлибди,
Обло сенинг ақли-хушинг олибди,
Бегижон, бул ишинг ўсал бўлибди,
Бойчиборни, билдим, қалмоқ минибди.
Марднинг иши элда шундай бўлама,

Отидан айрилиб яёв қолама,
Хаёлингга шундай гаплар келама,
Хеч замонда қалмок дүстлик қиласы?!
Менинг муножотим қабул бўлмади,
Бегижон, бўшлигинг сира қолмади.
Сен бекор берисан Чибор отингни,
Фалак берсин қайтай қўнгил шодингни,
Ҳай билмайман қиласми хизматингни?!
Оша юртга келиб бундай бўласан,
Ихтиёргинг бир қалмоққа берасан,
Бир фариб пиёда бўлиб қоласан,
Душман бўлса, нима илож қиласан?
Сен эшитгин мендай мунглуқ тилини,
Янги кеп кўргансан қалмоқ элини,
Сен билмайсан бадбаҳтларнинг сирини,
Куритмасин сендей мардинг шўрини.
Учкур бўлсанг, қанотингдан қайрилиб,
Югрук бўлсанг, туғингдан тайрилиб,
Бекор қипсан Бойчибордан айрилиб,
Англаб билгин, отинг омон келмайди,
Кўнглингдаги ўйлаганинг бўлмайди,
Улар душман, сира дўстлик қилмайди.

Бу сўзни эшитиб, Суқсур канизга қараб, бир сўз деб турган
екан:

Хар ким ўз шаънига бекми, тўрами,
Аёлнинг ақили ақл бўлами,
Шу гапинг шаънима тўғри келами,
Дўст деб менга ул душманлик қиласы?!
Бу насиҳат айтма, сендей муштипар,
Қулоқ соп эшитгин айтган нидога,
Бу сўзларни айтма, каниз, садага,
Ишимни согланман қодир худога.
Аввал обло, дуюм наби бўлса ёр,
Ўн икки имом, чилтан бўлса жиловдор,
Иншоолло пойгадан келар Бойчибор,
Бу сўзларни айта кўрма, қиркинлар,
Қоражонбек шумлик олса қўнглига,
Қоражонбек бир худога урдирад.
Кўнглига қандайин шумлик келади,
Дўст отини тутиб бундан жўнади,
Дўст деганинг қабоҳат гап бўлади,
Қоражонбек яхши хизмат килади,
Хаёлин қочирса, осий бўлади,
Эси бор, Қоражон ўзи билади,
Бу гапинг, канизак, қандай бўлади,

Таваккални бир худога қиласы,
Күп қалмоқман ёлғыз ўзи жүнади,
Менинг учун меңнат тортиб боради,
Мен билмайман нима азоб күради,
Қалмоқлар албатта ташвиш беради,
Дұст хизмати, қаныз, шундай бүлади,
Ұлмаса, бир куни келиб қолади,
Шаңнима бу гапинг номард бүлади.
Сен номард билмагин бул замон бизни,
Аёллик қип билмай сүйладинг сүзни,
Эргаштириб кепсан бул кирқиң қизни.

Бу сүзни айтиб, канизларнинг олиб келган овқатини еб, фоти-
хани юзга тортди. Кирқиң канизлар бу сүзни айтди:

Кийгани гулгун қирмизи,
Ақлингдолар жоду күзи,
Бизлар Барчиннинг канизи,
Келсин деган бийнинг қизи.
Кирқиң қизлар бошлаб борар,
Олдингизда хизмат қиласы,
Агар күрсанг, йүлинг бүлар.
Әшитингиз айттан сүзни,
Маҳтал қылманг кирқиң қизни,
Барчиной юборган бизни,
Күймай оп кетамиз сизни,
Күрмайсизми сарвинозни.
Балқ уриб ўтирган ўзи,
Сизни элтар айттан сүзи.
Боғдоғылган гулгунчалар,
Гулга ярашган думчалар,
Келсин деган ойимчалар.
Агар күрсанг, күнглинг түлар,
Билла юрсанг, яхши бүлар,
Канизлар бүлди миннатдор,
Күнглингда қолмасин ғубор,
Сирлашсам дейди гажакдор,
Сүз айтади жамъи қизлар.
Әшитинг оху зоримни,
Бориб күрсангиз ёрингни,
Тарқат черу ғуборингни.
Барчин шундай гажакдорди(р),
Хамма сизга интизорди(р),
Бориб күринг зулфакдорди,
Үгринча қалликқа бормоқ
Үзбак юртда расм борди(р).

Канизларга қараб, Алпомиш ҳам бир сүз деб турган экан:

Бул бориш, қирқинлар, айб бўлмайми,
Бойсарибий билса, гина қилмайми,
Эшитса, элу ҳалқ бизга кулмайми,
Бу борувим менинг айб бўлмайми
Одамлар шаънима номард қилмайми?!
Қизлар мени лодон ишга солмагин,
Ёрим таъриф қилиб ақлим олмагин,
Қўй, канизлар, бундай йўлдан урмагин,
Қизлар, бундай баринг йигилиб келмагин,
Мени жуда аҳмоқ, лодон билмагин,
Сен ияртиб, эл кулдириб юрмагин,
Ўртага олиб кўп шарманда қилмагин,
Бора бер, канизлар, ҳалак бўлмагин.
Сенинг билан юрсам қандай бўлади,
Гап келса, бетима таъна қилади.
Қанча одам хизмат қилиб юради,
Бий қизига борсак айб бўлади.
Хизматингдан, қизлар, кўнглим тўлади,
Бул ишинг кўнглима тўғри келмади,
Қандай одам кўрса айб қиласди.
Барчин сулув ўзин ўртага солади,
Бийнинг қизи бул ўртада қолади,
Мехнат тортиб бир кун отлар келади,
Сўнгра билмам кимники бўп қолади.
Хозир боришимиз бежой бўлади.
Канизлар, зўрлама, кўнглим қолади,
Гапирган сўзларинг айб бўлади,
Ўртада қолгандир, кимлар олади,
Ким оларин жаббор эгам билади,
Бу сўзларинг, каниз, айб бўлади.
Тақдир этса, бир кун даврон суради,
Тақдирга тан берса, яхши бўлади,
Худо қилган ишга банда қўнади.

Бу сўзни эшитиб: — Ўринча бормоқ ота-бобомиздан қолган расм, — деди. Бул маъқул тушайин, деди. — Ота-бобомиздан қолган расм экан, — деб бормоқни ихтиёр қилди. Бул ўринча қаллиққа бораётгандаги сўзи:

Ҳакимбекнинг билмаганин билдириди,
Ёрин айтиб шодиёна кулдириди.
Қизларнинг сўзига ҳуррам бўлади,
Киркинларман бирга-бирга жўнади.
Маъқул билди канизларнинг сўзини,
Кучук босмас йўлбарс-шернинг изини,

Бориб кўрсам дейди бийнинг қизини.
Таъриф бериб анинг ақлин олади,
Канизларман бир-бирга боради,
Сой билан паналаб шунқор жўнади.
Бийнинг қизин кўrsa қўнгли тўлади,
Кирқин қизлар ўйнаб-кулиб боради,
Хар тарафга назар солиб қаради.
Кўп қизларман билалашиб жўнади.
Ўзбакнинг расми шундай бўлади,
Ўгринча қалликқа кетиб боради.
Қизлар айтар: — Бизман бирга юринг, деб,
Хар замон паналаб бориб келинг, деб,
Дамба-дам вақтингиз хушлаб туринг, деб,
Кўнглингиз тобласа кунда боринг, деб,
Кандай бўлса аралашиб туринг, деб,
Барчинойман бориб сухбат қуринг, деб,
Насиб қўлса кунда ўйнаб-кулинг, деб
Хеч ким билмасин-да пасман юринг, деб,
Насиб этса, бийнинг қизин олинг, деб,
Кўчманчи бўп келган элни кўринг, — деб.
Бу сўздайтиб қизлар кетиб боради,
Ўн минг уйли элдоралаб юради,
Бойсариникига яқин боради,
Бевакт бориб баҳмал уйга киради,
Шул замонда Барчинойни кўради.
Адаб билан бул ўрнидан туради,
Кирқин қизлар хозир бўлиб туради,
Бу қизлардан Барчин уялиб боради,
Икковини қизлар яқин қилади,
Билагидан Ҳаким ушлаб олади,
Бекнинг вақтин қизлар хушлаб туради.
Бийнинг қизин жамолини кўради,
Кўриб Ҳакимбекнинг қўнгли тўлади,
Табассумман Барчин сулув келади,
Кирқин қизлар хизмат қилиб туради.
Ҳакимбекнинг сиёсатин кўради,
Барчинойим иззат қилиб туради,
Кирқин қизлар пайровинда бўлади,
Иzzатида бекнинг қўнгли тўлади.
Сахаргача Ҳаким бунда туради,
Тонг олдида таги қайтиб жўнади.
Эл кўзига тушмай бунда келади,
Намоз вақти чодирига киради,
Кунда қизлар хабар олиб туради,
Ҳаким бунда аралашиб қолади,
Боришли-келишили бўлиб юради.

Буларга ҳар замон қызлар келиб, бир-бирини күриб, сиру холини билиб, шундай бўлиб юрди. Булар бунда шундай бўлиб турди. Пойгачилар йўл юрди. Пойгачиларнинг бораётгандаги сўзи:

Не қалмоқлар шердай бўлиб,
Хар ягрини кирдай бўлиб,
Беш юз отли бирдай бўлиб,
Қистаб йўлда тўбичоқни,
От бошини қўйиб олар
Яқин қилмоққа узоқни.
От чопишиша узоқ йўлга,
Бир-бири кирмайди тилга,
Қамчи уриб Бойчигорга,
Коражон ҳам борар бирга,
Йўлдош бўлган сатта зўрга.
Коражонни мазах қилар,
Шўхлик кип ўртага олар,
Барчинойимнинг устидан
Хўп ўрлашиб талаш бўлар.
Бораётири лоловлашиб,
Ганаси дарёдай тошиб,
Бир хили ўтдай тулашиб,
Бадбахт чўлда аҳалашиб,
Коражон отини қўшиб,
Бир суриниб Чибор турар,
Энди жуда йўрға бўлар,
Кўп қалмоқлар ҳадик қилар:
«Кунба-кун юрса очилар,
Ўзбакнинг оти хийлагар».
Гумон килди кўп қалмоқлар:
«Хайвон ҳам бўлса жодугар,
Йўлларнинг танобин тортар,
Бул отдан ҳамма бехабар,
Ўзармикан шул укағар,
Фарқламайди акли йўқлар».
Шундай бўлиб йўл юради,
Зилнинг тогига боради,
Қалмоқ шундай айрилади.
Қалмоқ кетди ўйни ўйлаб,
Кўнглига келганин сўйлаб:
«Бобохонга етармиз, — деб,
Тумшуқ билан ўтармиз, — деб,
Текис йўлман кетармиз», деб.
Коражон айрилиб колди,
Зил тогин белига солди,

Бир йўл билан бора берди.
Бораётган Коражон номдор эди,
Зил тоғида бир айдаҳор бор эди,
Айдаҳорга алп Коражон дориди.
Коражонбек энди шундай қаради,
Бунда ётган айдаҳорни кўради,
От тизгинин мунда тортиб туради,
Айдаҳор ҳам Коражонни кўради,
Коражонга аждар салом беради.
(Шоир сўзи шундай ёлғон бўлами,
Айдаҳор одамга салом берами?!)
Остида мингани Бойчичор эди,
Мингланларга қутби замон ёр эди,
Жиловида чилтан, пирлар бор эди,
Пирга салом берган айдаҳор эди.
Жафоларга тушиб энди танда жон,
Бундай кунда эгам бўлгай меҳрибон,
Айдаҳордан ўтиб кетди Коражон.
Азаматлар олмос бойлар дастига,
Фаним тушар кам давлатнинг қастига,
Остилаги Чибор отни ййнатиб,

Коражон чиқди Зил тоғининг устига.
Токқа чиқиб алп Коражон қаради,
Йўлда тўзиб қалмок кетиб боради,
Бул тогдан энкайиб номдор жўнади,
Мазмуни қалмоқлар кейин колади,
Йўлнинг тўғасиман қичаб боради,
Неча адир, белдан ўтиб жўнади,
Муродини яратгандан тилади,
Тақдирида нима борин кўради,
Чу, дейди, Чиборга файрат қилади,
Қалмоқдан илгари кетиб боради.
Куринмайди қалмоқларнинг кораси.
Бораётган Коражондай тўраси,
Яқин колли Бобохоннинг ораси

Бобохон тоғига етиб, Коражон отга дам бериб ётди. Қалмоқлар тумшукни айланиб бораяпти. Бир нечаси: «Коражон кўринмайди», — дейди. Бир нечаси айтади: «Отларнинг тўзонида чўбири билан тўбалашиб юргандир-да, Коражон ўзбакнинг отини баланд олган, ул ўзбакнинг тани бўлган, қачон Коражон бир хисобда бор, у ҳам ўзбакнинг бири бўп сарсон бўлган». Қалмоқларнинг олди ҳафта-үн кун деганда Бобохон тоғига етди. Кейини чувалиб ҳали ҳам келаяпти, жуда ҳам ўлдик, деб бораяпти. Кўрса, Коражон Бобохон тоғида ётибди, пойга қўядиган ерга борибди.

Кўкалдош алп туриб айтди: — Коражон, сен лот-манотдан юз ўгириб, исломнинг динига кириб, сехргар-жодугар бўлиб, балога йўликиб қолибсан. Шу ёмон чўбир билан биздан бурун келибсан.

Коражон айтди: — Сизлар билан бирга-бирга Зил тоғига келдим, от чарчаб қолиб, кўп дилтанг бўлдим, зеҳним койиб, йиқиб тўрт оёғини бўғиб, орқалаб, йўлнинг тўтаси билан янгитта ошиб келдим. — Ўзбакка иярсанг, азоб қўрадиганинг белгили эди, — деб бир сўз айтиб турган экан:

Сен билмадинг бек оғангнинг ишини,
Кел кесайик Бойчиборнинг бошини,
Ўртаголиб ейик анинг гўшини,
Шўйтиб қилсак ўзбакларнинг ишини.
Сен эшигдин алп оғангнинг додини,
Кел сўяйик, ука, ўзбак отини,
Армомман кетмасин аканг хотини.
Ўзбак билан гапинг бир бўп юрасан,
Сен ҳам жуда ўзбошимча бўласан,
Мендайин акангни хафа қиласан,
Номус-орни кимга олиб берасан,
Қайси ўзбакни сен хотинли қиласан?
Ўзбошимча бўлиб элда юрасан,
Ёмон бўлсанг, сен жувармак ўласан.
Бир ўзбакнинг кизи деб ҳам келганмиз,
Беш юз одам ҳалак бўлиб юрганмиз,
Неча марта биз маслаҳат қилганмиз,
Сенинг ҳисобингни топмай турганмиз,
Ўзбак отин ўлдирмоқчи бўлганмиз,
Ўзбак қизин биз олмоқчи бўлганмиз.
Ўзбакнинг отини нобуд қилайик,
От гўштига тўйсин барча ҳалоийк,
Бойчибор гўштини овқат қилайик,
Келгин, ука, бир ваъдада турайик,
Жуда ҳам ўзбакнинг ишин қилайик.
Ёлғиз чиқиб ўзбошимча бўлмагин,
Кўкалдош акангни хафа қилмагин,
Ўзбакларнинг етагида юрмагин,
Баччағарнинг айтганини қилмагин,
Қандай бўлса, қариндошдан қолмагин,
Ўзгаларнинг айтганига кўнмагин.

Бул сўзни Кўкалдошдан эшитиб, Коражон ҳам бир сўз айтиб турган экан:

Бу сўзингни, ака, сенинг қўяйик,
Омин деса париштаю малойик,

Яратган раҳмондан мақсад тилайик,
Келгин, ака, Кўқдўонни сўяйик,
Дўноннинг гўштига тоза тўяйик,
Қазисини ёлғиз сенга қўяйик,
Шул сўзимни маъкул денглар, халойик.
Хазон бўлмай боғда гуллар сўлмайми,
Обло сенинг ақли-хушинг олмайми,
Кўз ола қиласан Чибор отима,
Бундай бўлсанг Кўқдўоннинг ўлмайми?!
Шу сўзим ҳаммага маъкул келмайми,
Кўқдўоннинг гўштин есак бўлмайми?
От сўймоққа жуда абжил бўлибман,
Одамларнинг кўнглидагин билибман,
Қассобликни ўзим машқ қип турибман,
Дўнонн сўймоққа, ака, толибман.
Хафа қилма Коражондай мардингни,
Аввал ўлдирайлик Дўнон отингни.
Йўқ ердаги сўзни лофи урасан,
От сўймоқни ўзинг бошлаб турасан,
Ўлдирмокқа мен абжил-ку, биласан,
Акажон, каттасан, кавак боласан,
Йўқ ердаги гапни топиб келасан,
Менинг отим ўлдирмоқчи бўласан,
Эгаси йўқ, нима жавоб берасан,
От сўймоқни, ака, мендан кўрасан,
Аввал сен отингни сўйиб берасан,
Мен айтсан, кўнглингга оғир оласан,
Одамларнинг кўнглидагин биласан,
Ярамаган сўзни айтиб турасан,
Ака, ўзинг асли аҳмоқ бўласан.
Бу сўзни айтиб туриб эди Коражон,
Қалмоқлар аччики келди ул замон,
Коражонга сира бермайди омон,
Ҳаммадан айрилик савдоси ёмон,
Коражонга интилганди бу замон.
Бари қалмоқ бу ўргага олади,
Коражон ёлғиз-да, нима қилади?
Бу қалмоқлар кўплик қилиб туради.
Қалмоқ бари хаста кўнглин хушлади,
Коражоннинг билагидан ушлади.
Йигилиб қалмоқлар зўрлик қилади,
Ўлдирмокқа кўзи қиймай туради.
Неча сўзни бу қалмоқлар ўйлади,
Коражонни кулабанд қип бойлади.
Харчанд чирпиниб кўрди Коражон номдор,

Қалмоқ күп-да, бўлолмади баробар,
Зўрлигини билдирганди қалмоқлар.
— Ҳазон бўлса боғда гуллар сўлар, деб,
Ажал етса, паймонаси тўлар, деб,
Бўшалса, бир куни ўзи борар, деб,
Шунғит бўлди, бу жувормак ўлар, деб, —
Бош бўлиб Кўкалдош бойлаб ташлади, —
Ҳамиша бизга чатоқ қилиб юрар, деб,
Ўзбак бўлса шундай азоб кўрар, деб,
Қарға, қузғун еса бунда қолар, деб,
Зўр бўлса бир Коражон кам бўлар, деб.
Бойловли қолгандир Коражон номдор,
Бойчиборни ўртага олди қалмоқлар.
Шундайин ҳайвоннинг кўнглин бўлади,
Қалмоқ бари бул ўртага олади,
Хар тарафдан унга арқон солади,
Бойчиборни энди йиқиб олади.
Бойчиборни шундай тортиб бойлади,
Оёғидан ўраб-кериб тайлади.
Аҳмоқ қалмоқ отга зулм қилади, .
Туёғига гулмиҳларни уради,
Урган гулмиҳ ялпоқ тизга келади,
Бадбаҳт қалмоқ отга зулм қилади.
Чингириб¹ кишиайди бойловли Чибор,
Сиёсатман зарб кўрсатди қалмоқлар.
Бойчибор ҳайвоннинг кўнглин бўлади,
Туёғига неча пичоқ уради,
Шундай қилиб отга азоб беради.
Миришкорлар туяр пўлат добилди,
Бундай кунда отнинг холи не бўлди,
Бўшалса ҳам етолмасин деди-да,
Отга жойлаб олти чорак совунди.
Коражонман Бойчиборни созлади,
Коражон бойловли ётиб бўзлади,
Қарамайди Коражоннинг юзига,
Хеч бир қалмоқ қулоқ солмас сўзига.

Коражон билан Бойчиборни шундай қилиб бойлаб ташлади
«Бўшалса, бир кунлари бора қўяр, ажали етса, ўла қўяр, иш кип
биздан кейин колса бўпти», деб пойгачилар жам бўлиб, қатор
туриб, пойгани қўйиб жўнаб кетди. Бобохон тогида ёлғиз қолиб,
Бойчибор билан Коражон иккови бойловли ётиб, авлиёларни
шафе келтириб, бу сўзни айтиб ётириб:

¹ Чингириб.

Барчанинг отаси ҳазрати Одам,
Пайғамбарлик бўлди унга мусаллам,
Иброҳим, И smoил, Макка муazzам,
Динларнинг чироғи Имоми Аъзам,
Муҳаммадга уммат, ҳаққа мусаллам.
Аввалим яратдинг сен Одам сафи,
Андин пайдо бўлди соңсиз минг вали,
Шайх Аҳмад, Зинда пил, Имоми шафи,
Обло, сендан бошқа йўқдир мураббий.
Сатқанг бўлай эр Сулаймон пойи ток,
Қўқонга юборди мўйи муборак,
Зиёрат айлайди насиб қилган халқ,
Каримсан, саматсан, расулинг барҳақ,
Раҳм айлаб, ёр бўлинг ночор қуллара.
Майдонда қилмадим Рустамнинг жанги,
Хайбатимдан титраб кетса фарангি,
Тошкантнинг мулкинда эр бобо Занги,
Товба қилдим, мен галирсам баланд-пас,
Бул бандадан баланд бўлар чўпу хас,
Сахийнинг сардори ул Сайд Ваққос,
Садағанг бўлайин Favс билан Фиёс,
Ҳақнинг ҳазначиси Хидири Илёс.
Ҳақ деб чиқар ғамли кулнинг овози,
Отингдан айланай ҳақиқат қози,
Сатқант бўлай, Ҳўжа Ҳофиз Шерози,
Гуноҳкор бандангман, раҳмон, бўл рози.
Умид қип йиғладим ҳазрати Нурдан,
Фам тортган лочинин кутқаргин тўрдан,
Аввали облодан, дуюми пирдан,
Мискин умид қиласр Алидай шердан.
Лочиннинг қаноти бўлмасин майиб,
Балога сабр этган ҳазрати Аюб,
Уч юз олтмиш ўтган мардони фойиб,
Кам банданг мақсадин тилар муғойиб.
Нимиш келсин кам банданинг қўлидан,
Ё мадад тилайман Ҳазрат Алидан,
Умид қилдим Favсул Аъзам валидан,
Отинг раҳмон, қайтар шайтон йўлидан.
Холиқсан, каримсан, қаҳрингдан кутқар,
Гуноҳкор бандаман, мақсадга еткар,
Сатқанг бўлай ҳўжа Қобил, Акбар,
Самарқанд валининг чорбоғи дерлар,
Шоҳизинда, Эрдониёр, пайғамбар,
Ҳўжайи Зумрати, Ҳўжайи Аҳрор,
Бобо, якка пирсиз, Эрхўжа мозор.
Бу сўзларни айтиб йиғлар Коражон,

Бойчиборман мунда қолиб бул замон.
Армоман бойланган Бойчибор эди,
Бек Алпомиш ўз юртinda қўл берган
Ражабхўжа деган пири бор эди.
Фалак титрар Коражоннинг нолишига,
Банда қўнар тангри қилган ишига,
Бобохонда йигълаб эди Коражон,
Ражабхўжа пири етди қошига.
Кароматман келиб хабар олади,
Коражоннинг қўлин чечиб кўради,
Коражонни пир тарбият килади,
Коражонбек бул ўрнидан туради,
Ким чечганин ўзи билмай қолади,
Бойчиборни али Коражон кўради,
Шул замонда отдан хабар олади,
Бойчибор бойланган, чечиб кўради¹.

Коражон туриб, отнинг оёғини ечди. От ўрнидан турди. Эшоннинг руҳунати отнинг сағрисини силади, қалмоқларнинг соглан совуни жириб ерга тушди. Отни калта қантариб, тизгинини эгарнинг қошига ўраб ташлаган эди. Коражон отнинг устига минди, от оёғини босолмай турди. Коражон: «Пойгага бекор келган эканман, қалмоқларнинг кетганига анча вакт ўтди, агар илгаридан от ўзиб бориб қолса, дўстимнинг бетига қандай қардай қардай? Бул юришим бекор бўлди», деб пушаймон қилиб турди. Эшоннинг руҳунати Коражонга кўринмайди, отнинг тўшида туриб, Коражонга бир сўзни айтди. Коражон хиёлида «Менга Бойчибор гапирияпти», — деб турди. Бул эшоннинг руҳунатининг айтаётган сўзи:

Дам шу дамдир, ўзга дамни дам дема,
Бошинг эсон давлатингни кам дема,
Қолдим деб, Коражон, сира фам ема.
Жабр қилгин бундай ҳайвон жонига,
Камчи ургин гўшт кўтарган сонига,
Етқизарман Бойсин-Қўнғирот хонига,
Қолдим деб, Коражон, сира фам ема.

¹ Фозил Йўлдош ўғли 1936 йилда достонини қайта куйлаганда, Коражоннинг пирларга сифиниши тасвирини тушириб қолдириб, уни қўйидагича айтган:

Коражонни қалмоқлар боғлаб кетди,
Бойчиборман ўзи ёлиб қолибди,
Коражон чирпиниб шул замон тортди,
Боғлаган аркенин узилиб кетди,
Файрати туташшиб шунда Коражон
Шу боғлаган банддан халос бўлибди.

Коражонбек, эшит, айтган сўзимди,
Эгар қошдан ушлаб юмгин кўзингди,
Энди билсанг мендан хизмат лозимди(р).
Энди кетдим шопарларим ёйилиб,
Армон билан қолма мендан айрилиб.
Ўзингдан хабардор бўлгин, Коражон,
Бу сўзларни айтди руҳунати эшон,
Бойчибор гапирди дейди Коражон.

Энди жабр қилди отнинг жонига,
Камчи урди Бойчиборнинг сонига.
Қолмади-ку Бойчиборнинг тоқати,
Ёзилгандир тўрт ярим газ қаноти,
Камчи тортди Коражондай зўрабор,
Яшиндай бўп кўтарили Бойчибор,
Балки булат билан бўлди баробар,
Кўзин очиб қарап Коражон номдор,
Яшиндай бўп оп кетибди Бойчибор.
«Билмай қамчи урдим буни муқаррар,
Мени кўкка олиб кетди жонивор,
Ўз тилидан айтиб эди Бойчибор,
Бул ишлардан мендай беклар бехабар.
Коражонман, бунда кўнглим бузилди,
Ёлғончи дунёдан ризқим узилди,
Дийда гирён бўлиб бағрим ээилди.
Бориб кўролмайман мен ўсган элди,
Бул отнинг кўнлига бир шумлик келди,
Коражон бекнинг ахволи не бўлди.
Мени кўкка олиб кетиб боради,
Бошлиарим айланиб, кўзим тинади,
Билмайман ахволим қандай бўлади».
Кўзин очиб алп Коражон қаради,
Ер юзида бедов кетиб боради,
Коражоннинг ҳуши ўзига келади,
Одамдай бўп ҳар тарафни кўради,
Қалмоқлардан дарак кўрмай боради.
Бойчибор боради шундай арқираб,
Туёғида тўрт сихи бор яркираб,
Иргиганда қумлар кетди тиркираб,
Бораётир чўлда шундай ширкираб.
Алп Коражон ёлғиз кетиб боради,
Чу дейди, Чиборга файрат қиласи,
Яшиндай бўп чўлда окиб боради.
Пойгачининг корасини кўрмади,
Коражондай мардда тоқат қолмади.
Эрдай бўлиб алп Коражон ох уриб,

Бораётир ёлғиз чүлларни күриб,
Калмоқларнинг азобидан кутулиб.
От чопса гумбурлар тоғнинг дараси,
Ботирни ингрантар найза яраси,
Коражон ҳам қалмоқ юртнинг тұраси.
Күз юбортыб шундай чүлда қаради,
Бадбаҳт чүлда пойгачилар боради,
Куннинг ўзи пешин вакти бўлганда,
Пойгачининг қорасини олади.
Тўсат-тўсат қалмоқ кетиб боради,
Не бедовлар жонни сотиб боради,
Бировдан бирори ўтиб боради,
Хайдовчига бул яқинлаб қолади,
Яқин ерда қалмоқларни кўради,
Кейнига Коражон етиб боради,
Қалмоқлар ҳам Коражонни кўради.
Бир нечаси бунга савол қиласди:
— Отингнинг жиловин тортгин, Коражон,
Илгарида бориб қолди Кўкдўнон.
Отни қичаб энди қайда борасан,
Борган билан бекор ҳалак бўласан,
Беҳуда отингга жабр қиласан,
Кўкалдошнинг олганини кўрасан,
Беҳуда ҳалак бўп нима қиласан?
Бундай гапга қулоқ солмас Коражон.
Қалмоқларнинг айтган сўзин билади,
Пойгачиман аралашиб қолади,
Ҳакнинг яшинидай Чибор боради,
Қалмоқлардан тўсат-тўсат қолади,
Беш юз отнинг бири бўлиб боради.
Ўзган отни санар Коражон номдор,
Кўқиб-буриб бораётир қалмоқлар.
«Янгитда биз ўзбак отин кўрдик, деб,
Чу, деб урар бундан кейин қолдик, деб,
Сени от деб бизлар бокиб юрдик, деб,
Ўзбакнинг қизидан қуруқ қолдик», деб.
Гоҳи тўп-тўп, гоҳи ёлғиз боради,
Бир-бирига қарамайин жўнади,
Бир неча отлар сузилиб кейин қолади,
Қувватин боринча қичаб кўради,
Қарамайин бари отин уради,
Не бедовлар суриб кетиб боради,
Ярамаган ёмон кейин қолади,
Ўзбак қизи шундай пойга бўлади,
Кимнинг оти ўзса, қизни олади,
Аланглаб қалмоқлар кетиб боради.

Шу отлар бири бўп Чибор юради,
Чу, дейди, Қоражон қамчи уради,
Жуптак ташлаб иргиб кетиб боради,
Неча отдан Чибор ўтиб боради,
Ўтган отни санаб кетиб боради,
Отларнинг ҳисобин Қоражон олади,
Алп Қоражон отга қамчи уради,
Бир кеча, бир кундуз чопиб боради.
Шундай бўлиб бораётир Бойчибор,
Тўрт юз олтмиш отдан ўзи жонивор,
Чопиб, хориб қолаётир тулпорлар,
Ҳақнинг яшинидай оқиб жонивор,
Қолган отдан алп Қоражон хабардор,
Кундуздай тизилиб чўлда бедовлар.
Яна тонг отганча тинмай чопади,
Не бедовлар жазосини топади,
Бир неча йиқилиб қумни қопади.
Шундай бўлиб алп Қоражон боради,
Ўзганини жамлаб санаб кўради,
Куннинг ўзи айни чошка бўлади,
Пойгачидан тўрт от кам кеп қолади.
Ким илгари кеттанини билмади,
Қоражондай алпда тоқат қолмади,
Ул тўрт отнинг нишонини билмади,
Сўрай деса ҳеч бир одам бўлмади.
Қоражон чўлларда ёлғиз боради,
Худо дейди, отга қамчи уради,
Жонни сотиб Чибор кетиб боради,
Қоражонбек шундай бўйлаб қаради,
Пешин вақти бир қорани кўради,
Қоражон бек чу деб шиддат қиласи,
Кейнидан Бойчибор етиб боради.
Қолмади-ку ул қалмоқнинг тоқати,
Бораётган Қалмоқшоҳнинг тўр¹ оти,
Шундай бўлар тўриқ отнинг одати:
Ета соп Қоражон носвой сўради,
Икковлари нашалашиб қолади,
Тўриқ от одати шундай бўлади,
Қизиб келиб энди қаерда турса,
Турган ерда олакароқ бўлади,
Бунинг одатини Қоражон билади.
От тизгинин бир тўхтатиб туради,
Ким кетди, деб бу қалмоқдан сўради.

¹ Тўриқ.

Коражонбек бул турганча бўлмади,
Чув, дейди, тафи ҳам бундан жўнади.
Қалмоқ ҳам бул отга шиддат қиласи,
Турган ерда оти қотиб қолади,
Қўзғалгандан шўрнинг оти қулади,
Эгар-абзал дардисар бўп қолади.
Айикдай чингириб қалмоқ жилади,
Чўлда бойкиш пиёда бўп қолади.
«Қалмоқ етса мени миндириб олар, деб,
Жуда менга қариндошлиқ қиласи, деб,
Қариндош-да, келса мени кўрар, деб,
Ҳар замон кейнига бурилиб қаради,
Кейин қолган қалмоқ етиб келар, деб.
Қоражон энағар андай қилганди,
Унинг хийласидан отим ўлганди».
Яёв бойкиш анча йўлни юрганди,
Барчиной шундайин пойга қилганди,
Не қалмоқлар чўлда сарсон бўлганди,
Қоражонбек шундай хизмат қилганди,
Ёлғиз бир чўлларда қичаб юрганди.
Кун айланиб тафи туш бўп келади,
Тафи шундай бир қорани кўради,
Яқинлаб Қоражон номдор боради,
Бу отнинг анигин энди билади.
Остида иргииди бул тўбичноғи,
Бораётган Қалмоқшоҳнинг шапаги,
Шапақ отга етиб борди Бойчибор,
Шапақ бўлди Бойчиборман баробар,
Йўл талашиб чопа берди жонивор.
Ҳарчанд қичаб кўрди Қоражон беклар,
Қичағанман ўтолмайди Бойчибор,
Ирфиса иккови бўлар баробар.
Қоражонбек аччиқ қамчи уради,
Шапақман баробар кетиб боради.
Фам билан сарғайди гулдайин дийдор,
Жуда дилтанг бўлиб Қоражон қайсар,
Қанча отдан ўтиб борган жонивор,
Шапақ билан энди бўлиб баробар.
Аччиқ қип Қоражон қамчи уради,
Шовқин бериб чўлда кетиб боради.
Шапақ отдан ўзолмайди Бойчибор,
Ўзмоққа Чиборда қувват қолмади.
«Жайрағирга бул бир бало бўлди, деб,
Шапақдан ўтмади, тоза ўлди, деб,
Курсин шапақ, отни андай қиласи, деб,
Шунча отдан ўзиб келган жайрағир,

Шапаққа кеп мени дилтанд қилди, деб,
Билмайман бул ишим қандай бўлди, деб,
Йўл олмайди, отим кейин қолди», — деб.
Қоражон бек шундай шиддат қиласи,
Куннинг ўзи айни туш бўп келади.
Шапақнинг олдини Чибор ўради,
От бошини кунга тўғри қиласи,
Кўзлари чағилиб кейин қолади.
Шапақ отдан Чибор ўтиб жўнади,
Шапақнинг одати шундай бўлади:
Дубур эшитмаса кейин қолади.
Шапақ отга қалмоқ қамчи уради,
Дубурни билмайди, кейин қолади.
Бекор қичаганман нима қиласи,
Бойчибордан от ўтмоғи қийинди(р),
Кейинги қалмоқлар тўп-тўп жийилди,
Бош¹ югрук-да, ўзи назари Чибор
Бўлмаса ёлғизга ўтмоқ қийинди?
Тоза югрук, бунга онсон бўлади,
Канча отдан ўзиг ўтиб боради,
Қоражон чўлларда ёлғиз боради,
Кўз юбортиб ўнгу сўлга қаради,
Чўлда таги бир бедовни кўради,
Кейнидан Қоражон етиб боради,
Бул отнинг аниғин таги билади:
Ўн бир минглик Қалмоқшоҳнинг самани
Чўлларда яркиллаб кетиб боради.
Фам билан сарғайиб гулдайин дийдор,
Бу қалмоқ ҳам Қалмоқшоҳга хизматкор,
Пойгага шоҳининг отини чопар,
Бораётир Қоражондан бехабар.
Чўлларда яркиллаб араби тулпор,
Иргиганда тоғу тошлар гумбурлар,
Саманининг кетидан етиб Бойчибор
Сағрисига келиб оғиз солади,
Кейин қараб ани тўлғаб ташлади,
Икки тулпор йўл талаша бошлади.
Иккви баробар кетиб боради,
Бир-бирига йўлларда рад беради,
Қоражонбек бунга ҳайрон қолади,
Қалмоқшоҳнинг оти саман балоди(р),
Бойчиборман баробар кеп қолади.
Харчанд ўйлаб борар Қоражон номдор,

¹ Боши, бошида.

Бораётир йўл талашиб баробар,
Оқтуёқ келгандир бундай саманлар.
Оҳ уриб тўқади кўздан ёшини
Ёлбориб худога солган ишини,
Тошга қараб бурди отнинг бошини,
Тошлоқда қилас деб бунинг ишини.
Тошлоқда чопади назари тулпор,
Бўйнин сузиб иргир эди жонивор,
Бир кеча, бир кундуз тошлоқда чопиб,
Туёғин олдириб, кейин қолдирав,
Саман отдан энди ўэди Бойчибор.
Самандан ўтди-да, тоқат қолмади,
Кўкалдошнинг Кўкдўнонин кўрмади.
Баракалла, Қоражондай мардига,
Бек дўстига бул қилган хизматига,
Чидай олмай чўлларда файратига,
Сира қарамайди отнинг бетига.
«Билмайман, Кўкалдош қайда бўлди, деб,
Оти ўзиб бадбаҳт бориб қолди, деб,
Агар борса, бир савдони қилди, деб
Тек ўтирумас, бекка ташвиш қилди», деб
Қоражонбек шундай бўйлаб қаради,
Милдираган бир қорани қўради,
Олис йўлдан отни қичаб боради.
Оҳ урганда кўздан оқар селоб ёш.
Золим билан ҳаргиз бўлманглар йўлдош,
Такимида беш юз ботмон калтаги,
Кайкайиб боради бадбаҳт Кўкалдош.
Алп Кўкалдош шундай бурилиб қаради,
Чув, дейди Дўнонга қамчи уради,
Яшиндай бўп оқиб кетиб боради.
— Қани энди етиб ол, — деб боради.
Шопириб иргийди назари Чибор,
Бу Дўнондан голиб келган тулпорлар,
Чу, деб қамчи урди Қоражон қайсар,
Кувиб Дўнонига етди Бойчибор.
Алп Кўкалдош шундай бурилиб қаради,
Бойчиорман Қоражонбек келади.
«Бирор буни чечкан», — деб гумон килади,
Шамолдай фувуллаб етиб боради,
Кўкдўноннинг сафрисидан олади,
Кейин қараб силтаб отиб юборди.
Анча йўлга бориб тушди Кўкдўнон,
Кирқ минг қадим ўтиб кетди Бойчибор,
Яна ҳам ўзини ўнггарди Дўнон,
Чиборнинг кейнидан етди ул замон.

Карсиллатиб думғаздан олади,
Устида Қоражон билмай қолади.
Кейин қараб силтаб отиб юборди,
Анча йўлга бориб тушди Бойчибор,
Ўн минг қадим ўтиб кетди бу тулпор.
Ўзини ўнгариб Чибор келади,
Кўкалдош илгари кетиб боради,
Пойганинг мазгили яқин келади,
«Ўзек қизи меники, — деб боради, —
Бул ўзбакнинг оти кейин қолади,
Барчинойим факирники бўлади».
Шу сўздайтиб ёлғиз кетиб боради,
Яшиндай бўп Чибор етиб келади.
Алп Кўкалдош жуда ҳадик олади:
«Шул ўзбакнинг оти тилсиз балоди(р),
Таги ҳам жаланглаб етиб келади»,
Чу дейди, Дўононга қамчи чолади,
Хозир Дўонон бир баробар келади,
Икки тўлпор йўл талашиб боради,
Алп Қоражон Кўкалдошга қаради:
— Акам эдинг, кўп шумликни ўйладинг,
Пойганинг бошида тортиб бойладинг,
Неча кундан бери отни ҳайдадинг.
Қани, сенинг Дўононингнинг ўзгани,
Еминг ҳақлаб, сенинг ҳолинг билгани,
Қани, бул отингнинг хизмат қилгани,
Ўзбак қизин сенга олиб бергани,
Қани, ундан Бойчиборнинг қолгани?!
Неча кундан бери чопиб келасан,
Беш юз одам сарсон бўлиб юрасан,
Оламан деб баринг ахмоқ бўласан,
Беҳуда зингкийиб ҳамманг қоласан,
Ўзбак оти энди ўзар, биласан.
— Остингда иргиди Чибордай ҳайвон,
Кўтарилиб сўз айтмагин, Қоражон.
Ўзбак қизи меники деб бораман,
Ҳар қандай қилсан-да, ўзим оламан.
Жафоларга солиб энди танда жон,
Ўзарман, деб кўтарилма, Қоражон!
Ушбу дамнинг дамларини дам дема,
Чиборингдан Кўқдўонни кам дема,
Тилинг тортгин, ахмоқ, сўзни лофт урма.
Қамчи босса яшиндай бўп кетади,
Сенинг минган Чиборингдан ўтади.
Устидаги мендай номдор тўради,
Бу зўрлигим юртга маълум бўлади,

Менга душман бўлган одам ўлади,
Хотинимни қайтиб ўзбак олади,
Сен бир ўзимдан чиккан балоди(р),
Оти ўзганман бир ўзбак нима қилади?!
Коражонбек бунинг сўзин билади,
Олганингни кўраман, деб жўнади.
Иккови баробар йўлда боради,
Бир-бирини мушт ташлашиб уради,
Бирор-бировига мушти текканда,
Тоғ чўққиси қулагандай бўлади,
Коражон қайтмайди, навбат олади.
Гоҳ ерларда қамчилашиб, савашиб,
Кўп хархаша қиласи ақили шошиб,
Бедов отлар борар йўлда талашиб,
Бораётири бир-бириман тишлашиб.
Икки тулпор йўл талашиб юргандир,
Қанча қалмоқ Бадбаҳт чўлда қолгандир,
Барчин дейшиб сарсон бўлиб юргандир.
Бир нечаси билмас айттар сўзини,
Худой галдиратиб қўйган ўзини,
Сира ҳам кўрган йўқ ўзбак қизини.

«Буларнинг келар муддатидан ўтди», — деб Алпомиш бир
баланд тепанинг устига чиқиб, дурбинини олиб, шундай йўлга
каради. Кўрди: икки от йўлда йўл талашиб келаяпти, бирини
дурбини билан таниди: бири Кўқдўнон. Бойчибор тўриқдай бўп
кўринди. Туёғидаги михлар озор берган, оппоқ кўпикка ботган,
туёғидан чиккан тўзон билан тўриқдай бўп қотган. Бойчиборни
танимай: «Ҳам отимдан, ҳам юртимдан айрилдим», — деб бехуш
бўлиб ийқилди.

Барчин келиб, Алпомишнинг ҳолини кўриб, ийқилганини
кўриб, бошини тиззасига олиб, бир сўз деб турган экан:

Не сабабдан, тўрам, қаддинг букилди,
Жаладай бўп кўздан ёшинг тўкилди,
Бир давлатли хоним, ҳолинг не бўлди?
Сен йиқилиб, қолмас ойим қарори,
Ё асар қилдими дев билан пари?
Сен эдинг-ку Кўнғирот элнинг шунқори!
Сабил бўлмасин-да бобом кирдори,
Ойимнинг қолмади сабри-қарори,
Бошинг кўтар, Кўнғирот элнинг қўчкори.
Мени излаб келиб бундай бўласан,
Мен билмайман кимдан зулм қўрасан,
Кўрдим сени бехуш бўлиб борасан.
Йиғлатмагин мендай гул бувишингни,

Оч күзингни, күттар, хоним, бошингни!
Бундай кунда, хоним, ҳолинг сүрайин,
Хабар бергин ахволингни билайн.
Сен эшигтиң мендай ойим сүзини,
Бундай хафа қылма бийнинг қизини.
Мендай ойим ҳолинг сүраб туриби,
Мен билмайман нима зулм бўлиби,
Тарзинг кўрдим, ҳолинг танг бўп қолиби,
Билмайман ахволинг қандай бўлиби,
Қиркин қизлар аввал сизни кўриби,
Ул канизлар менга хабар бериби,
Мендай ёринг қонлар йиғлаб туриби.

Бу сўэни эшитиб, кўзини очиб, Барчинга қараб, бир сўз деб
турган экан:

Мендай беклар сенинг учун келгандир,
Сенинг шартинг, билдим, пойга бўлгандир,
Кўп қалмоқман Бобохонга боргандир,
Коражонман менинг отим ўлгандир.
От ўздириб қалмоқ сени олмайми,
Оти ўса, гапи маъқул бўлмайми,
Мендай фарид қонлар йиғлаб қолмайми,
Сендей ойим қалмоқ билан бўлмайми,
Мендай тўранг тириклайн ўлмайми?!
Хасратингдан беҳуш бўлиб ётаман,
Юртим кўрмай, сарсон бўлиб кетаман,
Бундай бўлиб элга бориб нетаман,
Бу сўзларни ўйлаб, қонлар ютаман,
Қайтай мен ҳам беҳуш бўлиб ётаман,
Ётмаганда ёлғиз ўзим қайтаман?!
Энди бўлдим бу юртларда хору зор,
Бул ишларни соглан қудратли жаббор,
Эгам паноҳ берса, бизга не гап бор,
Қалмоқларда ўлиб кетди Бойчибор,
Излаб келиб менинг ўлмоғим даркор.
Қалмоқ келса, билмам, мени нетади,
Киличига қирмиз қонлар қотади,
От остида мени яксон этади,
От, яроқ, асбоби менда бўлмаса,
Зўрлик билан қалмоқ олиб кетади.
Қалма келар менинг кизил тилимдан,
Пиёдаман ҳеч иш келмас қўлимдан,
Қўлдан бериб, сендей зулфакдоримдан –
Мен энди айрилдим кирдикоримдан.
Пойга кетган қалмоқ йиғилиб келади,

Лоловлашиб бир киёмат қиласы,
Зүрлик билан келиб сени олади.

Бу сўзни Алпомишдан эшитиб, Барчин ҳам дурбин олиб
караб, келаётган отларга қараб, бир сўзни айтиб турган экан:

Курру-ё қур, ҳайт-а, тўрамнинг оти,
Оқ тўшим — яйловинг, сочим — шипиртки.
Куйганимдан гапни гапга улайин,
То ўлганча сайисинг бўп юрайин,
Эгам раҳм айласин қонли ёshima,
Сабаб бўлиб қўшгин денги-дўшима,
Олмосдай туёинг қордай тўшима,
Курру-ё қур, ҳайт-а, тўрамнинг оти!
Ўйилмай куймасин кулбай хонам,
Оҳ уриб йиглайди мендайин санам,
Қалмоқда қолмасин гулдайин танам.
Ўн икки ой сени Бойбўри боқди,
Гарданингга Калдирғоч кўтос тақди,
Йиглатмагин Барчин гулдай бебахтди,
Курру-ё қур, ҳайт-а, бегимнинг оти!

Узок ўйлга кўз юбортуб қаради,
Билмайман ҳисоби қандай бўлади?
Келаётган чўлда отни кўради,
Кур ҳайт, деди, желагини булғади.
Худонинг тақдири шундай бўлади,
Худо қилган ишга банда кўнади,
Муродини яратгандан тилади,
Тепанинг бошида қараб туради,
Отлар ройиш бул кўриниб қолади,
Кур ҳайт, деган Барчинойнинг довуши
Бойчиборнинг кулоғига боради.
Сувлук тишлаб ўзин отди Бойчибор,
Калта қантариб ташлаганди қалмоклар,
Тизгини узилиб кетди муқаррар,
Устидаги алп Қоражон бехабар,
Кўкдўнондан энди ўтди жонивор.
Қоражонбек энди буни билади,
Эгарнинг қошидан ушлаб келади.
Энди жонивор ёзилиб иргиб боради.
Алп Кўкалдош отга қамчи уради:
«Бул ўзбакнинг оти ўзиз боради,
Бул Қоражон бир балони қиласы,
Укам менга душман бўлиб боради».

Фалак титрар алпнинг айтган додига,
Хеч ким тоқат қылолмас сиёсатига,
Кулочлаб қамчи урар Дўонон отига,
Қарамайди қалмок олди-ортига.
Сиёсатман алп Кўкалдош боради,
Бойчибор фувуллаб кетиб боради.
Ҳарчанд қичаб кўрди бундай зўрабор,
Бойчиорман от бўлмади баробар,
Иргигандга гумбурлаб қолди чўллар,
Жуда ҳам бир дилтанг бўлди мукаррар,
Бир иш бошлаб Қоражонман Бойчибор.

Шунда етолмасини билиб, Қоражонга қараб, Кўкалдош алп
бир сўз айтиб бораяпти:

Мендайин акангнинг кўнглинг бўласан,
От ўздириб қайси гўрга борасан,
Акангнинг хотинин кимга берасан?
Бундай бўлсанг, сен жувормак ўласан.
Сен эшиггин бек акангнинг додини,
Жувормак, ўздирима ўзбак отини,
Армонман кетмасин аканг хотини.
Айтган сўзнинг поёмини билсанг-чи,
Шумлик қилсанг, қонлар ютиб ўлсанг-чи.
Икки қўллаб як жилов қип бурсанг-чи.
Сенинг ўзинг юрган қандай балосан,
Элу халқقا шарманда бўп қоласан,
Аканг тирик, чечангни кимга берасан,
Торт, жувормак, ўздириб қайда борасан,
Хотинимни кимга сарсон қиласан.

Бу сўзни эшитиб, Қоражон ҳам от устида бу сўзларни айтиб
бораётир:

Қайтай, ака, сенинг кўнглинг қолади,
Кўнглинг бузук, хаёлинг бадга боради,
Асли кўнглим сенда эди, бек оға,
Бу Бойчибор жилов бермай боради.
Шундай бўлди менга ҳақнинг фармони,
Кўп бўлади сендай акам армони,
Кўп гапирдинг орт-сиртимдан бемаъни,
Торта-торта қолмади-ку Қоражоннинг дармони,
Отга ўргатганми Бойсиннинг хони?!
Мендай ининг ҳарчанд тортиб кўради,
Сувлук тишлаб, суриб кетиб боради.

Так, дейди, чу-ха, дейди, жүнади,
Коражонбек ўз йўлидан қомади,
Харчанд бақирғанман қулоқ сомади,
Чингириб ортидан довуш қиласди.
Коражон қарамай кетиб боради.
«Жувормак ўл», — дейди Кўкалдош номдор,
От тизгинин сақлаб олди муқаррар.
Қандай бўп илгари ўтди Бойчибор,
Пойганинг олдини олди жонивор.
Олдин олиб борар бу Чибор оти,
Томошамон ўн минг уйли элати.
Пойганинг олдини олиб борибди,
Мамлакатга хўп овоза тўлибди,
Қалмок, ўзбак бари йиғилиб қолибди,
Саф-саф бўлиб томошамон турибди.
Келаётган ёлғиз отни кўради,
Бойчибор деб ўзбак хуррам бўлади,
Кўкдўон деб жами қалмок қаради,
Кўкдўоннга ҳеч келбати келмади.
Барча халойиклар қараб туради,
Бойчибор экани аниқ бўлади.

Кўкалдош алп ҳарчанд чингириб қолди, куйиб-пишиб кўп довуш қилди. Коражон қулоқ солмай кетди, хоннинг Чибор оти пойга боши бўлиб, олдига ўтди. Қанча қалмок чўлда тизилиб келаяпти. Нечови отини ураяпти, Кўкалдош кўп пушаймон қиласди: «Илгаридан фамимни емадим, ёлғиз вактимда отни хўб ҳайдаб кўрмадим, бу ўзбакнинг отининг бундай келарини билмадим, хайр Коражон қулоқ солмай кетди, қалмоқнинг бари қопти, ўзимиздан чиқиб Коражон бизнинг ишимизни қипти, ўзбакнинг оти пойганинг олдини опти».

Ҳамма қалмоқлар ҳам пушаймон қилибди: «Булай-шуладай қилиб ўзиб келибди, ўзган билан ололмас, йиғилиб борармиз, хўп чатоқ қип турармиз, олти ойчилик йўлдан кеп ўзбакнинг олганини кўрармиз, бориб кўлимиздан келганча кўрармиз, шунча одам бундан қараб қолгандан кейин ўлармиз». Шундай деб қалмоқлар келаяпти.

Хоннинг Чибор оти пойганинг олдини олиб, шашти билан келиб, баҳмал ўтовни етти марта айланиб, отнинг тизгинини ушлаб Коражон тўхтатди, Барчиннинг канизлари йиғилиб етди. Коражонни отнинг устидан олиб, гиламнинг устига солиб, бардор-бардор қилиб кўтариб, баҳмал уйга киргизиб кетди, қизлар отни елдириб, совутиб турибди, оп кеп якка михга бойлади, тери қотди. Барчин кеп, отни кўрибди, кўзларини ипак рўмollар билан суртди, чанги, терини ушатди. Оёғидаги михлароз бериб, хоннинг Чибор оти таппа тушиб ётди. Туёғидаги михларни кўриб, Барчин бир сўз деб турибди:

Ахмоқ қалмоқ отга зулм қилибди,
Менинг учун ҳайвон азоб кўрибди,
Шул мих билан Бобохондан келибди,
Ул бадбахтлар бежой ишни қилибди.
Бунга зулм қилган қалмоқ бемаъни,
Сенга қурбон мендай ойимнинг жони,
Азоб кўрган хон тўрамнинг ҳайвони.
Ҳеч замонда шундай ишни қиласми,
Ҳайвонэздга шундай азоб берами,
Минган одам, бул бехабар қолами,
Шунча азоб билан бедов келами?!
Ул қалмоқлар отнинг кўнглин бўлибди,
Бобохонда билганидай қилибди,
Туёғига неча пичоқ урибди,
Кўрганларнинг бари раҳми келибди,
Бу бадбахтлар оша зулм қилибди,
Менинг учун кўп азобни кўрибди.
Муғойиб йиглайди мендай муштипар,
От эгаси бу мазгилда бехабар,
Ўсал ишлар отга қилган қалмоқлар,
Менинг учун азоб тортган Бойчибор.
Бул ҳайвонга душман қойил бўлибди,
Чин тулпор-да, шул азобман келибди,
Шунча жароҳатман хизмат қилибди,
Қирқ кунчилик йўлдан пойга бўлибди,
Шунча йўлдан шу жабрман келибди,
Қалмоқ жуда қабоҳат иш қилибди.
Кўп азоб бериди хоннинг душмани,
Пўлатни эритар кизларнинг дами.
Барчинойим кўриб ўйлаб туради,
Урган михи ялпоқ тизга боради,
Чорсисин туёққа ёзиб солади,
Гул михларни тишлаб сууриб олади.
Қалмоқ деган шундай тилсиз балоди(р),
Кўнгли бўлиб бундай ишни қиласди,
Азоб билан бу жонивор келади,
Бу сўздайтиб йиглар Барчин зулфакдор.
Сенинг азобингга кўнглим бузилар,
Кўп жафони солган сенга қалмоқлар,
Каттиқ кунда азоб тортган жонивор,
Мендай ойим бул йўлингга интизор.
Билганича қилган сени бадбахтлар,
Бепарво ўтирган давлатли шункор,
Хизматимни бажо қилган Бойчибор.

Бу сўзни айтиб, отга меҳрибонлик қилиб, банот тўрвага емни
илиб, кўчиб борган кўнгиrotлар жам бўлиб, йифилиб, пойга

кетган қалмоқлар ҳам келиб, бир кам тўқсон алп гуруллашиб туриб, «Алплар билан ўзбакнинг полвони ёй тортишар эмиш», — деб овоза бўлиб, ҳамма томошамонлар йигилиб, шунда Ойна кўлига, Чилбир чўлига томошамон тўлиб, ёйандозлик қилмоқчи бўлиб, бу ёй тортишмоқдаги сўзи:

Кизу жувон саф-саф бўлиб туради,
Барчиннинг устида талаш бўлади,
Фуруллашиб неча алплар келади,
Буни кўриб бир хил қизлар кулади:
Бир хотин деб бари шундай килади,
Хотин топмай юрган шўрли келади.
Олис йўлга нишонани куради,
Нишонани урган одам олади.
Қалмоқ алплар бари қатор бўлади,
Мен урарман дейди кўнгил қилади,
Бир-бирига алплар навбат беради,
Парли ёйни бул қўлига олади.
Шикирлатиб энди ёйни тортади,
Ёйнинг ўқи бул фувуллаб кетади,
Бири пастдан, бири баланд ўтади,
Бир хилининг ўқи етмай ётади,
Аччикланиб ёйни буклаб тортади,
Ушлаган парли ёй синиб кетади,
Иккам тўқсон алпи тортиб ўтади,
Кўкалдошга энди навбат етади.
Ахмоқ қалмоқ ёйни қўлга олади,
«Барчинойим бул меники бўлади».
Ёйига Кўкалдош ўқни солади,
Нишонага қараб тўғри қилади.
Бор, урдим, деб энди ёйни тортади,
Кўлда ёйи чўртта синиб кетади,
Кўп қалмоқлар пушаймон қип ётади,
Энди навбат Алномишга етади.
Фамли кунда тортар эди оҳу вой,
Бандам десин, раҳм айласин бир худой,
Ўн тўрт ботмон биричдандир парли ёй.
Парли ёйни шундай қўлга олади,
Кўрган қалмоқ бари ҳайрон қолади.
Раббим дейди, энди ёйни тортади,
Нишонага ўқи тўғри кетади,
Нишонани урган шундай тўради(р),
Бекнинг ёйи энди омон қолади.

Бу шарт билан қалмоқ сўзи бўлмади.
Минг қадим ерни қадимлаб кўради,

Танга пулдан бул нишона қиласы,
Ёйни қүйиб, милтиқ отмоқ бўлади.
Кўп деб қалмоқларга навбат беради,
Аввал қалмоқларга навбат келади.
Қалмоқлар нечови милтиқ отади,
Саксонман тўқсонга ўқи етади,
Қайси отса, йўлда қолиб кетади.
Алп Кўкаaldoш жуда гайрат қиласы.
Қалмоқнинг айтгани сира бўлмади,
Отган ўқи њеч бир гўрга бормади.
Алп Кўкаaldoш шундай кўзлаб кўради,
Беш юз қадим ерга ўқи боради.
Кўкаaldoшнинг кўнглидаги бўлмади,
Қалмоқлардан навбат ўтиб боради,
Неча қалмоқ хўп тан бериб туради,
Алномишга тағин навбат келади.
Бек Алномиш хаста кўнглин хушлади,
Йифилган душманинг сирин фошлади,
Анжом, милтигини қўлга ушлади,
Қараб нишонани отиб ташлади.
Кўриб, бул қалмоқлар ҳайрон қолади:
«Илгаридан машқ қип юрган балоди(р),
Минг қадимдан танга-пулни уради,
Бул ўзбак ҳадисга ўзи балоди(р),
Хали ёлғиз кўп ишларни қиласы,
Хар иш ҳам қўлидан бунинг келади,
Қўйган шартнинг барин уdda қиласы,
Бунинг билан ким баробар бўлади?!»
Барча қалмоқ шу сўзни айтиб туради:
«Бул ҳам бир алп экан, жуда зўрабор,
Қалмоқ юртда йўқдир бунга баробар,
Минган оти тулпор экан Бойчибор,
Ёлғиз ўзи кўп ишларни битирар.
Кўрган қалмоқ ҳаммаси ҳайрон қолди,
Уч шартнинг олдини шул ўзбак олди,
Энди шартдан бори бир кураш қолди,
Бойсарининг қизини ўзи олди,
Бизим қалмоқларнинг иши бекорди(р)».

Уч шарт ўтди, кураш тарааддисин қип ётиди. Ўн минг уйли
Қўнғирот одами, қанча қалмоқнинг одами йифилиб, Чилбир чў-
лига, Ойна кўлига томошамон тўлиб, раста-растада, даста-даста
кур тортиб ўтириди. Томошамонлар: «Курашни кўрамиз. Тойчи-
хоннинг алпи билан Кўнғиротдан келган ўзбакларнинг алпи
кураш қиласы, кураш жуда қизиқ бўлади, курашда қайсиси
зўрлик қиласа, ўзбакнинг қизини олади», — деб томошамоннинг

бари жам бўлади. Кўкалдош бош бир кам тўқсон алпи билан бир тарафдан қатор бўлиб ўтириди. Алпомиши билан Коражон бир тарафдан ўтириди, ўртада анча ерни очиб кўйиб, чангиган ерларга сув уриб, Коражон ўрнидан туриб, бир хил кийимларини чечиб кўйиб, кураш кийимини кийиб, белини бўғиб, шундай айланади. Қалмоқлар айтди: «Ўзимииздан чиқиб, Коражон ҳам бало бўлди. Мудом ўзбакнинг ёрдамини олди». Бу ёқдан Кўшкулок алп деган алп майдонга кирди.

Бу алпларнинг курашаётгандаги сўзи:

Жафоларга тушиб энди танда жон,
Мўмин қулга эгам бўлгай меҳрибон,
Тараф тортиб бу майдонда Коражон.
Қалмоқ бари Коражонга қаради,
«Бул Коражон бир балони қиласи,
Ўзимииздан бизга ёв бўп қолади».
Коражоннинг бир акаси бўлади.
Тараф бўп Кўшкулоқ полвон жўнади,
«Кани мен ҳам Коражонни кўрай, деб,
Жувормакни билганимдай киласи, деб,
Бошимдан ошириб ерга урай» деб
Чечиниб бул қалмоқ келди майдонга.
Коражонга алплар тараф қиласи,
Кўшкулоқ ҳам шундай бир зўр балоди(р),
Кураш-да, търифи шундай бўлади:
Шомурти шохалаб ҳар ёққа кетган,
Учида чичқонлар болалаб ётган,
Издан тушган пишак олтойда етган,
Мундай қалмоқ кўлин булғаб келади.
Коражонбек хаста кўнглин хушлади,
Жуппай қилиб ёқасидан ушлади,
Дустамон қип уни қокиб ташлади.
Кўшкулоқнинг шундай ақили шошди.
Кумни қопиб энди ерга ёпишди.
Яна ҳам бир қалмоқ келди майдонга:
Одам тушмас бунинг айтган тилига,
Беш юз қулоч арқон етмас белига,
Дучор бўлди Коражоннинг кўлига,
Ушлагандан отди Чилбир чўлига.
Кўтарилиб таги қалмоқ киради,
Коражонбек ўзи ёлғиз туради,
Бунга дучор бўлган қалмоқ ўлади.
Бул қалмоқдир қалмоқларнинг равиши,
Оҳ урса оламни бузар довуши,
Тўқсон молнинг терисидан ковуши.
Сиёсатман келиб майдонда турди,

Коражон таваккал тангрига қилди,
Бу қалмоққа энди яқынлаб қолди.
Курашмок ҳадисин шундай билади,
Алп Коражон ётиб отар қиласы,
Анг эди, ул шүрли билмай қолади,
Бошидан ошириб ерга уради,
Тушиб ерда пора-пора бўлади.
Аччиғланиб таги қалмоқ келади,
Коражоннинг ишин бари қўради.
Қаҳрланса тошни ёрап қаҳари,
Тўқсон норнинг гўшти бўлмас наҳори,
Ҳар изига кетар анча баҳори,
Шундай қалмоқ келиб кирди майдонга.
Жафолар солгандир тандаги жонга,
Хазон бўлса зоғлар кўнар гулшангага,
Дучор бўлди Коражондай полвонга,
Ушлагандан буни отди осмонга.
Таги ҳам бир қалмоқ келди майдонга:
Олтмиш қари олачадан қалпоғи,
Тўқсон қўйнинг терисидан теллаги.
Шундай қалмоқ келиб кирди майдонга.
Коражонбек жуда файрат қиласы,
Кайсардай бўп бул олишиб туради,
Кейинга қайириб ерга уради,
Келган қалмоқ армон билан ўлади.
Коражонга пирлар кувват беради,
Худо дейди, бул майдонда туради,
Дўсти учун жуда хизмат қиласы,
Коражондан бекнинг кўнгли тўлади,
Келган қалмоқ сира омон қолмади.
Коражонбек ўзи танҳо турибди,
Нашаванд қалмоқлар алпи кўрибди,
Нашасини хўп қўндириб олибди,
Кайфин чоқлаб бул майдонга келибди.
Коражонга талаб қилиб турибди,
Нашаванд таърифи шундай бўлибди:
Тўрт юз тўқсон кулоч қўлда ҳассаси,
Сарҳовуздан катта эди косаси,
Шунинг билан ўн саккизта нашаси,
Тўқсон қари бўздан бўлган киссаси,
Шундай қалмоқ айланади майдонда.
Бир-бирига қўлин булғаб боради,
Нашаванд бўлса ҳам бир зўр балоди(р),
Иккови ҳам кўп олишиб туради,
Мисли ерлар шудгордай бўп қолади,
Нашаванд-да, бўғуми бўшаб боради.

Бу қалмоқдир жуда номдор, хунари,
Йўқ эди бойқишинг ҳадис-хунари,
Кўп олишиб, кам-кам кетди мадори,
Кўринг энди Коражондай шункори,
Қалмоқ билмай қолди, ҳеч бир хабари,
Алп Коражон қўкка отиб юборди.
Балки булаттга ул бойқиш етишди,
Жуда ҳам ёзганнинг нашаси учди,
Осмондан келиб ерларга тушди,
Куни битиб, ўлар вақти етишди,
Фуруллашиб қолгани кўтарилишиди,
Коражонбек ёлғиз қиласи ишди,
Қалмоқ тарафидан таги етишди.
Қалмоқларнинг бунда ҳолин билади,
Майдонга келгани қолмай ўлади.
Коражонбек: — Баринг кел, — деб туради,
Иккакам тўқсон алпни нобуд қиласи,
Бул алплардан бир Кўкалдош қиласи.
Алп Кўкалдош ёлғиз ўзи қолибди,
Ўзга алпларнинг бари ўлибди,
Коражон барига ғолиб келибди,
Кун номозгар, энди кеч бўп қолибди,
Курашга ул замон жавоб бўлибди.
Одам тарқаб мазгилига борибди,
Ўрда бозор, юриб ўйин қилибди,
Қалмоқларнинг кўпи изза бўлибди,
Қанчаси бу ерга ётиб қолибди,
Тонг отганча маслаҳатда бўлибди,
Нечовларнинг вақти хуш бўп қолибди.
Бир оқшомни шундай қилиб ўткизида,
Номоз вақти эрта-мертан тонг отди,
Чошкада йиғилиб кетганлар кепти,
Алпларнинг каттасин навбати кепти,
«Кураш қизиқ бўлар», — деб ҳам турибди,
Кечагидай бари келиб саф тутди.

Шунда кетган томошамон бари йиғилиб: «Кечагидан ҳам

буғун қизиқ бўлар, алпларнинг зўри олишар», — деб турди.

Кеча қандай бўлса, буғун ҳам шундай бўп ўтирди. Коражонга

Алпомиш туриб айтди: — Бугун тушмайсанми майдонга, буғун

талаб қилмай турибсан? — Бунга ҳам туш десанг, тушман,

тушган билан бундан омон топмайман, лекин бу ҳаддили зўр,

бунга тушсам, икки бошдан ўламан. Ўзим ўлгандан кейин сенинг

берган давлатингни нима қиласман. Бизнинг сири-ҳолимиз бир-

биришимизга маълум, илгаридан ҳам тўқайда айиқдай олишиб ёг-

ган одам эдик, уларни илгари ҳам йиқитар эдим, энди қалманинг

шашохати — ушлагандан отиб юбораяпман, қандай бўлса, бир қалмоқ қонти, бунга тушиб ўлгандан бир нима чикарми, файратинг бўлса, кўрсат энди, — деб туриби.

Алпомиш чечиниб: — Хайр, ундей бўлса, — деб майдонга талаб кила берди. Кўкалдош алп туриб айтди: — Ўзбак! Сен бундай бўйни ўйғонлик қилма, гариби гўристон бўлиб ўлма, ҳали ҳам кўйгин, ёрингдан умид қилма, ҳалак бўп келган ўйлингдан қолма, шу алплар ўлса, ўлсин, ўзбакнинг кизи бечаток бўп ёлғиз ўзима қолсин, деб туриб эдим, сени илгаридан ҳам хисоб қилганим йўқ эди.

Бу сўзни эшитиб, Алпомиш Кўкалдошга қараб, бул ҳам бир сўз деб турган экан:

Хар ким ўз элига бекми, тўрами,
Ўзи ўлмай киши ёрин берами?
Бунча сўзни лоф урмагин, сен қалмоқ,
Кел энди майдонда тургин, ё аҳмоқ.
Билмайман майдонда кимлар ўлади,
Кўтаришма арzon бўлиб қолади,
Барчинойим бул ўртада туради,
Бийнинг кизи кимга тақдир қиласди.
Мени сен ўзингдан кам деб турасан.
Кўтаришма, жуда аҳмоқ балосан,
Олишган сўнг қанчалигим биласан,
Кўтарилиб, қалмоқ, нима қиласан.
Боғон бўлсан, қизил гулни тераин,
Хар на қисмат ёзилганин кўрайин,
Келгин, қалмоқ, бирга майдон қиласин,
Насиб этса, сенинг додинг берайн,
Сенинг билан майдон қилиб кўрайин,
Зўрлик қилсанг, тақдирга тан берайн,
Кўтаришма, бир олишиб кўрайин!
Билдирасан менга зўрликларингни,
Ўлдириб оласан Барчин ёрингни,
Олишсанг, синайсан ўзинг ҳолингни.
Ўз жонингга сен қилмагин зулмни.
Бир аросат бунда майдон бўлади,
Турган барча томошани кўради,
Кимнинг куни битса, бунда ўлади,
Колган одам бойнинг қизин олади.

Бу сўзни Алпомиш айтиб туради,
Аччиқланиб бул Кўкалдош туради,
Чечиниб, шу замон белини бўғиб,
Минордай бўп бу майдонга киради.

Күрган одам бари ҳайрон қолади,
Биз билмаймиз қандай замон бўлади.
Иккови майдонда айланиб турди,
Томошамон кўз юбортниб тикилди.
Ҳамма бу алпларга тиклаб туради,
Шердай қайсар қўл булғашиб қелади,
Турпоклар чангийди, тўзанг бўлади,
Иккови кеп белма-бел бўп олади,
Белма-бел олишса айрит бўлади,
Зўр деганинг маълум бўлиб қолади.
Шундай бўлди анга ҳақнинг фармони,
Кўп бўлади ғамли қулнинг армони,
Харчандки чирпинди Бойсиннинг хони,
Йикмоққа келмади бекнинг дармони,
Зўр экан Кўкалдош, жуда бемаъни.
Зўр қилиб, инграниб шундайин шунқор,
Кўкалдош ҳам бўлди хонга баробар,
Шудгордайнин бўлиб қолди бу ерлар,
Жуда ҳам олиши бу икки қайсар.
Иккови қайтмасдан майдон қилади
Жон бозори кўп олишиб туради,
Иккови баробар келиб қолади,
Элда ёлғиз бек Алномиш тўради(р),
Курашда қувватин сарф қип юради,
Йикмоққа қуввати бекнинг келмади.
Кўкалдош ҳам Алномишдан кам эмас,
Мени ўзбак йикади деб ғам емас,
Олишар майдонда икки шағал мас,
Иккови ҳам бир-бирига сир бермас,
Буларнинг ишини халойиқ билмас,
Иккови бир-бирин ҳеч парвой қилмас.

Ўн минг уйли Кўнғиротнинг қизлари билан, Барчин канизла-
ри билан томоша қилиб, буларнинг олишганини кўриб, Ҳаким-
бекка қараб, бир сўз деб турган экан:

Очилар баҳорда боғларнинг гули,
Гулни кўрса маст бўп сайрап булбули,
Нар-мода бўлибсиз бий бобом ули.
Йиколмасанг, бизга беринг навбатди,
Жуда келди Барчин ёринг ғайрати,
Ушлагандан кўкка отмай не бўпти?
Йиколмасанг, тўрам, навбат тилайин,
Эркак либосини ўзим кияйин,
Бор кучимни билагима жияйин,
Бул қалмоқни пора-пора қилайин.

Қалмок билан, хоним, бўлдинг баробар,
Сизни жуда мазақ килар канизлар,
Бу қалмоқни кўкка отсанг не бўлар?
Иш кўрсатсанг, менинг кўнглим топилар.
Бу сўзларни Барчин сулув айтади,
Барчинойга навбат бергин, нетади,
Мендай ойим ушлаб кўкка отади,
Қизлар сизни нар-мода деб айтади,
Қизларнинг айтгани менга ботади.
Мардлар олишмайди, силтаб отади,
Майдон бўлса иш кўрсатиб кетади,
Бўш одамнинг иши кейин кетади.
Барчинойнинг бундай кўнглин бўлмагин,
Кўп олишиб, ўзинг ҳалак қилмагин,
Қиз бола деб мени номард билмагин,
Навбат бергин, сира гина қилмагин.
Майдон кунда сенга ҳамдам бўлайин,
Мен ҳам энди бир олишиб кўрайин,
Ушласам қалмоқни нобуд қилайин,
Оғир олма, тўрам, навбат сўрайин.
Бу сўзларни айтди гул юзли дилбар,
Икки полвон бўлиб турди баробар,
Кўп сўзларни Барчин сулув айтади,
Сўзи Алпомишга ботиб кетади.
Жафо тифи бул кун жондин ўтади,
Айрилик ханжари бағрин йиртади,
Ўтдайин туттаниб шунқор кетади,
Файрати файратта бекнинг етади,
Ёр сўзиман шердил бўлиб кетади,
Чирпиб Кўкалдошни кўкка отади,
Анча ер ҳавога чиқиб кетади.
Халойиклар кўкка бокиб қаради,
Олчи-чикка бўлиб шундай айланиб,
Алп Кўкалдош бул осмондан келади,
Калласиман келиб ерга уради,
Калласи.....чиқиб боради,
Шундай бўлиб Кўкалдош ҳам ўлади.
Томошамон қалмоқ бўзлаб жўнади,
Қалмоқ ҳалки шундай зарбни кўради,
Томошамон бари изза бўлади.
«Армон билан, эсиз, аллар ўлди», — деб
Не гўзаллар кўзин ёшлаб боради,
Коражондан бари гина килади,
Шу вактинда кураш охир бўлади.
Тақдирига Қалмоқшоҳ тан беради,

Қанча амалдорман қайтиб жүнади.
Бир нечаси күриб гина қилади,
Баробар келмади, ахир ўлади,
Нече сұзни қалмоқ айтиб боради,
Қалмоқшоқ сұзига қулоқ солади:
«Менманлиман бизинг алплар ўлади,
Ўзбак иши асли ҳақ деб боради.
Бироннинг хотинин қайтиб олади,
Ўларманинг иши шундай бўлади,
Тан бермаган одам шуйтиб ўлади».
Қалмоқлар ҳам рост, деб кетиб боради,
Тойчихоннинг сўзи маъкул бўлади.
Шундай бўлиб қураш охир бўлади.
Давлатидан адрес-кимхоб кийдирди,
Кимки ғаним, хонумонин куйдирди,
Ҳақдан келган ишга бўйнин ийдирди,
Ўн минг уйли элатини жийдирди.
Хабар борди шундай отлар чоптириб,
Намойишга оқ ўтовлар ёптириб.
Эли-халқи — барча йиғилиб келади,
Бекни сийлаб, яхши хизмат қилади,
Барчинойга тўй қилмоқчи бўлади.
Обгардонин ортиб ошпаз келади,
Чилбир чўлда тўйни бошлаб қолади,
Бешта-ўнта улок ташлаб туради,
Бир четида кўпкари ҳам қилади.

Ўлиб кетди қалмоқ гачча,
Тўй бўлди Барчин ойимча,
Олмоқчи Ҳаким бекбачча,
Йиғилишган сатта норча,
Кўпкарини чопиб ётирип
Аралашиб соп бойбачча,
Тўй беради кўп кунгача,
Улогига ташлаб турур
Катта сарка, олапоча.
Беҳад қўю сўқимларни сўяди,
Кунда ҳамма қолмай ошга тўяди.
Кунига узмасдан улок беради,
Чиқарганлар танга-тилла олади,
Чавандозлар катта унум қилади,
Қирқ кунгача узмай тўйни беради.
Ўйинчи, нағмагар бари келади,
Ўзбак шоирлари айтиб туради.
Келган одам сира қуруқ қолмади,

Хаммаси ҳам анча нарса олади,
Кирк кундан кай түйлар охир бўлади,
Бир нечалар уйга тарқаб жўнади.
Бойбаччалар бекнинг гирдин олади,
Куёв нўкар бўлиб бунда туради,
Ўзбакнинг расими шундай бўлади:
Кизу жувон бари йигилиб келади,
Аёллари тўққиз товоқ қиласди,
Куёвнинг олдига шундай боради,
Оп борган таомни нўкарлари еб,
Товоғига танга-тилла солади.
Не бир хотинлар вакти хуш бўп боради,
Анча танга бунда унум қиласди,
Ўртага ўт ёкиб қизлар туради,
Салом солиб бекни бошлаб боради.
Шу замонда уйга яқин бўлади,
Уй ичинда катта одамлар туради,
Санам қизлар бари йигилиб қолади,
Барчинойни бул ўртага олади,
Қадимги расими шундай бўлади,
Барчинойни қиз опқочди қиласди.
Не келинлар юриб қизни сўради,
Бир ердан буларни топиб олади.
Икки вакил ул мулладан келади,
Келин қизнинг ихтиёрин сўради,
Уялгандан қабул килмай туради,
Қиз сўйлатар деган расм бўлади,
Қиз гапиртган анча пулни олади,
Барчин вакилини энди беради,
Ҳакимбекни бунда қабул қиласди,
Гувоҳлар йигинга яна боради,
Пешини қайтариб мулла сўради,
Бул гувоҳлар туриб жавоб беради.

Домласи вакилларидан сўраб, булар ҳам гувоҳлигига бир нима олиб, мулла хутбасини ўқиб, никоҳ қилиб, мулланинг сўраган сўзини вакиллар ҳам қабул қилиб қайтди. Ҳакимбекдан ҳам не шартлар сўраб, шарти, шароити билан қабул қилиб, ҳамма димоги чоғ бўлиб, мазгилига қайтиб кетди. Бахмал ўтовда чимилдик тутиб, куёв нўкарлари билан куёвни киргизмоқчи бўлиб, бир неча хотинлар «кампир ўлди» бўлиб, ўлганига бир нима олиб, «ит ириллар» деган расмини қилиб, бунга ҳам бир нима бериб, ҳар замон салом солиб, уйдан ичкари кириб, чимилдиқда ўтириб, олдига дастархон солиб, қўйларнинг тўшини пишириб олиб келиб, буларнинг олдига қўйиб, хўп еб тўйиб, куёв нўкарларга тўппи, рўмол, сарпойлар бериб, ҳаммаси ўз расми-қаъда-

сини қилиб, күёв нўкарлар чиқиб кетди, булар ҳам мазгилига жой-жойига қараб кетди. Барчинни бекнинг қошига оп келмоқчи бўлиб, кўп қизлар ўртага олиб, баҳмал қоплаган оқ кигизга солиб, «қадимги расмимишни қиламиш», — деб қизлар кўтариб, кўтаргани қуввати келмай ҳалак бўлиб, уйтаб-буйтиб олиб келиб, Ҳакимбекнинг қошига олиб кириб, хотинлар расмини қилиб, «чоч сийпатар», «кўл ушлатар»ини қилиб, бир неча янгалар шўхлик қип туриб: «Нима қилсангиз, ихтиёр ўзингизда», — деб шўхлик билан бир нечаси жавоб бериб, ҳар қайсиси ўз мазгилига кетди. Бул ўтов икковига танҳо тегиб қолди. Ана энди Барчинойни никоҳ қип олган сўзи:

Эшитингиз, беклар, оху зорини,
Ўлиб кетган неча душманларини,
Никоҳ қийиб олди Барчин ёрини,
Қўнгилдан чиқариб кўп губорини,
Ўйнаб-кулиб тарқатгандир черини,
Олгандир шундайин зулфакдорини,
Қўнглин хушлаб бунда бул бекларини.
Банда кўнар тангри қилган ишига,
Ул кечаси бориб анинг қошига,
Ўйнашиб, қўл солиб қордай тўшига,
Ул кечаси файзи сахар бўлганда,
Бек Ҳаким қўшилди гул бувушига.
Намоз вақтигача ўйнаб-кулади,
Тонг отган сўнг бул ўрнидан туради,
Икковлари икки жойда бўлади,
Овлок жойга ўтов тикиб қўяди,
Бек Ҳаким ўтовга бориб ётади.
Хар замонда қизлар хабар олади,
Янгалар йигилиб бунда келади,
Бир хил янга «куёв товок» қиласди,
Танга-тилла товоғига солади,
Ўзбаклар расими шундай бўлади:
Чошка-тущда соп йигитлар келади,
Ҳакимбекдан «куёв улок» сўради,
Сўраган одамлар қуруқ қолмади,
Буларга ҳам битта сарка беради,
Вақти хуш бўп булар кетиб боради.
Коражон ҳам келиб бирга туради,
Коражонни яхши иззат қиласди,
Коражон кўнглига ҳамма қаради,
Алпомишнинг бири бўлиб туради.
Коражон ҳам иззат-хурмат кўради,
Хар куни бу ерда даврон суради,
Кун айланиб яна кеч бўп қолади.

Хакимбекни янгалари олади,
Барчиной қошига қўйиб келади.
Қизу жувон бари бунда жам бўлиб,
Турур Қоражонга хизматни қилиб,
Неча кунлар бундай давронда ўтди,
Бу мағилга келиб Ҳаким жой тутди,
Бойсарига энди гапни жўнатди.
Бойсарига энди хабар борибди,
Элатидан катта-кичик қилибди,
Элат билан маслаҳатни қилибди,
Барчинни узатиб қайтмоқ бўлибди,
Бойсарибой бормайманда турибди,
Бўлак эл кетмоқни ихтиёр қилибди,
Бойсарига ҳарчанд зўрлаб кўрибди,
Эли-халқи кўп насиҳат қилибди,
Бир нечалар кўп сўз айтиб турибди:
— Кизинг кетар, сен ҳам ганиб қоларсан,
Қалмоқлардан кўп жафони кўрарсан,
Бул кўрганинг ҳали озлик қиласми,
Қалмоқнинг юртида нима қиласан.
Сен қоларсан, кетар бундан элатинг,
Сўнгра учмоққа йўқдир қанотинг,
Ўн минг уйли Қўнғирот сенинг қувватинг.
Эт қизувман бунда ёлғиз қоласан,
Ёлғиз қолиб кўп пушаймон қиласан,
Албатта бирга борсанг, сен ҳам яхши бўласан.
Аввал бир гап билан бунда кеп эдинг,
Тойчихонни паноҳ берар деб эдинг.
Бунда келиб неча кунлар тургансан,
Қизинг талаш, қанча изза кўргансан,
Қалмоқлардан не яхшилик кўргансан.
Каттамизсан, бундай ўрлаб турмагин,
Кандай бўлса элдан ёлғиз қолмагин,
Қизингдан айрилиб фариб бўлмагин,
Кийин бўлар сўнгра элни кўрмагинг.
Келиб эдик, бирга-бирга борамиз,
Ҳакимбекка шу жавобни берамиз,
Бундан борсак, Қўкқамишга қўнамиз,
Бойсин элни бориб ёйлаб юрамиз,
Қурсин қалмоқ юрти, нима қиласми?
Ҳакимбекка нима жавоб берамиз?
Кетар қизинг Барчин зулфакдор,
Ўрлаб сенга ёлғиз қолмок не даркор,
Қалмоқнинг юртини қиласми ихтиёр,
Мусофирилик юртдан кетмоғинг даркор.

Бу сўзни эшитиб, қавми-қариндошининг гапига қараб, Бойса-
ри ҳам бир сўз айтиб турган экан:

Акам изза қилди Бойсин элида,
Туролмадим Кўкқамишнинг кўлида.
Закот деди, ўн тўрт маҳрам буюрди,
Маҳрам келиб менга берди хабарди,
Закот деган гапга кўнглим қабарди.
Улсиз эдим кўп гап ёдима келди,
Акамнинг сўзлари қаттиқ кўринди.
Мен ҳам айтган сўзга менманлик қилдим,
Ўн тўрт маҳрамини ушлаб ўлдирдим,
Кашалга кўчмоқни ихтиёр қилдим,
Сизлар ҳамроҳ бўлиб ундан кунларда,
Неча кунлар Кашал қараб йўл юрдим,
Кўкқамишдан чиқиб Ойкўлга кўндим,
Қалмоқлар алпидан кўп изза кўрдим,
Қандай бўлса тақдирима тан бердим.
Қариндошлар, эшит айтган сўзимни,
Керак бўлса, олиб кетсин қизимни,
Бориб мен акама таъна бўлганча,
Қалмоқлар ўлдирсан менинг ўзимни.
Мени билсанг, сира Кўнғирот бормайман,
Борсам ҳам мен бурунгидай бўлмайман,
Акамнинг дийдори курсин, кўрмайман.
Кўнглим синиқ эди, ҳолим билмади,
Акам мени элда иззат қилмади,
Закот деган одатини қўймади.
Акамнинг зарбидан сарсон бўлганман,
Элимдан айрилиб бунда келганман,
Кўп сўрасанг, тирик эмас, ўлганман,
Қариндошлар, гапни адо қилганман,
Кетмок бўлса, Барчинга жавоб берганман.
Бу элларда менга ўлмоқ лозимди(р),
Хар замонда сўраб туриңг Барчин қизимди.

Бул жавобни қариндошларига берди. Улар ҳарчанд зўрлаб
кўрди, кетмоқни ихтиёр қилмади. Қариндошларининг айтгани
бўлмади, Ҳакимбекка бориб қариндошлари шундай билдириди: —
Бойсарибий билан келиб, қайтиб элга боролмай, сарсон бўлиб
қолганмиз, бирга кетсан, — деб бийга кўп гапириб кўрганмиз,
катта-кичик жуда зўрлаб турганмиз. Кетмоқни ҳеч ихтиёр қилма-
ди, қариганда ҳам бунинг бўйни ўйғонлиги қолмади. Бул одам-
лар ҳарчанд зўрлаб кўради, одамнинг эсида йўқ гапларни гапи-
ради: «Қайтиб борсам, кўчиб бориб ўл, баччағар, ўғлим бориб
ҳам ўзингни олиб келди, ҳам қизингни олиб келди, — деб

бетимга таъна қиласди, ўлсам ҳам бормайман», — деб ўрлайдида, туради, — деди. Ҳакимбек эшитиб: — Бу мусофириликда суяги қолиб кетмасин, деб неча марта одам юбориб кўрди. Ҳеч сўз қопмади, ҳеч кимнинг гапини қулогига олмади, ўзининг билганидан колмади.

Шундай бўй бол орада қирқ кун ўтди, қирқ кунгача маслаҳат қип ётди. Қирқ кундан кейин маслаҳатни бир ерга қўйиб, Бойсари қолди. Ўн минг уйли Қўнғирот Барчин билан кетмоқчи бўлди. Барчинни узатмоқчи бўлиб, куёвга «Эрга кўрсатди» деган расмларини килиб, бир қўйни сўйиб, чошка вақтида уйига чакириб яхши сарпойлар Ҳакимбекка ёпиб, қаватида Коражонга ҳам ёпиб, Барчинни узатмоқчи бўлиб, узатаётгандағи сўзи:

Чечанлар эплайди гапнинг эпини,
Шул замонда беш юз норни чўктариб,
Ортади Барчиннинг қилган сепини.
Барчиной йиглайди, кўнглин бўлади,
Энасиман отасига қаради,
Қараб турса элат кўчиб боради,
Суянчи йўқ, ота-эна қолади,
Булар қолишига Барчин жилади,
«Ота не бўлди?» — деб зўрлаб кўради,
Кулоқ солмай Бойсари ўрлаб туради.
Бир йўрга устига Барчин минади,
Барчиннойим энди кетиб боради.
Кўнгили бузилиб, ўпка тўлади,
Кўнгили бузилиб, мўнглиқ жилади,
Ўн минг уйли элат кўчиб боради,
Отаси, энаси шўрнинг қолади,
Эсиз отам улсиз деди, жилади,
Йигланман нима илож қиласди,
Сепин ортиб энди йўлга солади,
Бойчиборни Ҳакимга олиб келади,
Коражонман Ҳакимхон отланади.
Бедов минган от-абзалин шайлади,
Келганлар элига талаб айлади,
Чўпонлар қур ҳайтлаб қўйни ҳайдади.
Элибойлар қилиб ётир доврикни,
Хайдади чўпонлар чори, совлиқни.
Кашалдан Бойсинга талаб айлади,
Келган элат бундан кўчиб боради.

Бойсари қизини узатиб, кўнгли бузилиб, яна Барчинга тасалили бериб, бир сўз айтиб турган экан:

Жоним болам, Барчин, кўнглинг бўлмагин,
Отам қолди деб сен хафа бўлмагин,
Кўп яшагин, кўп йилгача ўлмагин,
Яҳшилик кўр, ёмонликни кўрмагин,
Сен борасан қариндошнинг ичига,
Ёлғизман деб, болам, йиғлаб юрмагин.
Муна элда бойлик даврон суарман,
Ҳар гап бўлса тақдиримдан кўрарман,
Ҳар замонда, болам, сени кўрарман,
То ўлганча дуогўйинг бўларман.
Элу халқни бундан бориб кўрасан,
Мен қолганга, билдим, хафа бўласан,
Бизга қараб, болам, йиғлаб борасан.
Кулокқа тут, болам, айтган сўзимни,
Қайтайнин, жўнатдим сендай қизимни,
Ёш тўлдирма сен ҳам наркас кўзингни,
Жуда хафа қилдим сендай кўзимни.
Йиғлама, жон болам, кўнглим бузилди,
Кетишингни кўриб бағрим эзилди.
Хафа қилиб бунда сендай санамни,
Кўйиб кетма менга дори-аламни,
Тенгқурингга қўшдим сендай боламни.
Бу юртларга келиб роҳат кўрмадинг,
Қалмоқлардан эмин-эркин юрмадинг,
Шукрулилло, қалмоқларда қолмадинг.
Кетдинг, болам, қавми-қариндошнингга,
Кўп савдолар тушиб бунда бошингга.
Жон болам, отангни ҳолин билгансан,
Отам деб ҳам меҳрибонлик қилгансан,
Тўқсон алпга ёлғиз жавоб бергансан,
Бойсарининг ҳолин билган боламсан.
Кийғир деган қўш ўлтирап қиёда,
Не кўриб-кечирдинг фоний дунёда,
Қиз ҳам бўлсанг, килган ишинг бир нечадан зиёда
Рустамдайин иш кўрсатиб борасан,
Софинсанг отангни, болам, кўрасан,
Элу халқман бирга кетиб борасан,
Бойсин-Қўнғирот элда даврон сурасан,
Ҳар замонда мени эсингга оласан,
Билдим сени, оша хафа бўласан,
Бундан борсанг, бий бобонгни кўрасан,
Бўлган ишни унга маълум қиласан.
Тойрилиб бошимдан тожи давлатим,
Бойбўрига танҳо қолди элатим,
Қиз ҳам бўлсанг, мен суянган фарзандим.
Юрагимда бордир ғамли кулфатим,

Энди тил билмаган қалмоқ улфатим,
Кунма-кун зиёда бўлди ҳасратим,
Кўрар кўзим, омонда бўл, фарзандим.

Бойсари қизини узатиб, ўн минг уйли Кўнғирот бари кўчиб,
йўлга кириб, Бойсари қайтиб уйига келиб, ёлғиз қолиб, ҳам
юритидан, ҳам қизидан айрилиб, калласи фувуллаб, мусофирилиги
асар қилиб қолди.

Коражоннинг энаси бул ишларни билиб, алпларнинг макони-
га келиб, зўр қалмоқларнинг ўлганини кўриб, Коражондан ти-
рик айрилиб, ўзга ўғилларидан ўлик айрилиб, кўнгли бузилиб,
бир сўз деб турган экан:

Болаларим элда зўрабор эди,
Қалмоқ юртда юрган бир қайсар эди,
Қаторда гуркираб турган нор эди,
Ҳар қайси юз мингга баробар эди,
Менинг ҳам бир етти ўғлим бор эди,
Бир-биридан жуда зўрабор эди,
Мен билмайман не фалокат дориди.
Армон билан билмаганим билдириди,
Ханжар чекмай бағрим қонга тўлдириди,
Ўзбак келиб ўғилларим ўлдириди.
Кесилиби эсиз алпларнинг боши,
Майда-майда бўпти гавдайи лоши,
Кўриб тўклилади кўзимнинг ёши,
Фарзандлари эди Сурхайилнинг сирдоши.
Йиғлаб қолдим энди мен ҳам муғойиб,
Коражондан тириклайн айрилиб,
Учқур эдим қанотимдан қайрилиб,
Югрук эдим туёғимдан тайрилиб,
Армон билан мен алплардан айрилиб,
Мен йиғлайман гариб бўлиб, сарғайиб,
Алплардан айрилдим сочимни ёйиб,
Кимга айтай энди кўксимни ёриб,
Қайда борай мен кўзимни ахтариб?!

Шул қисматни тақдиримдан кўрайин,
Қалмоқшоҳга энди ўзим борайин,
Кўрганимни йиғлаб арз кип турайн.

Бу сўзларни айтиб, алами зиёда бўлиб, сочини ёйиб, бетини
юлиб, Қалмоқшоҳнинг давлатхонасига бориб, ўғилларининг
вактида подшоҳликда хукми зўр кампир эди, амалдор, жига-
дор, туғдорлар олдига тушиб, Қалмоқшоҳнинг олдига ияртиб
борди.


Сурхайил мастоннинг Қалмоқшоҳга айтиб турган сўзи:

Олмадайин сүлган гулдай тарзим бор,
Тойчихоним, сенга айтар арзим бор,
Сендей шоҳим бул ишлардан бехабар,
Сени яксон қилиб кетди ўзбаклар.
Тахт устида сендей шоҳим турами,
Ёлғиз ўзбак шундай ишни қилами?!
Ҳеч замонда шундай гаплар бўлами,
Бир ўзбак шундайин ишни қилами,
Шундай алплар бул бейўқлов ўлами,
Беваҳм сендей шоҳ элда турами?!
Бундай бўлсанг, шоҳим, элни сўрама,
Сенинг жонинг бўлса, шундай қилама?
Билдим, ўзбак кетса сенинг далангдан,
Ҳеч бир сен чиқмайсан қўргон-қалъянгдан.
Билмадингми ул ўзбакнинг ишини,
Кесибди-ку зўр алларнинг бошини.
Подшо деган бул ишларни билмайми,
Билиб элдан оғир лашкар олмайми,
Ўзбакларга қиёматни қилмайми.
Подшо бўлган номус-орни билмайми,
Майдон бўлса иш кўрсатиб келмайми,
Моли-ҳолин, борин талон қилмайми,
Кизу жувон от остинда қолмайми,
Қасд қилганга шундай кунни солмайми?!
Шундай алплар ўлган бунда биласан,
Билсанг ҳам билмамиш бўлиб турасан,
Уяти йўқ, қандай катта бўласан?!

Айтган сўзим қулогингга оласан,
Гап келганда сен уялиб қоласан,
Бу сўзима нима жавоб берасан.
Сен бормасанг, юриб хабар қилайин,
Бу элатдан одам йигиб олайин,
Қичов қилиб мен кейнидан борайин,
Бало теккан Қоражонни кўрайин,
Унинг билан бир шекилли бўлайин,
Ё ўлдириб, ё бир ўлиб келайин,
Жавоб бер сўзима, шоҳим, жўнайин,
Энди сенга гапни қўтоҳ қилайин.

Бу сўзни Сурхайилдан эшишиб, Қалмоқшоҳ ҳам бир сўз
айтишиб турган экан:

Амалдорлар барин чақиртиб олади,
Түғдорларман кўп маслаҳат қиласди,
Сурхайилнинг сўзин бари билади,
Амалдордан маслаҳат қип сўради,



Ўзбаклар устига лашкар килади,
Намойишга карнай-сурнай кўяди,
Байдоқ-байдоқ лашкарини жияди.
Отга солиб арпа билан ийирди,
Қор ёққанда карвон солар чийирди,
Қалмоқшоҳи аскарини буюрди.
«Сурхайилнинг сўзи маъқул бўлган, деб,
Рост айтади ўзбак андай қилган, деб,
Жабр ўтиб бунда йиғлаб келган, деб,
Юртимнинг ободи алплар ўлган, деб,
Қоражонни тириклайн олган, деб,
Хийламан ўзига йўлдош қилган, деб.
Бундай турмай лашкар тортиб борарман,
Борсам ўзбакларни ўлжа қиларман,
Нечовини тандан бошин юларман,
Қизи, хотинини ҳайдаб келарман,
Алларнинг лотини шуйтиб оларман».

Жўнади бундан жам бўлиб,
Байдоқ-байдоқ лашкар тўлиб,
Ботирлар бедовни миниб,
Туғу байдоқ кўлга олиб,
Даста-даста йўлга кириб,
Шоҳининг айтганин қилиб.
Лашкар кетди даста-даста,
Одам тўлиб баланд-пастда,
Жўнаётир чапараста.
Туғ кўтарган йўлни олиб,
Хар байдоққа сардор бўлиб,
Тойчихоннинг амрин қилиб,
Ўзбак бекларни ахтариб,
Кўп лашкар шаҳардан чиқиб,
Тўқайистонда йўл юриб,
Аллар ўлган ерга бориб,
Нечови пушаймон қилиб,
Лашкар бундан қичаб кетди,
Тўқайистондан ўтди,
Ойнали кўлига етди.
Чилбир чўлга равон бўлиб,
Борар лашкар йўлни олиб,
Урушмоққа бари толиб,
Уруш яроғи чоқ бўлиб,
Бораётир бу сўзни айтиб:
«Элибойга борармиз, деб,
Кўп ўлжали бўлармиз, деб,
Бир сиёsat қилармиз, деб,

Ўзбакларда ярок қайда,
Анчасини қиравмиз, деб,
Молин тортиб олармиз, деб,
Қон тўкишиб кўрармиз, деб
Бизлар етиб қолармиз, деб,
Бундан бориб уруш қилсак,
Ўзбакларни кўрармиз, деб.
Бизлар минганди тулпорди,
Элибойда не жон борди(р),
Англамайди бораётган —
Уруш кўрган қалмоқларди».
Бу сўзни айтиб лоф урди,
Қоражон эсига келди,
Бир-бирига гапирди:
«Ўзимиздан била кетган
Коражондай бало борди(р),
Алп Коражон зўраборди(р),
Танҳо қирап кўп лашкарди,
Ул ҳам мисли айдаҳорди(р)».
Коражон эсига келиб,
Қалмоқларни ваҳм олди.
«Юришимиз бўлди ёмон,
Ўзбакман бирга Коражон,
У бизларни кўриб қолса,
Сира бермас бизга омон.
Солар бизга қайғу-туман
Алпдан колган зўр Коражон,
Бу лашкаринг нима бўлар,
Тингилса, қиласи яксон».
Келганига бу қалмоқлар
Йўлда қиласи пушаймон.
«Алпдан колган бор Коражон».
Бир-бирига сўзлар айтиб,
Бораётир йўлни тортиб.
«Баҳодирлар ҳам бизда бор,
Ярай бермайди ўзбаклар,
Тортинмай, лашкар, юрабер,
Ёлғиз одам нима қиласи.
Бундай гапирма ажаб сўз,
Кўп эмас, Коражон ёлғиз,
Бундай тортинмай борармиз,
Элнинг ақлинни олармиз.
Алп Коражон от кўйган сўнг,
Бизлар найзани солармиз,
Кўп бўй ўртага олармиз;
Қандай бўлса бир одам-да,

Унинг корини қиласмиш.
Қалмоқшоҳ буюрган бизни,
Сира айтма номард сўзни».
Бу сўздайтиб не қалмоқлар
Бедов отга қамчи чотар,
Чилбир чўлни тўзанг тутар,
Ўз ҳолига шердай бўлиб,
От чопар чўлда қалмоқлар.
Яқиндири бойлар ораси,
Кўринди кўчнинг қораси,
Кичов қилиб бораётган
Кўринг қалмоқлар тўраси.
«Мана энди келдик, дейди,
Ўзбакларни кўрдик, дейди.
Қанча элат йўлда борар,
Бирдан от қўйсак не бўлар,
Қайтиб булар уруш қиласи?!
Ўз ҳолига бари абгор,
Молини ҳайдаган бойлар,
Хали бизлардан бехабар».
Бир-бирига шердиллик бериб,
Маст бўп боради қалмоқлар.
«Қайтмай от қўйган сўнг лашкар,
От остинда калла қолар,
Ақли шошади ўзбаклар,
Урушмай молини берар».
Бу сўзни айтиб қалмоқлар,
Бораёттир кўп ахмоқлар.

Қалмоқларнинг келаётганини кўриб, элибойлар чувуллаб,
бесарамжон бўлиб, молларини тўплаб, хар қайсиси ўз бошига
бўп қолди. Алпомиш ҳам кўриб: — Қалмоқлар бир гап ўйлаб-
ди, бизнинг устимизга қасд қилиб лашкар юборибди, байдоқ-
байдоқ лашкар кўринади, мазмуни лашкар келаяпти, — деди.
Бу сўзни эшишиб, Коражон Алпомишга қараб, бир сўз деб
турган экан:

Қани келсин қалмок, деб,
Келса ошириб солмок, деб,
Ҳалак бўлса ўлмок, деб,
Жазосини бермоқ, деб,
Қалмоқ бошин олмок, деб,
Барин ўлжа қилмоқ, деб,
От асбобин олмок, деб,
Келса бизни кўрмок, деб,
Қайтмай саваш қилмоқ, деб,

Конни кечиб юрмок, деб.
Бекор ҳалак бўлади,
Уруш ҳавас қилади,
Бу қалмоқлар ўлади,
Ажал ҳайдаб келади,
Бири эмас, ёзганлар –
Бари аҳмоқ бўлади.
Кўргулигин кўради,
Хўп шарманда бўлади,
Бекорига ёзганлар
Уруш излаб келади.
Қоражондир зўрабор,
Қайтиб бўлар баробар?!
Мен кирсам майдон излаб,
Кўярман бағрини тузлаб,
Бир нечаси кетади
Бунда бўтадай бўзлаб.

Бу сўзни Қоражондан Алпомиш эшишиб, бул хам бир сўз
айтиб турган экан:

Хаёлингга бошқа гаплар келмасин,
Бул сўзим шаънингга номард бўлмасин,
Қасд қилма, бек дўстим, қалмоқ ўлмасин.
Қалмоқ келар аҳволидан бехабар,
Келиб қирғин топмасин-да шўрлилар,
Бизда бордир бесаранжом кўп бойлар,
Қоражон, бойлардан бўлгин хабардор.
Қўйи юрмай, булар кейин қолмасин,
Яна қалмоқ қўлга тушириб олмасин,
Бехуда қалмоққа ўлжа бўлмасин,
Сиёсат кўрсатгига улар ўлмасин,
Ўғли-қизи ебир-есир бўлмасин,
Ватани безга бўлиб қолмасин.
Булар эмас, келиб бизга гунохкор,
Қалмоқшоҳ амрини туттган кўп аскар.
Хизматкор-да, шоҳ амрини тутади,
Ҳар хизмат буюрса булар кетади,
Бу ёзганлар агар бормай нетади,
Ўлдирсанг, бехуда ўлиб кетади.
Умид тортиб файрат билан келади,
Сенинг билан мени булар билади,
Бу лашкар бизларни нима қилади?
Қалмоқшоҳ буйруғи шундай бўлади,
Шоҳ сўзига ҳалак бўлиб келади.

Бу сүздайтиб иккови шундай туради,
Энди күчдан анча кейин қолади.
Күз юбортиб ўнгу сўлга қаради,
Молин ҳайдаб бойлар ўтиб боради,
Қалмоқлар лашкари яқин келади,
Элибойнинг бари ўтиб бўлади,
Қоражонман Алпомишни кўради,
Қалмоқнинг аскари тўхтаб қолади.

Иккови бир-бирини кўриб, икки ерда туриб, бойларнинг олди-ортини йигиб тўплаб, йўлга солди. Қоражон билан Алпомиш иккови уруш яроғини фамлаб турди. Қалмоқнинг лашкари ҳам яқинлаб босиб келди. Қоражон ёлғиз ўзи айрилиб, бу лашкарга рўпара бўлиб, бир сўз деб турган экан:

Қоражонбек дейди мени,
Ким аҳмоқ килдиё сени?
Қурилар уруш майдони,
Тўкилар қалмоқнинг қони,
Жаҳаннамга борар жони,
Қайт энди, келган бемаъни!
Сен эшигтгин айтган тилди,
Қоражон, йўлингда турди,
Ўлдирап сендай душманди,
Сендай қалмоқ ҳалак бўлди.
Сенга яхшилигим шулди(р),
Билиб кетгин тўғри йўлди,
Бу сўзни айтган Қоражонди(р),
Қиларман қонли майдонди,
Сен ҳам менга бир душманди(р),
Сулатарман сонсиз танди,
Кўп қиласан пушаймонди.
Майдонда жондан кечарман,
Кафан тўнингни бичарман,
Қиличдан қонлар сочарман.
Бунда келиб қилсак майдон,
Ҳеч кетмайсан мендан омон,
Солай сенга охир замон.
Бунда келиб боролмайсан,
Сира омон қололмайсан,
Қайтиб юрtingни кўролмайсан,
Ўз ҳолингни билолмайсан,
Бола-чақанг кўролмайсан,
Элга омон боролмайсан.

Бу сўзни эшитиб, қалмоқ баҳодирлари ҳам Қоражонга қараб,
бир сўз айтиб турган экан:

Номдор полвон дейди мени,
Бўлар бу йўлда майдони,
Кейнимизда қалмоқ хони,
Қоражон, бўлдинг бемаъни.
Ўлар деб бизни ғам ема,
Ўзингдан бизни кам дема,
Мехнат тортиб бизлар келган,
Не ишларни ўзбак қилган,
Не азamat алплар ўлган,
Биз қайтмаймиз қилмай майдон.
Хўп бир чопишиб кўярмиз,
То ўлгунча биз туармиз,
Моли-зотини олармиз,
Ўзбакни ўлжа қиласмиз,
Сўнгра элга бораармиз.
Бўлар бунда қалмоқ иши,
Бугун қаттиқдир саваши,
Алпнинг хунин довлаб келдик,
Бизга дори ўзбак гўши.
Лофт урма, саваш қиласман,
Сендей алпни ўлдираман,
Қиёмат кунни соларман,
Боринг қайтариб оларман.
Сени мен одам демасман,
Уруш кунда ғам емасман,
Сендейин аҳмоқ бўлмасман,
Ўзбак динига кирмасман.
Элу ҳалқдан айрилмасман,
Сендей сарсон бўп юрмасман,
Ўлмасам омон бермасман,
Олмай ўзбакни қўймасман,
Аскаримни қайтармасман.

Бу сўзни эшитиб, ўтдай туташиб, Қоражон билан Алпомиш
облоҳу акбар, деб қалмоқ лашкарига қараб от солди.

Қарамай баланд-пастига,
От қўйди қалмоқ устига.
Остига минган тўбичок,
От қўйгандир шундай фўччик,
Бир ёқдан от қўйди қалмок,
Бунда ажаб уруш бўлмок.
Қалмоқларга аралашди,

Кайтмай қалмоклар савашди,
Бир-бириман қиличлашди,
Қалмоқ шохнинг номдорлари
Хар тарафдан от солишиди,
Рад берар келган қиличди,
Кесади Коражон бошди,
Мардлари дарёдай тошди,
Номардларнинг ақли шошди.
Нечов отдан овиб қолди,
Жазосини товиб қолди,
Нечовлар отдан йиқилиб,
Тоза ерни қовиб қолди,
Калмоқлардан анча ўлди,
Ақли шошиб қўркиб қолди.
Икки полвон зўраборди(р)
Кўп кирап келган лашкарди,
Йиғлатгандир қалмоқларди,
Юбормоқчи боз лашкарди.
Калмок юртга хабар борди,
Бу беклардан азоб қўрди,
Келиб ҳоли забун бўлди.
Фалакка етгай нолиши,
Шулдир бу бекларнинг иши,
Сулаб қолди қалмоқ лоши,
Кесилди қалмоқнинг боши.
«Ўлжа олармиз», деб келди,
Бул беклардан азоб қўрди,
Иккови шундай от солиб,
Калмоқни ўртага олиб,
Канча қалмоқлардан ўлиб,
Калмоқларни тўплаб олиб,
Коражонбекни қайтариб,
— Элга бўлгин хабардор, — деб
Хакимбек урушда қолиб.
Ёлғиз бўп бунда юради,
Кўп қалмоқни ўлдиради,
Килич-найза соп кўради.
Бу алпга таъсир килмади,
Қалмок айтгани бўлмади,
Қалмоқлар фикр ўйлади,
Бехуда жонни қийнади,
Кочмокни талаб айлади.
«Тиги олмос бунга ботмас,
Уруш қилган омон кетмас,
Бу ўзбак қандай жодугар,
Ё бу кашмири хийлагар?

Хеч ким бўлмади баробар,
Урсанг ботмайди яроқлар».
Қалмоқларда бордир номдор,
Алпомишга бўлди дучор.
Коражонга сўзлар айтган,
Қиличига қонлар қотган,
Кўринг Ойқашқа полвонни
Ҳакимбекман саваш этган.
Бир-бирининг ақлин олиб,
Найза билан қилич солиб,
Унга Ҳаким ғолиб келиб,
Шердай бўп устига борди.
Сиёсатман қилич солди,
Ойқашқани икки бўлди,
Энди қолган қалмоқлар
Кочмоқни ихтиёр қилди.
Қалмоқларни тўплаб олди,
Бирор майдон уруш бўлди.
Оқади кўзининг ёши,
От остида қолди боши,
Шулдир Ҳакимбек саваши.

Талаб қилиб ўзинг келдинг,
Ҳолинг билмай уруш қилдинг,
Бекорига анчанг ўлдинг,
Тойчи қалмоқ, нима қилдинг?
Бек Алпомиш дейди мени,
Кўрсам ўлдирарман сени,
Кўп одамни ҳалак қилиб,
Бунда ўлдирдинг бемаъни,
Мени билсанг Бойсин хони.
Қайтмайман бунда йўлимдан,
Омон бермасман кўлимдан.
Сенинг ақлингни оларман,
Ерни қизил қон киларман,
Бирингни қўймай қирараман,
Қирмасам номард бўларман.
Бу сўзни айтиб йўлга солди,
Ҳар на қалмоқ қочиб берди,
Оз одам кўпдайин бўлди,
Қочганин Алпомиш билди,
Шовқин бериб, қувиб кўрди,
Етиб барин ўлдирди.
Сиёсатга довуш қилиб.
Остида ўйнайди оти,

Бўлди бекнинг сиёсати,
Булар Қўнғиротнинг жўмарди,
Қалмоқ қочиб тоза кетди.

Қалмоқлар келиб, бир озғинтой уруш қилиб, ўлган ўлиб,
қолгани қочиб кутулиб, Ҳакимбек қайтиб, Қоражоннинг қоши-
га етиб, Қоражон Алпомишга қараб, бир сўзни айтиб бораяпти:

Мен қайтган сўнг қалмоқларда турдингми,
Хабар бер, бек дўстим, барин қирдингми,
Менинг тилим олмай уруш кип эди,
Баччагарни жуда андай қилдингми?
Ажал етиб пайманаси тўлдими,
Қалмоқларнинг шохи сендан ўлдими,
Ё Қалмоқшоҳ ўлмай омон қолдими?
Мендан колиб ёлғиз уруш қиласан,
Сен қилган ишингни ўзинг биласан,
Шукрилилло, соғ-саломат келасан,
Қалмоқларга иш кўрсатган тўрасан,
Душманларнинг қайтиб додин берасан,
Келиб, дўстим, бунда мени кўрасан,
Не бўлди? — ишингдан хабар берасан,
Нор кесар олмосни кўлга оласан,
Қалмоқларга қаттиқ ўйни соласан,
Қанчасин ўлдириб бунда келасан,
Яна қайтиб ўз юрtingга борасан,
Душман кўрсанг, яхши додин берасан,
Қандай иш кўрсатиб бунда келасан.
Қилган ишинг қандай бўлди, сўрайин,
У қалмоқлар душман бўлди, сўрайин,
Қалмоқ шохи ўлса, хурсанд бўлайин,
Ўз мағилинг қанча қолди, билайин,
Сенинг юрting мен ҳам бориб кўрайин,
Сенинг мамлакатинг эл кип турайин.
Мен бормайман қалмоқларнинг элига,
Энди қайтмам бадбаҳтларнинг динига,
Умримни ўтказай ислом элига,
Мен юарман дўстимнинг мағилида.
Неча тоғдан ўтиб бундан борармиз,
Бул элибойларга йўлдош бўлармиз,
Гоҳ ерларда бизлар бориб кўнармиз,
Бўлган ишни сендан сўраб турармиз.

Бу сўзни Қоражондан эшишиб, Алпомиш ҳам шундай бўлди,
деб Қоражонга билдириб бораётир:

Сен кетган сўнг бир озроқ уруш қилдим,
Наъра тортиб мен ҳам майдонда турдим.
От суриб бирори майдонга келди,
Менга сиёсат қип оша лофт урди,
Менинг ҳам қўлимда шу полвон ўлди,
Ундан кай қолгани ул қочиб берди,
Ундан кейин тағи бир қалмок ўлди,
Сиёсатга довуш қилиб мен қайтдим,
Қалмоқ қочиб бари элига кетди.
Ўйнаб-кулиб, дўстим, кейнингдан етдим.
Бул бойларман, дўстим, бирга бўлармиз,
Юра берсак, бир кун элга борармиз.

Бораётир элат кўчини ортиб,
Окшом юрар, кундуз тинмай йўл тортиб.
Бойлигидан бедов отни бойлаган,
Тангқа тайлаб не чўлларни ёйлаган,
Саркашлаб чўпонлар кўйни ҳайдаган.
Бораётир қўю қўзи манграшиб,
Неча Аскар довон, беллардин ошиб,
Беклар келди бул бойларга етишиб.
Бек Алпомиш Барчинойни кўради,
Кўп элатман бирга кетиб боради,
Кўй оёғи билан йўлни олади,
Аччиқўлга келиб бари қўнади.
Молларни ҳайдайди шундай аҳалаб,
Тушди бойлар Аччиқўлни ёқалаб.
Аччиқўлга қўнган элга қаради,
Неча кундан бери йўллар юради,
Элат жуда ҳориб-чарчаб боради.

Келиб Аччиқўлга қўниб, чодир тикиб, Барчиннинг қиркин
канизлари неча кундан бери йўрга миниб, йўл тортган, жуда
чарчаб мазаси кетган, нечови отнинг устида жуда зингкийиб
қотган. Барчинни отдан тушириб ётган, беш юз норга сепини
ортган, норларни чўкариб юкини тушириб ётган, хотинлар баҳ-
мал уйни тикиб ётган, қиркин канизлар Барчинни баҳмал уйга
олиб кетган, тоза либосларни бул уйга солиб ётган, ҳар қайсиси
ўз иши билан бўлиб ётган. Ҳаммаси чойдиш-қумғонни қайнатган,
чойни дамлаб ётган, дастархон ёзиб, хизматкорлар таом тортган.
Йўл қокиб, бир нечаси сулаф ётган, кеч вақти яқин етган, уч-тўрт
кун дам олиб ётган. Барчиннинг қўнглини шод этган:

Киркин кизлар ақлин олар,
Кизлар югуриб хизмат қилас,

Барчин ойнинг кўнгли тўлар,
Бойларнинг вақти хуш бўлар,
Дам олишиб уч кун турар,
Тағи бундан кўчмоқ бўлар.
Бир-бирига хабар қилиб,
Ўз юртига равон бўлиб,
Аччикўлдан энди кўчиб,
Кўчларини норга ортиб,
Булар йўлга равон бўлди.

Беклар отларини эгарлаб, чоқлаб, шайланиб, Барчин билан
йўлга равона бўлди. Алпомиш Барчинга қараб, бул сўзни айтиб
бораётири:

Сўзим эшит, моҳи анвар,
Бизман бирга санам дилбар,
Сенга ҳамроҳ кўп канизлар.
Сўз айтар сенга бекбачча,
Англагин сўзни ойимча,
Лашкар қилиб кейнимиздан,
Қувиб келди қалмоқгачча,
Қалмоқлардан ўлиб анча,
Жабр кўргандир бир неча.
Қалмоқлар жазосин бердим,
Сенинг билан сухбат қурдим,
Йўлга бирга равон бўлдим.
Зулфинг юзингга ярашиб,
Йўлиқсанг бизман талашиб,
Кетсанг бунда тоғдин ошиб.

Бир-бирига хон ёнашиб,
Узангилар ширқиллашиб,
Минган оти диркиллашиб.
Бораётири ҳазиллашиб.
Бедовларга қамчи чотар,
Неча қия йўлдан ўтар,
Қалмок юртнин бўзлатар.
Бораётган шундай қайсар,
Қаватинда Барчин дилбар,
Гоҳи кулса, гоҳ вақтинда,
Отасини эсга олар.
Барчиннинг кўнгли бузилар.
Кўп гаплар бордир кўнглида,
Колди деб Қалмок элида.
«Эна-отам қандай, — дейди, —

Душман қалмоқнинг элида.
Отама зулм қилдими,
Душманда ғарип бўлдими,
Молини талаб олдими,
Ахволи забун бўлдими?»
Бу сўзлар кўнглига келар,
Буни билди Ҳаким шунқор:
— Кўнглингни бўлма, гажакдор.
Сенинг бу кўнглинг бекор,
Хадди борми у қалмоқлар.
Соф-саломат уйга борсак,
Бийдан таги хабар олсак,
Уйтиб-буйтиб олиб келсак,
Юра бергин, бизлар кўрсак,
Икковимиз даврон сурсак,
Кўнгирот элда ўйнаб-кулсак,
Дунёни шутиб ўтказсак.

Бу сўзни айтиб кетди беклар,
Бораётир жами бойлар.
Жафо тифи жондан ўтиб,
Айрилиқ бағрини йиртиб,
«Йўлларда кўрдик зулм, деб.
Қайдасан Бойсин элим, деб,
Обод юртим, мазгилим», деб
Неча кўлу чўлни ёйлар,
Ўн минг уйли Кўнгирот бойлар,
Йўлнинг азобини ўйлар,
Чарчаб қолди қанча қўйлар.
Келар неча тоғдин ўтиб,
Тинмайин булар йўл тортиб,
Кўкқамишга яқин етиб,
Бир тоқقا чиқиб қаради,
Кўнгирот элнинг музофоти,
Кўкқамиш кўлни кўради.
Бойлар бундан кетган жойи,
Вакти хуш бўп жами бойи.
Йўл юрмоқдан кўп азобни кўради,
Қалмоқдан чиққандан йўллар юради,
Жаҳонгашта бўлиб элни кўради,
Жаҳонни сайл этиб йўлда юради,
Кетган ери — Кўкқамишга келади,
Ўз юртим деб вакти хуш бўп қолади,
Кўкқамишни бул ёқалаб қўнади,
Бурунгидай элин ёйлаб олади.

Ўлмаган дунёнинг ишин кўради,
Одамларнинг барин йифиб олади,
Бул бойлардан хўшлашиб жўнади,
Коражонман бул ҳам бирга бўлади,
Қирқин қизлар Барчинойнинг қошида,
Барчинни узатиб бирга боради.
Бораётган ери Кўнғиротнинг юрти,
Бораётган Кўнғирот элнинг бекзоди,
Хабарчи қип чопафончи жўнатди,
Яқин қолган бекнинг Бойсин элати.
Чопафончи отга қамчи уради,
Ким йўлиқса, унга хабар беради,
Шундай бориб Кўнғиротни оралади,
Нима гап деб халойиклар сўради,
Сўраганга жавоб бериб боради,
Бойбўрининг мазгилини кўради,
Алпомишдан бориб хабар беради,
Бойбўрибий чиқиб бундан сўради.

Чопафончи келиб, Бойбўрига Алпомишнинг келганини билди-
риб, бир сўзни айтиб турибди:

Арзим эшит, хон Бойбўри,
Шул бўлди хизматкор тили,
Сендай бекнинг жони-дили,
Боғдочилган гулинг келди,
Чаманда булбулинг келди,
Бек Алпомиш улинг келди.
Рухсат олмай шикор кетган,
Дин йўлида жавлон этган,
Ўз юртини ёд этган,
Калмоқ юртини бўзлатган,
Душманларни изиллатган,
Ҳакимбек қайсаринг келди.
Ҳакқа етгай айтган ноланг,
Обод бўлар кулбахонанг,
Қалмоқ кетган ёлғиз боланг,
Саломат юртингга келди.
Кетган бойлар бирга келди,
Қўкқамишга қўниб қолди.
Барчинойни бирга олиб,
Бек Коражон йўлдош бўлиб,
Сенинг жону дилинг келди.
Қалмоқ элдан ёрин олиб,
Номус билан орин олиб,
Келаётир шердай бўлиб,

Душман қолган ердай бўлиб,
Ишонмасанг чиқиб қара,
Яқин келди бирдай бўлиб,
Бу юрга овоза тўлиб,
Барчин бирга ойдай бўлиб,
Қаватида канизлари
Мисли қуралайдай бўлиб,
Келаётир йўлни тортиб,
Беш юз норга сепин ортиб.
Турмагин мунда бехабар,
Элга келиб қолди беклар.

Бу сўзни Бойбўри билар,
Яхши сарпо инъом берар,
Суюнчи олди хизматкор.
Кўнғирот юртда бўлди хабар,
Отланиб қанча амалдор,
Пешвоз кетди саркардалар.
Мамлакат ғалофул бўлди,
Хар кўчага одам тўлди,
Кизу хотинлар йигилди.
Кирқин канизини олиб,
Ой Қалдирғоч энди юриб,
Канизларман равон бўлди.
— Юринг, қизлар, борайик, деб,
Бек акамни кўрайик, деб,
Чечамдолиб келайик, деб,
Кизу хотин бораётир,
Йўлда бақан солайик, деб,
Тўппи, рўмол олайик, деб.
Шундай бўлиб одам кетди,
Беклар элга келаяпти,
Буларчувлаб бораяпти,
Оқсувга беклар етди.
Беклар хонни зиёрат қилди,
Бир-бирини кўриб вақти хуш бўлди,
Отланиб илгари равона бўлди,
Кўп киз билан Қалдирғоч етиб қолди.
Акасиман бул кўришиб қолади,
Кўп қизлар келинни ўртага олади,
Ўтқизмайди, йўлда бақан солади,
Суксур каниз тўппи, рўмол беради.
Кўнғирот мамлакати, барча йигилиб,
Бир неча етолмай ҳалак бўлади.
Йўлга сиғмас баланд жойда туради,

Бир нечалар томга чиқиб қаради,
Элу халққа бул овоза бұлади,
Үн олти уруғ әлга хабар боради,
Денги-дүши, қариндоши келади,
Шундай қилиб бир-бирини күради,
Хамма бирдай ўйнаб-кулиб юради,
Ойдай бўлиб Барчин сулув боради,
Бойбўрининг мазгилини кўради.
Кўринг Алпомишман Коражонбекни,
Хизматкорга берди бул минган отни.
Фарзандини хон Бойбўри кўрибди,
Болам, деб икковин бирдай билибди.
Қувонгандан кетди ақили шошиб,
Гапиролмай қолди сўздан адашиб,
Ҳакимбекни шундай бағрига босиб,
Коражонман муҳаббатман кўришиб:
— Худойим бергай-да, барчага дармон,
Иш бўлмас кудратли ҳақдин бефармон,
Соф-саломат сени кўрдим, Ҳакимжон,
Кетди юрагимдан менинг юз армон,
Бул ўғлимнинг дўсти экан Коражон.
Бўлақдан кучоқлаб энди кўришган,
Аввал билмабман, деб қилди пушаймон,
Икковини бирдай кўриб ул замон.
Барчиндолиб келган элнинг тўраси,
Келиб қолди оқ сут берган энаси.
Коражон икковин бирдай сўради,
Энаси айналиб дуо қиласи.
Амалдорлар бекни ўртага олади,
Тахт устига буларни олиб жўнади.
Булар тахт устида мазгилда турди,
Саркарда, амалдор хизматни қилди,
Бул бекларнинг вақтин хушлашиб турди,
Барчинойни ўрдага оп кеп тушириди.
Кизу хотин йигилиб ўрдага тўлган,
Канизларман қатор саф бўлиб турган,
Барчиннинг адабин кўп қизлар кўрган,
Адабман хулқига табассум қилган.
Ўзбаклар расими шундайин бўлган:
Ўртага ўт ёқиб саломни солган.
Чарчаб келди деб қараб турмайди,
Ўтиргани кўп қизларни қўймайди,
Салом солиб ичкарига киради,
Хотин-қизлар бари расмин қиласи,
Тонг отганча бундачувлаб юради,
Кўрмаган кўрсак деб интиқ бўлади,

Кўрганларнинг кўнгли тўлиб қолади.
Ой Барчин элга келади,
Кўрганнинг ақлин олади,
Ўзи шундай бой болади (р),
Хусни тўлган ой бўлади.
Кўп қизлар хизмат қилади,
Қалдирғоч яқин келади,
Бий орасини сўради,
Барчиной жавоб беради:
— Қисмат шундай бўлди, дейди:
Жами бойлар келди, дейди,
Кўкқамишда кўнди, дейди.
Менинг отам ғариб бўлиб,
Қалмоқ юртда қолди, дейди.
Қалдирғоч ҳам хафа бўлди,
Эшитиб пушаймон килди,
Ул бийнинг ҳоли не бўлди?
Тонг отганча кўп сирлашиб,
Билдирмай элга кулишиб,
Ул оқшомини ўткизди.
Ҳар тарафга хабар борди,
Куллук бўлсинга йифилди,
Ҳар элатдан одам келди.
Бойбўрининг вақти хушди (р),
Катта-кичик тўй бошлишди.
Пишириб ётибди ошди,
Хаммасининг вақти хушди (р).

Ҳакимбек юртига келган тўради(р),
Канча моллар сўйиб ошни беради,
Беўлчов давлатни нима қилади?!
Тўкиб берган билан адo бўлмади,
Кунда чиқиб бул кўпкари қилади
Кунда солим, улоқ бериб туради.
Шул ишларни қилди Бойсиннинг марди,
Гургумали обод бўлди элати,
Шул ишларни қилди Кўнғирот бекзоди,
Қалмоқ элдан келган марднинг фарзанди.
Неча кунлар элда тўй бериб ётди,
Неча кун ул замон орада ўтди,
Ул элда бўлган тўйни тарқатди.
Ҳар ким туриб ўз мазгилига қайтди.
Шундай қилиб кўриб ўсган элатди,
Худо берган бекка мундай давлатди,
Шундай бўлиб топди мурод-мақсадди.

ИККИНЧИ ҚИСМ

Бек Алпомиш беклик қилиб, Коражон билан бирга даврон суріб, хўп мамлакатни обод қилиб, Барчин билан ўйнаб-кулиб юртига эга бўлиб, булар бунда юра берди. Эндиғи гапни қалмоқлардан эшитинг. Қочқинчи қалмоқлар элига бориб, Қалмоқшоҳнинг олдидагам бўлиб, маслаҳат қилиб, Коражоннинг энаси Сурхайил мастан ҳам келиб, маслаҳатнинг бир четида бу кампир ҳам туриб, шунда Қалмоқшоҳ катта-кичик амалдорларига қараб, бир сўз айтиб турган экан:

Мен айтарман бундай кунда доду дод,
Катта-кичик, турган бунда жамоат,
Ўйлашайлик, беринг менга маслаҳат,
Бойсаридан тегди менга касофат,
Касиридан ўлди қанча азамат,
Катта-кичик, беринг энди маслаҳат.
Байдок-байдоқ бундан лашкар борибди,
Ўрта чўлда ўзбакларни кўрибди,
Кайтмай булар туриб уруш қилибди,
Бу урушда анча одам ўлибди,
Қанча одам ярадор бўп келибди,
Ўйланглар, касофат кимдан бўлибди.
Мен ҳам муна элда турган тўраман,
Бу ишларни Бойсаридан кўраман,
Бойсарини мен ҳам нима қиласман?
Маслаҳат бер, катта-кичик қариндош,
Хар на бор молини талаб оламан,

Ўз молига ўзин етим қиласман,
Шул ишни қылсам деб ўйлаб-кўраман,
Маслаҳат бер, беклар, сўраб турман,
Нима десанг, айтганингни қиласман.
Бу сўзимни яхши ўйлаб кўринглар,
Қариндошлар, бир маслаҳат беринглар,
Маъқул бўлса, бундан турмай боринглар,
Ҳар на бор молини тортиб олинглар.
Эшитгин мендайин шоҳнинг тилидан,
Кетолмабди бунда қалмоқ элидан,
Хеч иш келмас Бойсарининг қўлидан.
Бу сўзларни мендай шоҳнинг айтади,
Бойсарини талон қилсак, қайтади.
Бойсарига қаттиқ азоб берамиз,
Ўзини хизматкор қилиб соламиз,
Қатта давлат, молин тортиб оламиз,
Ўйлаб туриб қайтиб омон берамиз.
Ўлиб кетди ул неча валламатим,
Ўйласам, қолмайди танда тоқатим,
Илгари кўп эди қилган ҳурматим,
Энди бўлар Бойсарига бул сиёсатим,
Қандай бўлди бу менинг маслаҳатим,
Жавоб бергин, катта-кичик элатим.

Бул сўз йигилган қалмоқларнинг ҳаммасига гап маъқул туш-ди. «Қалмоқшоҳ рост айтади, Бойсари бўлмаса, бул ишлар бўл-мас эди, бунча одам ўлмас эди», — деб Бойсарининг молини талаб олмоқка анча одам жўнатди. Бу сўзни айтиб, жўнаб борајити:

Бош бўлган неча сипохи,
Буюрди Қалмоқнинг шохи,
Чилбир чўлига бормоқقا,
Жавоб берди кўп қалмоққа,
Бойсарининг молин тортиб олмоққа,
Бойсарини бойлаб ҳайдаб келмоққа,
Жавоб тегди саттагина аҳмоққа.
Эшитган шоҳнинг дотини,
Миниб бариси отини.
Бул шаҳардан чўлга юриб,
Нечовлар пиёда бўлиб,
«Бешта-ўнта олармиз», деб
Калтагин эйнига солиб.
Хеч ким чиқолмас йўлига,
Боргандир Ойна кўлига,
Отли-пиёда чувашиб,
Етишди Чилбир чўлига.

Карайди Бойсари ночор,
Келаётир күп қалмоқлар,
Түксон түқайда йилки бор,
Айланиб барини түплар,
Хүп бир түплаб санаб күрар,
Хатлаб ўтказди мирзалар,
Қалмоқшохга тобе қилас.
Бойсари ҳам юртнинг шойи,
Не бўлди шўрнинг гунойи,
Билмас қандай қалмоқ ўйи,
Түксон қўра бордир қўйи.
Чўпонларнинг барин йигиб олади,
Бойсари қўйлардан жудо бўлади.
Чўлда юрган қўрар шундай қияни,
Хатлаб олди бундан қирқ минг туяни.
Ўтказгандир қатор-қатор норини,
Подшолик айлади ҳамма зарини,
Хатлаб олди писандида борини,
Куригти-ку Бойсарининг шўрини.
Барин хатлаб мағилига келади,
Бойсарига кўп сиёsat қиласи,
Худо қилган ишга банда кўнади,
Ёлғизлиги асар қилиб боради.
Колганига кўп пушаймон қиласи,
Ўрликдан наф топмай энди жиласи,
Бу шўрли ёлғиз-да нима қиласи,
Бир одам кўлидан нима келади?!
Шунча давлатидан жудо бўлади,
Бойсарини шохга хайдаб жўнади,
Шу замонда хайдаб кетиб боради.
Дод деганман эшитмайди сўзини,
Ёш оқизиб бунда икки кўзини,
Хар кимга сарғайтиб гулдай юзини,
Хайдаб борар Бойсарининг ўзини.
Аччиғланса, бунга қамчи тортади,
Фалак жабри бунинг бағрин йиртади,
Пиёда Бойсарини хайдаб кетади.
Бойсаридан ҳеч ким хабар олмаса,
Қариндоши, ўғли, қизи бўлмаса,
Ҳеч ким бунинг ёрдамини олмаса?!
Сиёsat кип ҳайдаб кетиб боради.
Зўрлигини қалмоқ бунга билдириб,
Зўрлик билан айтганига кўндириб,
От ўйнатиб не қалмоқлар боради,
Тақдирида ёзилганни кўради,
Қалмоқшохга элтиб тўғри қиласи.

Ёзган хатни Қалмоқшоға беради.
Бойсаридан неча сўзни сўради,
Жавоб беролмайди, кўркиб туради.
Сиёсат кўрсатди қалмоқнинг шоҳи,
Кўп экан, — деб, — Бойсарининг гуноҳи.
— Бойсарини «яхши хурмат» этарман,
Бошин кесиб, буни дорга тортарман.
Бизнинг юртга не ишларни солганди,
Мендай шоҳнинг оша ақлин олганди,
Кўп ишларни бунда келиб қилганди,
Шу вақтгача билмай мендай султонди,
Энди бунга ўлим лозим бўлганди(р).
Бойсарига қаттиқ азоб берарман,
Жаллодлар кўлига топиш қиласарман,
Хукми кушга сени тайин қиласарман.
Турган мазгил-жойинг қалмоқлар жойи,
Бу сўзларни айтиб мендайин шоҳи,
Қаватида кўл қувшириб сипойи.
Саф-саф бўлиб турган қалмоқ балоди(р),
Нима деса, ул Бойсари кўнади,
Кўнмаганда нима илож қиласади,
Хозир қалмоқ жуда зўр ёв бўлади,
Бойсарига азоб бериб туради.
Не иш эканин хон Бойсари билмади,
Сўрамоққа бунда ҳолат қолмади.
Караб туриб кўзда ёши тизилар,
Бойсарининг караб бағри эзилар.
Бойсарихон хўп дарҳайрон бўлади,
Бори давлатини кўлдан беради,
Қалмоқ бари шундай ишни қиласади.
Қалмоқ ҳалқи шундайин эл бўлади,
Ўзбакларнинг бир уруғи бўлади.
Бойсарини ғазаб қилиб сўради,
Ночор бўп Бойсари шоҳга қаради.

Бойсари Қалмоқшоҳга караб, гунохини сўраб турибди:

Фариблиқда менинг сўлган тарзим бор,
Қалмоқшоҳим, сенга айтар арзим бор,
Не сабабдан мен бўлибман гуноҳкор?
Мусофириман, кўриб сенинг элингни,
Ўз жонима мен қилганман зулмни,
Кимга айтай энди ўлар ҳолимни,
Хатлаб тортиб олди бори молимни,
Хеч ким сўрамади мунда ҳолимни,
Одамларинг қилиб қайғу-зулмни,

Нишон қўймай олди барча молимни.
Мен сўйласам кўп сиёсат қилибди,
От ҳукминда сенга ҳайдаб келибди,
Сенинг сўйлаганинг бундай бўлибди,
Мендай факир нима гуноҳ қилибди?!
Барча давлатимни қўймай оласан,
Жаллод йўқлаб, мени топиш қиласан,
Қилган гуноҳимни қайдан биласан?
Фам билан сарғайди гулдайин дийдор,
Бу ишлардан қолган мен ҳам бехабар,
Не сабабдан, шоҳим, бўлдим гуноҳкор?
Ноҳақ қилдинг энди менга зулмни,
Талон қилиб олдинг барча молимни,
Ахиринда қилдинг мундай зулмни,
Faзабман чақирдинг жаллодларингни,
Қалмоқшоҳ, сен қаттиқ қилдинг кунимни,
Бир одам деб сўрмадинг ҳолимни.
Раҳм қилмай кўзда қонли ёшима,
Қартайганда қамчи уриб бошима,
Етолмайман кетган қариндошима,
Ҳайдаб келди зулм билан қошинга.
Мусоғир элларда бўлдим хору зор,
Бошим кесиб дорга тортса жаллодлар,
Бойсари дер нега бўлдим гуноҳкор?

Бу сўзни эшитиб, Қалмоқшоҳ бир сўз деб турган экан:

Ул ҳамдамим кетди менинг Коражон,
Тўқсон алп эди-ку юртимда сulton,
Шундай зўрлар бўлди ер билан яксон,
Касофат ишини сендан кўрдим ман.
Гуноҳкорсан, эшиит айтган сўзимни,
Ўйдирман сенинг нарбас кўзингни,
Ўртага ташладинг Барчин қизингни.
Мен ҳам сенга кўп яхшилик қилганман,
Юртимдан жой бериб раҳбар бўлганман,
Шул алплардан жудо бўлиб қолганман,
Шуйтиб бул ишларни сендан кўрганман,
Бил, Бойсари, мен гуноҳкор қилганман.
Сендайин лодоннинг кўнглин бўларман,
Алплар қасосини сендан оларман,
Нима бўлса билганимдай қиласарман,
Бошинг кесиб сени дорга иларман.
Бир одамсан, ҳали ўлиб кетмагин,
Яхшилик қилайин, сен унутмагин,
Яна қайтиб сен ўзингдан кетмагин.

Үлдирмайин, тўрий йўлга солайин,
Ўз молингга сени сардор қилайин.
Мен ҳам сенга меҳрибонлик қилайин.
Кўп йиғлайсан, бунда фифон қиласан,
Бир одамсан, аччиқлансан ўласан,
Мол бокар каттаси бўлиб юрасан,
Тақдирингда нима борин кўрасан,
Кунинг битса ажалингдан ўласан.
Жўнатгансан талаш бўлган қизингди,
Ўлдирмайин мен ҳам сенинг ўзингди,
Жон ширин-да, сенинг кўнглинг бузилди,
Килган ишларингга ўлим лозимди(р),
Хали ҳам мен озод килдим ўзингди,
Мол бокарга сардор бўлмоқ лозимди(р).

Бу сўзни эшитиб, Бойсарининг кўнгли таскин топиб, моли кетса ҳам жони қолгандай бўлиб, нима деганига ўзини рози қилиб, жамъи молларини қўлидан олиб, катта одам эди, ўз молига ўзи етимлик қилиб, мол боқадиганларнинг устидан сардор бўлиб, шул ишга Бойсарини рози қилиб, Қалмоқларнинг нима деганига кўниб, кўл кўйдириб, Қалмоқшоҳ муҳрлаб олиб, молларнинг устидан қарайдиган сардор бўлиб, шунчалик даражани Қалмоқшоҳ Бойсарига бериб, Бойсарига бул ишларни топшириб, ўз мазгилига қайтариб юборди. Қалмоқ юртида шу сарсончиликни кўриб қолди. Шундай бўлиб молни боқиб юра берди.

Сурхайил мастан, бу кампир ҳамма ишга аралаш, Қалмоқшоҳнинг қилган ишларини кўриб, бул ҳам ўз нафсига тортди:
«Бойсарининг молини талаб опти, ўз молига ўзини етим қипти, подшоҳларнинг наздига шул ҳам иш бўйти», — деб ўрнидан туриб, бир сўз деб турибди:

Хазон бўлиб боғда гуллар сўлмади,
Сўлган гулга булбул қелиб кўнмади,
Бу қилган ишингга кўнглим тўлмади,
Сенинг қилган ишинг ишдай бўлмади.
Элни сўраб турган катта тўрасан,
Бойсарининг молин талон қиласан,
Ўз нафсингга тортиб молин оласан,
Бойсарига омон жавоб берасан.
Қилганинг назлингга ишдай бўлами,
Сен мол олсанг, ўлганнинг хуни тўлами?!
Қанча молга эга бўлиб турасан,
Ўлганлар хунини қандай қиласан,
Молдор киши бўлиб ёйлаб қоласан,
Мол эгасин сен ҳам етим қиласан,
Хун довлайман, нима жавоб берасан,

Болаларим нобуд бўлган, биласан.
Сурхайил дер, бир иш бошлаб турайнин,
Кўнгилда боримни айтиб турайнин,
Қани, сенинг яхшилигинг билайнин,
Устаю мардикор сендан сўрайин.
Кўнглим шулдир: Мурод тепа борайнин,
Чилбир чўлдан жой ораста солайнин,
Шул ўзбакнинг йўлин тўсиб кўрайин,
Бойсарида нима ишим бор менинг,
То ўлганча Алпомишман бўлайнин.
Агар қўлга келса Бойсиннинг хони,
Ўлдирсам тўланар ўғлимнинг хуни,
Даркор эмас ўзбакнинг моли,
Шул бўлади Сурхайил айтган саволи.
Ёшга тўла мендай ночорнинг кўзи,
Қандай бўлди Сурхайилнинг бу сўзи.
Шоҳ қошида баринг инъом оласан,
Шу сўзима нима жавоб берасан.

Бу сўзни Сурхайлдан эшитиб, Қалмоқшоҳ ҳам Сурхайил мастанга қараб, бир сўз деб турган экан:

Ночор, айтган сўзинг мен ҳам билайнин,
Нимани хоҳлассанг, шуни қилайнин.
Сўрасанг аввали мендан хизматкор,
Қанча десанг, менинг бермоғим даркор,
Яна ҳам сўрасанг устаю гилкор,
Шахар қилсанг, қила бергин муқаррар,
Обод қилсанг, менинг бермоғим даркор.
Устига қўяйин неча амалдор,
Бу ишларга сен бўлмагин чиқимдёр.
Кўрсатиб бўлгайсан бошида саркёр,
Ҳар на бўлса қилиб бермоғим даркор.
Қанча одам сен сўрасанг, берайнин,
Қаерга буюрсанг, ҳозир қилайнин,
Бурунгидай ҳурмат қилиб турайнин.
Кулок солгин мендай шоҳнинг тилига,
Кўзинг тўртдир Коражоннинг йўлига.
Бир мазғил қилганинг ўғлинг билади,
Ўзбак юртдан бир кун ўғлинг келади,
Бари боланг тирилгандай бўлади,
Кўнглингдан рубори кетиб туради,
Кўнглинг бўлма, шоҳинг хизмат қилади.
Сенинг ҳам улларинг бу юртда сардор,
Ҳар қайсиси эди мисли айдаҳор,
Ўлиб кетди бунда шундай зўрабор,

Келолмас эди-ку ҳеч бир душманлар.
Үйлаб турсам юрагимда дардим бор,
Сурхайил, берайин неча хизматкор,
Бурунгидай тортилмагин, айта бер.
Агар аскар сўрасанг ҳам берарман,
Қанча дунё бўлса хозир қиласман,
Кадимгидай иззатингни киласман.

Сурхайил маston бу сўэни эшишиб, айтган сўзи маъқул бўлиб,
қанча хизматкор, қанча уста сўраб олиб, қанча мардикор, булар-
ни ишлатадиган қанча муҳрдор, амалдор, соп сулув кирқ қиз,
шундай қизлар: кўрганнинг ақлин олгудай, жамолига ҳар ким
хайрон қолгудай, бир кўрган одам жамолига маст бўлиб, шу-
тада айланиб қолгудай қизларни олиб, Сурхайил маstonнинг
қайтиб бораётгандаги сўзи:

Айтган ишим мавжуд бўлиб,
Подшоликдан одам олиб,
Амалдорлар йўлга солиб,
Бир нечалар йўл бошқариб,
Сурхайил айтганин қилиб,
Қанча арава жўнади
Овқат билан анжом солиб.
Кетди устаю мардикор,
Боради Сурхайил айёр,
Оро бериб неча қизлар,
Сурхайилга хизмат қилиб,
Бораётган сарвинозлар.
Шоҳга ёққан кампир сўзи,
Атрофидা кирқин қизи,
Кийгани гулгун кирмизи,
Қалмоқ юртнинг сарвинози.
Кўрганларнинг ақлин олиб,
Хусни бир-биридан голиб,
Сурхайилга ҳамроҳ бўлиб,
Бир нечаси наъма чалиб,
Шундай бўлиб борар қизлар,
Чилбирнинг чўлини излар.
Тўқайистон кўлга кетди,
Олди Мурод тепа етди,
Ул тепада қўниб ётди.

Мурод тепага бориб, Мурод тепанинг яқинидан, Чилбир чў-
лидан бир жой ораста тузатди. Неча вактлар устаю мардикорлар-
ни ишлатди, кўнгираларини пўлатдан сўқдириб, бўсағаларини
олтингдан чоптириб, дарвозаларига тилланинг сувини югуртиб,

ёкут, марвар тошларидан намойишга ўтқизиб, ичкима-ички бул мазгил-жойларни тузатиб, Қалмоқшох келиб бул жойларни кү-риб, шунда бу иморатлар тамом бўлиб, устаю мардикорларнинг ҳаммасига жавоб бериб жўнатди. Сон подшоликдан арок-шарок, бехуш дориларни фамлаб кўйибди, ўзига оро-торо бериб, бул мазгилда юрибди. Қалмоқшох ҳар замон келиб, аскарлари билан хабар олиб турибди. Бойсарининг кўрган кунини ўзбак беклар эшитса, излаб келар, деб юрибди. Ҳар кун кампир чикиб, дур-бунни олиб, ўнгу сўлга қараб турибди, шу ташвишларни Сурхайил билан ваъда қилиб, Қалмоқшох иккови бир бўлиб, келса ўзбакларни қўлга туширамиз, деб юрибди.

Бойсари ўз молига ўзи етимлик қилиб юрибди. Ногаҳон мол бошида юриб эди, бир қатор карвон ўтиб борајати. Молини қўйиб, карвонларнинг олдига чикиб, бир сўз деб турибди:

Шундай бўлди менга ҳақдин фармонлар,
Жаҳонни сайл этиб кезган карвонлар,
Йўл бўлсин, карвонлар, қайда борасан?
Хабар бергин, қайси элдан келасан,
Борар юртинг менга хабар берасан.
Жафо тифи бул кун жондин ўтади,
Мени тақдир шу кулфатга элтади,
Катта йўлдан сендай карвон ўтади;
Карвонлар ҳам туюни тўхтатади.
Ҳар на дардин карвонларга айтади,
Фарibiliгим суяғимни ўртади,
Йўл бўлсин, карвонлар, қайда борасан?
Тўрт қилгандир эгам икки кўзимди,
Картайганда хўр бўп қолган ўзимди(р),
Сен англагин гулдай сўлган тарзимди,
Тўхтадинг, эшитгин айтган арзимди.
Хабар бергин қайси элдан келасан,
Ростин айтгин қай шаҳарга борасан?
Азамат мард эдим, бўлғанман ночор,
Бу чўлларда шундай бўлдим хору зор,
Элимдан айрилиб бўлдим дарбадар,
Бул сўзима жавоб беринг, карвонлар.
Кўнглим бўлиб сендан савол сўрайин,
Сенинг борар юртинг мен ҳам билайнин,
Борар жойинг хабар бергин, кўрайин,
Ул сабабдан сендан савол сўрайин,
Дардманман, дардимни ёриб турайнин,
Дардим бордир, сенга арза берайнин,
Йўл бўлсин, карвонлар, сендан сўрайин.

Бу сўзни эшитиб, карвонлар ҳам Бойсарига қараб, бир сўз деб турган экан:

Хар шаҳарман шул шаҳарда юраман,
Тойчиконнинг мамлакатин кўраман,
Юриб ўзим савдогарлик қиласман,
Қалмоқлар шахридан чиқиб келаман,
Асли ўзим қанжигали бўламан,
Бойсин шаҳарига кетиб бораман,
Беҳад молни бу шаҳардан оламан,
Мен ҳам мато, кимхоб юклаб бораман,
Бойсин бозорига молим соламан,
Худо берса, кўп фойдани оламан,
Рўзгоримни бориб обод қиласман.
Бир худонинг берганига кўнаман,
Бу чўлларда туни-куни юраман,
Мехнат тортиб Бойсин-Қўнғирот бораман,
Мен ҳам билсанг, Қўнғирот элдан бўламан,
Бу юртни кезган мен савдогар бўламан,
Кашалдан Қўнғиротга кетиб бораман,
Сўрасанг, гапингга жавоб бераман,
Мени билсанг, асл ўзбак бўламан.
Мен билмайман, неча кунда бораман,
Элда юрган мен бозорчи бўламан,
Юқ босди тумни, йўлга кираман,
Кўп ҳаяллаб, сўзга қулоқ соламан,
Сўзинг бўлса айтгин, йўлдан қоламан,
Карвонман-да, юрсам йўлни оламан,
Қўнғирот юртга мен ҳам кириб бораман,
Мундан борсам, элатимни кўраман,
Хаялламай жўнамакчин бўламан,
Нима десанг, сўзингдолиб бораман.
Кўп сўрадинг, айтгин нима ишинг бор,
Тарзинг кўрдим, сен бўлибсан хору зор,
Қўнғирот элда кимга айтар сўзинг бор?
Аҳволингдан сен менга бердинг хабар,
Ул элатда кимга айтар дардинг бор?
Қараб туриб кўп сўради карвонлар.
Замонингда сен ҳам дарёдай тошиб,
Сен қолгандай табгирингдан адашиб,
Кўп сўзни сўйладинг ақилинг ёнашиб,
Яқинлаб келгансан менга ёнашиб.

Бу сўзни карвонлардан эшишиб, карвонларга қараб, Бойсари
ҳам бир сўз деб турган экан:

Кариндошсан, қиласай изингни тавоф,
Сен менинг сўзима бергансан жавоб,
Бир сўзим бор айтай, қилсанг кўп савоб.
Қалмоқ элда мусофириман сандираб,

Сўзимни айтмайман ҳеч кимга қараб,
Чиқиб эдим мен акамдан ўпкаладаб,
Хозир менга қалмоқ бўлгандир тараф.
Қалмоқ менинг билмаганим билдири,
Хар на деса, айтганига кўндириди.
Карvonлар, эшитгин менинг тилимни,
Қалмоқ қилди бир қабоҳат зулмни,
Талаб олди менинг бори молимни,
Кулоқ соп, сўрамас бул ахволимни,
Додлаганман эшитмайди тилимни,
Қаттиқ қилиб ўткизганман кунимни,
Ҳеч ким билмас бул сири-аҳволимни,
Кўролмайман Бойсин-Қўнғирот элимни.
Қалма шаҳодат мусурмоннинг тилига,
Мен қолганман айролиқнинг ҳилига,
Мустарман-ку қалмоқларнинг қўлига,
Ким бурилар Бойсарининг ҳолига,
Арза берай Бойсин-Қўнғирот хонига,
Элтиб берсанг Бойбўри меҳрибонига,
Сен бурилгин мендай мискин ҳолига,
Ўзи етим, билсанг, ўзи молига.
Сири-ҳолим, сенга айтар сўзим бор,
Барчин деган бундан кетган қизим бор,
Берган хабаримни Барчинга еткар.
Барчин қизим бул йўлима интизор,
Мен қолганман бу шаҳарда хору зор,
Албатта сўзимни қизимга еткар.
Бул айтган сўзимни ҳазил билмагин,
Яхшилик кўр, ёмонликни кўрмагин,
Кўп яшагин, кўп йилгача ўлмагин,
Менинг гапим айтди-кўйди демагин.
Янглишиб айтибман сенга сўзимни,
Эсима олмабман Барчин қизимни.
Хаялласанг, оша оғир олмагин,
Қизима бер, Бойбўрига бермагин.
Бундан бориб элатингта киргайсан,
Барчиннинг қошига тикка боргайсан,
Арза битиб Барчинойга бергайсан.
Қиз ҳам бўлса, болам бўлгайди омон,
Мен бўлибман бу чўлларда саргардон,
Кетмади бошимдан қоронги туман,
Ёлиз қизим эди менга меҳрибон,
Бойсарининг айтган сўзи шу бўлар.
Қариндошсан, яхши хизмат қиласан,
Мундай бориб Барчинойни кўрасан,
Ўз қўлимдан битган арзам берасан,
Нима бўлса шу хизматни қиласан,

Хозир менинг ахволимни кўрасан,
Кўрганинг Барчинга айтиб борасан,
Шундай қилсанг, менинг кўнглим оласан.
Хаёлингга бошқа сўзни олмагин,
Барчиндан ўзага хатни бермагин.
Қулоқ солгин мендай ночор тилига,
Омон-эсон боргин Бойсин элига,
Албатта бер Барчинойнинг кўлига.

Бу сўзни Бойсаридан эшитиб, карвонлар Бойсарининг сири-
ахволини, айтган сўзларини, қалмоқларнинг зўрлик билан олган
молларини ўз кўзича арзага солиб, карвонлар битиб олиб, Бойса-
ри ўз ҳолига йиглаб, хўшлашиб, карвонлар ҳам йўлга равона
бўлди. Бу карвонларнинг кетиб бораётгандаги сўзи:

Кўнглин бўлиб бул Бойсари қолади,
Арза олиб бундан карвон жўнади,
Туя оёғиман кетиб боради,
Бойсарининг асли-наслин билади,
Бир-бирига йўлда айтиб боради:
«Илгари бул Кўнғирот элда тўради,
Бир гап билан бул юртларга келади,
Ахирида хўп ахволни кўради».
Бир нечаси билиб савол қиласди:
«Илгаридан бўйни йўғон бўлади,
Закот деса, бермай ўрлаб келади,
Пўқ ейми бу ёқда, нима қиласди,
Ахирида шундай бўлиб ўлади,
Милладор бўп энди арза беради».
Бир-бирига бу сўздайтиб боради,
Худо деб карвонлар йўлни олади,
Йўлда туясини тортиб боради.
Бораёттир бу карвонлар тўп бўлиб,
Урри, газандага жуда кўп бўлиб,
Бир-бирига айтган сўзи эп бўлиб.
Карвонлар боради бул тўзон қилиб,
Хар замонда кўнар молга дам бериб,
Кечакундуз тинмай энди йўл юриб.
Кетар карвон неча дарбантдин ошибиб,
Карвон юрса кетар йўлга ярашиб,
Гоҳ кечалар йўлдан чиқар адашиб,
Уйқу олиб кетар ақили шошиб,
Бир-бирин чакириб, йўлларга тушиб,
Оқшом бўлса, бир-бирига етишиб.
Фойда талаб карвон кетиб боради,
Хар тарафга, ўнгу сўлга қаради,
Йўқ фойданни ҳисоблашиб боради,

Бир-бириман бу ўрлашиб қолади.
Кундуз шундай бўлиб булар юради,
Оқшомига кўп интифоқ бўлади,
Нима бўлса, эҳтиётни қиласди,
Оқшом анжомини қўлга олади,
Тонг отган сўнг фарогатни қиласди,
Хар на жабр бўлса, йўлда кўради,
Сувли ер кўринса, бориб кўнади,
Туясин ўтлатиб кетиб боради,
Шундай меҳнат қилиб фойда кўради,
Етсам деб карвонлар йўлда юради.
Бундан қичаб энди карвонлар кетди,
Неча ой, неча кун орада ўтди,
Кўз юбортиб кўради мамлакатди,
Энди кўрди Бойсиндай музофотди,
Оралаб боради сонсиз элатди,
Бойсин шаҳарига тикка йўл тортид.
Элни кўриб вақти хуш бўп қолади,
Туяларин тўғри йўлга солади,
Бойсин шаҳарига булар боради,
Узоқ эмас, энди яқин қолади.
Қанча мато булар юклаб боради,
Халойиқлар карвонларни кўради,
Карвон келди, дейшиб одам туради,
Бир нечалар неча сўзни сўради,
Танигандар ҳорма-бор бўл қиласди.
Бир нечаси от устида сўради,
Бир нечалар сўраб ўтиб боради.
Келгани бул юртга овоза бўлади,
Шаҳарнинг ичига етиб боради,
Карвон бориб бир саройга кўнади.
Бугун Бойсин элнинг шундай бозори,
Катта-кичик бозор дейди, келади,
Хамма келиб карвонларни кўради.
Қофила бошининг эсига келади,
Бойсарининг арзасини олади,
Барчинга берай деб кетиб боради,
Бойбўрининг мазгил-жойин сўради.
Катта одам белгили жойда бўлади,
Бекнинг давлатхонасига боради,
Жиловхонада энди тўғри бўлади,
Амалдорлар қофила бошни кўради,
Танигандан келиб хабар олади,
Амалдорлар таниб буни сўради,
Барчинойда ишим бор деб туради.
— Ишингдайтгин бизлар маълум этайик,
Сўзинг бўлса, Барчинойга айтайик.

Шунда ул амалдорларга қараб, қофила боши бир сүз деб турган экан:

Қалмоқлар юртига гузарим тушди,
Юкимни түлдириб ундан келибман,
Бойсарининг ахволини кўрибман,
Кўп туришиб басти жавоб қилибман,
Ул сабабдан мен бу ерга келибман.
Мен ҳам савдогарман, айтар арзим бор,
Бекорига сўзламоқлик не даркор,
Барчинойга уч-тўрт оғиз сўзим бор.
Хабар берса, Барчинойни кўраман,
Отасининг хабарини бераман,
Бўлак одамларни нима қиласман,
Ой Барчинни мен ҳам сўраб тураман.
Хазил дема қофила бошин сўзини,
Хон Бойсари кўп сўраган қизини,
Бераман отасин айтган қарзини,
Кўриб ўтай Барчинойнинг ўзини.
Қофила бошини айлантириб турмагин,
Хабар бергин, оша ҳалак қилмагин.
Катта ерда айтиб турар арзим бор,
Барчинойим ҳали мендан бехабар,
Мен карвонман, шаҳар жойда ишим бор,
Буюргин Барчинга битта хизматкор,
Қофила бошнинг айтган сўзи шу бўлар.
Ул саройда менинг беҳад молим бор,
Мен борганча жўраларим интизор,
Барчинойга хабар бермоянг даркор.
Кўп ҳаяллаб мен ҳам бунда тураман,
Ҳаялласам мен савдодан қоламан,
Ҳаялламай келса Барчин муштипар,
Отасининг сўзин маълум қиласман.
Бий отаси бўлиб қопти саргардон,
Хабар ололмайди ҳеч ким ҳолидан,
Барчинга билдириб ўтай бул замон.

Бул сўзни эшитиб, амалдорлар бир хизматкорни Барчинга буюрди. Бориб Барчинга хабар берди. Барчин ичкаридан чиқиб, — билдириб. — Бизлар Қалмоқ юртига бордик, отангни кўрдик, — сени кўп сўраб бир хат бизга топиш қилди, нима борини ўқиб эшиласан, — деб қайтиб йўлга равона бўлди. Ўз бозорчилик ишига карвон ҳам кетди. Барчин хатни олиб, бул ҳам уйига қайтиди, мазгилига етди, ўтириб бул хатни ўқиб кўраяпти. Ўқиб кўриб, ўз шаънига бу сўзни айтиб турибди:

Лайли-Мажнун эди жаҳонга устод,
Фалакнинг қавлидан дод билан бедод,
Бий отама унда бўпти қиёмат,
Бор экан бошида турли аломат,
Бир карвондан юборибди арза хат,
Бу хатни кўрибман, қолмади тоқат,
Отам деб қиларман бул замон фарёд,
Бузилсин, йиқилсин ул чархи ношод,
Дунёнинг ғамидан бўлмади озод,
Қалмоқлардан қутулмади саломат,
Отама бўлибди ваҳми қиёмат.
Султон отам унда хор бўп қолибди,
Бошидан ўтганин хатга солибди,
Дунё молин барин тортиб олибди,
Қалмоқлар кўлида мустар бўлибди,
Мендей муштипарга хабар қилибди,
Отамнинг аҳволи қандай бўлибди.
Буни кўриб Барчин сулув жилади,
Йигланман нима илож қилади,
Термулиб ҳар ёққа Барчин қаради,
Шундай отам жуда хор бўй қолади,
Мен билмайман куни қандай бўлади,
Отам дейди, кўп сарғайиб туради.
Хатда борин таъриф қилиб жилади,
Талабини яратгаんだн тилади,
Эшикдан Алпомиш кириб келади,
Караса, Барчиной йиглаб туради,
Буни кўриб шунқор хафа бўлади,
Нима гап деб Барчинойдан сўради,
Кўлига Барчиной хатни беради,
Хатда борин бул ҳам ўқиб кўради,
Ўқиб кўриб оша диққат бўлади,
Барчинойга бул тасалли беради.
— Йиглама, гул юзлим, бундан борарман,
Хафа бўлма, сени шодмон қиларман,
От ўйнатиб қалмоқларга борарман,
Йиглама, отангни олиб келарман.
Мендей тўранг қалмоқларга боради,
Борса қалмоқларга қирғин солади,
Хафа бўлма, отанг келиб қолади.
Хозир кўрар тақдирдаги меҳнатин,
Сенинг ҳурматингдан бўлар хизматим.
Бул элларда юрт сўраган тўраман,
Олмос пўлат қайраб қўлга оламан,
Насиб этса қалмоқ юртга бораман,
Бу ишларнинг қасосини оламан,

Кўрмаган кунларни унга соламан,
Отангни саломат олиб келаман.
Отанг ҳозир шундай бўлиб тургандир,
Кетар вактда оша ўрлик қилгандир,
Энди шўрли пушаймон қип юргандир.
Ўз ишидан наф топмайин қолгандир.
Йиглаб сенинг ҳолинг абгор бўлганди,
Олиб келай Бойсаридай султонди.
Хатга караб бундай хафа бўласан,
Йигламагин бий отангни кўрасан,
Қайта бошдан қадимгидай бўласан,
Сен отангни кўрсанг, ўйнаб-куласан,
Кўнғиротнинг юртида даврон сурасан.

Бу сўзларни Барчинга тасалли айтиб, Алпомиш чиқиб, отаси-
нинг қошига бориб, отасига қараб, отасидан жавоб сўраб, бу
сўзни айтиб турган экан:

Ота, бир сўзим бор маълум қилайин,
Жавоб беринг қалмоқ элга борайин,
Ота, сиздан бул жавобни сўрайин,
Кашал элдан бийни олиб келайин.
Қалмоқ унга кўп зулмни килибди,
Карвонлардан бунда хабар келибди,
Билсанг, ўғлинг Кашал бормоқ бўлибди.
Билгин, ота, мендай бекнинг ишини,
Бориб кесай Қалмоқшоҳнинг бошини,
Жавоб бериб жўнат Алпомишингни.
Бизлар тирик, қалмоқ шундай қиласми,
Ўз молига ўзи етим бўлами,
Биз эсонда шундай ишни қиласми,
Бу иззага одам тоқат қиласми?!
Эшлиб қолмади, ота, тоқатим,
Кўриб хафа бўлди мендай фарзандинг,
Миниб кетай бундан Бойчибор отим,
Хор бўлибди Бойсаридай авлодинг,
Урушли кун тоша келар гайратим,
Жавоб бергин, Кашал кетар фарзандинг.
Бундан борсам, қалмоқларни кўраман,
Ёлғиз борсам, кўп қалмоқни қираман,
Бойсаридай бийни олиб келаман.
Ота, сиздан жавоб сўраб тураман,
Рухсат беринг, қалмоқ элга бораман,
Тақдиримда нима борин кўраман,
Ярашикка от кокилин ўраман,
Душманларман борсам уруш қиласман,
Бойсарини олиб элга келаман.

Келиб обод қиласын элизни,
Жавоб беріб жүнат мендай улингни.

Бу сүзни әшитиб, Бойбүри ўғлига қараб, бир сүз деди:

Күрар күзим, кулоқ солғин тилима,
Даврон суріб юргин Бойсін элинга,
Бориб келдинг, болам, қалмоқ элина,
Талаб қиласа душманлар мазгилина.
Мен қартайдым, болам, қайда борасан,
Ёлғизсан-да, бориб нима қиласан,
У юртларда, болам, қандай бұласан,
Келиб мендан жавоб сұраға тұрасан,
Мен жавоб бермайман, нега борасан.
Бораман деб, болам, шердил бўлмагин,
Йигитлик асари — ғайрат қилмагин,
Балони ўзингга сотиб олмагин,
Хафалимда бориб келдинг қалмоққа,
Қўйгин, болам, энди талаб қилмагин,
Ўртанган ўтларга жоним солмагин,
Кўрар күзим, қалмоқ элга бормагин.
Әшитгин сен, болам, айтган ноламни
Мен жүнатмайман-ку сендей боламни,
Қариганда солма турли аламни,
Жўнатмайман кўрар күзим, боламни.
Тағи, болам, қалмоқ талаб қиласан,
Ўйнаб-кулиб элда даврон сурасан,
Қалмоқ деб оғзингга, болам, оласан,
Тинчиганда бир балони қиласан.
Бойсари ҳам тақдиридан кўрар-да,
Қуни битса, ахир бир кун ўлар-да,
Ўлмаса, бир куни ўзи келар-да,
Хар ишни бандага худо қиласа-да,
Худо қилганига банда кўнар-да,
Қўйгин, болам, борма қалмоқ юртига.
Бул ишинга сира хурсанд бўлмайман,
Ўзим ўлмай, сенга жавоб бермайман,
Жавоб беріб сендан жудо бўлмайман,
Болам, зинҳор борма қалмоқ юртига.

Бу сүзни әшитиб, Алпомиши ҳам отасига қараб, бир сүз деб
турган экан:

Ота, менинг бормаганим бўлами,
Сенинг ининг қонлар йиғлаб қолами,
Бормасам шул ишга, ота, бўлами?
Оқ кировқа, олтин совут кияман,

Бор кучимни билагима жияман,
Олмос олсам, қирмизи қон қуяман,
Ганимларнинг танасини уяман,
Қарчифайман, душман бошин қияман.
Эсим олса, бўтадайин бўзлайман,
Душман кўрсам, кесиб бағрин тузлайман,
Аслим шерман, ўзим йўлбарс излайман.
Бул сўзимни, ота, оғир олмагин,
Ёлғиз-да, деб мени номард билмагин,
Қандай бўлса, мени йўлдан урмагин,
Холисилла дуода бўл, бек ота,
Мен кетсам, отажон, ваҳм қилмагин.
Қулоқ соп эшиггин айтган нидога,
Ўлим навбат етар шоҳу гадога,
Омонат топширгин қодир худога,
Хафа бўлмай, жавоб бергин, бек ота.
Мен биламан, ота, сенинг ҳолингди,
Кўп қайтариб йўлдан урма улингди,
Холисилла дуога оч қўлингди,
Яхши гапман жўнат жону дилингди,
Оғринмай, отажон, жавоб бер энди.
Жавоб сўраб мен сарфайиб тураман,
Отамсан-да, жуда ҳурмат қиласман,
Қалмоқлар ишига дикқат бўласман,
Мен бормасам, хафаликда ўласман,
Холисилла жавоб бергин, бек ота,
Дуо қил, қалмокка бориб келаман.

Бу сўзларни Алпомиш айтди. Бойбўри эшилди. — Кўзимнинг тириклигига жавоб бермайман, — деб ўрлаб ётибди. — Бойсарининг ўзингга кераклик қизини олиб келдинг, Бойсарини бошингга урасанми? — деб ўрлашиб ётди. Алпомиш қайтди, уйига келса, Барчин тинчитмаяти: — «Султон суягини хўрламас» деган гап бор, сенинг эсонлигингда отам қалмоқ юртида хор бўлиб қолами, — деб бу сўзни айтиб турибди:

Муштипарман, энди нима қилайн,
Бормасанг, жавоб бер, ўзим борайин,
Отамнинг ҳолидан хабар олайин,
Энди қолган умрим сарфлаб кўрайин,
Бу шоҳлик шавкатни нима қилайн,
Аёлман, деб қандай караб турайин,
Бел бойладим, энди ўзим борайин,
Қалмоқларга бир қабоҳат қилайн,
Турарим йўқ, энди мен ҳам жўнайин,
Бир отнинг устига ёлғиз минайин,
Эркак либос кийиб, анжом олайин,

Қалмоқнинг юртига ёлриз борайин.
Бу ерда қолмади сабри-қарорим,
Шундай бўлди бул менинг ихтиёрим,
Отамнинг йўлида қурбондир жоним,
Бормасанг, жавоб бер, давлатли хоним,
Мен қалмоқ борарман бундан, сultonим.
Бий бобомнинг мен қошига борайин,
Бобома йўликиб ўзим сўрайин,
Отамнинг кейнидан энди борайин.
Хазон чолмай боғда гуллар сўлмади,
Ҳарчанд айтдим, айтган сўзим бўлмади,
Бегижон, бўшлигинг сира қолмади.
Ўз билганинг қилиб бунда юрасан,
Ҳар ишга тортиниб, бўшлиқ қиласан,
Мен кетаман, энди ўзинг қоласан.

Бу сўзни эшитиб, Алпомишнинг дикқатлиги ошиб, ўйланиб юрди. Отасидан ҳам ҳуб жавоб сўраб кўрди. Алпомишнинг Қалдироҷ деган синглиси бор эди, унинг куёвини Бектемир бойбачча дер эди, тортувли қўнғиротнинг беги эди, Алпомиш қанжираги қўнғиротнинг беги эди, Алпомишнинг дикқатлиги ошиб, Бектемир бойбаччанинг қошига бориб, иккови маслаҳат қилиб, Бектемир бойбаччага қараб, бул сўзни айтиб турган экан:

Тинчлиги йўқ бек Алпомиш келиби,
Бектемир, маслаҳат қандай бўлиби,
Мени енганг жуда дикқат қилиби,
Отасидан бунга хабар келиби,
Бир хатни савдогар оп кеп бериби,
Шундан бери тоқат қилмай юриби,
Келган хатни у ҳам ўқиб кўриби,
Отасини қалмоқ ўсал қилиби,
Эндиғи маслаҳат қандай бўлиби?
Мен отамдан бориб жавоб сўрадим,
Неча қайта ундан рухсат тиладим.
Жавоб бермай, мазгилима келаман,
Тинчим йўқ уйимда, дилтанг бўламан,
Отамнинг иложин қандай қиласман?
Асли мен ўзим бормоқчин бўламан,
Отам жавоб бермас, қандай қиласман?
Маслаҳат килгани сенга келаман.
Безовита бўлди гул юзли дилбар,
Менда ҳеч қолмайди тоқату қарор,
Бормоқ маслаҳати қандайин бўлар?
Бир маслаҳат бергин, сенда ихтиёр.
Маслаҳат кип, яхши ўйлаб кўрайик,
Бу элда бундайин қараб қомайик,

Кандай бўлса, қалмоқ юртга борайик,
Енгангнинг отасин олиб келайик,
Шуйтиб маслаҳатни сендан сўрайик.

Иккови маслаҳат қилиб, маслаҳатни бир ерга қўйиб, Бойсарини излаб бормоқчи бўлиб: — Кандай бўлса, Бойбўри жавоб бермайди, Бойбўри билса, жавоб бермас, билиб қолса, бизни юргизгани қўймас, унга билдирамаймиз, оқшомлаб жўнаймиз, — деб маслаҳат қилди. Тағи бирга бормоқчи бўлиб қирқ йигит қўшилди. Қирқ иккиси кетмоқчи бўлиб, кечқурун овқатланиб, йўл юрмоқнинг ҳаракатини қилиб, қирқ икки сардор отини эгарлаб, эл маст ухлаган вақтда уруш-яроғини фамлаб, жўнамоқчи бўлди. Шу вақтда Бойбўри далада юриб эди, буларни кўриб қолди, олдидан чиқиб, буларга қараб, бир сўз деб турган экан:

То ўлгунча сўйлаб қолган тил бўлсин,
Узуни-қисқали тўнинг мўл бўлсин,
Бемаҳалда миниб отнинг белига,
Кирқ икки сардорим, сенга йўл бўлсин?
Менинг сўзим қулоғингга олмадинг,
Кўй деганман Кўнғирот элда турмадинг,
Отам деб сен мени ҳурмат қилмадинг,
Менинг розилигим сизлар билмадинг,
Мен сўрайман, туриб қулоқ солмадинг,
Ўзи туккан беклар, сенга йўл бўлсин?
Белинга бойлабсан заррин пўтангни,
Кечиргай худойим қилган ҳатонгни,
Хафа қилиб кетдинг мендай отангни.
От, яроқ, асбобни шайлаб оласан,
Бемаҳалда баринг отни минасан,
Қайсар сифат беклар, қайда борасан?
Сенсан менинг бунда ёлғиз фарзандим,
Қалмоқнинг юртига бўпти ғазотинг,
Болам, сенга бўлмай қолди ҳурматим,
Бойсарини излаб сенинг хизматинг.
Бойсари деб ҳамманг бундан борасан,
Сўраган сўзима жавоб берасан,
Қулоқ солмай, болам, қайда борасан?
Гина қилмай, саволимни билсанг-чи,
От жиловин тортиб қараб турсанг-чи,
Бул сўзима, қўзим, жавоб берсанг-чи,
Бемаҳал юришни, беклар, қўйсанг-чи!
Сендай беклар бу элатда тўради(р),
Сен қайтсанг, отанг рози бўлади,
Бул ишингга норози бўп туради,
Кетишингни сендан отанг сўради.
Давлатим бор, шоли-шолдам ўрадим,

Гул тарзим сарғайыб сенга қарадим,
Бемаҳалда, болам, сендан сүрадим,
Йүл бўлсин, фарзандим, қайда борасан?
Бундай бўлиб бошингдолиб кетмагин,
Бу юришда бўлмас сенинг мақсадинг,
Ҳали ҳам қайт, борма, жоним фарзандим,
Шулдир сенга кўп айтган насиҳатим.
Кумушдандир қарчиганинг чегаси,
Сенсан, болам, давлатимнинг эгаси,
Қайтгин, кўзим, борма Қалмоқ юртига.
Козининг олдида шабгир нойиби,
Йигитга панд берар отнинг майиби,
Сен бўласан бу юртимнинг сойиби,
Кўрар кўзим, борма Қалмоқ шахрига.
Қалмоқлар пойингда юрган бўлмасин,
Хийла-мақр билан ақлинг олмасин,
Душманларнинг айтган сўзи бўлмасин,
Қонлар ийғлаб мендай отанг қолмасин,
Қайтгин, болам, борма душман юртига.
Пандим олмай, беклар, бундай қиласан,
Дуо олмай, баринг кетиб борасан,
Кулоқ солмай, отга қамчи урасан,
Бул юришинг ёмон, қандай бўласан,
Хар қайсинг шердай чопиниб борасан,
Қайтгин энди, бориб нима қиласан?!

Бу сўзни ҳарчанд Бойбўри сўради, сўзига жавоб бермади.
«Бул миясини еган тентак чол, илгари қанча миллатдор бўл-
ганимиз, жавоб бергани йўқ, энди бизнинг оқшомлаб жўнагани-
мизни қаёқдан билади, тағи балодай бўлиб, йўлга чикиб тура-
ди, гапига жавоб берсанг, жиловингдан олади, тармашиб бало
бўлади». Шу сўзни ўйлаб, Бойбўрининг сўзига кулоқ солмади,
кетиб бораётган йўлидан қолмади, Бойбўрининг насиҳатини
кулогига олмади. Бойбўри ҳам қайтди. «Уларнинг кетиши ёмон
бўлди, Қалмоқ юртдан келуви гумон бўлди», — деб ўйланиб
қолди.

Алномишнинг кетиб бораётгандаги сўзи:

Бедовларга қамчи чатиб,
Оқшом юрар шабгир тортиб,
Жўнади қирқ икки сардор,
Хар қайси мисли айдахор.
Боради шундай йўл юриб,
Бедов отга қамчи уриб,
Қалмоқ юртини ахтариб.
Бул беклар баҳрини очиб
Парқинидан кўпик сочиб,

Остидаги зап маст отлар
Гох йўлларда олиб қочиб.
Қалмоққа қилди ғазотди,
Хон Бойсарининг ҳурмати,
Вакти хуш бўп қолган элда
Барчингул деган фарзанди,
Бораётир сатта беклар,
Қаерда қалмоқнинг юрти.
Қалмоқ юртга етсам, дейди,
Бойсарини кўрсам, дейди,
Ҳол-аҳволин билсам, дейди,
Ундан хабар олсам, дейди,
Қалмоқ додин берсам, дейди,
Баччагарни қирсам, дейди,
Жуда андай қилсам, дейди.
Булар ҳам шундай тўради(р),
Ҳар бир тарафга қаради.
Мундай йўлда эллардан,
Неча сувли кўллардан,
Зоф уммаган чўллардан,
Не бир кия йўллардан,
Катта, адир, беллардан,
Бир қамишзор кўллардан,
Ўтиб кетиб боради.
Шундай бўлиб йўл тортиб,
Қалмоққа яқин етди.

Булар мунда бораяпти, ҳеч бир душмандан бехабар. Энди гапни Сурхайил мастандан эшитинг. Буларнинг йўлида туриб, ҳар ёқни дурбин билан караб, кўриб, кунига хабар олиб юрасди. Кунлардан бир кун қаради, қараса, кирқ икки сардор, ҳар кайсиси мисли айдаҳор, буларни кўриб, хийлаю-макрлик килиб, чочини ёйиб, бетини юлиб, буларнинг олдидан чиқиб қолди. Шунда беклар кампирни кўриб, отнинг жиловини тортиб, отни тұхтатиб, кампирдан бир сўзни сўраб турибди:

Чўлларда йиглайсан бундай мугойиб,
Не сабабдан, момо, чочингни ёйиб,
Бу чўлларда фариб бўлиб оҳ уриб,
Юрибсанми сен бировни ахтариб?
Ўтранган ўтларга жонингни солиб,
Кўп сиқилиб йиглар, момо ингранициб,
Кўрдим аҳволингни, бўлибсан фариб.
Сен ҳам йиглаб қобогингни уясан,
Чочинг ёйиб, момо, қора киясан,
Юришингни, момо, сендан сўрайман,
Хабар бергин, кимдан ситам кўрасан?

Не сабабдан бундай абгор бўласан,
Мазгилинг қаерда, бунда юрасан?
Бизни сўрсанг, узоқ йўлдан келамиз,
Қистаб юриб йўл азобин қўрамиз,
Сени кўриб жуда ҳайрон қоламиз,
Бизлар ҳам Қўнғиротнинг беги бўламиз.
Не сабабдан, момо, буйтиб юрасан?
Сен ўзингни бундай жинни қилдингми,
Шул юришни ўзинг яхши билдингми,
Кўзимлаб айрилиб, бўзлаб қолдингми,
Не сабабдан, момо, бундай бўласан?
Бошдан ўтган кулфатингни сўрайин,
Нима аҳвол ўтди сендан, билайнин,
Чўлда юрган момо, сендан сўрайин.
Не сабабдан бул аҳволда юрасан,
Қайси элдан, қайси юртдан бўласан,
Бул юришинг Мажнундай бўп турасан,
Не сабабдан бўзлаб, йиғлаб юрасан,
Хабар бергин, кимдан ситам кўрасан.

Бу сўзни эшишиб, кампир ҳам бир сўз айтиб турган экан:

Дардманман, дардимни сенга айтайин,
Қалмоқ хони шундай қилди, қайтайин?
Хазон чалиб боғда гули сўлсин-да,
Менинг муножотим қабул бўлсин-да,
Дуо қиласай, Қалмоқшоҳи ўлсин-да,
Ул ҳам мендай сарсон бўлиб қолсин-да!
Қалмоқшоҳи лашкар тортиб келгандир,
Кабоҳат кунларни менга солгандир,
Қалмоқшоҳ зулмидан болам ўлгандир,
Қалмоқшоҳим менга азоб бергандир.
Менинг ҳам бир етти ўғлим бор эди,
Қаторда гуркираб юрган нор эди,
Ҳай қайсиси мингга баробар эди.
Армон билан етти ўғлим ўлдириди,
Душман қургур билмаганим билдириди,
Қалмоқшоҳи чўлда саргардон қилди.
Остингда юз алвон ўйнайди отинг,
Белингда ярқиллар кескир пўлатинг,
Қаерларда, болам, ўсан элатинг?
Қалмоқшоҳдан кўпdir тортган заҳматим.
Тарзим кўриб, менинг ҳолим сўрадинг,
От устидан, болам, менга қарадинг,
Нима ишда юрган талаб-муродинг?
Менинг ҳолим, болам, мунда сўрадинг,

Калмоқлардан күпdir менинг захматим.
От ўйнатиб қайси юртдан келасан,
Қай чаман булбули, кимнинг улисан,
Холим кўриб, менга раҳбар бўласан,
Сен ҳам бир-бировнинг жони-дилисан.
Айтсам сири-ҳолим, сўраб биларсан,
Келиш юрting менга маълум қиласан.
Тарзингга қарайман, кирқ икки номдор,
Юрtingда белтили яхши жойинг бор,
Қалмоқшоҳдан куйган мендай муштипар.
Қалмоқшоҳдан дод деб йиглаб юраман,
Бир мунглиқман, нима илож қиласан,
Чочим ёйиб, мен ҳам тентак бўламан,
Қалмоқлар зарбидан куийб-ёнаман,
Мен ўртаниб, йўлда йиглаб кўраман,
Сизларга суюниб, ўғлим қиласан,
Кўнглим бўлиб, мен ҳам йиглаб тураман,
Худо қилганига, шутиб кўнаман.
Етти улдан айрилиб мендай муштипар,
Қалмоқлар гуссаси ўтди, хору зор,
Фарзандим, деб мен бўлибман интизор,
Қалмоқшоҳдан оладиган ўчим бор.
Юришингдан хабар бергин, сен беклар,
Хар на дардин айтди мендай муштипар,
Қайси элдан бунда етишдинг, қайсар.

Бу сўэни эшитиб, Алпомиш ҳам момосига қараб, бир сўз деб
турган экан:

Мени билсанг Кўнгиrot элдан келаман,
Кўнгиrotнинг қўчқори ўзим бўламан,
Сардорларни ҳамроҳ қилиб келаман,
Қалмоқшоҳ устига кетиб бораман.
Қалмоқшоҳман бир дўғилиб кўраман,
Қалмоқлар куввати қанча, кўраман,
Кўнгиrot юртдан қалмок излаб келаман,
Излаганга сўраганинг бўламан,
Қалмоқшоҳдан ўчингдолиб бераман.
Момо, билгин чўлда ғариб ҳолингни,
Қалмоқлар ўлдирса сенинг улингни,
Мен оларман Қалмоқшоҳдан хунингни,
Кўролмайсан ўлган жони-дилингни.
Картайибсан, дуо қилиб тур энди,
Қалмоқларга қилган ишим кўр энди.
Бек Алпомиш дейди менинг ўзимди,

Хунини түләтәй ўлган қўзингди,
Қалмоқларман қон тўкишмоқ лозимди(р),
Қалмоқшоҳ устига кетиб бораман.
Қалмоқшоҳга борадиган ишим бор,
Менинг ҳам бир ғариб бўлган кишим бор,
Кўп жафони унга солган қалмоқлар,
Оти Бойсаридир, юртида номдор,
Шуни излаб келган мендайин қайсар,
Бул ишида жабр кўтар қалмоқлар.
От ўйнатиб Қалмоқ юртга киарман,
Қалмоқшоҳ устига тикка борарман,
Қайда бўлса, уни топиб оларман,
Кўрмаган кунларни унга соларман,
Шу кунда сени ҳам хурсанд қиларман,
Йиғламагин, шоҳни излаб борарман,
Жами қасосингни йиғиб оларман.

Бу сўзни эшитиб, кампир яна бир сўз айтиб турган экан:

Бу чўлларда меҳрибонлик қилдинг сен,
Кўнглини кўтардинг мендай муштипар,
Қайта бошдан, болам, айтар арзим бор.
Бир кеча бўлайин сенга хизматкор,
Бир кечага таом бермак ҳақим бор.
Олис йўлдан меҳнат тортиб келасан,
Бизникига бугун меҳмон бўласан,
Мен энангман, сен-ку ўғлим бўласан,
Менинг килган хизматимни кўрасан.
Ўғилларим ўлиб кетди хору зор,
Хозир ўғлим йўқдир, қирқта қизим бор,
Қизларимнинг бари бўлар хизматкор,
Ўғлимнинг ўрнини қизларим босар.
Акамдай деб бари хурсанд бўлади,
Сизларни кўрганда кўнгли тўлади,
Бариси бўй етган, хўп баркамолди(р).
Хизматидан, кўрсанг, кўнглинг тўлади,
Нима десанг, айтганингга кўнади,
Бариси ҳам ўрта бўйли болади(р),
Қизлар билан мендай энанг қолади,
Тонг отганча қўймай хизмат қиласди,
Тонг отган сўнг сенга жавоб беради.
Қалмоқлар тилини энанг билади,
Бошкаради, яхши йўлга солади,
Қалмоқларга бул бошкариб боради,
Қанча қалмоқ бўлса, сендан ўлади,
Кўрдим сени ким баробар бўлади,
Шундай қилсанг, энанг кўнгли тўлади.

Шу сўздайтиб бекнинг ақлин олади,
Хаммасига бул сўз хуш кеп қолади.
Қалмокман ваъдалаш, айёр балоди(р),
Беклар бунинг айтганига кўнади,
Шуйтиб барисининг ақлин олади.
Бул бекларни эргаштириб жўнади,
Анг ўзбаклар била кетиб боради,
Бу кампирнинг вақти хуш бўп қолади,
Ул бекларни олиб энди жўнади,
Хаммаси эргашиб кетиб боради.
Қувонгандан кампирнинг ақли шошиб,
Йўл бошлар пиёда олдига тушиб,
Эна дейди, бораётир гаплашиб.
Сўз айтиб боради, кўнглини хушлаб,
От билан баробар кампир ангишилаб,
Бораётир ҳар қайсига сўз ташлаб,
Ҳар алвон гапириб, вақтини хушлаб.
Ақлин олдим дейди, айёр боради,
Назар солиб ўнгу сўлга қаради.
Бир мунглик деб беклар писанд қилмади,
Бу кампирдан ҳеч бир ҳадик олмади,
Кўнгилида нима борин билмади.
Эна дейшиб, бирга кетиб боради,
Яркіллаган бул маконни кўради,
Уллари қилган деб кўнглига келади.
«Ўғлиниң борида кампир шой экан,
Хўп беклиқдай ўхшатган мазгил-жой экан».
Дарвозани очиб ичкари кирди,
Бул маконни кўриб табассум қилди.
«Подшо билан ўғли тараф бўлган-да,
Шоҳлардан кам эмас, буни қилган-да,
Тараф бўлиб бунинг ўғли ўлган-да,
Хозир бул жой кизларники бўлган-да».
Бир ораста мазгил-жойни кўрганда,
Шундай гап бунинг кўнглига келган-да.
Кампир шундай дарвозадан киради,
Кизларига қаттиқ довуш қилади:
— Акаларинг тирилгандай бўлади,
Акангнинг хунини тўлаб беради.
Бу сўзни эшитиб кизлар қаради,
Диловар бекларни қизлар кўради,
Кампирнинг тилини қизлар билади.
Айёрлиги юртга маълум бўлади,
Одати белгили, кампир балоди(р),
Хийла билан бу мазгилга келади.
Беклар келиб энди қўнмоққа толиб,
Чопиб келар қизлар бели буралиб.

Кампир кизга иасиҳатни беради:
«Бунинг бари сенинг аканг бўлади».
Югуриб келиб кизлар кўнглин хушлади,
Битта-битта келиб отни ушлади,
Беклар бунда энди отдан тушади,
Отни бойлаб бул кизлар эргашади.
Бораётир кизлар шундайин бошлаб,
Бекларнинг остига либосни ташлаб,
Бу бекларни мажлисхонага бошлаб.
Бул бекларни кўп парвариш қиласди,
Табассум кип кизлар таъзим беради,
Адабига вақти хуш бўп туради.
Жамоли ярқиллаб ақлин олади,
Рўмоли пириллаб хизмат қиласди,
Кўл ювдириб, дастархонни солади.
Писта-руста, қандалатни ташлади,
Кизлар хизмат қилиб, энди бул ишди,
Жуда ҳам бекларнинг бул вақти хушди(р),
Таомнинг устидан кизлар тортади
Бекларга оп келиб қовурма гўшди.
Беклар жуда яхши хизмат фаҳмлади,
Қирмизи чойнакка чойлар дамлади,
Арок-шароқларни кампир ғамлади,
Сухбатта кераклик нарса жамлади.
Қирқ киз хизматида бўлиб туради,
Қалмоқларнинг кизи сулув экан, деб
Жамолига бунда беклар қаради,
Жамоли барк уриб ақлин олади.
Хаёлига қизиқ сухбат келади,
Буларнинг кўнглига шундай келади:
«Нима десанг, бу кизлар кўнади,
Одамнинг кўнглидаги бўлади,
Кўнмаса, бу ерга нега келади,
Эркакнинг қошида нима қиласди?!»
Бу бекларнинг жуда кўнгли тўлади,
Нима кераклисин мавжуд қиласди,
Куннинг ўзи кечга тортиб боради,
Бекларнинг кўнглига шундай келади:
«Оқшом ётсак, бул бир бало қиласди,
Бу кизлар битта-битта бўлади,
Иккиси шунда ҳам етмай қолади».
Буларнинг кўнглига шундай келади,
Куннинг ўзи айни пешин бўлади,
Беклар чиқиб отдан хабар олади,
Дарвозани очиб шундай қаради,
Беклар билмас, кампир хабар беради,
Қалмоқшоҳ лашкари келиб қолади,

Карнай тортиб ўнгу сўлни олади,
Қалмоқшоҳи келди, дейди Сурхайил,
Бул меҳмон бекларга хабар беради.
Ўзи чиқиб бу лашкари кўради,
Қалмоқлар лашкари яқин келади,
Бу кампирнинг ҳақиқати билади,
Беклар энасидаи кўриб қолади.
Икки ёққа кампир хабар беради,
«Билдирмаса, бизни босиб олади,
Ангниб қопти, хўп яхшилик қилади»,
Жуда ҳам кампирдан рози бўлади.
От-асбобин шайлаб беклар минади,
Зиёд нарса мазгил-жойда туради,
Дарвозадан энди чиқиб боради,
Дарвозадан чиқиб қайсар қаради.
Яқинлади қалмоқ лашкар,
Бу сўздайтиб ўзбак беклар.
Учраса ёрнинг марди,
Кўзга дори пойи гарди,
Бизлар Кўнғиротнинг бекзоди,
Кирмаганлар номард бўлсин.
Мудом бўлса ёри қобил,
Хар маҳал ваъдадан тобил,
Майдонли кун пўлат добил,
Туймаганлар номард бўлсин.
Йигит пири ҳазрат Довуд,
Оқ кировка, олтин совут
Киймаганлар номард бўлсин.
Бу сўзни айтади Ҳакимхон,
Яқин келиб колди душман,
Қалмоқ қилиб кўп пушаймон,
Саф-саф бўлиб ҳам бу замон,
Яқинлаб борди Ҳакимхон,
Бир ажойиб бўлсин майдон.
Сизлар ҳам Кўнғиротнинг хони,
Бугун уруш, хун майдони,
Чочилар нечовнинг қони,
От кўйинг Бойсин султони.
От кўйинглар ҳар бир ёндин,
Юз қайтарманг бу майдондин,
От кўйинг душман устига.
Кулоқ сонг бекнинг тилига,
Олмосни олиб кўлига,
Қон тўкинг Чилбир чўлига.
Бу сўзни айтади шунқор,
Шердай бўлди мард йигитлар,
От қўйди, облоҳу акбар.

Хар қайсиси эрдай бўлиб,
Хар яғрини қирдай бўлиб,
Тоғдакирган шердай бўлиб,
Душман қолар ердай бўлиб,
От кўйди қалмоқ устига,
Ҳаммалари бирдай бўлиб.
Чувуллаб қалмоқ от кўйди,
Юлдуз учгандайин бўлиб,
Карвон кўчгандайин бўлиб,
Шундай аралашиб қолиб,
Чилбир чўлни тўзон олиб,
Чапараста уруш бўлиб,
Мардлар майдонда оҳ уриб,
Бир айдаҳордай ишқириб.
Одам тўлиб баланд-пастда,
Ботирга майдон ҳавас-да,
Одам десанг даста-даста,
Номардлар майдонда хаста,
От чопади аста-аста,
Урушмоққа бўлиб уста.
Килич солиб алвон-алвон,
Бандам деса қодир мавлон,
Шул сифатда бек Ҳакимхон
Қон тўкар майдон ичинда.
Гангида кўрқокнинг боши,
Оқади кўзининг ёши,
От остида душман боши,
Шулдир бекларнинг саваши.
Тоғ аскарин чалиб туман,
Бермай душманларга омон,
Шул сифатда бек Ҳакимхон,
Бош кесар майдон ичинда.
Бир-бирига қилич солди,
Не қалмоқлар овиб қолди,
Жазосини товиб қолди,
Дўстаман бўп ерга тушиб,
Тоза қумни қовиб қолди.
Фуруллаб қалмоқлар келар,
Пўлат найза, қилич солар,
Кўпайиб қолди ярадор.
Эр йигитлар жондан кечиб,
Майдонда қонларни кечиб,
Кўрқоклари писиб кочиб,
Ботирлари баҳрин очиб,
Қочганин найзаман санчиб,
Бир аломат уруш бўлди,
Чилбир чўлда кон тўкилди.



Мунда беклар уруш қилди,
Қалмоқларга хўп иш қилди,
Бул майдонда туриш қилди,
Қалмоқлардан нечов ўлди.
Ҳийла билан келиб эди,
Бу бекларга дучор бўлди,
Шул вақтда келган қалмоқ
Ўз юртига қочиб берди.
Мунда турсак ўлармиз, деб,
Бир балога қолармиз, деб,
Жазомизни кўярармиз, деб,
Қочсак, омон қолармиз, деб.
Қалмоқларнинг ақлин олди,
Бир хил ерда ўлиқ қолди,
Бир неча ярадор бўлди,
Бир нечалар қочиб кўрди.
Қалмоқларни тўплаб олди,
Етганига найза солди,
Қалмоқка сиёsat қилди,
Кувиб ўйлга олиб борди.
Юртга қалмоқ қочиб кетди,
Энди беклар мундан қайтди,
Кун ҳадди намозгар бўлти.
Бул мағилга борайик, деб,
Бугун оқшом турайик, деб,
Қандай бўлса кун кеч бўлди,
Фароғатда бўлайик, деб,
Қалмоқ шоҳ устига эртан
Чошқа вақтда борайик, деб,
Бошқаватдан кўрайик, деб,
Қалмоқ юртин қираийик, деб,
Подшосин ўлдирайик, деб,
Қаттиқ кунни солайик, деб,
Қайтиб келаётир беклар
Бугун бунда бўлайик, деб,
Энам билан турайик, деб,
Бугун сухбат қурайик, деб,
Хизматини кўрайик, деб.

Бу сўзларни айтиб, урушдан қайтиб, Сурхайил маstonнинг
кошига келиб, отларни бойлаб ташлаб, қизлар билан беклар
ўтириш бошлаб, бекларнинг вақтини хушлаб: «Бугун бунда ту-
рармиз, эртан тонг отган сўнг Қалмоқшоҳнинг устига борар-
миз», — деб ўтириш-сухбат бошлаб, олтин косаларни қизлар
кўлига ушлаб, алиёр тортиб, бекларга коса узатиб, қизларнинг
айтаётган сўзи:

Кўнгирот элдан келган хоним,
Бир фасл бўлди майдонинг,
Сизга курбон менинг жоним,
Бул келган азиз меҳмоним,
Хеч бўлмасин пушаймонинг,
Яксон бўлғай-да душманинг,
Зарра қолмасин армонинг,
Шу бугун коса давронинг,
Олинг, аллаёр-аллаёр,
Хоним, аллаёр-аллаёр.
Кийганим гулгун кирмизи,
Бизлар бу кампирнинг кизи,
Кўнгирот элнинг добилбози,
Бизлар қалмоқ сарвинози,
Бекка ёққай қизнинг сўзи,
Ақлингдолган жоду кўзи.
Бердим коса шароб солиб,
Маҳтал бўлсан кўлим толиб,
Кизлар бир-биридан ғолиб,
Уст-устига коса бериб,
Ўтиришдан кўнгил тўлиб,
Олинг, аллаёр-аллаёр.
Хали ёш, бўлар камоли,
Бошида ловдан рўмоли,
Ойдай яркиллар жамоли,
Олиб ичар Кўнгирот хони,
Кизларман бўлиб даврони.
Хизмат қиласан санам дилбар,
Бирдай ўтирибди беклар,
Машрика кўйлак, енги тор,
Хуснин кўрса, кетар губор,
Жамоли пари, хурча бор,
Қаддингдан айланай, беклар,
Олинг, аллаёр-аллаёр.
Тиши гавҳар дурдай бўлиб,
Беҳиштдаги хурдай бўлиб,
Бари шундай коса берар,
Киркин қизлар бирдай бўлиб,
Тўрда ўтириб ичаётир,
Эр йигитлар шердай бўлиб,
Берганин қайтармай олиб,
Бул бекларнинг кўнглин хушлаб,
Ўйин қиласан зулфак ташлаб,
Нечовлари коса берар,
Ноз билан белини ушлаб.
Бу бекларнинг йўли бўлар,
Жуда бекни иззат қиласан,

Беҳуш дорилардан солиб,
Узмай қуйиб берар қизлар,
Қўринг энди сарвинаозлар,
Бу қизлардан кўнгли тўлар,
Беклар кўнгли шодмон бўлар.
Бир-бирига йўқдир арзи,
Ёқади қизларнинг сўзи,
Аллаёр торттан овози.
Бул хийладан хон бехабар,
Узмай коса берар қизлар,
Бошида кампирি айёр,
Бадани қизиган беклар,
Бир нечаси маст бўп ётар,
Бир хили қайтартмай ютар,
Оқшом бўлди мисли сахар,
Узмай коса берар қизлар,
Маст бўп қолди кирқ бир сардор.
Унча-мунча кор қилмайди,
Қизиган Ҳакимдай шункор,
Кирк қиз сузган шаробини
Кўтин узмай бунга берар,
Ёлғиз ичаётир қайсар.
Билмайди Ҳаким бечора,
Қилсан деб айёр масхара,
Ичаётир шундай тўра.
Хийла билан ақлин олар,
Қанча бўлса ортмай қолар,
Билмайди шундайин номдор,
Сулаб ётири кирқ бир сардор,
Неча хум арокни ичиб,
Энди маст бўп қолди қайсар.

Бу сухбатни охир қилар,
Косаларни олиб қизлар,
Бул беклар қолди бехабар,
Иш кўрсатиб бундай айёр,
Маст бўлиб кирқ икки номдор,
Қалмоқшоғга борди хабар,
Қўрингиз кампир жодугар,
Бу кулфатга қолди беклар.
Кераклисин йигиб олиб,
Устига ўт қўйди айёр,
Бул оловнинг ёруғиман,
Қалмоқшоҳман келди лашкар,
Келиб кўрди-ку қалмоқлар,
Куйиб кетган кирқ бир номдор.

Кампир ишни ўсал қипти,
Кирк бир одам ўлибди.
Алпомишига асар қилмай,
Қолди бу оловда қуймай.
Қалмоқ подшо күрди келиб,
Кирк бири куйиб кул бўлиб,
Бек Алпомиш тирик қолиб,
Қалмоқ бари қилич солиб.
Алпомиш ётар бунда мас,
Ураётир, қилич, олмос,
Ҳеч бир исфиҳон кор қилмас,
Қилич қайтар, иложи бўлмас.
Алпомиш масти беихтиёр,
Ўққа тутади қалмоқлар,
Ўқи ботмай бундан қайтар,
Бари саргардон қалмоқлар,
Сурхайилдан гина қилар:
— Сенинг ўзинг ёмон айёр.
Нега, бадбаҳт, олов қўйдинг,
Кирк бир одамин куйдирдинг?
Қурғур айёр, янги қўрдинг,
Жуда бежо ишни қилдинг,
Тиги олмос кор айламас,
Ўлмасини энди билдинг.
Маст бўп беш кун, ўн кун ётар,
Бир кун масти тарқаб кетар,
Бизнинг юртни яксон этар.
Бул одами ўлмаганда,
Саҳал ишман ўзи кетар,
Йиғлай бергин энди айёр,
Вайрон бўлди қалмоқ шаҳар,
Бизнинг юртда жонзод қўймай,
Хаммани ўлдириб кетар.
Бу ишдан сен ҳам бехабар,
Хийла қилмай, ўлгин, айёр,
Вайрон бўлар қалмоқ шаҳар,
Бир ўй топгин, курғур айёр.

Қалмоқшоҳ Сурхайилга туриб айтди: — Алпомишини масти
қилмадинг, бир балони масти қилиб бердинг, бу кирк бир одами-
нинг куйгани касрига шаҳарда жонзод қолмай, тиги дамдан
ўтказиб кетади.

Алпомиш эндан туғилган вактда Шоҳимардан пири борган
эди, Шоҳимардан пири этагига солган эди, отини Ҳакимбек
кўйиб, ўнг эйнига беш панжа урган эди, Шоҳимардан пирнинг
тарбият қилганидан ўтга солса, куймас эди, қилич солса, ўтмас
эди, милтиқ отган билан ўқи ботмас эди, ул сабабни қалмоқлар

билмасдан, қандай балога дучор бўлиб қолдик, деб аланглашиб
қолган эди.

Сурхайил мастан туриб айтди: — Сен подшосан, нима қил-
санг, хукминг етади. Муна Мурод тепанинг қаватидан чуқур —
зиндон қаздирсанг, олиб бориб зиндонга ташласанг, заҳ ерда беш
кун, ўн кун, бир ой, бир йил ётар, чириб ўлиб кетар. Бу сўзи
Қалмоқ юртининг ҳаммасига маъқул тушди. Энди чувуллаб бу
сўзларни айтиб, зиндон қазияпти:

Хазон бўлмай, боғда гуллар сўлмасин,
Масти тарқаб, яна туриб қолмасин,
Эрта бўнглар, зиндон кечга қолмасин.
Ҳар на деб сўйласам, буни билинглар,
Бир соат дам олмай хизмат қилинглар,
Кирқ кулоч зиндонни қазиб бўлинглар,
Катта-кичик — баринг урнаб кўринглар.
Бул айтган сўзимни ҳазил билмагин,
Турпоқ торт, қаттаман деб қараб турмагин,
Ҳеч қайсинг ҳам сипойилик қилмагин,
Катта, кичик демай, жовлик урнагин,
Масти тарқаб, баринг ўлиб қолмагин,
Хаёлингни ҳар тарафга бўлмагин,
Эътиқодман қаэгин, тақал қилмагин,
Бекорига сира қараб турмагин.
Қалмоқшоҳнинг деганини билади,
Эътиқодман бари хизмат қиласди,
Сипойилар турпоқ тортиб туради,
Бари аланглаб жуда хизмат қиласди,
Хаёлида кеп қолгандай бўлади,
Одам узмай хабар олиб туради,
Ҳакимбекни зиндон қилмоқ бўлади,
Кирқ кулоч зиндонни қазиб кўради,
Чиккан турпоқ тепадай бўп қолади.
Қалмоқлар зиндонни тамом қиласди,
Байдоқ-байдоқ қанча қалмоқ келади,
Қалмоқшоҳ аскари билан туради,
Алпомиш қошига энди боради.
Қўзғамоққа ҳеч бир ҳолат келмади,
Қўп зўр уриб кўрди мунда қалмоқлар,
Қуввати келмади ёзган ахмоқлар,
Қандай бўлар, дейди энди қалмоқлар,
Шундай бўп қалмоқлар кўнглин бўлади,
Зўр урганман ҳеч қуввати келмади,
Қанча бўлса, хонни қўзғаб бўлмади.
Бешта-ўнта отдан олиб келади,
Хайвонзодни оп кеп қўшиб туради.
Тортар деб қалмоқлар буни ўйлади,

Шатак қилиб шундай отга бойлади,
Хайвонларга аччиқ қамчи тайлади.
Зўр уриб кўрди-ку бу отлар,
Тортмоққа бўлмади бунда қувватлар,
Тортиб қўзғатолмай бул хайвонзодлар,
Ўйланишиб колди қанча қалмоқлар.
Барча қалмоқ тараффудуни қилади,
Ҳарчанд бул отларда ҳолат бўлмади.
Қанча қалмоқ бул хавфсиниб туради:
«Масти кетса, одам қўймай қиради,
Қилган ишин қичов қилиб қўради,
Эртароқ бўлса, деб гайрат қилади,
Хозир ўлик, маст бўп ётган балоди(р),
Туриб келса, бундан ким қолади».

Минган оти Бойчиборни олиб кеп,
Бойчиборнинг қўйругига бойлади,
Атрофида қалмоқ ёри айлади.
Қийғир деган қуш ўлтураси қиёда,
Хайвонзоднинг эси бордир Бойчибор,
Ақли бордир одамзоддан зиёда.
Эгасининг ахволини қўради,
Кишинаганда кўз ёши сел бўлади,
Худонинг иродаси шундай бўлади,
Ёри бериб қалмоқ қамчи уради,
Ул хайвонзод энди тортиб жўнади,
Зиндан яқин, шундай бориб қолади.
Банда кўнар тангри қилган ишига,
Бориб турди бул зинданнинг бошига.
Қўриб ҳайвон безовита бўлади,
Қўп қалмоқ ўртага олиб туради.
Қилич оп зинданнинг четида турди,
Зиндандан ирги деб Чиборни урди.
Букилиб жонивор ўзини отди,
Жуппай бўлиб энди зиндандан ўтди,
Отнинг қўйругига қилич солибди,
Қилич тортиб, шундайин кесиб ўтди,
Қўзғалиб Алномиш зинданга кетди,
Мастликда зинданнинг остига етди.
Ҳали ўлик, ўзин билмай ётибди,
Ихтиёри бул ўзидан кетибди,
Алномишни қалмоқлар зиндан қилибди.
Банди килиб энди Чиборни олди,
«Бул Бойчибор бизга не ишлар қилди»,
Бўлак от подшолик хизматкор минди,
Банди килиб Қалмоқшоҳга еткарди.

Қалмоқ бориб Бойчиборни кўради,
Ўртага олиб шундай банди қиласди,
Тойчихон кўлига банди бўлади.
Зиндан бўлган бекни ҳайвон билади,
Вахм босиб, бўйнин ерга солади,
Ўту ем берганман сира емади,
Бойчиборга қалмоқ зулм қиласди.
Тўқсон ботмон чўян гулни келтириб,
Бойчиборнинг бу бўйнига солади,
Олтмиш ботмон энди темирни йифиб,
Оёғига бул парчинлаб уради.
Ётолмай, туролмай ҳайвон қолади,
Энди қалмоқ кўзгалмасдай қиласди.
Шул азобни энди Чибор кўради,
Ҳайвонзод-да, нима қилса кўнади,
Кўнмаганда нима илож қиласди,
Шул ахволда банди бўлиб қолади,
Бойчиборни шундай бандга олади,
Банди бўлиб бу мастиликда қолади,
Коровуллар хабар олиб туради.
Қалмоқларнинг энди иши тинади,
Неча кунлар шул ахволда бўлади.
Бир кунлари бекнинг масти тарқади,
Шундай кўзин очиб энди қаради,
Ул ўзини бу зинданда кўради.
«Такдирим шул», — деди, — ҳаққа жилади,
Ўтган ишни сира билмай колади.

Ўз ахволига бу сўзларни айтиб, зинданда йиғлаб, бул ўтган
ишларга пушаймон қилиб, ўзини зинданда кўриб, Алпомиш бу
сўзларни айтиб турибди:

Хақ таоло мени қилди саргардон,
Кўзима кўринмас ер билан осмон,
Мазгилим бўлибди қоронғи зиндан,
Неча вакт мен эдим Кўнғиротда султон,
Сув билан оламни яратган раҳмон,
Энди мендан ўтиб кетди бу даврон.
Чикмоғим гумондир менинг зиндандан,
Фарид бўлиб тор зинданда ўлдим ман.
Хеч ким келиб мендан хабар олмаса,
Ўли-тирим¹ қариндошлар билмаса,
Ер остида қолганимни кўрмаса,
Кўнғирот элдан бирор йўқлаб келмаса,

¹ Ўлик-тириклигим.

Қалайсан деб мендан хабар олмаса,
Ахволимни ота-энам күрмаса,
Үли-тири эканимни билмаса,
Учиб чиқай десам, қанот бўлмаса,
Чиқмоққа тангирим йўлни бермаса,
Фарип ўлдим, ҳеч ким мени билмаса.
Армон билан қалмоққа бўлдим гирифтор,
Бу қалмоқлар мени қилди хору зор,
Маст бўлибман, мен зиндонга сазовор,
Ахволимдан мамлакатим бехабар.
Азоб кўриб ширин жоним бу танда,
Калмагўй бандаман, бўлдим шарманда,
Армон билан ўлиб кетдим зиндонда,
Билмай сұхбат қурдим шундай маконда.
Хаддан ошиб мен менманлик қилибман,
Бир бадбаҳт қашмирга дучор бўлибман,
Ҳар на деса айтганига кўнибман,
Униман бирга мазгилига келибман,
Айёрлигин билмай ангда қолибман,
Ароқ-шароқ ичиб маст бўп қолибман.
Бу курғурлар билганини қилгандир,
Беҳуш дорилардан менга бергандир,
Азаматлар қалмоқ қўлида ўлгандир,
Менга ҳам кўп ташвишни қилгандир,
Ўлдиролмай бари ҳайрон бўлгандир,
Ахир оп кеп бу зиндонга солгандир,
Мазгилим қоронри зиндон бўлгандир,
Ахволимни қалмок забун қилгандир,
Шундай қип ўлдирди мендай сultonди.
Ҳеч кимга келмайди менинг қувватим,
Беэга бўлгандир тожу давлатим,
Вайрон бўлди менинг ўсган элатим,
Балки илон, чаён бўлиб улфатим,
Захар-закум бўлди еган овқатим,
Шундай бўлди менинг тақдир-қисматим,
Зиёда бўп ошиб кетди меҳнатим,
Сўйлашмоққа йўқдир менинг улфатим,
Ахир шундай қилди қурган сұхбатим,
Бу зиндонда чириб кетар жасадим.
Мен ётибман ўз холимдан бехабар,
Хору зор бўлганман, зиндонда ночор,
Кариндошлар бу йўлима интизор,
Бул ишни бошқарган ҳақ парвардигор.

Бек Алпомиш тор зиндонда колади,
Ҳар замон зиндончи хабар олади,

Ишқилиб қалмоқлар хурсанд бўлади,
Бу Сурхайил ишни ўрин қиласди,
Энди қалмоқ бари тиниб қолади,
Ўлганини ҳамма эллар билади.
Ўлди дейди, юртга овоза бўлади.
Эмиш-эмис Кўнғирот элга боради,
Хар ерда одамлар гап қип юради.
Рости-ўтиригин ҳеч ким билмади,
Кўрган одам йўқдир, сўраб бўлмади.
Бир маломат овозаси боради,
Эшитганлар унда ҳайрон қолади,
Билмаймиз бул ишлар қандай бўлади.
Йўқ бўлмай, овоза бўлиб юради,
Бир-биридан қариндошлар сўради,
Сўраганман анигини билмади.
Бойбўрининг қулоғига тегади,
Хар кимдан югуриб-елиб сўради,
Билмаймиз деб элат жавоб беради,
Дарҳайрон бўп энди гангид қолади,
Бойбичага сирин айтиб кўради.
Элу ҳалқقا шул овоза бўлади,
Уйқуси очилиб оқшом жилади,
Барчинойни билмасин деб туради,
Билмайман, бул ишлар қандай бўлади,
Хар оқшом иккови ўйлаб кўради,
Буларнинг ўлганини ким билади,
Ҳеч ким билмас, элга овоза бўлади.
Шул гап элатнинг оғзида юрибди,
Бу сўзни бир куни Барчин билибди,
Қалдирғочга сирин айтиб турибди,
Хотинлардан Барчин сўраб кўрибди,
Сўраса, ўлгани аниқ бўлибди.

Ўлди, деб овозасини эшишиб, буларнинг қандайини билмай,
Ҳеч кимдан сўраб анигини билолмай, Барчин ҳеч кимга билдири-
май, сир бермаган киши бўлиб, ҳаммаси ҳам ўз ҳолига йиғлаб, бу
сўзларни айтиб турибди:

Айрилиқ ўтига бағримни доғлаб,
Боролмайман мен тўрамни сўроғлаб,
Фироқида қолдим бунда қон йиғлаб.
Ўлди, деб овоза бунда келганди(р),
Отамни излаб Кашал элга борганди,
Анигин билмадим кетган султонди.
Одамлар гапириб элда юрганди,
Маломат гап элда овоза бўлганди,
Авбаҳолам менинг тўрам ўлганди(р),

Элу халққа шүйтіб гап бўп юрганди(р).
Билмайман ахволи қандай бўлганди(р).
Мен йиглайман, тўрам дейман муғойиб,
Хозирги кетиши тириклай фойиб,
Кечакундуз мен йиглайман сарғайиб,
Бунинг молу мулки ҳозир бесойиб;
Ота-энаси колди бунда оҳ уриб,
Боролмаса ҳеч ким бекни ахтариб,
Тўрам ўлиб унда қолгандир фариб,
Кимга айтиб йиглай дардимни ёриб,
Бек Алпомиш ўлди, ҳаммаси фариб.
Узок юрт-да, етолмаса йўл юриб,
Ким бориб келади анигин билиб,
Парво қилмай бир неча ўйнаб-кулиб,
Бизлар қолдик ғам лойига булғаниб.
Бир нечалар шоду хуррам бўлгандир,
Бир нечага навбат яқин келгандир,
Ўлганин анигин қуллар билгандир,
Ул сабабдан қўтарилиб юргандир,
Кашал бориб шундай полвон ўлгандир,
Мулки қўлдан кетайин деб қолгандир.

Анигини билмай, бу сўзларни айтиб ўтди, неча ой, неча вақт
орадан ўтиб кетди. Булар Кашал бориб, ўлиб кетган деб юртга
неча мартадан овоза бўлиб кетди. Энди ўлганини аниқ билиб,
умидини узиб, кўнглини бузиб, қора кийиб, буларнинг қарин-
дошлари аза тутиб қолди. Аза билан бир йил ўтди, бир йилдан
кейин йил оши бериб, азасини очди.

Бойбўрининг Бодом чўридан бўлган Ултонтоз деган ўғли бор
эди. Алпомиш бор вақтида чўридан бўлган бола деб ҳеч ким
писанд қилиб гапирмас эди. Хизматкор қуллар қаторинда юрар
эди. Бир озғинтой йилқи боққанига катталик қилиб ҳам турар
эди. Карамаса ҳам, Бойбўрининг ўғли-да, деб хизматкорлар
хурмат килар эди.

Кашал бориб Алпомиш ўлиб кетди. Эндиги навбат Ултон-
тозга етди. Алпомишнинг бор вақтидаги амалдорни Ултонтоз
хизматга солибди, Коражонни кўриб: «Бундай бесўнақай, катта
одам элда юрса, одамларни оёқ ости қилиб босиб кетади», —
деб Коражонни қишлоқдан чиқариб, элга қўштирмай, Олатов
деган тоғдан жой бериб қўйди. Коражон ҳам тақдирига тан-
бериб, Олатоғда юра берди. Бектемир бойбачча Алпомиш би-
лан, қирқ йигит билан бирга бориб, у юртда ўлиб кетди, энди
хамма Ултонтозга тобе бўлибди. Қалдирғочойим ҳам Ултонтоз-
нинг қўлида қолиб кетди. Қалдирғочойимни Ултонтоз Бобир
кўлига буюриб, тия боктириб қўя берди. «Энди Барчин ҳам
факирнинг тани-да, икки бошдан бизга тегади», — деб юриб-
ди.

Алпомиш банди кетганига неча вақт ўтган, ҳамманинг ҳам кўнглидан чиқиб кетган. Бор деган билан ҳам хеч ким ишонмайди. Алпомиш банди кетган вақтда Барчиннинг бўйида ҳомила гумон қолган, бул пайдо бўлган, Алпомишнинг жойини тутар, деб отини Ёдгор қўйди.

Шундай замон бўлиб неча вақт ўтди. Барчин ўғлини олдига олиб ўтириб, бу сўзларни айтиб, ўзига тасалли бериб ўтирибди:

Ўлмаса Ёдигор болам эр етар,
Омон-эсон болам ўлмай эр етса,
Бойбўрининг юрагидан чер кетар,
Отасин ўрнини Ёдгоржон тутар.
Ота юртин Ёдгор қўзим тебратар,
Фаним бўлган душманларни бўзлатар,
Отаси эр эди, эрдай бўп ўтар,
Отасининг юртин шундай бўп тутар.
Шунда кетар менинг кўнглимдан ғубор,
Хозирги каттамиз чўриман қуллар,
Хозир бенавбатга тегди ихтиёр,
Не гўзаллар мамлакатда хору зор,
Кулдан жабр кўрди элда катталар,
Давлат шунда, ҳар не деса ихтиёр,
Не қилмоқقا бу бадбахтнинг ҳадди бор,
Кул ҳам бўлса қурғур ёмон муҳрдор,
Ҳеч бир одам бўлолмайди баробар.
Ойимларни килиб қўйди хизматкор,
Бобир кўлда ой Қалдироҷ муштипар,
Тuya бокиб юргандир-да хору зор.
Эсимга олсам, кўзда ёшим сел бўлар,
Фарив бўлиб қолди шундайин ноchor,
Хали ёшлик килар сафир Ёдигор.
Ёдгор болам камолига киради,
Душман қулни кўрса додин беради,
Энасининг кўнглидагин билади,
Фаним бўлган душман бунда ўлади.
Барчин шундай бўлиб кўнглин кўтариб,
Ўз кўнглига хўп тасалли беради,
Худо қилган ишга банда кўнади,
Гоҳ йиғлайди, гоҳи ойим қулади.

Ёдгор ҳам йўл юргандай бўп қолади,
Бобир кўлдан ой Қалдироҷ келади,
Ёдигорни келиб энди кўради.
Неча марта Ёдигордан айланиси:
— Фарив бўп эзилди менинг юрагим,

Акамнинг ўрнига қолган, чирорим,
Бу сўздайтиб ой Калдирғоч туради,
Ёдигорни бағрига босиб сужди,
Ой Калдирғоч анча хурсанд бўлади,
Калдирғочой туюга олиб жўнади.
Гоҳ кўтариб, гоҳи чўлда юргизиб,
Бобир кўлга қараб кетиб боради,
Худо дейди, яратганга жилади,
Талабини бир облодан тилади,
Бек Алпомиш келгандай бўп қолади,
Ёдигорни бул тасалли қилади,
Бобир кўлда тую бокиб юради,
Ёдигор иккови бирга бўлади.
Хар замонда гапиртириб кўради,
Тили янги чиқсан, Ёдгор болади(р),
Сўйлатиб кўрганда хурсанд бўлади.

Шуйтиб булар бунда юра берди. Неча вакт, неча замон орада ўтди. Алпомиш зинданда ётиби. Қараса, зинданнинг бошида бир фоз қанотини ёзиб айланиб туриби. Фозни кўриб, Алпомиш бу сўзни айтиб туриби:

Э, жонивор, Кўнғирот элдан келдингми,
Хумоюндай менга соя солдингми,
Тор зинданда мендан хабар олдингми,
Қариндошдан элчи бўлиб келдингми?
Зинданда гангиган бу бекнинг боши,
Оҳ тортсам тўкилар қўзимнинг ёши,
Илоҳим қурисин подшолар иши,
Кажга айланган шум фалакнинг гардиши,
Зинданни айналган фойибнинг қуши,
Сўргимни билмас менинг хеч киши.
Фариб бўлиб қолдим бунда зинданда,
Азоб кўтарар ширин жоним бу танда,
Илгари юриб эдим қанча давронда.
Мендай мардни бу зинданда кўрасан,
Зинданни айланиб парвоз қиласан,
Мен билмасам қайси элдан келасан,
Нега сен айландинг, ўзинг биласан.
Мендан ўтиб кетди ул неча даврон,
Мен киларман ўтган ишга пушаймон.
Пушаймон қилганман хеч наф қилмайман,
Қутулмадим Юсуф каби зиндандан.
Зинданни айланиб парвоз қиласан,
Софмисан сен ё, шикаста балосан.
Неча сўзни шункор фоздан сўради,
Сўз айтмакка фознинг тили бўлмади.

Давлатли хон энди шундай қаради,
Ёлғиз ғозни бул яқинда күради,
Айланаб зинданга яқын келади.
Муни күриб Ҳаким күнглиң хушлади,
Үзин келиб ғоз зинданга ташлади.

Шунда ғозни ушлаб күрди. Ғознинг бир оёғи синган, бир қаноти майиб бўлган, ўқ тегиб, ҳолати кетиб, шу ерга йиқилган. Ҳакимбек туриб айтди: «Ўз элимда, Бобир кўлинда юрган вактларимда шу ғоз менга йўлиқса, бутун йўлиқар эди. Ҳозир зинданда ярим одамман-да, бу ғоз менга ярим йўлиқди».

Неча кунлар ғоз билан суҳбат қуриб ётди, ғознинг яралари битди. Парвоз қилиб, кўтарилиб учадиган бўлди. Ҳакимбек: — Элу ҳалқимга менинг ўлик-тирик хабаримни сен етказсанг, — деб хат қилиб, ғоз қанотининг шопарига муҳтасар қилиб, ғозга қараб, бир сўзни тайинлаб турган экан:

Белимга бойлаган заррин пўтам бор,
Худойим кечиргай қилган хатом бор,
Қўнғирот элда Бойбўридай отам бор,
Албатта отама арзамни еткар.
Мен йиғлайман, юрагимда алам бор,
Вайрон бўлган элда кулбаҳонам бор,
Қўнғирот элда оқ сут берган энам бор,
Албатта энама арзамни еткар.
Мен эдим неча вақт элда добулбоз,
Тул бўп қолди Барчинойдай сарвиноз,
Арзамни ёрима етказ, ёлғиз ғоз.
Ох урганда кўздан оқар селоб ёш,
Золим билан ҳаргиз бўлманглар йўлдош,
Бир синглим бор, менинг билан эмиқдош,
Бобир кўлда ҳала дейди, йиғлайди,
Синглимга арзамни еткар, ёлғиз ғоз.
Сенга айтган неча алвон тилим бор,
Хафа фалак бошга соглан зулм бор,
Қайда борсам бир бошимга ўлим бор,
Хазон бўлиб, тар очилган гулим бор,
Пайдо бўлган сафир, Ёдгор улим бор,
Албатта ўғлимга арзамни еткар.
Фам билан сарғайди гулдайин дийдор,
Бир нечалар ўз ҳолидан бехабар,
Олатоғда алп Қоражон дўстим бор,
Албатта дўстимга арзамни еткар.
Қайтайин эзилди бағрим чегаси,
Кўтаролмай синди бошим жигаси,
Авбаҳолам Ултон юртнинг эгаси,
Албатта инимга арзамни еткар.

Кулоқ сол, жонивор, айтган нолишима,
Хафа фалак заҳар қўшган ошима,
Кўнгирот элда қовму қариндошима,
Арзами еткаргин денгу душима.
Бу сўзларни айтар мендайин шункор,
Эсиз умрим бу зинданда хору зор,
Кундуз ётиб, оқшом учгин, жонивор,
Саломат арзамни Бойсинга еткар.
Яна йўлда сени лочин кўрмасин,
Лочин кўриб боз чангига олмасин,
Юришингни олғир қушлар кўрмасин,
Оқшом юргин, сени лочин билмасин,
Бекнинг арза хати зое бўлмасин,
Эҳтиёт бўл, туйғун қушлар кўрмасин,
Хизмат қил, арзамни Бойсинга еткар.
Бу сўзларни фозга тайин қиласди,
Бекнинг сўзин бу ёлғиз фоз билади,
Бу жонивор туриб парвоз қиласди,
Алпомишнинг арзачиси жўнади.
Бек Алпомиш қолди бунда зинданда,
Бу ёлғиз фоз кўтарилид осмонга.
Тор зинданда қолиб дуо қиласди,
Алпомиш ҳурмати шундай бўлади,
Бекнинг арзасини олиб боради,
Кўнгирот юртин кўзлаб учиб жўнади,
Кундуз ётса, оқшомига йўл тортди,
Оқшом ётса, кундуз қичади кетди,
Неча қорли тоғлардан ўтди,
Ўн тўрт кечакундуз бунда фоз учиб,
Шакаман тогига яқинлаб етди.
Қичов қилиб фоз қаноти толибди,
Қараб тоғда ўнгу сўлни кўрибди,
Бу ёлғиз фоз эҳтиётин қилибди,
Шакаман тогига чарчаб қўнибди,
Энди қўниб, бу ғанқиллаб турибди.

Бу фозни бир кампирнинг ўғли отган эди, йиқилмай ярадор

бўлиб кетган эди, йиқилмай кетганига алам қилиб, неча йилдан бери ўласи бўлиб ётган эди. Бу торни Шакаман тори дер эди.

Одамининг ҳаммаси егани қушнинг гўшти эди. Мерганчиликни

кўп орият билар эди. Хеч қайсисининг отгани хато кетмас эди,

хеч бир қушга омон бермас эди. Мерганликка шундай қўшиш

қилган халқ эди. Бир шу фозгина кампирнинг ўғлидан йиқилмай

кетган эди. Алам қилганидан касал бўлиб ётган эди. Фознинг

ғанқиллаган довуши кампирнинг ўғлининг қулогига бориб, дар-

ди бўшалиб, бошини кўтариб, энасига қараб, бир сўз деб турган

экан:

Бу ўлкадан ўтмагай-да нишоним,
Кўп бўлар кўнглимда ҳам пушаймоним,
Шакаман тогига келди душманим,
Эна, ўқлаб бергин ўку ёйимни.
Шакаман тогига борайин якка,
Оқсоқ рознинг гўши дори чичқокка.
Жон боринда бир ҳаракат қиласайн,
Шакаман тогига ёлғиз борайин,
Ёлғиз розни мен ҳам уриб келайин,
Эна, ўқлаб бергин ўку ёйимни.
Бу душмандан кўп азобни кўраман,
Ҳаялласам, мен билмай қоламан,
Фоздан қуруқ қолсам, тайин ўламан,
Энди борсам, буни отиб келаман.
Ҳаяллама, тоққа ёлғиз борайин,
Ёлғиз розни қўлга берсин худойим,
Мен ҳам бориб нобуд қилиб келайин,
Эна, ўқлаб бергин ўку ёйимни.
Хафа қилма, эна, мендай улингди,
Бу ёлғиз роз сўлдирганди гулимди,
Ҳаяллама, жоним эна, тур энди,
Эна, олиб келгин ўку ёйимди.
Ҳаялласанг, роз парвоз килмасин,
Бу душмандан ўғлинг қуруқ қолмасин,
Бу ғам билан мендай ўғлинг ўлмасин,
Тақал қилма, бу роз жўнаб қолмасин,
Борай писиб ўсал-шумни билмасин,
Қандай бўлса боришими кўрмасин,
Энди бу роз сира омон қолмасин,
Эрта кунин кечга тортиб юрмасин,
Эна, ўқлаб келгин ўку ёйимни.

Бу сўэни ўғлидан эшитиб, кампир ҳам бир сўз айтиб турган
экан:

Подшоларнинг қатнаб юрар элчиси,
Элчиларнинг бўлар экан тилчиси,
Бу ёлғиз роз Алномиш арзачиси,
Кўйгин, болам, арзачига ўлим йўқ,
То ўлганча тирик қулга тиним йўқ.
Банди бўлган бекни ҳурмат қиласди,
Шундай бекни бул роз ҳурмат қиласди,
Бобир қўлга хат кўтариб боради.
Фалак уриб сенинг гулинг сўлмасин,
Бекнинг арзачиси бунда ўлмасин,
Бекнинг арза хати зое бўлмасин,
Кўйгин, болам, арзачини ўлдирма.

Жоним қўзим, билмаганим билдирма,
Дўст йиглатиб, душманимни кулдирма,
Қалдирғочга хат кўтариб боради,
Қандай бўлса ёлғиз фозни ўлдирма.
Мусулмонсан, бундай ишни қилмагин,
Бекнинг элчисига душман бўлмагин,
Хат кўтарган фозни, болам, урмагин,
Бекорига билмай аҳмоқ бўлмагин.
Учар күш парвоз қип бундан борганди,
Тор зиндонга бориб бекни кўрганди,
Кариндошин ул арзага соганди,
Неча сўз арзага тайин қилганди,
Қанотлари толиб бунда қўнганди(р),
Буни отиб, ишинг қандай бўлганди,
Бу сўздайтиб ўғлин ўйлдан урганди(р),
Неча сўз тусмолдан айтиб берганди(р).
Кўп яшагин, жоним болам, ўлмагин,
Бу рэйингдан қайтгин, нобуд қилмагин,
Арзачини, болам, отиб келмагин,
Бу ишингни, қўзим, яхши билмагин,
Фоз гўшига, болам, интиқ бўлмагин.
Бу сўзни кўнглингга оғир олмагин,
Яхшилик қил, ёмонликни қилмагин,
Кўйгин, қўзим, ёлғиз фозга бормагин.

Бу сўзни эшитиб, кампирга қараб, ўғли бир сўз деб турган
екан:

Мендайин ўғлингнинг кўнглини бўласан,
Ёлғиз фознинг тарафини оласан,
Мундай бўлсанг, сен имонсиз ўласан.
Оҳ урганда кўздан оқкан ёшингми,
Ўтиришда сенинг кўнгил ҳушингми,
Шу ёлғиз фоз, ё эна, ўйнашингми?
Хадик бериб мендайин фарзандинга,
Мени солиб айрилиқнинг ўтига,
Ёлғиз фознинг тарафини оласан,
Эшаклар ҳанграшиб.....
Бу сўздайтиб кўп аччиғи келади,
Кампир ўғли бу ўрнидан туради,
Парли ёй ўқини қўлга олади,
Фозга қараб кампир ўғли жўнади,
Пасқамман панараб кетиб боради.
«Жуда шум фоз, бул ҳам мени билмасйн,
Бораётганимни сира кўрмасин,
Ангда қолсин, урай, омон бўлмасин».
Бу сўзни ўйлаб фозга якин боради,

Дардли кул дардини кимга ёради,
Айрилик ўтига бағри поради(р),
Кўлидан келганча писиб боради,
Хар замонда шундай ангниб қаради,
Фозни жуда кулайга олиб боради,
Қандай бўлса хўп ангниб кўради,
Энкайиб, киялаб кетиб боради,
Шу замонда яқин бориб қолади.
Душман келганини бу фоз билмади,
Чарчаб эди, сира парво қилмади,
Писиб ётириб, ҳеч одамни кўрмади.

Ўғлиниң борганини кўриб, кампир ғозга қараб, бу сўзни
айтиб турган экан:

Эрисин, тоғларнинг қори эрисин,
Ер остида душман тани чирисин,
Фанкилламай сенинг довшинг қурисин.
Ҳаяллама, кўтарилилган осмонга,
Кўзинг тушмади-ку келган душманга.
Англамайсан, сени отиб кетади,
Олиб бориб гўштинг шишга тортади,
Писиб борди, дарров сени отади,
Энди уриб нобуд қилиб кетади,
Ҳаяллама, кўтарилилгин осмонга!
Даминг олиб бунча бунда турасан,
Тура берсанг, армон билан ўласан,
Арза хати қарз бўп қолган бўйнинга,
Махшар куни нима жавоб берасан,
Бекорига жавобгар бўп юрасан.
Нима бўлса сен ҳам ангда қолмагин,
Кўтарилилгин, кўп ҳаяллаб турмагин,
Мендай кампир шўрни хафа қилмагин.
Алпомиш деб бор эди эътиқодим,
Қайтардим, кўнмади менинг фарзандим,
Сени отса, бунда қолмас тоқатим,
Сенга душман бўлиб келди фарзандим,
Шулдир сенга менинг айтган бул пандим.

Бу сўзларни мунглик кампир айтади,
Кампир ўғли кулайголиб етади,
Шикирлатиб ўйни шундай тортади,
Ёйнинг ўқи яшиндай бўп кетади,
Шу замонда ғозга яқин етади.
Фоз фалакка кўтарилиб кетади,
Бу ўйнинг ўқидан омон ўтади,

Мунинг дарди ёмон бўлиб ётади,
Кампир буни кўриб энди қайтади,
Фоз фалакка парвоз қилиб кетади.
Кампир ўғли дардман бўлгандир ночор,
Ушбу розни отолмади муқаррар,
Дардманд бўлиб бунда қолди интизор,
Фоз ҳам бўлди булат билан баробар,
Кўзлаб учар Кўнгирот элни жонивор.
Баланд парвоз қилиб кўкда боради,
Неча олғир күшдан ҳадик олади,
Назар солиб ҳар тарафга қаради,
Бул паридан терлар оқиб боради,
У ҳавода қичаб парвоз қилади,
Кўнгирот элга етсам деди, қаради.
Бораётир неча тоғлардан ошиб,
Энди етди Кўнгирот элга ёнашиб.
Шундайин айланиб ерга қаради,
Ярқиллаган Бобир кўлни кўради,
Туянинг ичига келиб кўнади.

Бул роз Қалдироғочнинг туя боқиб юрган ерида, туяларнинг
ичига ташлади, донлаб турди, Қалдироғочийим бундан бехабар,
Ёдгорни эргаштириб, туяни қайтариб, ўз шаънига бу сўзларни
айтиб юриб эди:

Аввали айлади бизларни хандон,
Охирида бундай бўлдик саргардон,
Отингдан айланай, қудратли раҳмон,
Сен отангдан мен оғамдан айрилиб,
Икковимиз чўлда фариб, Ёдгоржон.
Армон қилиб мендай мунглиқ жилади,
Кўнгирот элнинг шоҳ чинори қулади.
Бизнинг аҳволимиз кимлар сўради,
Икки фариб чўлда юриб жилади.
Бундай кунда ээзлади юрагим,
Акамнинг ўрнига қолган чирофим.
Икковимиз чўлларда фариб, Ёдгоржон,
Худо қилди бўлдик шундайин сарсон.
Кумушдандир қарчиғайнинг чегаси,
Олтиндандир кировканинг ёқаси,
Сенинг отанг бўлса юртнинг эгаси,
Сен бўлардинг-ку элнинг тўраси,
Вайрон бўлди бунда кулбаҳонаси,
Фариб бўлиб бунда юрган боласи.
Кетмади бошимдан қоронги туман,
Бизларга бермади шум фалак омон,
Икковимиз чўлларда фариб, Ёдгоржон.

Икковимиз бирдай бўлиб муғойиб,
Акам бўлган бу элдан тирик ғойиб,
Ҳар замон йўқлайман чочимни ёйиб,
Икковимиз чўлларда ғариб, сарғайиб.
Бу чўлларда ҳеч ким ҳолим сўрмаса,
Қўнғирот элда ҳеч ким раҳбар бўлмаса,
Бир мусулмон биздан хабар олмаса,
Биздай ғарибларнинг кўнглин билмаса,
Биз йиглаймиз ҳеч бир илож бўлмаса.
Йигланман нима илож бўлади,
Муштипар қўлимдан нима келади,
Ёдгоржон сағир-да, қандай қилади,
Икки ғариб йиглаб сарсон бўлади,
Шундай бўлиб чўлда кунни кўради.
Илойим чиқсин деб чўлнинг қияси,
Ёмон бўлар баланд йўлнинг қияси,
Олдида бор эди кирқ минг туяси,
Бузилгандир бунда марднинг уяси,
Сағир Ёдгор шундай марднинг боласи,
Ияртиб юргани шўрнинг аммаси.
Бир-бирига булар раҳбар бўлади,
Бирор-бировининг ҳолин сўради.
Гоҳ кунларда чўлда бўзлаб жилади,
Гоҳ вақтида Ёдгор кўнглин кўтариб,
Туяни қайтариб мунглик келади.

Туяни қайтариб, Қалдирғочойим фознинг устига келиб қолди.
Фоз фалакка кўтарилиб учди. Худонинг қудрати, бекнинг битган
хати узилиб ерга тушди. Ўқиб кўрса, неча марта ўлди, деб
хабарини эшитган Ҳаким оғасининг хати. Хатида шундай айтиб-
ди: «Кашал юртида, зиндонда, ёлизлиқда, хабар оладиган ки-
шим бўлмади» деган хат. Буни кўриб, Қалдирғочойим бир сўз
айтиб турган экан:

Азоб кўрди ширин жоним бу танда,
Калмагўй бандаман, бўлмай шарманда,
Тирик экан меҳрибоним зиндонда,
Ўлган йўқ экан-ку, акам омонда.
Ёлғизлик гапини хатга солибди,
Орқаварот Ёдгорни ҳам билибди,
Хабар олиб бунда бир фоз келибди,
Ёлғизлиги оша аксар қилибди,
Элу ҳалқдан унда умид қилибди,
Ҳаммамизни йўқлаб хатга солибди,
Акамнинг борлиги маълум бўлибди,
Ёдгорга билдириб йиглаб турибди,
Айтган сўзин кўп тўтиё қилибди,

Бирга борган бойбаччалар ўлибди,
Зиндан ичидә акам буни билибди,
Ёлгиз ўзи кўп азобни кўрибди,
Ўлган эмас, акам омон турибди.
Зиндан бўлганини энди билади,
Билмайман узоққа кимлар боради,
Мен аёлман, боролмайман у юртга,
Ўласам, Ёдгоржон ёшлик қиласди.
Бирор шердай бўлиб хабар олмаса,
Ўзиман туғишган ака бўлмаса.
Бу иш ҳар кимнинг кўлидан келмаса.
Бу сўздайтиб кўп ўйланиб туради,
Шу отангнинг битган арза хати, деб
Ул замон Ёдгорга ҳам билдиради.

Ёдгорга билдириб, туюнинг қошига Ёдгорни кўйиб, ўйлаб
кўрди: «Бу олти ойчилик йўлда бўлса, қалмоқнинг элида бўлса,
зўр ёвнинг кўлида бўлса, унча-мунча одам излаб боролмаса, дўст
деган худонинг оти, агар Коражон излаб бормаса, унча-мунча
одам излаб боролмайди», — деб Олатокқа, Коражонникига қа-
раб юрди. Йўлда бу сўзни айтиб бораётир:

Ёдгор шунда тургин, хафа бўлмагин,
Мен келганча сен ҳам йиғлаб қолмагин.
Отангнинг Коражон деган дўсти бор,
Мен бориб берайин унга ҳам хабар,
Юришим билмасин бу бадбаҳт қуллар,
Мен келганча, жоним болам, тура бор.
Коражон ҳам хафа бўлиб юргандир,
Дўстининг ўтида ғамгин бўлгандир,
Бу қуллардан ул ҳам азоб кўргандир.
Коражонни бориб хурсанд қилайин,
Ҳар гап бўлса мен ҳам бориб қелайин.
Бу сўздайтиб ой Қалдирғоч жўнади,
Олатокқа кичаб кетиб боради,
Ҳар тарафга аланглашиб қаради.
«Бораётганимни қуллар кўрмасин,
Кўриб Ултонтозга хабар бермасин,
Юришимни дўсту душман билмасин».
Бу сўздайтиб борар шундай муштипар,
«Юрганимни кўрса қуллар ўлдиради,
Ҳар гап бўлса, бадбаҳтларда ихтиёр,
Бўйлмасам улар билан баробар,
Кўринмай паналаб юрмагим даркор».
Ой Қалдирғоч шундай кетиб боради,
Коражон мазгилин қайдан билади,
Сўрагани ҳар кимдан ҳазар қиласди,

Хеч кимга ёнашмай ўтиб боради.
Бобир кўлнинг усти Олатоғ эди,
Олатоққа энди етиб боради.
Коражоннинг мазгилини кўради,
Шу ерга кеп ой Қалдирғоч туради.

Шунда маконидан чиқиб, Коражон Қалдирғочни кўриб, бир сўз айтиб турган экан:

Хазон бўлмай боғда гуллар сўлмасин,
Обло менинг акли-хушим олмасин,
Келганингни бадбаҳт қуллар билмасин.
Агар билса, билмаганинг билдирав,
Дўст йиғлатиб, душманингни кулдирав,
Бадбаҳт қуллар билса, сени ўлдирав,
Не сабабдан бунда келдинг, муштипар?!
Дод айласанг, эшитмайди сўзингни,
Зулм билан ўяр икки кўзингни,
Билса қуллар ўлдиради ўзингни.
Агар кўрса сени ҳайдаб кетади,
Баданингга аччик қамчи чотади,
Бошинг кесиб сени дорга тортади,
Суякларинг пора-пора этади,
Сендей мунглик бу дунёдан ўтади,
Не сабабдан бунда келдинг, муштипар?!
Сўз эшитгин менинг айтган тилимдан,
Ҳазар этмай ҳақдан келган ўлимдан,
Кўрқмайсанми қуллар қилган зулмдан?
Мен сўйласам, кўзингта ёш оласан,
Қуллар ўлдиради, нега келасан?
Лодон кўнглинг ҳар хаёлга бўласан,
Мунглиқсан-да, бир лодонлик қиласан,
Меникига сен нимага келасан,
Қуллар кўрагойса, тайин ўласан.
Шум фалак бошингга савдо солмаса,
Айириб олмоққа аканг бўлмаса,
Коражон мусофири, иложин қилмаса,
Келганингни шу бадбаҳтлар билмаса,
Эмикдошинг бек Алпомиш бўлмаса.
Шу вақтинда бул Ултонтоз зўрабор,
Унинг билан хеч ким бўлмас баробар,
Ултонтозни билсанг, бунда муҳрдор,
Ултонтоз бўлмаса у сенга раҳбар.
Катта-кичик шунинг гапин гапирав,
Шўйтиб душман қуллар сени ўлдирав,
Бу мазгилга бекор кепсан, муштипар.
Коражон дер, эшит сўйлар тилимдан,

Мусофириман, хеч иш келмас қўлимдан,
Сен айрилма ўйнаб-ўстган элингдан,
Хали ҳам қолмагин келган йўлингдан.
Мени сен ўзингга ҳамдам билгансан,
Кадимидай акам деб ҳам келгансан,
Мунглиқ синглим, меҳрибонлик қилгансан,
Акамни қўрсам деб бунда келгансан,
Келганингни бадбаҳт куллар билмасин.

Бу сўзни Қоражондан эшитиб, кўнгли бузилиб, Қалдирғоч-
ойим Қоражонга қараб, бир сўз айтиб турган экан:

Жафоларга тушиб энди танда жон,
Бу гариблик суяк-багрим ўртаган,
Фамли кулга эгам бўлгай меҳрибон,
Сўзимни эшиггин, ака, Қоражон.
Гарибликда менинг сўлган тарзим бор,
Жоним ака, сенга айттар арзим бор.
Бир розда келиби бунда арза хат,
Йиглайман, қолмади ҳеч менда тоқат,
Тирик экан Кашал элда валламат,
Зинданда ётгандир соғу саломат,
Юборибди сени йўқлаб арза хат.
Фозни элчи қипти, бунда борсин, деб,
Олатогда қолган дўстим қўрсин, деб,
Бу хатларни тоза ўқиб билсин, деб,
Кўлидан келганча хизмат қилсин, деб.
Азоб тортиб ширин жони бу танда,
Эмиқдошим тирик экан зинданда,
Келса, душман бўлар эди шарманда.
Душманларга солар охират замон,
Сўз айттайин, ака, сизга бир алвон,
Дўст деган худонинг оти, Қоражон,
Бек оғангни излаб борсанг, меҳрибон,
Сен чиқариб олиб келсанг зинданда,
Душман бўлиб қолса ер билан яксон.
Шу хизматни бажо қилсанг, Қоражон,
Сен ҳам менинг акамсан-ку, меҳрибон.
Бу иш душвор, бизга қийин бўлмасин,
Сен эсонда менинг акам қолмасин,
Борганингни бул Ултонтоz билмасин,
Дўст деган худонинг оти, бек оғам.
Бораман деб бундан талаб қилсанг-чи,
Мендайин мунглиқнинг кўнглини олсанг-чи,
Жоним ака, яхши хизмат қилсанг-чи,
Кашал элга сен ҳам бориб келсанг-чи.
Сендан бошқа одам бориб бўлмайди,

Балки борган зиндонини күрмайды,
Бундан борса унинг ўзи билмайды,
Билгандан сўраса, омон келмайды,
Хар ким бориб ишни ўрин килмайды.
Мехрибоним, сен бормасанг бўлмайды.
Этам гангиттанди менинг бошимни,
Қандай бўлса олиб кел эмиқдошимни.
Ўз йўлингда юрган элда тўрасан,
Шу хизматни, ака, бажо қиласан,
Хар гап бўлса, яратгандан кўрасан,
Нима бўлса Кашал элга борасан.
То ўлганча яратганга рост бўлдинг,
Шул вактида чўпу хасдан паст бўлдинг,
Худони ўртага солдинг, дўст бўлдинг.

Бу сўзни эшитиб: — Ха, бундай хат келган бўлса, менга
бериб кета бер, келганингни ҳеч бир қуллар билмасин, — деб
қайтариб юборди.

Хатни Қоражон олиб қолди, Қоражон авом, хатда нима деган
гапни билмайды. «Шу ёқдан келган хат экан», — деб белига
туғиб олди. Арқон-парқонни фамлаб, зинданда бўлса, икки важ-
дан тортиб оламан, деб телпаги қайқайиб, Қалмоқ тарафига
караб, йўлда ўзавонига бу гапларни айтиб, кетиб борајпти:

Қийғир деган қуш ўлтирап қияда,
Не кўриб кечириб фоний дунёда,
Чиқиб кетди бундан пою-пиёда,
Жуда аламлари бўлиб зиёда.
Қалмоқ юртга Қоражон кетиб боради.
Мехнат тортиб кўп жафони кўради,
Худо қилган ишга банда кўнади,
Худо деб яёвлаб кетиб боради,
Хар гап бўлса яратгандан кўради.
Қоражонбек қичаб йўлни олади,
Бек дўстини излаб кетиб боради.
«Жабр қилсам, кўп йўлларни юрай, деб,
Қайда бўлса сўраб топиб олай, деб,
Бораётир мен дўстимни кўрай», — деб.
Гоҳ ерларда юрар ўтдай тулашиб,
Бораётир неча дарбантдан ошиб,
Тоғларда чашмалар бўйнига тушиб,
Бораётир хўп салқинлаб, сув ичиб.
Шундай бўп Қоражон ошиб боради,
Не сувсиз чўллардан ўтиб боради,
Етарман деб қичаб кетиб боради,
Хар гап бўлса яратгандан кўради,
Дўстим дейди, йўлда хизмат қиласди.

Пиёда юргани асари тегиб,
Бек Коражон борар кўнглини бўлиб,
«Томошалар килиб токка чиқардим,
Тозилар югуртсам, ҳар ён бοқардим,
Шунқор чуйсам, тилла таблим қοқардим,
Неча беклар билан шароб ичардим,
Инъом берсам, танга-тилла сочардим,
Хукм айласам, мен қизлардан қучардим.
Шунча ҳам бор эди иззат-хурматим,
Бир боис-баҳона бўлди қисматим.
Талхи бор деб емас эдим навотди,
Гарди бор деб тўшамадим банотди,
Бир такаббурлигим бошимга етди,
Энди бўлдим парча ноннинг гадойи.
Мен борарман узок йўлдан оҳ уриб,
Пиёдалаб мен дўстим дёб ахтариб»,
Неча адир, сувсиз чўлларда юриб,
Худо қилган ишга бул рози бўлиб,
Бораётир бек дўстини ахтариб.
Алп Коражон неча мўлжал юради,
Қалмоқнинг юртига яқин боради,
Узок йўлдан ўтиб кетиб қаради,
Узок йўлдан Мурод тепани кўради,
Юрган жойин кўриб ўтиб боради,
Ўйнаб-ўсган ерларини кўради,
Тўқайистон кўлларига қаради,
Кашал горни кўриб ўтиб боради.
Алпомишнинг зиндонини билмади,
Албатта шаҳарда дейди боради,
Қалмоқшоҳнинг бул шаҳрига киради.
Коражон келганин хеч ким билмади,
Душман юрт, бирордан сўраб бўлмади,
Телпаги қайқайиб ҳар ёқ қаради.
Ҳар кўчада ҳалак бўлиб юради,
Сўрамоққа бул ҳам ҳазар қилади.
Дўстининг зиндонин сира билмади.

Коражон ҳар кўчаларда сарсон бўлиб, бирордан сўрай олмай,
ўзи билмай, душман юрт, ҳаммадан ҳадик олиб юриб эди. Бир
кўчада уч-тўрт бола ошиқ ўйнаб ётибди. Бир икки бола бир
боланинг ошиғини тортиб олаётиди. Бу бола айтади: — Ёлғиз-
лик шундай нарса, ҳам урдинг, ҳам ошиғимни тортиб олдинг,
неча йилдан бери Кўнгиротнинг хони. ҳам зиндонда ётибди,
бунинг билан туғишган ё акаси, ё укаси бўлса, шундай одамнинг
йўлида боши кетса ҳам, бир йўқлаб келар эди.

Бу сўёни Коражон бул боладан эшилди, унга болалардан
бунинг ошиғини тортиб олиб берди. У боладан сўради: — Ўғлим,

Алпомишиң деб гапирдинг, Алпомишиңнинг зинданы қаерда? Бола айтди: — Бобо, биз Алпомишиңнинг зинданини айтольмаймиз. Қалмоқшоҳ подшомиз чакириб қўйган: «Алпомишиңнинг зинданы деб гапирган кишининг боши — ўлимда, моли — талонда». Ул сабабдан биз айтольмаймиз.

— Ундаи деган бўлса, астагина айта қўй, — деди. Ул бола айтди: — Астагина айтсанам, бундан Чилбир чўлига борсанг, Чилбир чўлида Мурод тепа деган бир тепа бор, тепанинг қошига борсанг, Мурод тепадай бир янги тепа бор. Шу янги тепанинг устига чиқиб қарасанг, паст бети чукур зиндан, мисли гўристон.

Коражон бу сўзни эшитиб, Қалмоқ шахридан чиқиб кетди. Чилбир чўлига қараб йўл тортидди, ўзи кўриб юрган Мурод тепанинг қошига етди. Караса, бир янги тепа турибди, бу янги тепанинг устига чиқиб қаради. Паст бети чукур зиндан, ҳарчанд қараб Алпомиши кўрмади.

Зинданда ётиб, Алпомиши Коражонни кўрди. Коражон эканини билмади. Тўқсон ботмон темирдан совут кийган, зинданнинг бошида қарғадай булдураб кўринади. «Бу Қалмоқшоҳнинг хабар олиб юрган жонсизлари да¹, Алпомишиңнинг жуда кўнгли чўкиб кетган экан, демасин», — деб Коражонга қараб, бир сўз айтиб турган экан:

Зинданчилар, мендан хабар оласан,
Сўзимни шоҳингга айтиб борасан,
Мен Алпомиши, назаркарда ботирман,
Ботирликдан бу зинданда ётируман.
Омон-эсон ўлмай чиқсан зиндандан,
Тойчихон юртини изиллатирман,
Жонсиз бўлсанг, айтиб боргин шоҳингга.
Зиндан қилган бунда мендай кишини,
Бизларга ўтқизган қалмоқ ишини,
Худо мени шу зиндандан кутқарса,
Кесар эдим Қалмоқшоҳнинг бошини,
Жонсиз бўлсанг, айтиб боргин шоҳингга.
Бул оҳимни бир оллога еткариб,
Фарибликда ҳожатимни биткариб,
Худо мени шу зиндандан кутқариб,
Қалмоқ кўрсан тири дамдан ўткариб,
Жонсиз бўлсанг айтиб боргин шоҳингга.
Соя солиб бунда зинданга келдинг,
Мени фариблигим жуда ҳам билдинг,
Ҳар замонда хабар олиб сен юрдинг,
Не ишларни, қалмоқ, сен менга қилдинг.
Хозир бандиман-ку, фифон қиласман,
Тақдирда ёзилган қисмат кўтарман,

¹ Жосус.

Кўрмаган кунларни сенга соларман,
Ўлмай омон-эсон чиқсан зинданда,
Бу юртингда жонзод кўймай қиарман,
Жонсиз бўлсанг, айтиб боргин шохингга.
Мен ётируман тор зинданда фам тортиб,
Мен қарадим сенга кўзим юбортниб,
Фалак оҳим бунда бағримни йиртиб,
Билмайман умирим зинданда ўтиб,
Хар на жафо солиб менга қалмоқлар,
Мазгилим коронги зиндан бўлдилар,
Охир худо бу зинданда кутқарар.
Қалмоқларнинг зулумига кўнаман,
Кўнмаганда нима илож қиласман,
Кўнгилда боримни айтиб тураман,
Жонсиз бўлсанг, айтиб боргин шохингга.
Алпомишман, келган Бойсин элимдан,
Худойим кутқарса бундай зулмдан,
Қалмоқ, сен омон қолмайсан қўлимдан,
Жонсиз бўлсанг, айтиб боргин шохингга.
Айтиб боргин мендай банди сўзини,
Хар боп билан ўяй икки кўзини,
Ўлжа қилиб кетай улу қизини.
Кайда қочса, уни ушлаб тутарман,
Катталарин тўпга солиб отарман,
Шаҳарини ҳаворлатиб кетарман,
Кизу жувонларин ҳайдаб ўтарман,
Чўри қилиб қозоқларга сотарман,
Жонсиз бўлсанг, айтиб боргин шохингга.

Бу сўзни эшитиб, Қоражоннинг кўнгли бузилиб, кўзидан ёши тизилиб, жигар-бағри эзилиб, «Дўстим мард-да, хали ҳам кўнгли чўгарган йўқ экан», — деб ўзини билдириб, бир сўз айтиб турган экан:

Фамли қуллар оҳу войда,
Бу ерларда жонсиз қайда,
Худони ўртага солган,
Шу тепада дўст бўп қолган,
Пойгадан отинг ўздирган,
Жони-дилман хизмат қилган,
Душманларнинг додин берган,
Олатогни мазгил тутган,
Тўқсарини бирдан ютган,
Қалмоқ юртини бўзлатган,
Алп Қоражон дўстинг ўзим.
Бир фоздан борди арза хат,
Кўриб колмас менда тоқат,

Кўрдим зинданда саломат,
Бошимда қанча аломат,
Кетди мендан армон, дўстим.
Хамиша хизматинг қилган,
Сени излаб кўп йўл юрган,
Йўлларнинг захматин кўрган,
Кўриб сени кетди армон,
Алл Коражон дўстинг ўзим.
Жосуссан деб сўзлар айтдинг,
Балки сен мени уялтдинг.
Мазгилинг, бек дўстим, зиндан,
Албатта қилмагин гумон,
Излаб келган алл Коражон,
Сенинг билан даврон, дўстим.
Мен зинданга арқон солай,
Белга боғла, тортиб олай,
Бирга йўлга равон бўлай,
Йўлингга интиқ Барчиной,
Борсанг, ёрман даврон, дўстим.
Кўрмакка ҳамма ҳавасда,
Ой Қалдирғоч бошикаста,
Душман десанг даста-даста,
Ота-энанг кўп шикаста,
Ўз кўзингман кўрсанг, дўстим.
Сени излаб кўп йўл юрдим,
Қўнғирот ўлкасидан келдим,
Сенинг учун бошим бердим,
Қалмоқ кўрса, энди ўлдим,
Кечиб жондин бунда келдим,
Жуда сенга ошиқ бўлдим,
Бирга кетсак равон, дўстим.
Менинг билан Қўнғирот боргин,
Яхши-ёмон юрting кўргин,
Қайтадан сен ёринг олгин,
Ёринг билан ўйнаб-кулгин,
Мазгилингни обод қилгин.
Шулдир сенга айтган тилим,
Қайтадан очилсин гулинг,
Хизматкори, қулу чўринг,
Хозир шунда ўсган элинг,
Билдиримайди Барчин гулинг,
Борсанг қайтадан давронинг,
Бизман бирга юргин, дўстим,
Бориб юрting кўргин, дўстим.
Арқон солай, кўнглинг бўлма,
Хаёлингга оғир олма,
Мени ҳам сен номард билма,

Бизман бирга юргин, дўстим.
Бирга-бирга Кўнгирот борсак,
Душманлардан обрўй олсак,
Элга бориб эга бўлсак,
Бундан борсак даврон, дўстим.

Бу сўзни эшитиб, Коражон эканини билди, Алпомишнинг кўнглига келди: «Бойқиши бекор келиби, бунинг нима қуввати, нима файрати бор экан мени зиндондан тортиб олиб кетадиган», — деб турди.

Ипак арқонни зиндонга ташлади. Алпомиш белига боғлаб олди, Коражон чирпиниб тортди, қараса, тортиб олиб кетгудай файрати. Алпомиш туриб айтди: «Бу зиндондан тортиб олиб кетиб қолади шекилли. Зиндондан чиқариб олиб борар, элда маърака-мажлис бўлар, бир тошиб гапириб ўлтирган вақтимда, «зиндонда чириб кетадиган одам эдинг, фалокатдан қутқарган факир-да», — деб бетимга улгу қилиб юрар», — деб орқасини бериб, оёғини тираб турди. Алп Коражон чирпиниб тортди, ипак арқон узилиб кетди, Алпомиш зиндонга тушиб кетди. Коражон арқон узилди, деб учини туғиб ташлай берди. Шунда Коражонга қараб, Алпомиш бир сўз деб турган экан:

Худойим саклагай бандани омон,
Фариб қулга эгам бўлгай меҳрибон,
Чиқардан чиқмасим зиндондан гумон,
Кета бер, Коражон, сендан розиман.
Ҳак таало мени қилган саргардон,
Излаб келиб сен қилмагин пушаймон,
Кўрмасин-да сени қалмоқи душман,
Кета бер, Коражон, сендан розиман.
Кўп айланиб бу ерларда турмагин,
Яхшилик кўр, ёмонликни кўрмагин,
Кўп яшагин, кўп йилгача ўлмагин,
Кўп айланиб, хатарли ер, турмагин,
Дўстим, кетгин, келган йўлдан қолмагин.
Қалмоқ билса сени, келиб колади,
Ёлғизсан-да, сени бойлаб олади,
Кўрмаган кунларни сенга солади,
Ундан кейин ишинг ёмон бўлади.
Қалмоқ зўр ёв, тозагина балоди(р),
Сен ёлғиз, кўлингдан нима келади,
От-ярок, асбоб сенда бўлмаса,
Эр йигит хотиндан хароб бўлади.
Лашкар келса, одам қандай қиласди,
Ёлғизсан-да, ҳолинг забун бўлади,
Кўп турмай, кетганинг ўнгай келади.
Навода қалмоқдан бирор кўради,

Билса, Қалмоқшоғға хабар беради.
Хатарли жой, шоҳдан лашкар келади,
Сени ўлдириб пора-пора килади.
Азоб кўриб ширин жоним бу танда,
Сўз айтарман мен ҳам ётиб зиндонда,
Албатта, бек дўстим, бўлма шарманда,
Сен қолмагин яна бунда армонда,
Кета бер, бек дўстим, бўлма дармонда.
Қалмоқ деган шундай жоҳил, балоди(р),
Бунинг зарби юрагимни олади,
Айёрлари мени зиндон қилади,
Дўстим, турмай, кетсанг, яхши бўлади.
Кулоқ солгин мендай дўстинг тилига,
Бош берибсан бек дўстингнинг ўйлига,
Бориб тургин Бойсин-Қўнғирот элига,
Дучор бўлма золим қалмоқ қўлига.
Бу қалмоқлар билмаганинг билдирадар,
Ханжар уриб бағринг қонга тўлдирадар,
Дўст йиглатиб, душманингни кулдирадар,
Кет, Қоражон, қалмоқ кўрса, ўлдирадар.
Сен ҳам ўз даврингга юрган зўрабор,
Сен биласан бу қалмоқлар анжомдор,
Анжомсиз кишида нима қувват бор,
Менманликман туриб ўлмак не даркор,
Кета бер, бек дўстим, сенда ихтиёр.

Бу сўзни Алпомишдан эшитиб, Қоражон ҳам зиндоннинг бошида бир сўз айтиб турган экан:

Оҳ тортганда кўзда ёшим селмиди,
Бек дўстим, умидим сендан шулмиди?
Сендей бекни бунда тирик қўраман,
Не бет билан Қўнғирот элга бораман?
Ой Қалдирғоч сўраб чикса олдима,
Бек дўстим, қандайин жавоб бераман?
Сендей дўстим Қўнғирот элда тўрами,
Хаёлингга шундай гаплар келами,
Шаънингга Қоражон номард бўлами,
Қилган хизматини улги қиласми?
Хаёлингга Қоражон номард бўлибди,
Қўнғилингга шундай гаплар келибди,
Ўйлаган шумлигинг бекор бўлибди.
Бек дўстим, умидим сендан шулмиди?
Сени олмай, мен ҳам қайда бораман,
Тақдирда бор қисматимни қўраман,
Ажал етса, мен ҳам бунда ўламан,
Сени ташлаб, дўстим, қайда бораман.

Биламан-ку қалмоқ бермайди омон,
Сени излаб бўлиб келдим саргардон,
Сени кўрдим, ёлғиз кетмас Қоражон,
Бек дўстим, умидим сендан шулмиди?
Яхши, жавоб бердинг элга бораман,
Катта-кичик қариндошинг кўраман.
Ҳаммаси ҳам келиб сўраса мендан,
Нима деб жавоб бераман сендан,
Бек дўстим, умидим сендан шулмиди?
Бундай қилиб менинг кўнглим бўлмагин,
Яхши ўила, мени ёмон қилмагин,
Бу зинданни ўзинг ватан билмагин,
Мард бўлсанг, номарднинг ишин қилмагин,
Келгин, дўстим, менга ҳамдам бўл энди.
Мен кетган сўнг сен ҳам ёлғиз қолмагин,
Мундайгача кейинтортар бўлмагин,
Ёлғиз ўрлаб сен зинданда қолмагин,
Ўйла, дўстим, мени хафа қилмагин,
Келгин, дўстим, менга ҳамроҳ бўл энди.

Бу сўзни эшитиб, Алпомиш ҳам Қоражонга қараб, бир сўз
деб турган экан:

Баланд торнинг бошин чалгандир туман,
Чиқардан чиқмасим зиндандан гумон,
Ҳакимбекни ўлди дегин, Қоражон,
Қонлар йиғлаб мен зинданда қолдимман.
Сен кўрмагин бу элда қалмоқларни,
Бу ерда сен турмай қилгин сафарни,
Қариндошлар йиғлаб чиқса олдинга,
Алпомиш ўлди деб бергин хабарни.
Тирикман, зинданда ётган ўлиман,
Агар билсанг, ўликларнинг бириман,
Ўлмасам бир куни чиқиб бораарман,
Куним битса, бул зинданда қоларман,
Хар гап бўлса тақдирга тан берарман,
Худо қилганига рози бўларман.
Худо қози, пайғамбарлар нойиби,
Урушда панд берар отнинг майиби,
Ултон бўпти ҳозир элнинг сойиби.
Мени излаб келдинг зиндан устига,
Кулок солгин сўзимнинг пайвастига,
Қалмоқ тушмасинда сенинг қастингга,
Баланд ерда турма, тепа устига.
Дурбун олиб қалмоқ сени кўради,
Кўзи тушса, қалмоқ келиб қолади,
Розилигим менинг шундай бўлади,

Сўзингга бек дўстинг жавоб беради.
Қандай бўлса изламагин зулмди,
Менинг учун сўйгин Ёдгор улимди,
Хуш келибсан, дўстим, яхши бор энди.
Ўйнаб-кулиб бундан юриш қил энди,
Омон бориб мазгилингни кўр энди,
Қўнғирот элда қариндошни кўр энди,
Оғайнига шундай жавоб бер энди:
Шум фалак бошига савдо согланди,
Борма деб бек отам йўлдан урганди,
Отам менга қўп раҳбарлик қилганди,
Жавоб бермай, қайтарди мендай полвонди,
Ота тилин олмай, дўстинг келганди,
Ўликларнинг бири бўлиб қолганди,
Хозирги мазгилим чуқур зиндонди,
Албатта сўрагин ота-энамди.
Барчин гулга шундай айтгин саломни,
Йиғлатмасин менинг Ёдгор боламни,
Обод килиб турсин кулбахонамни,
Бориб сўра Барчинойдай санамни.

Бу сўзни эшлитиб, Қоражон ўйланиб, телпаги билан ақллашиб, бир сўз айтиб турган экан:

Зиндонга тўрт бўлди Қоражон кўзи,
Шу бўлди-ку дўстимнинг айтган сўзи,
Кўзимга суртардим кўрсам бу изи,
Менга жавоб берди дўстимнинг ўзи.
Юрагимда қолди аламли доғим,
Остимда йўқ минмакка тўбичогим,
Турамизни, кетамизми, телпагим?
Устимга кийганим яшил кўк эди,
Менинг излаганим Ҳакимбек эди,
Арқондан бошқа яроқ йўқ эди,
Турамизми, кетамизми, телпагим?
Бошимда бор менинг неча аломат,
Кўрса душман қилас менга қиёмат,
Ёлғизман, телпагим, бергин маслаҳат,
Ўйландим, қолмади танимда тоқат.

Бек Қоражон қўп ўйланиб туради,
Телпагидан маслаҳатни сўради,
Телпак бунга не маслаҳат беради?!
Кетолмай Қоражон бунда туради.
Одам бор эканин қалмоқ билади,
Тақдири илохий дейди Қоражон,

Дүсти билан розилашиб қолади.
Кайтадан бир-бирин ҳолин сўради,
Бир-бирини йиглаб дуо қилади,
Хўшлашиб Қоражон энди жўнади,
Қўнгирот тарафга равон бўлади,
Эсиз, дўстим қолди дейди, боради.
Ахир ғарип бўлди кўрган қуним, деб,
Олатоги менинг бул мазгилим, деб,
Жуда забун бўлди менинг ҳолим, деб
Алп Қоражон йўлда кетиб боради,
Худо қилганига рози бўлади,
Қоражон келганин қалмоқ билади,
Қалмоқшоҳга бориб хабар беради.
Хазон бўлиб боғда гуллар сўлди, деб,
Қалмоқ юрти бул бехабар қолди, деб,
Зинданнинг бошига бирор келди, деб.
Эласлайди, кўп айланиб қолди, деб.
Бу сўзларни шоҳга маълум қиласди,
Айтган сўзин поёмини билади,
Қалмоқшоҳ буюрди, аскар жўнади,
Қалмоқ юртдан аскар чиқиб келади,
Чилбир чўлга қараб энди жўнади,
Туғ-байдоқ билан қичаб боради,
Кўз юбортиб ҳар тарафга қаради,
Мурод тепани хўп айланиб кўради,
Алпомиш кетди, деб гумон қиласди.
Зинданга бир неча қалмоқ қаради,
Чоҳ тубинда бек Алпомиш туради.
Кўрган сўзин нома-симо қиласди,
Унинг гапи ёлғон бўлиб қолади,
Душман топмай, қалмоқ қайтиб жўнади,
Яна қалмоқ ўз юртига боради:
«Жонзод йўқ, деб хонга хабар беради,
Бу орага қандай душман келади,
Айтган сўзи ўтирик бўп қолади,
Бир нечаси бунинг ҳадик қиласди,
Пана ерда турса, қандай бўлади,
Одам бўлса таги айланиб келади».
Ҳар қуни зиндандан хабар олади,
Неча қунлар шундай бўлиб қолади.
Алп Қоражон олис йўлда боради,
Гумон қилиб кўп қалмоқлар қаради,
Қоражоннинг дарагини билмади.

Неча тоғу неча беллардан ошиб,
Борди шундай мазгилига етишиб.

Неча кун Қоражон жойида турди,
Бир куни сўрай, деб Калдирғоч келди,
Акаси тарафдан бу хабар берди,
Қандай бўлса Калдирғочга билдири.
Ёдигорга меҳрибонлик ки.л, деди.
Хафа бўлмай, йўлга қараб юр, деди,
Бировга сўйлама, ҳолинг бил, деди,
Қулларга билдирма, тўғри юр, деди,
Нима бўлса, бурунгидай бўл, деди.
Душман қуллар бу сўзимни билмасин,
Бу юришим элга овоза бўлмасин,
Эҳтиёт бўл, Ултон ҳадик олмасин,
Кўриб келдим, дўсту душман билмасин,
Билиб Ултон ёмон кунни солмасин,
Гапирмагин, мендай аканг ўлмасин.
Бир кун келиб қолар давлатли шункор,
Оғзингдан чиқарма, мунглиқ муштипар.

Бу сўзни айтиб, қайтариб юборди: — Ҳеч бир одамни дўст
билиб, оғзингдан чиқарма, менинг бориб-келганимни қуллар
бўлмасин, қадимгидай элда гап бўлмасин, хайр, — деб булар
қадимгидай бўлиб юра берди. Алломиши ўлиб кетган деган овоза
билиан зиндонда ётди.

Тойчи вилоятида, қалмоқ музофотида Янгибозор деган бир
кичкитой бозори бор эди. Қалмоқшохнинг Товка деган қизи бор
эди. Товкайимнинг Янгибозорга раислик амали бор эди. Шунда
кирқин қизларини буюриб, Товкайим бир сўз айтиб турган
екан:

Кирқин қизлар абжир бўлиб туринглар,
Бугун бозор бўлганини билинглар,
Сирли таёк бунда ушлаб кўринглар,
Хаялламай Янгибозор боринглар,
Косибларнинг тарозисин кўринглар,
Тошини тўғрилаб бунда келинглар,
Қизим, ойим баринг унда боринглар.

Бу сўзларни айтди Товка гажакдор,
Сипоҳи либосни кийди канизлар,
Сирли таёфини қўлига ушлаб,
Амалдор бўп бораётир бу қизлар.
Бувушимнинг айтганини қилай, деб
Жуда ҳам бозорни тергаб кўрай, деб
Кўчада боради шундай канизлар,
Кирқини ҳам ўз ҳолига амалдор,
Ҳар қайсисин сўраётган иши бор,

Ўйнаб-кулиб бундай йўлда боради,
Бозор қизиганда етиб қолади,
Бир растандан қизлар кириб кўради.
Аввал бориб бazziзликни тергади,
Қалами бозорга энди боради,
Қаламисин бунда ўлчаб кўради,
Ўлчовдан қочганга ташвиш беради,
Шундай қилиб тергаб ўтиб боради.
Бундан ўтиб қассобликни кўради,
Тошини тўғрилаб қизлар туради,
Тоши енгил чикса, таъзир беради.
Бир хил қассоб кўзи аланглаб туради,
Қассоб бозорини қаттиқ тергади,
Тоши енгил келса, дурра уради,
Қассоб бозорини тамом қилади.
Кўй бозорига энди ўтиб боради,
Одамларнинг ақли шошиб қолади,
Олув-сотовини бундан сўради,
Сўраса, одамлар жавоб беради,
Олиби, озрок фойда қўяди,
Кўпроқ айтганини ул қизлар билса,
Ул одамни гуноҳкор қип боради,
Шундай қилиб бу қўйларни кўради.
Кўй ичида бир саркага қаради,
Бу саркага кўп ишқибоз бўлади,
Ҳеч нима деёлмай қизлар жўнади.
Бу терговни тамом қилиб боради,
Товканинг қошига етиб боради,
Товкаойим канизлардан сўради,
Товкаойимнинг айтганидай қилади,
Товканинг сўзига жавоб беради.

Қизлар Товкага: — Баққол, косибларнинг тоштарозисини тўғрилаб, кўй бозорига ўтдик, уни ҳам тергаб кўрдик, жаллобларга озроқ фойда билан сот, деб гапирдик, бир оқ саркани кўрдик, жунлари ерга тегиб турибди, шохлари аймасиб, зингкийиб, осмонга чиқиб кетибди. Жуда яхши кўрдик, — деди. Бу сўзни эшитиб, Товкаойим канизлари билан сарканинг бошига келди. Кўриб бул ҳам ишқибоз бўлди. Саксон тангага саркани савдо қилиб олди, ўрдасига олиб борди. Жуни сайин бир кўнфириқ такиб, ўрдада етаклаб бокиб, ўйнатиб юра берди. Сарка жун ташлаб, озайнин деди. Шунда канизларига қараб, Товка бир сўз айтиб турибди:

Кирқин қизлар баҳор-кўклам бўлади,
Жуни тушиб сарка озиб боради.
Қайси каниз бу саркага қаради,
Нега бу жонивор хафа бўлади?

Ким қаради, мендай ойим сўради.
Қарамай жонивор ўтдан қолдими,
Ё бўлмаса сарка касал бўлдими,
Ёлиз ўзи кўп дикқатлик қилдими,
У сабабдан гўшти қочиб қолдими?
Тили йўк-ку, бундан сўраб билмадим,
Кўп кун бўлди, мен ҳам хабар олмадим,
Илгаридан ахволини кўрмадим,
Хайвонзод-да, кўнглидагин билмадим.
Янги келиб ахволини кўрибман,
Кўп озибди, бунинг ҳолин кўрибман.
Бу сўзларни айтар гул юзли дилбар,
Бу ганимга жавоб бергин, канизлар.
Ёлиз бўлса кўнглидагин қилайик,
Шоҳ отамнинг чўпонига берайик,
Буни элтиб қўйга қўшиб келайик.
Ахволини кўриб бўлганман дикқат,
Отамнинг чўпони, кизлар, Кайқубод,
Ҳак берсак, боқиб берар бемиллат.
Бу сўзларни айтди Товкадай дилбар,
Маъқул тутди қошидаги канизлар,
Албатта жинсига қўшмоқлик даркор,
Қўлдан еб қаноат қилмас жонивор.
Авлодини кўрса бундай саркалар,
Ўйин қилиб кунда вакти хуш бўлар,
Эт олиб, жонивор сўнгра семирар,
Қўйда бордир ўзидаин эчкилар,
Ўз йўлига жонивор ўтлаб юрас.

Бу сўзни Товкадан эшитиб, канизлар айтди: — Рост айтасиз, ер риzekли мол-да, қўлдан берганингизга қаноат қилмайди, энди кўклам чиқиб келаётир, бундан бўёққа озгани-озган. Бу сўзни эшитиб, кирқин қанизлари билан саркани етаклаб, Кайқубод-нинг қошига келиб қолди. Кайқубод илгари Бойсарининг қўйини бокар эди. Алиомишни меҳмон қилиб, жезна-қайин бўлиб қолган эди. Бу вактлари Тойчи қалмоқнинг қўйини боқиб юриб эди. Товка ойим сўради: — Отамнинг қўйини қанчадан боқиб юрибсан? Кайқубод айтди: — Отангнинг қўйини олти ойга саккиз тилладан боқиб юрибман. — Мен ҳам бир саркамга саккиз тилла берайин, меникини ҳам қўшиб боққин, — деди. Кайқубод айтди: — Сен нақд бермасанг, қўштирумайман. Товка ойим айтди: — Ойинг битгандан кейин оласан, отамдан нақд олиб юрибсанми? Кайқубод: — Отангдан ҳамма вақт ҳақимни оламан, сендан ҳақимни олайин деб ўрдага борсам, боскинчилик қилиб келдинг, деб мени ўлгунча урсанг, сарканинг ҳақини ҳам онг қилсанг, нақд бермасанг, қўштирумайман, — деди. Дардинг нақд олмок бўлса, нақд ола қол, — деб ёнидан саккиз тилла чиқариб берди.

Кайқубоднинг ҳам думоги чоғ бўлди. «Шу баччагарнинг қизи пулни тутиб берди, шунинг кўнгли бизда бор экан, саркасини семиртирсак, бизга тегар экан», — деб қолди. Шунда саркасини тайинлаб, икки оғиз сўз айтиб турган экан:

Кокилларим эшилгандир тол-тол,
Хар толига берса етмас дунё мол,
Магар душман келса бўлади поймол,
Кайқубод, сен бу сўзима қулок сол,
Хар замон кўриб саркамдан хабар ол,
Эҳтиёт бўл сен ҳам бўлгин хабардор.
Хаким дейсан, саккиз тилла оласан,
Саркамни йўқотсанг, ёзган, ўласан,
Ўтга боқиб хўп семиртиб берасан,
Хизмат қилсанг, таги мендан оласан.
Чўпгун ерни сенинг ўзинг биласан.
Боғбон бўлмай қизил гулни терасан,
Лолазор, баҳрли ерда юрасан,
Бу саркамни хўп эҳтиёт қиласан,
Бировга олдирсанг, тайин ўласан,
Қашкирлардан сен хабардор бўласан,
Тоғда, адир, бузук жойда юрасан.
Эшилтинг сен Товка айттан сўзини,
Мангратибсан қанча қўю қўзини,
Қаватинда бирга қирқин қизини,
Хафа қилма мендай сарвинозини,
Эҳтиёт қил шу саркамнинг ўзини.
Бу саркамни сенга қўшиб кетаман,
Билган сўзим энди сенга айтаман,
Бул саркадан қўзинг пана бўлмасин,
Сен кўрмай, бир ерда ётиб қолмасин,
Ёлгиз қоп бўрига дучор бўлмасин,
Хабардор бўл, менинг саркам ўлмасин.

Тайин қилиб қайтди гул юзли дилбар,
Ўйин-кулги билан айттан сўзи бор,
Қаватида бунинг қирқин қизи бор,
Ўрдага тўп бўлиб қайтди у қизлар,
Товкани ўртага олиб канизлар,
Маст бўлиб қолгандир Кайқубод ночор.

Шунда саркани қўйга қўшиб, маст бўлиб, диморини чоғлаб, Кайқубод ўз шаънига бу сўзларни айтиб турибди:

Сарка олиб келди бир моҳи анвар,
Қаватида саф-саф турди канизлар,

Мен ҳам билдим Товка ойим күнгли бор,
Шох қизига бўлиб колди харидор.
Пулни туртиб бериб ўзи суйканар,
Кўрганда кўнглимда қолмади губор,
Мен билмабман, ул ҳам менга интизор,
Ноз билан айтгандир ул неча сўзлар.
Мен тегишсам, қобогини уяди,
Саркаси семирса тайин теяди,
Яхши кўриб менга кўнгил қўяди.
Кулимсиб ҳар замон менга қаради,
Билдирмайин қош қоққандай бўлади,
Бунинг кўнглидагин қизлар билмади,
Нима бўлса бизга кўнгил қиласди.
Яхшилаб саркасин боқиб берайин,
Жониворни хўп парвариш қилайин,
Мен семиртиб, Товкаойимни олайин,
Канизларни хизматима солайин,
Бу қизларни бизга берди худойим,
Бу шаҳарда ўйнаб даврон сурайин.
Бу сўзни айтиб эр Кайқубод ётади,
Хаста кўнглин бунда шодмон этади,
Қўй ёйилиб Мурод тепа этади,
Тепани айланиб ўтлаб ётади.
Ёлғиз бўлиб бул ок сарка айрилиб,
Бўш тупроқ устига чиқиб кетади,
Тупроқнинг устига шундай чиқади,
Бўш тупроқда ўйин килиб ётади,
Гумбурлаб зинданга тушиб кетади.
Қўй ёйилиб энди бундан қайтади,
Кайқубод устига қўйлар этади,
У қизлардан сўзни айтиб ётади.
Олатой — иккови бул ерда қолган,
Қўйлари ёйилиб, боз қайтиб борган.
Турасоп Кайқубод шундай қаради,
Қўй ичиди бу саркани кўрмади,
Кайқубод аланглаб энди қаради,
«Хотин олмай ўлай, қандай бўлади,
Тоза бизни фалак уриб қолади».
Бу сўздайтиб хўп чопқиллаб қаради,
«Синглифар бошима бало бўлади».
Қўй ёйилиб қайтган ерга этади.
Харчанд қараб ҳеч дарагин билмади.
Тупроқда эчкининг изин кўрибида,
Мурод тепадай тепа бўлиб турибида,
Из қувиб бошига чиқиб борибида,
Нарёқ бети чуқур зиндан кўрибида,
Тойиб тушган ери белгили турибида.

Зиндоннинг бошига ётиб қаради,
Пастда одам қўзгалгандай бўлади,
Одам борми деди тиклаб қаради.
Бирор саркани бағрига олиб қолади,
Бўғни бўшаб чоҳ бошида туради,
Анигин билай деб тоза қаради,
Жуда чуқур, эласлаб кўринади,
Саркани сўйгандай бўп билинади
Эр Кайқубод шундай қилиб кўради.

Шунда Кайқубод зиндоннинг бошида саркани кўриб, зиндоннинг ичидаги бирор саркани бағрига босиб, қозонсиз осиб, саркани қўркитиб ётириб. Бунинг анигини билиб, зиндоннинг бошида туриб, бир сўз деб турган экан:

Баҳорда очилган тоза лоласан,
Ер остида ётган қандай балосан,
Армонман саркани нобуд қиласан,
Сен ажаб бошима бало бўласан.
Сарканинг эгаси Товка зулфакдор,
Мени қилма Товкаойимга гуноҳкор,
Сенга шундай айтадиган арзим бор,
Сарка учун шохнинг қизи ўлдирав,
Жуда ҳам тайинлаб айтган шарти бор,
Сенга қайдан дучор бўлди жонивор?!
Шоҳ қизига мени қилма жавобгар,
Шу саркамни қўя бергин, баччагар,
Олиб кеп қўшганда ўзин кўнгли бор,
Сенинг менга оша зарарин тегар,
Хабар берсанг, ахволингни билайн,
Гўштин е, терисин сендан сўрайин,
Ўлдирибсан, энди қандай қилайн,
Терисин элтиб шоҳ қизига берайин,
Қашқир еди, дейин, дўқлаб кўрайин,
Ҳар на бор сўзимни айтиб турайин.
Хозир ўзим гуноҳкор бўп қоламан,
Берсанг, терисини олиб бораман,
Қизлар билан кўп ўрлашиб кўраман,
Сен ким эканингни нима биламан,
Хабар берсанг, мен ҳам айтиб бораман.
Сарканинг эгаси сарвиноз дилбар,
Мен қолибман билмай буни бехабар,
Қабатида канизлари амалдор,
Хозир билмай, мен ҳам бўлдим гуноҳкор.
Билмайман, мен ичор кўнглим бўлами,
Терини кўтариб борсам урами,
Сарсон бўлдим менга азоб берами,

Мен билмайман, ишим ёмон бўлами,
Айтган сўзим ё бир маъкул қилами?!

Бу сўзни Алпомиш эшитиб, Кайқубодга қараб, бир сўз деб турган экан:

Ўлмай чиқсан сендаи қалнинг бахтига,
Миндиарман Тойчихоннинг тахтига.
Бошинг эсон, сен Кайқубод, фам ема.
Сен эшитгин бек езнангнинг тилини,
Бера бер Товканинг қалин молини,
Қайси куни қалинидан қутулсанг,
Олиб берай Товка зулфакдорини.
Қойил бўлгин мендай езнанг ишига,
Чиқарай Товканинг қордай тўшига.
Сен эшитгин Алпомишбек сўзини,
Бу зиндонда тўрт қилгандир кўзини,
Қайси куни қалинидан қутулсанг,
Чиқиб олиб берай шоҳнинг қизини.
Қалинни берганча қараб тураман,
Сен қутулган куни чиқиб бораман,
Қалмоқшоҳга сени куёв қиласман,
Товкаойимни сенга олиб бераман.
Қалмоқ юртда Товка ойимни оласан,
Товканинг қалинин менга берасан,
Товка билан ўйнаб-кулиб юрасан.
Биласанми қалмоқларнинг қизини,
Оп берай Товкадай сарвинозини,
Зиндон қилган Қўнғирот добилбозини,
Зиндонда ҳоритган бекнинг ўзини,
Мен кесарман Қалмоқшоҳнинг бўғзини,
Йиглатайин неча сарвинозини.
Шу шаҳарга сени подшо қиласман,
Товка ойимни сенга олиб берарман.

Бу сўзни Алпомищдан эшитиб, Кайқубод айтди: — Сен нима килиб ётибсан бу ерда? — Мен қалмоқларнинг қўлига бандизин-донман. — Билмабман-да сенинг бу ётишингни шу вақтгачайин. Хайр, энди ундей бўлса, қалиннинг боши — оқ сарка-да. Сарка-ни кўшган вақтда ўзининг ҳам кўнгли бордай эди, тегадигандай эди, — деб қайтиб бориб, қўйларни қайтариб, уч-тўрт қўй ташлаб кетди. Кайқубод ҳар кун Мурод тепани айлантириб қўй ёяди. Кунига беш қўй, ўн қўй ташлаб кетиб бораёттир. Керакли нарсасини олиб келиб бераёттир. Нима деса, айтганини қилаёттир. Бу молларнинг эгаси сўрайди демайди, еган одам бир нима қилар, деб бераёттир. Неча вақт орадан ўтди. Қалин молни бериб ётди, боккан моли соп бўлиб кетди. Олатой билан иккови

кайқайиб қолиби. Алпомишнинг чиқар куни бўлмабди. Ола-
тойни еталаб, зинданнинг бошига келиб, Кайқубод бу сўзни
айтиб турибди:

Фамли қулман ўйлайдиган ўйим бор,
Ўйнаб-кулсам хўп бир Товка ойим бор,
Езна, қалин берган беш юз қўйим бор,
Энди қолган битта олатоим бор,
Қалмоқ шоҳга мени қилма гунохкор.
Боқиб юрган молнинг бари соп бўлар,
Бир куни ҳолимни қалмоқлар сўрас,
Сўраса, Кайқубод не жавоб берар.
Езна, сени чиқар кунинг бўлмади,
Агар билсанг, қўй-эчқидан қолмади,
Еб қўйдинг, қалмоқлар буни билмади.
Мен бокқанман Қалмоқ шоҳнинг қўйини,
Хар замон кўраман Товка бўйини,
Сен чиқиб қилмадинг ёрнинг тўйини,
Билолмадинг Кайқубоднинг ўйини,
Товка деб йўқ қилди боқкан қўйини.
Езна, менга меҳрибонлик қилсан-а,
Еган молларингни ҳақлаб турсан-а,
Товкани эртароқ олиб берсан-а,
Сен менинг кўнглимни хурсанд қилсан-а,
Нима топсам, сенга оп кеп бераман,
Қалмоқларга мен билдирмай юраман,
Югуриб-елиб тинмай хизмат қиласман,
Умидим шул: «Товка ойимни оламан,
Қалмоқ билса, нима жавоб бераман,
Сенга, езна, сўзимни айтиб қўраман.
Бир қалмоқ юришимни билмасин,
Билиб Қалмоқшоҳга хабар бермасин,
Қалмоқ подшо мени ҳайдаб бормасин,
Кетган молни сўраб, нобуд қиласин,
Чикқин, езна, эр Кайқубод ўлмасин,
Бу қилган хизматим зое бўлмасин.
Айтган сўзим фариблиқда бил энди,
Буйтиб ётма, бир ҳаракат қил энди,
Сен чикмоқнинг ҳаракатда бўл энди,
Нима бўлса, езна, чикиб қол энди.

Бу сўзни эшитиб, Алпомиш ҳам бир сўз айтиб турган экан:

Хазон бўлмай боғда гуллар сўлмади,
Сўлган гулга булбул келиб қўнмади,
Бу берган молингга кўнглим тўлмади,
Товка ойимнинг ярим моли бўлмади,

Нима бўлди, бош отлари келмади,
Ул сабабдан чиқар кўнглим бўлмади.
Мендайин шунқорнинг кўнглини бўласан,
Оз ташлаб, кўп мол деб чатоқ қиласан,
Қутулмайин сен кунига келасан,
Бош от берганинг йўқ, қандай қиласан,
Шу молман Товкани қайтиб оласан,
Бу молинг оз эканин ўзинг биласан.
Устига кийгани гулгун қирмизи,
Ақлингни олади жодугар кўзи,
Атрофда сап-сап турар канизи,
Жуда ҳам судувдир қалмоқнинг қизи.
Бу мол билан сен ҳам аҳмоқ бўлмагин,
Беҳуда ўзингни гаранг қилмагин,
Қалин олар, билсанг, мендай зўрабор,
Хали ҳам берасан бизга кўп моллар,
Озроқ билан тегмас Товка зулфакдор,
Шоҳ қизининг қалин моли кўп бўлар,
Бу ишлардан сендай ёзган бехабар.
Қалинини хўп аниқлаб оламан,
Хисоб қилсанг, қутулганинг биламан,
Қутулсанг, мен чиқиб олиб бераман.
Хали бери қутулмайсан, Кайқубод,
Тараадди қил, қила бергин кўп хизмат.
Ўз юртимда мен белгили тўраман,
Хозир мен ҳам зиндан бўлиб тураман,
Сен Товканинг қалинидан қутулсанг,
Билгин, мен сенга олиб бераман,
Хозир мен бош отинг сўраб тураман.

Бу сўзни эшитиб, Кайқубод ҳам бир сўз айтиб турган экан:

Қалин берган менинг қанча кўйим бор,
Ўйласам кўнглимда қанчавойим бор,
Ўйнаб-кулсам менинг Товка ойим бор.
Хуржун-кулоқ ортиб юрган тойим бор.
Той ҳам бўлса бош отига бўлами,
Шуни берсан, езна, кўнглинг тўлами?!
Нима десанг, айтганингни қилайнин,
Маъқул тутсанг олатойни берайин.
Обло менинг ақлу ҳушим олмади,
Олатойдан бўлак нарса қолмади.
Бериди кўйдим мен ҳам ҳар на боримни,
Энди олиб берсанг Товка ёrimни,
Мен ўйнаб тарқатсан бу хуморимни,
Бердим сенга бисотимда боримни,
Билдинг, езна, менинг хизматларимни.

Бу сўзларни айтди туриб Кайкубод,
Чоҳ тубинда эшитганда валламат.
Кайкубоднинг айтган сўзин билади,
Кайкубодга қараб сўзлаб туради:
— Мен ҳам сенга қариндошлиқ қилайнин,
Қайнимсан-да, мен суяшиб турайин,
Той ҳам бўлса от ўрнига кўрайин,
Қариндошлиқ қилиб мен ҳам олайн.
Бу сўзларни айтди ётган валламат,
Олатойга кўндиридим деб Кайкубод.
Эр Кайкубод хаста кўнглин хушлади,
Олатойнинг жиловидан ушлади,
Хуржун-кулогин олиб ташлади.
Зиндоннинг бошига олиб келади,
Олатойни энди йиқиб олади,
Шуйтсам Товкани оларман деб ўйлади,
Олатойнинг ёғини бойлади.
Олиб борди Товканинг бош оти, деб
Олатойни бу зиндонга тайлади.
Чоҳ тубинда давлатли хон қаради,
Остин-устин бўлиб энди айланиб
Товка ойимнинг бош отлари келади,
Алпомишнинг вақти хуш бўп қолади,
Бунда Алпомиш олатойман бўлади,
Кутулдим деб бу Кайкубод жўнади.
Неча кунлар ўз ишида юради,
Таёгини судраб таги келади,
Келиб таги боз зиндонга қаради,
Езна, нима килдинг, дейди, туради.
Сўра энди Кайкубоднинг ҳолини,
Бош от билан бериб кўйган молини,
Олиб бергир Кайкубод дилбарини.
Езна, мени мундай ҳалак қиласан,
Кунда кесам, шу зинданда турасан,
Мен қутулдим, нима жавоб берасан.

Бу сўзни эшитиб, Кайкубодга қараб: — Ҳали Товка ойимнинг ярим молини берганинг йўқ, қайтаман дейсан. Кунига келиб турасан, — деди.

Кайкубод айтди: — Берадиган ҳеч нимам қолмади.

— Ҳеч ниманг қолмаса, шўрлик эса, ўғрилик қил, — деди.

Кайкубод: — Қувиб келиб ташлай берсам, ўғриликтан онсон нарса йўқ: ўғриликни қай маҳал қиласан, — деди.

— Эл ухлагандан кейин қил, — деди.

— Мабодо бир ердан ошолмай қолсам, эгаси билиб қолса, мен кимга сиғинаман, — деди.

Алпомишиң айтди: — Ўгрининг пири ҳазрати Жолтонг дегучи эди, ҳазрати Жолтонга сиғина қолғин.

Кайқубод айтди: — Ҳазрат Жолтонг чин қўллайдиган бўлса, бирор бир работда икки бўрдоқи хўқиз боқиб ётири. Бу сўзларни айтиб, Кайқубоднинг ўғрилика кетиб бораётган ери:

Куни билан Кайқубод ухлаб ётади,
Номозшом-говгумда ўрнидан туриб,
Кайқубод ўғрилика жўнаб кетади.
Хар тарафга шундай бўйлаб қаради,
Жуда чаққон бўлиб кетиб боради,
Кучукларга билдирмайин юради,
Ўзи кўриб қўйган битта работни,
Коронгида шуни чўтлаб боради.
Бемаҳалда у работга етади,
Эгаси бўрдоқи боқиб ётади.
Бўрдоқи хўқизни бойқиши кўргандир,
Шу хўқизни урламоқчи бўлгандир,
Шуйтиб бул Кайқубод борлаб юргандир,
Ичкари киролмай сарсон бўлгандир,
Бир тарафда бир қорани кўргандир,
Деворга ёпиш бўлиб писиб боргандир,
Ул қорайган нури тўда билгандир,
Бу нуридан томга чикиб олгандир,
Том устинда эр Кайқубод тургандир,
Ховлининг эгаси билмай қолгандир.

Томнинг бошида туриб, пастга тушмакка қулайлаб қаради, бир ер қорайиб кўринди. «Бу томнинг олдида ҳам қорайган нури тўда экан. Ё Жолтонг», — деб ўзини ташлаб юборди. Бу қорайиб турган — қудукнинг оғзи эди, қудукка тушиб кетди. Шунда қудукка тушиб, бир сўз айтиб турган экан:

Кўзидан тўқтириб селоб нурини,
Укасини Жолтонг пирини.
Ох урганда хаста қўнглин хушлади,
Фанимга дуч бўлмай, сирим фошлади,
Жолтонг дедим, бу қудукка ташлади.
Алпомишнинг айтганини қилмайман,
Мундан бўлак ўғрилика келмайман,
Жолтонг пирни сира пирим демайман.
Мендайин ночорнинг кўнглин бўлади,
Кўрмаган кунларни менга солади,
Билса, эгасига ушлаб беради,
Жолтонг пирни сира пир қилмайман.
Рахми келмай кўзда қонли ёшима,
Хафа фалак оғу қўшиб оshima,

Бундай ажаб савдо тушиб бошима,
Хайрон қолдим, Жолтонг, сенинг ишинга.
Пирим, деб мен бул ўғриликка келганман,
Жолтонг деб ҳам бу мазгилда турганман,
Сенга ишониб мен қудукқа қолганман,
Сени пирим дедим, сарсон бўлганман.
Қудукқа соп менинг ишим қиласан,
Мол эгасин билсанг, хабар берасан,
Пирим, десам, бир балони қиласан,
Мени эгасига ушлаб берасан.
Сени пирим деб мен аҳмоқ бўлмайман,
Воллоҳ, биллоҳ, сени пирим қилмайман,
Сенга ишониб мен ўғриликка келмайман,
Мундайғачоқ аҳмоқ бўлиб юрмайман,
Укангнисени Жолтонг демайман.

Номоз вақти чиқиб, ўз бошини кутқариб, зинданнинг бошига
бориб қолди. Алпомиш кўриб: — А, қайтдинг, қайним? — деди.
— А, езна, сенинг пириңг курсин, сенинг суянганинг шу
Жолтонг пир бўлса, сира ҳам зиндандан чикмайсан, ҳали ҳам бу
пирни кўйиб, бўлак пирга сифинсанг, чиқасан, — деди.

Алпомиш суюқдан икки чанқовуз қилиб қўйган эди. — Бу
chanқovuzни сотиб кел, — деб Кайқубодга берди. Бу чанқовузни
Кайқубод олиб, Янгибозорга кетди. Янгибозорнинг ихтиёри қиз-
ларда, қизлар кўп йифилади. Бу сўзларни айтиб, чанқовузни
наъма қилиб ўтирибди:

Мен бўлиб уста нағмагар,
Борми бу ерда харидор,
Созим кўрсанг, келгин қизлар,
Тор биқинли сарвинозлар,
Создир жуда чанқовузлар,
Баринг келгин, санам қизлар.
Баринг келгин хурдай бўлиб,
Оқ баданинг қордай бўлиб,
Тиши гавҳар, дурдай бўлиб,
Ҳамманг келгин бирдай бўлиб.
Сўйлар қўлимдаги созлар,
Чанқовузим нағма қиласан,
Кўрган қизнинг кўнгли тўлар,
Эр Кайқубод уста бўлар.
Шулдир Кайқубод ишлари,
Калмоқ юртнинг бувишлари,
Кизларнинг кўнглин хушлари,
Келиб кўр қалмоқ қизлари,
Чанқовузим бию-бию.
Оқ олма, қизил олма,

Олар бўлсанг, қуруқ қолма,
Йигилишган бели толма,
Бу созимдан қуруқ қолма,
Э, олмоққа ишкинг борма?!

Чанқовузин бозор солди,
Кўп қизлар атрофин олди,
Бир нечаси чалиб кўрди,
Қанча қиз харидор бўлди.

Шундай бўлди кўнгил хушлар,
Кайқубодман ўлтиришлар,
Чанқовузим наъма килиб,
Талашиб олади қизлар.

Нағмага кўнгли чоқ бўлди,
Неча пулдан деди, сўрди,
Кўринг энди Кайқубодни,
Икки нондан нархин айтди.

Икки нондан олиб бериб,
Тўрт ноннинг эгаси бўлиб,
Олди чанқовузни сотиб,
Кайқубодни аланглатиб,
Нархига етказмай сотиб.

Шунда кирқ қиз йигилган экан. — Уста ака, бизга ҳам килиб
келиб беринг, — деб икки нондан олиб келиб берди. Саксон нон
бўлди. «Энди қолган қалиндан чанқовуз сотиб ҳам кутулиб
кўяман», — деб кўтариб олиб келиб зиндонга ташлади. Яна
суюқдан ўймалаб яна бир чанқовуз тузатиб қўйиб эди. Бу чанқо-
вузни Кайқубодга бериб буни тайин қилди: — Янгизорга олиб
бориб, икки нондан сотмагин, Товканинг сайил боғига олиб
бориб чалгин. Қизларга кўрсатмагин. Мабодо қизлар кўрса,
кувса ушлатмагин; мабодо ушлаб олса, «бу чанқовузни ким
килди» деса, ўзим қилдим дегин, менинг дарагимни айтмагин.
Қизлар кувса, қочиб кутуларсанми?

Кайқубод туриб айтди: — Семизи иркиллаб, ориғи эчкидай
диркиллаб юрган қизлардан кутулмай, менга бир гап бўлди-
ми, — деб зиндоннинг бу ёғига, у ёғига жуппай бўлиб иргиб ўта
берди. Алломиш айтди: — Ёзган кал, сен ҳам тушиб кетарсан.

Чанқовузни олиб кетди, Товканинг сайил боғига етди. Бир
гул бутанинг остида нағма қиласяпти. Бу нағмани эшитиб, Товка
оим сайил боғида канизлари билан бориб, гул бутани шундай
кўтарди. Ким деб қараса, Кайқубод, Кайқубод қочиб берди. Бу
сўзни айтиб, Товка оим канизлари билан кува берди:

Бу Кайқубод ҳилла қилди,
Ушлар эдик, қочиб берди,
Кува беринг, санам қизлар,
Кўлда ажаб чанқовузлар,

Олдиндан чик, киркин қизлар.
Кўринг энди кургур кални,
Етай деганда чап солди,
Илкисдан бурилиб кетиб,
Неча қизлар ўтиб кетиб.
Қуваётир кўнглин хушлаб,
Товка ойим зулфак ташлаб,
Кайқубод иргир ангишлаб,
Не қизларни буриб ташлаб.
Кўринг Товка зулфақдорни,
Чарчатди-ку кўп қизларни,
Ушламоқчи бундай кални.
Неча қизлар етай дейди,
Етайин деб қўл узатди,
Бул Кайқубод буриб кетди,
Не қизларни ҳилла билан
Дўстманан қилиб йикитди.
Тоза чарчади канизи,
Туриб қолди киркин қизи.
Кайқубодни қувиб юриб,
Товка ойим ёлғиз ўзи.
Еб ётган ул шоҳнинг қизи.
Бу Товка ҳам етай деди,
Қадимгидай буриб кетди.
Шулдур Кайқубоднинг доғи,
Кайқубод бурилган чокда
Тойиб кетгандир оёғи.
Бу ёзганнинг ақли шошди,
Дўстман бўп ерга тушди.
Шоҳнинг қизи ойдай Товка ушлаши.
Киркин қизи бир-бирига ёнашди,
Шўр Кайқубод бул ўртага тушди.
Чанқовузни ким қилди деб сўради,
Ўзим қилдим, дейди, ёзган туради.
Ростин айтгин, деб сиёsat қиласди.
Ёлғон сўз айтмоқни қайдан билдинг, деб,
Худой олғур қачон уста бўлдинг, деб,
Айтгин, чанқовузни кимдан олдинг, деб,
Мунча қочиб, бизни ҳалак қилдинг, деб.
Бизларни чарчатиб ташвиш берасан,
Кургур, сен таёқ еб биздан ўласан.

Шунда қизларга қараб, Кайқубод бир сўз деб турган экан:

Қизлар урса илон-чаён чақади,
Товканинг таёғи мойдай ёқади.
Ошикни қуйдирса, қошин қоқади,

Кайқубод Товканинг молин боқади,
Урган таёклари жуда ёқади.
Мендай ошиғингга қилма зулмни,
Бурилиб сўрагин менинг ҳолимни,
Бериб юрибман-ку қалин молингни,
Зулм қилиб урма харидорингни.
Мен кучарман сенинг нозик белингни.
Аччиқланиб менга зулм қиласан,
Илгаридан ўзинг ваъда берасан,
Сўзлар сўйлаб жуда ақлимдоласан,
Канизларман мунча мени урасан,
Илгаридан ваъда қилиб юрасан,
Саркани қўшганда ишни қиласан,
Кайқубоднинг, қизлар, кўнглин бўласан,
Айналтириб ўртага олиб турасан.
Сенга бу Кайқубод харидор эди,
Саркани қўшганда кўнглинг бор эди,
Аввал-охир сенга интизор эди,
Сенинг учун жуда гирифтор эди,
Сенинг ишқингда юрган хору зор эди,
Эр Кайқубод нега гуноҳкор эди.
Қизларингман бундай азоб берасан,
Ўзим қилдим десам, кўймайсан, урасан,
Нега менга бундай ишни қиласан,
Кайқубодни жуда фариб биласан,
Ўзингнинг кўнглинг бор, нега урасан,
Қизларингман мени бойлаб турасан,
Жуда ҳам сен менга азоб берасан.
Кайқубод қизларга нолиш қиласди,
Ундан сай шўхлик қип қизлар уради.

Ундан кейин Кайқубодни бир толга бойлаб қўйди, сайил боғда қирқин қизлари билан Товка ойим ётди, иссиқда терлаб, қизлар чарчаб қолган экан, кўзи уйқуга кетди. Товка ойим туриб келаяпти. Кайқубод келаётганини кўриб: «Энди урса, ўлдиради, урса, айтаман», — деб турибди.

Кайқубод эт қизувда қўп таёқ еган экан, энди бадани совиб, ҳамма ери оғриб турибди. Шоҳнинг қизи бориб: — Кайқубод, бу чанқовузни ким қилди? — деди. — Зиндонда Алпомиш қилди, — деди. — Таёқ еб юрганча илгаридан айтсанг, бўймиди? — деди. Кайқубод туриб айтди: — Муртини бурагани билмайсан, қошини керганни билмайсан, овлоқда айтаман деганни билмайсан, ўзинг имга тушумайдиган, қандайин сен фар эдинг?!

Бу сўзни эшишиб, Товка айтди: — Отамнинг Алпомиш деган бандиси бор эмиш деб эшиштаман, Алпомиш шу одамлардай одами, ё бир бургутдай нарсами? Кайқубод айтди: — Алпомишни кўрсанг, сенинг остингдан сувинг оқиб кетади.



— Эса мени эргаштириб борсанг, Алпомишиң қандай одам экан,
бир күрсам, — деди. Кайқубод айтди: — Эргаштириб борар
эдим, күп таёк еб каллам гувуллаб қолиби, күп таёк еб нимкуш-
та бўлибман. Агар малол келмаса, кўтариб кета берсанг, мана шу
йўл билан боради, деб кўрсатиб кета бераман. Шоҳнинг қизи
айтди: — Агар гапирсанг, ғижиним келади.

Шунда гапирмас қилиб, Товка ойимнинг белига миниб, га-
пирмаса ҳам гапиргиси келиб, бу сўзни айтиб кетиб бораётир:

Азаматлар олмас бойлар дастига,
Душман юрар кам давлатнинг қасдига,
Миниб олди Товка ойим устига,
Қарамас Кайқубод баланд-пастига.
Кўкрагим мулоим бўлди, худойим.
Йўлнинг узогини бергин илойим.
Ёўргалагин, юришингни кўрайин,
Ёкиб кетса сенинг билан бўлайин.
Қаддингдан айланай қалмоқнинг қизи,
Мени кўп болқитар сўйлаган сўзи.
Ҳар на деса айтганига кўндириди,
Харидорни сафрисига миндириди.
Қирқин қизи унда билмай қолади,
Ҳилламан Кайқубод муни минади,
Зиндан бетга қараб кетиб боради,
Юриш қылсанг, харидоринг олади.
Яна баҳор бўлса очилар гуллар,
Булутлар маст бўлса чалқиди қўллар,
Мушки анбар, ўзи гул юзли дилбар,
Харидоринг сағрингдадир муқаррар.
Шоҳнинг қизи билмаганим билдиридинг,
Алдаб-сулдаб, дилбар, сени кўндиридим,
Шоҳнинг қизи кўп ғайратинг бор экан,
Кайқубодни оч белингга миндиридинг.
Кўрсатиб устингда Кайқубод ночор,
Кайқубод дер жуда сенга интизор,
Гап билан болқитган сендайин дилбар,
Зиндан деганинг кўп бир узок йўл бўлар.
Шундайин ойимнинг кўнглин бўлади,
Бурилиб кўп юрди, ҳалак бўлади,
Товка ойимнинг зехни койиб боради.

Кайқубодга қараб, Товка бир сўз айтган экан:

Кайқубод не чоғли бордир илиминг,
Орқама ботади гупдор туюнинг,
Киссангда бормиди суюк чилиминг
Гапирма, Кайқубод, келди ғижиним.

Мендейин ойимга жабр қиласан,
Узок йўлдир, мени буриб минасан,
Элда йўқ ишларни нега қиласан,
Аччиқлансан, армон билан ўласан,
Мени мунча сен ҳам ҳалак қиласан.
Қалмоқшоҳнинг қизин аҳмок биласан.
Алпомиш деб эшитиб бўлдим интизор,
Бунча менга жабр қилмок недаркор,
Холинг билиб тўғри йўлга юра бер,
Чоҳ бошига энди бошлаб бора бер.
Яқинласак бирга-бирга борайик,
Қандай одам экан бориб кўрайик,
Тузук бўлса, унинг ҳолин сўрайик,
Яхши кўриб унга хизмат қилайик,
Тўғри юр, йўлларда ҳалак бўмайик,
Кўрса қулар аҳволимни ҳалойик,
Канизлар уйгонмай бориб-келайик.
Юришимиз қирқин қизлар билмасин,
У курғурлар гап етаклаб юрмасин,
Эл ичинда маломат сўз бўлмасин,
Бу ишимни ота-энам билмасин,
Сенинг кўнглингга сўзлар келмасин,
Буйтиб юрганимизни бирор кўрмасин.

Бу сўзни эшитиб, шоҳнинг қизига қараб, Кайкубод бу сўзни
айтиб турган экан:

Бу юришим, дилбар, сенга ўтади,
Худо берган якка михим ботади,
Жуда сени безовта ҳам этади,
Хар замон хаёлим олиб кетади,
Шоҳнинг қизи, ишқинг мени ўртади.
Аввал-охир бўлдим сенга интизор,
Сенинг жамолингга бўлиб гирифтор,
Жамолинг тўлишиб менга барқ урар,
Қараганда менинг ақлимни олар,
Бўлиб мудом мен ҳам сенга харидор.
Неча йил кўйингда бўлиб юраман,
Умрим ўтиб хаста бўлиб бораман,
Олис эди, мен яқинлаб қоламан
Мен сенинг сағрингга миниб бораман,
Ўлмасам, сенинг билан бирга бўламан.
Бу сўзни айтиб шунда кетиб боради,
Товқанинг аччиғи келди, билади,
Зинданнинг бошига тўғри боради,
Товқа ойим бу зиндонга қаради,
Зиндан ичиди бир шунқорни кўради.

Жамоли окшомни ёруф қиласы,
Бу хуснуга зиндан ёруф бўлади,
Товка кўриб бекнинг кўнглини сўради.

Товка Алпомишни кўриб, бир сўз айтиб турган экан:

Сизга қурбон бу менинг ширин жоним,
Зиндан ичидаги фариб бўлган меҳмоним,
Мен билдим, янгитда сўраб тураман,
Сизни билиб мен ҳам хизмат қиласман,
Чоҳ ичинда кўриб сўраб тураман,
Зиндандан чиқарсан, нимам бўласан?
Сизни сўраб мен ҳам хизмат қиласман,
Кўнглингда не гап борин биласман,
Қалмоқнинг юртидан ҳалак бўламан,
Сизни эшишиб меҳнат тортиб келасман,
Отим Товка, шохнинг қизи бўламан,
То ўлгунча сенга хизмат қиласман,
Зиндандан чиқарсан, нимам бўласан?
Давлатим бор, шоли шалдам ўрайин,
Жамолим балх уриб сенга қарайин,
Сени лойик кўрса қодир худойим,
Мендай ойим сенга чўри бўлайин.
Зиндан бўлган бегим, сендан сўрайин,
Зиндандан чиқарсан, нимам бўласан?
Сен сўйласанг, кўнглим бўлар барқарор,
Сен зинданда кўп ётибсан хору зор,
Сендан сўз сўраган Товка гажакдор.
Хар на сўзини бўлса бизга айта кўр,
Хизматингни ойим бажо келтирасан,
Зиндандан чиқарсан, нимам бўласан?

Бу сўзни эшишиб, Алпомиш ҳам бир сўз деган экан:

Шохнинг қизи, чоҳ бошидан қарадинг,
Нима талаб, нима бўлар муродинг,
Не сабабдан келиб ҳолим сўрадинг?
Азоб кўриб ширин жоним бу танда,
Етти йилдир умрим ўтди зинданда.
Устингга кийганинг яшил кўк эди,
Фариблиқда сеига кўнгил тўқ эди,
Не сабабдан келиб, дилбар, сўрадинг?
Менинг ҳолим ҳеч ким сўраган йўқ эди,
Қалмоқ юртда юрган одам кўп эди,
Зинданга қараган одам йўқ эди.
Бурилиб келдинг, мен ҳам ҳолинг билайнин,
Мен ҳам сенга бир яхшилик қиласайн,

Сўзим билгин, сенинг тоғанг бўлайин.
Қайтайин зинданда гангиган бошим,
Киёматча бўлар эди савашим,
Тор зинданда шоҳнинг қизи сўраса,
Мен бўлайин сенинг қовми-кардошинг.
Кўнглингни бўлма сен, гул юзли дилбар,
Сенга қанча айтадиган сўзим бор,
Мени сўраб келган бул моҳи анбар,
Сўраб кепсан ўзингдадир ихтиёр.
Қалмок қизи, сенинг кўнглинг биларман,
Зиндандан чиқарсанг, йўлдош бўларман,
Хизматингга лойик ишни қиласман.
Сўз эшил, гул юзли, айтган тилимдан,
Лочин эдим, парвоз қилдим элимдан.
Койил бўлдим худо қилган тақдирга,
Йўлиқиб қолганман ўзимдан зўрга,
Армон билан келиб тушганман тўрга,
Хизмат қилиб, шоҳнинг қизи, чиқарсанг,
Кариндош бўп юрай сен билан бирга.

Бу сўзни эшитиб, шоҳнинг қизи қайтиб жўнай берди: —
Кайқубод, бу Алпомишиңг ўзингга насиб қиласин. Мен оға, тоға,
қариндош топмай, бунинг олдига келганим йўқ, ўзимнинг ҳам
қариндошим кўп, — деди. Кайқубод айтди: — Езна, эринг
бўламан десанг, бўлмайми? Алпомиш: — Сенинг кўнглингга гап
келар деб турибман, — деди. — Бу ёнинг тўғри бўлса бўлади,
айта бер, — деди, — Шунда: — Эса айтиб кел, — деди.
Кайқубод Товканинг кейинидан етди: — Қайт, эринг бўламан
деяпти, — деди.

Шунда Товка келиб, Алпомишиңга қараб, яна бир сўз айтиб
турган экан:

Худо дейин, яратганга жилайин,
Яратган холиқдан мадад тилайн,
Қайта бошдан, бегим, сиздан сўрайин,
Зиндандан чиқарсан, нимам бўласан?
Мен йиғлайман қаттиқ шунда доди-дод,
Мени йўлдан қайтаргандир Кайқубод,
Чоҳ тубинда ётган энди валламат,
Зиндандан чиқарсан, нимам бўласан?
Қулоқ солинг, бегим, айттан сўзима,
Жавоб бергин мендай сарвинаозинга,
Ёш тўлгандир менинг жоду кўзима,
Қора зулфим ярашгандир юзима.
Мендай ойим бўлиб сизга кўп маҳтал,
Билмам, кўнглингда нима гапинг бор,
Хар на ўйлаганинг бўлса, айта кўр,

Зиндандан чиқарсам, нимам бўласан?
Обод бўлар муна ўсган элатим,
Сенинг билан бўлар менинг сухбатим,
Қадингдан айланай, лочин бекзодим,
Зиндандан чиқарсам, нимам бўласан?
Назар солиб соғу сўлга,
Гап бўлмайик қалмоқ элга,
Йўқса бизнинг билан бирга,
Даврон сурсак ўсган элга,
Зиндандан чиқарсам, нимам бўласан?

Бу сўзни эшитиб, Алпомиш ҳам бир сўз деб турган экан:

Сен сўрадинг, мен ҳам жавоб берайин,
Қайта бошдан вақтинг хушлаб кўрайин,
Икковимизни кўшса қодир худойим,
Ростин айтсан, сенинг эринг бўлайин.
Ўйнаб-кулиб юрсак сайли чорвокқа,
Гоҳи олчи бўлсак, гоҳларда чикка,
Олиб борсак сени эл билан халқа,
Сенга йўлдош, мен ҳам эринг бўлайин.
Кеча-кундуз бўлай сенинг улфатинг,
Кетсин бошдан сенинг фаму кулфатинг.
Зиндандан чиқарсанг бирга бўлармиз,
Жаҳонни сайл этиб ўйнаб-кулармиз,
Душман кўрсак қамсаб бошин олармиз,
Фанимларга қаттиқ кунлар солармиз.
Дилбар, қилган хизматингни кўрармиз,
Неча кун қалмоқда даврон суармиз.
Навода сен хизматингни аяма,
Менинг сўзим сира қиёмга олма,
Энанг билан бул отангга билдирма.
Отанг билиб қаттиқ зулм килмасин,
Килган хизматларинг зое бўлмасин,
Чоҳ тубида мендай хонинг ўлмасин,
Қандай бўлса, отанг жоҳил билмасин.
Таг остидан бўлиб юргин хизматкор,
Биз зиндандан чиқсан, кўнглинг топилар,
Майдон бўлса, бедов отлар чопилар,
Чопиб келса, баҳмал жуллар ёпилар,
Ошиқиб иш қилмоқ бунда недаркор,
Ошиқмагин, ҳар нарсанинг вақти бор,
Албатта, гул юзли, бўлгин хизматкор.
Бундай деб айтди, деб ҳаё килмагин,
Сен ҳам сира лодон кўнглинг бўлмагин,
Бу сўзимни сен ҳам оғир олмагин,
Зиндандан чиқарсанг, эринг бўламан.

Товка ойим бу сўзни эшитиб қайтди, канизларининг олдига
етди. Канизлар билан маслаҳат қилиб, тўрт одамни мардикор
солиб, ўзининг ўтирган ўрдасидан лахм қаздириб, бу сўзларни
айтиб, ернинг ости билан зинданга туширмакчин бўлди:

Мардикорга бу сўзларни айтади,
Тўрттовини ишга солиб ётади.
Товканинг ошиқлик феъли озади,
Бу тўрт одам тинмай лахм қазади.
Товка ойимнинг айтганини қиласди,
Тупроғини билдирмай тўкиб келади,
Алпомиш деб шул меҳнатни қиласди,
Қазган ғорда одам тикка юради,
Мардикорга кўп сўз тайин қиласди:
— Ҳазон урмай боғда гуллар сўлмасин,
Пинҳон сақла, ҳеч бир одам билмасин,
Тупроқ тўқсанг, ҳеч бир жонзот кўрмасин.
Одам билмас ерга тўкиб келинглар,
Бу ишимни эл одами билмасин,
Билиб бу сўзимни айб қилмасин.
Ҳар на деб сўйласам, они қилинглар,
Хизматига ишлаб ҳакни олинглар,
Нима десам айтганимни қилинглар,
Билдирмай, бул ишни пинҳон қилинглар,
Сўзинг бўлса менга айтиб туринглар,
Шул ишимни ўрин қилиб беринглар.
Бу сўзни тайнинлаб Товка қайтади,
Тўрт мардикор лахм қазиб ётади,
Зинданга тўғрилаб қазиб кетади.
Фам билан сарғайди гулдайин дийдор,
Шаҳар ҳалқи бул ишлардан бехабар,
Тинмай ишлаб ётирип тўртта мардикор,
Товка ойим устидан бўлиб хабардор,
Иш бошқариб кетар бунда канизлар,
Канизларга тайин қилган бу дилбар,
Ҳеч кима сирини айламас қиркинлар.
Хизматкорни қўймай ишга солади,
Нима керак бўлса мавжуд қиласди,
Тўрттоби ишлайди пулнинг ишқида.
Нима даркор бўлса Товка берсин, деб,
Товканинг бу иши ўрин бўлсин, деб,
Ҳалқ одами ҳеч ким билмай қолсин, деб,
Товка ойим биздан рози бўлсин, деб.
Ҳеч ким билмас бунинг қилган ишини,
Пул билан ишлатган тўртта кишини,
Шундай ишни бош бўп Товка қиласди,
Иркилмайин қазган ғорда юради,

Мардикорлар шундай ишлаб боради,
Товка ойим кўриб хурсанд бўлади,
Яхши хизмат қилиб пулни олади,
Хизмат қилиб булар қазиб кетади,
Неча кун, неча ой бунда ўтади,
Энди мазмуни чоҳга яқин етади.
Бек Алпомиш соҳда ётган тўради,
Шунинг учун кўп меҳнат қиласи,
Ишқибозлик шундай нарса бўлади.
Мардикорлар энди зинданга етди,
Қилган хизматлари — ишлари битди,
Мардикорни олиб Товка ойим қайтди,
Кўнглида бор гапни уларга айтди:
— Бундан кетиб хаёлингни бўлманглар,
Яхшилик кўр, ёмонликни кўрманглар,
Узоқ яшаб, кўп йилгача ўлманглар.
Бу сирни бировга маълум қилманглар,
Ёру дўстим, деб айтиб юрманглар,
Бировга айтиб кўп пушаймон қилманглар,
Эҳтиёт бўл, ҳеч ошкоро қилманглар,
Товканинг сўзини ҳазил билманглар.
Кўрсанглар ҳам ҳеч бир ишни кўрманглар,
Хуш келдинглар, энди йўлдан қолманглар.
Бу сўзни айтиб хизматкорни жўнатди,
Форга қараб энди Товка ойим қайтди,
Фор билан Товка ойим у юриб кетди,
Зиндандаги бекдан хабар олибди,
Алпомиш қошига Товка борибди.
Шундай бўлди мунда Товканинг иши,
Хизмат қиласи Товкадайнин бувиши,
Бу форга сифмайди шунқорнинг боши.
Чиқарсам деб Товка умид қиласи,
Ўзи тутул бекнинг боши сифмайди.
Балки Товка кўнгли норизо бўлади,
Алпомиш бўйнига кўлин солади.
Хар куни бир марта бунда келади,
Алпомиш ҳам руҳбозлик қип туради,
Товка неча ишни умид қиласи,
Бунинг кўнглидаги ишин қилмади.
Кандай бўлса вақтин хушлаб туради,
Товка жуда югуриб хизмат қиласи,
Нима топса бекка олиб келади,
Шундай бўлиб хабар олиб юради.
Товканинг ишин қизлар билади,
Горнинг оғзи ул ўрдада бўлади,
Билдирамай устидан хаспўш қиласи.
Ул куни Товка ойим зинданда эди,

Сурхайл кампир бунда келиб қолади,
Қалмоқ юртда бу белгили балоди(р),
Барча қызлар бул ўрнидан туради,
Бу кампирни юқори ўтинг қиласи.
Кампир биллиб бу замон түрга ўтди,
Кампир билмай энди хаспушга етди,
Англамай хаспушни босиб олибди,
Хаспүш ўйилиб кампир юмалаб қолибди,
Кампир билмас не аломат бўлибди,
Анча йўлга у юмалаб борибди.
Ҳеч билмайди, бу гап қандай бўлибди,
Ўзини ўнгариб форман юрибди,
Бу кампир ҳам у зиндонга борибди.
Алпомишман Товкаойимни кўрибди,
Энди кампир бир сўз айтиб турибди,
Товка қилганини энди билибди.

Кампир икковини кўриб, айтиб турган сўзи:

Айтган сўзининг поёмини билгин-чи,
Фар бўлибсан, Товка болам, ўлгин-чи.
Устингга кийганинг яшил, кўқмиди,
Мундай кунда сенга кўнгил тўқмиди,
Ўз юрtingда бундай банди йўқмиди?!
Сен эшитгин мендай момонг сўзини,
Туман қиссан бек отангнинг юзини,
Бандиларман кўрдим шохнинг қизини,
Фар бўлибсан, Товка болам, ўлгин-чи.
Бошдин тожи, қўлдан бериб давлатди,
Зиндонда бандиман қуриб сухбатди
Мундай ишлар, болам, сенга уятди(р).
Бир бандига бундай интиқ бўлибсан,
Ўрдангдан фор қазиб бунда келибсан,
Алпомишман сухбат қуриб турибсан,
Билдим, болам киймир жалаб бўлибсан,
Элда йўқ расмни сен ҳам килибсан,
Мен айтайнин, сен жувормак, ўлибсан,
Фар бўлибсан, Товка болам, ўлгин-чи.

Бу сўзларни айтди Сурхайил маston,
Бул ишдан хабардор бўп бу замон,
Алпомишга энди бу кампир душман,
Кампир билди деб Товка қилди пушаймон,
Душман билди, энди иш бўлди ёмон.
Давлатли хон Сурхайилни кўради,
Фор оғзида у гапириб туради.

Сурхайил мастанга бермай деб омон,
Ушласам солай деб охири замон,
Чирпиниб интилди унга бу замон.
Бўлмади Ҳакимнинг айтган бу иши,
Бу форга сифмади шунқорнинг боши,
Қошида бор Товка ойдай бувиши.
Ушла деди, Товка ойимни буюрди,
Бурилиб қочади Сурхайил айёр,
Кувиб бораётир Товка зулфакдор,
Ушла, деб чирпиниб турар бу номдор,
Букилиб иргиди Сурхайил айёр,
Ёш-да, қувиб етиб олди гажакдор.
Ойдай Товка етиб кўнглин хушлади,
Икки қўллаб этагидан ушлади,
Зўр айёрдир жуда силкиб ташлади.
Товка ойим ўтириб бунда қолади,
Кўйлагидан бир эн юлиб олади,
Кампирнинг қорасин кўрмай қолади.
Бу Сурхайил омон-эсон қутулиб,
Шу замонда фордан чикиб боради.
Бир ўлимдан кутулдим, деб жўнади,
Сурхайилни қирқин қизлар кўради,
Ҳаммалари қўрқиб четда туради,
Қарамай Сурхайил ўтиб боради.
Орт-сиртидан қиркин қизлар кўради,
Кўйлаги юлиниб кетиб боради,
Кўп канизлар — бари ҳайрон қолади,
«Қурғур айёр бир балони қиласди»,
Бурилмайин кампир кетиб боради.
Бу зиндоңда бўлган ишни билади,
Ҳар на гап бўлганини ўйлаб юради,
Қалмоқшоҳга кампир бориб қолади.

Шоҳнинг қошига бориб, кампирнинг гапириб турган сўзи:

Армон билан ўлдим ғаминг е, деди,
Қадингдан, подшоҳим, берман ке, деди,
Кўрганини Қалмоқшоҳга не, деди.
Шоҳим, эшит менинг айтган сўзимни,
Тубан килган элда сенинг юзингни,
Алпомишман кўриб келдим қизингни,
Куёвлисан, шоҳим, бергин суюнчи,
Ҳазил билма менинг айтган сўзимни,
Тийиб ололмадинг Товка қизингни,
Ўлдираёзди-қу менинг ўзимни,
Жалаб билдим сенинг Товка қизингни.
Ҳар кун бориб қурадикан сухбатди,

Бундай ишлар, шоҳим, сенга уятди(р).
Бу сўзимни хўп бир ўйлаб кўрсанг-чи,
Ҳар на айтган поёмимни билсанг-чи,
Куёвлисан, шоҳим, бергин суюнчи.
Муна элда қизинг бежой бўлибди,
Ўрдасидан лахм қазиб борибди,
Жуда ҳам қизингнинг ақлин олибди,
Иккови зинданда бирга турибди,
Бандининг ишига қизинг толибди(р),
Эл кулдириб, ёмон ишни қилибди.
Ҳеч замонда шундай ишлар бўлами,
Шоҳнинг қизи бандини тенг кўрами,
Эси бўлса, банди билан юрами?!
Элда, шоҳим, қизинг шундай иш қиласар,
Подшолар шаънига бу иш недаркор,
Шундай иш қилибди қизинг муштипар,
Омон-эсон кўриб келдим муқаррар.
Сендан ўзга одам бўлса бу ишга,
Рахм қилмай бундай қизни ўлдирап.
Ўзинг билиб сен бир ишни қилгин-чи,
Қўриб келдим, куёвлисан, суюнчи.

Шунда бу сўзни эшитиб, Қалмоқшоҳ туриб айтди: – «Ўзинг-
дан чикқан балога, қайда борарсан давога». Товка бориб уйтиб
юрса, сен бизга Алномишини маст қилиб бермадинг, бир балони
маст қилиб бердинг, чириб ўлиб кетади, деб зинданга солдинг,
ҳаммага ҳам ташвиш бердинг, шу ишларни бекор килдинг. Бун-
дан чиқади, бул ўлмайди экан.

Сурхайил мастон туриб айтди: – Сен подшосан, сен нима
қиламан десанг, ҳукминг етади, беш юз аравани қўшсанг, Зил
тоғига буюрсанг, тош юклаб келса, Алномишининг зинданини тош
билан кўмса, устидан тош босар, ҳар ёғидан ер қисар, шунда
ўлмаса, бул ўлмайди экан, – деди. Бу сўзни эшитиб, Қалмоқ-
шоҳга маъқул тушиб, беш юз аравани тошга жўнатди. Товка бу
хабарни билиб, аравакашларнинг олдига чикиб, бу сўзларни
айтиб турибди:

Чечани сўйлатган қизил тил бўлсин,
Сенга айтган менинг сўзим шул бўлсин,
Душманнинг шавкати келиб эл бўлсин,
Баринг бирдай отинг қўшиб борасан,
Халак бўлган қариндошим, йўл бўлсин?
Хали ҳам қайтинглар, бундай қилманглар,
Мени десанг, тоқقا-тошга борманглар,
Сурхайилнинг етагига юрманглар.
Хизматкорсан, кўп ишлардан бехабар,
Зил тоғида бордир битта айдахор,

Борсанг, айдахорга бўларсан дучор,
Қайтгин энди тоққа-тошга борманглар.
Айдахор дамига дучор бўлманглар,
Ўз жонингга бекор жабр қилманглар.
Сен борсанг, айдахор ютар ўзингни,
Қайтиб кўролмайсан улу қизингни.
Менинг айтган сўзим ҳазил билмагин,
Хали ҳам қайтиб, ўзингни ҳалак қилмагин,
Сен бола-чақангни кўрмай ўлмагин,
Баринг тўп бўп чувлаб йўлга кирмагин,
Қариндошлар, билмадинг-ку ишингни,
Эгам гангитдими сенинг бошингни,
Тоғдаги айдахор ейди гўшингни,
Кўролмайсан элда денги-дўшингни.
Айдахордир, ул ишкирган зўрабор,
Тортганда кетади дамига тоғлар,
Шундай зўрга бориб бўлмагин дучор,
Қайтгин энди сенинг нима жонинг бор,
Бекор бориб унда ўлмак недаркор?!
Сурхайил сўзиман кетиб борасан,
Борсанг келмай, Зил торида қоласан,
Баринг бирдай якка мозор бўласан,
Бола-чақанг ебир-есир қиласан,
Хали ҳам қайт, икки бошдан ўласан,
Бундан борсанг, кўп пушаймон қиласан,
Ўз бошингни кутқаролмай қоласан,
Қайт энди, бехуда ғарид ўласан.

Бу сўзни эшитиб, аравакашлар ҳам бир сўз айтиб турган
экан:

Бизлар Сурхайилни нима биламиз,
Шоҳ буюрди, бизлар қандай қиласмиз,
Қалмоқшоҳнинг хизматкори бўламиз,
Ажал етса, армон билан ўламиз,
Қайтолмаймиз, ҳар гап бўлса борамиз,
Бу тақдирда не ёзилган кўрамиз,
Агар қайтсак, Қалмоқшоҳдан ўламиз.
Шоҳ сўзини биз мухтасар биламиз,
Қайтарма, ўлсак ҳам бизлар борамиз,
Азали тақдирга нимиш қиласмиз.
Отга солиб арпа билан ийирди,
Қор ёққанда карвон солар чийирди,
Зил тоғига шоҳим бизни буюрди.
Беш юз киши анжом чоғлаб борамиз,
Қалмоқшоҳнинг айтганини қиласмиз,
Сенинг сўзинг билан қайтсак, ўламиз,

Кайда борсак, биз тутулиб қоламиз,
Кайтармагин, шохнинг қизи, борамиз,
Таваккални бир худойга қиламиз.
Устингга кийисан гулгун кирмизи,
Шундай бўлди сенга хизматкор сўзи,
Бизни сен қайтарма, ул шохнинг қизи.
От ҳайдайик, Зил тоғига борайик,
Омин деса париштаю малойик,
Сайл этиб дунёни бизлар кўрайик,
Нима бўлса, бизлар бориб-келайик.
Кайтармагин, бизлар тоғда юрамиз,
Калмоқшоҳ сўзини ўрин қиламиз,
Бизлар қайтсан, қандай шохга борамиз,
Айдаҳор йўлиқса, қандай қиламиз.
Бир худога бизлар йиғлаб кўрамиз,
Кайтармагин, ажал етса ўламиз.

Бу сўз билан қайтмай, аравакашлар жўнаб кетди. Товка ойим
буларни ўз кўзи билан кўриб, қайтиб зиндонга келиб, Алпомишиш-
га қараб, бу сўзни айтиб турган экан:

Кўздан ёшим мунчоқ-мунчоқ тизилди,
Дийда гирён бўлиб бағрим эзилди,
Ёлончи дунёдан ризқинг узилди,
Сенга қараб менинг кўнглим бузилди.
Бошингдан кетгандир тожи давлатинг,
Ажал етиб, энди тўлди мухлатинг,
Бир иш билиб қолмас менинг тоқатим,
Фариблик элларда қолди жасатинг,
Куниба-кундан зиёд бўлди меҳнатинг.
Сенинг билан бирга Қўнғирот бормадим,
Чўринг бўлиб хизматингни қилмадим,
Ўз юртингга бориб даврон сурмадинг,
Мендай ойим билан ўйнаб-кулмадинг,
Хозир бўлган ишни, хоним, билмадинг,
Фариблиқда фариб ўлган, сultonим!
Фам билан сарғайди гулдайин дийдор,
Эли-халқинг сендей шохга интизор,
Бу қалмоқлар, билдим, сени ўлдирап,
Кавми-кариндошинг элда бехабар.
Фариблиқда қазонг етиб боради,
Душман сенга қаттиқ азоб беради,
Йиғлай бергин умринг охир бўлади.
Дод деганда эшитмайди сўзингни,
Бадбахтлар тўрт қилас икки кўзингни,
Сарғайтади бунда сенинг юзингни,
Ўлдирап бадбахтлар сенинг ўзингни.

Муштипарман, не иш келсин қўлимдан,
Армонда айрилдинг ўсган элингдан,
Армонман айрилдинг мендай гулингдан,
Умидингни узгин ширин жонингдан,
Тақдиринг бўлмади ўсган элингдан,
Сен бандисан, ҳеч иш келмас қўлингдан,
Фарибликда гарип ўлган, сultonим!

Бу сўэни эшитиб, Алпомиш: — Қалмоқлар бир зулм қиласман
деганини эшигансан, ул сабабдан бу сўзларни айтдинг сен, —
деб бу сўзларни айтиб, тасалла бериб турибди:

Худодан беамр ишлар бўлама,
Ажал етмай бунда чибин ўлама,
Ўлдирап отангнинг қўлидан келама,
Ўлар деб сен кўнглинг бўлиб жилама.
Хизматингга қурбон бул ширин жони,
Хафа бўп йиглама, лодон, бемаъни,
Ажал етмай ўлмас Бойсиннинг хони,
Беамр чиқмайди чибиннинг жони,
Бизни ўлдиролмас қалмоқ сultonи,
Хозир бизга макон шоҳнинг зиндони,
Бу сўзингнинг йўқдир, дилбар, поёни.
У қалмоқлар бир лопини ургандир,
Шундай қиласмиз деб гапириб тургандир,
Айтган сўзин сендай ойим билгандир,
Ўлдиради деб ул кўнглингга келгандир,
Қалмок сўзи сени дикқат қилгандир,
Қалмок ўлдиролмас мендай полвонди,
Хаёлингга неча сўзлар келгандир,
Душман сўзи сени дилтанг қилгандир,
Ўлар деб ғам ема мендай ўғлонди,
Худо қилганига рози бўлганди.
Неча йиллар бу зиндонда турарман,
Ўлмасам бир куни озод бўларман,
Қалмоқларнинг тандан бошин юларман,
Хафа бўлма, дилбар, шодмон қиласман.
Бир чангририб қалмоқдай юрting,
Зарбимдан титраса мұна элатинг,
Очилар бир куни ўлмасам баҳтим.
Эсга олдим ўсган мамлакатимни,
Мен сўрайман миниб келган отимни.
Етти йил зиндонда хор бўлган бошим,
Ҳеч хабар билмади қавми-қардошим.
Жилва қилас бу эсимда элатим,
Етти йил зиндондир менинг мухлатим,
Қалмоқлар қўлида бормикан отим?

Жонивор бор бўлса менинг қанотим,
Борин билсам тоша келар файратим.
Эшитгин, гул юзли, айтган додимни,
Отанг ўлдирганми менинг отими?
Ёш тўлдирма, бунда жодугар кўзи,
Банди бўп бормикан Бойчибор ўзи?
Билсанг, хабар бергин, қалмоқнинг қизи.
Тўтиё айларам изингни тавоф,
Кўп ишларни қилдинг бизларга савоб,
Сен билсанг, сўзима бергайсан жавоб.

Бу сўзни эшитиб, шоҳнинг қизи ҳам бир сўз айтиб турган
екан:

Кўрганим йўқ, хоним, ўсган юртингни,
Нишонини айтай, билгин, отингни.
Отамнинг қўлида бир от турибди,
Оёғига темир парчин урибди,
Ул бўйнига чўяндан гул солибди,
Душман дейишиб отга азоб берибди,
Етти йилдан бери азоб кўрибди,
Ётиб туролмайди, шундай бўлибди,
Хафа бўлиб бошин ерга солибди,
Жуда ҳам жонивор ғамгин бўлибди,
Қалмоқ кўпи шундан ҳадик қилибди,
Ўзбакнинг оти деб бари юрибди,
Хоним, отинг шу Чибор от бўлади,
Шундай бандда азоб кўриб турибди.
Ҳеч бир одам уни парвариш қилмас,
Қараб ҳеч ким унинг кўнглини билмас,
Ҳеч ким қараб унинг олдига бормас,
Ул азобдан, хоним, отинг қутулмас,
Билдим, унга ҳеч ким ему ўт бермас,
У банддан чиқмоққа қуввати келмас.
Кўрдим ўзи хайвон экан зўрабор,
Қалмоқ юртда от бўлмайди баробар,
Етти йилдан бери шундай бўп ўтар,
Азоб тортиб ётириб отинг Бойчибор.
Кимники эканин нима биламан,
Гузарим тушганда кўриб қоламан,
Кўрганимни, хоним, айтиб бераман.
Ўз юртингда сен ҳам бексан, тўрасан,
Етти йилдан бери азоб кўрасан.
Ўзинг қандай бўлсанг, отинг ҳам шундай,
Қалмоқлар килганди отингни андай.
Шул фикрда ул жонивор туради,
Етти йилдан бери азоб кўради.

Шунда Алпомиши бу сўзни эшитиб, Товкага бу сўзни тайинлаш
турган экан:

У қалмоқлар мени банди қилгандир,
Маст қилиб қабоҳат кунлар согландир,
Ўз отима судиратиб ургандир,
Олиб келиб чоҳ бошинда тургандир,
Чоҳга ташлаганин отим кўргандир,
У жонивор мени ўлди билгандир,
Менинг учун аза тутиб тургандир,
Хеч ким билмас аза тутган ҳайвонди!
Кулок сол, гул юзли, айтган тилима,
Исириқ нишон берай сенинг қўлинга,
Бориб тутат отим турган ерина,
Исим борсин Бойчиборнинг бурнина.
Сўнгра менинг тириклигим билади,
У отнинг зарбини қалмоқ кўради.
Айтганин бу Товкага беради.
Туриб Товка энди шундай йўл тортди,
Исириқни олиб таблага етди,
Қалмоқларга билдирамади, тутатди,
Тутаган бул ис бориб Чиборга етди,
Отнинг кўнгли анча равшан бўлибди.
Кўнглида Ҳакимбек келгандай бўлиб,
Ерга соглан бошин баландга олиб,
Жониворнинг кўнгли равшан бўлади,
Бу таблада дувлаб ҳайвон кишинади.
Фулу занжир майда-майда бўлади,
Бу парчиндан ўзин озод қиласди,
Бу шаҳардан кишинаб кетиб боради,
Мурод тепа қараб энди жўнади.
Қалмоқ кўриб бари ҳайрон қолади,
Ўзбак оти нега бундай қиласди?
Чоқдан бу от кутурди деб юради,
Жондан тўйган бунга дучор келади.
Қалмоқ бари ҳайрон бўлиб қолади,
Ўрасига Товка келиб туради,
Бу ишни қалмоқлар кимдан кўради?!
Бу безавон дувлаб кишинаб боради,
Зиндоннинг бошига бориб қолади.
Ҳаволаниб учган суксур шайланди,
Қалмоқлар ичига фамлар жойланди,
Саросима бўлиб бари ўйланди,
Кўринг назаркарда бекнинг Чибори,
Етти марта бу зиндонни айланди.
Ховирини паст қилиб шундай қаради,
Чоҳ тубинда Ҳакимбекни кўради,

Бекни тирик эканини билади,
Куйругин кўтариб, ўйин қиласди.
Назаркарда кўринг энди ҳайвонди,
Қанча азоб, ғамдан қутулиб келганди,
Ҳеч азобни кўрмагандай бўлганди(р).

Ҳакимбек отнинг келганини кўриб, азизларни шафе келтириб, бу сўзни айтиб турган экан:

Азамат мард эдим, бўлмайин ночор,
Дўстга зор айлама, душманларга хор,
Шохимардон, шохи Кавсар йўл бошқар,
Алининг шогирди Бобои Қамбар,
Али билан йўлдош Молики аждар,
Рахмат дарё тошар ул файзи сахар,
Рахматингдан мендай мискин умидвор,
Рахмат дарёнг тоша тилар дарвишлар,
Садағанг бўлайин имом, чилтанлар,
Рахм алаб ёр бўлинг ночор қулларга.
Дунёдан ўтдилар ўн икки Аҳмад,
Жону дилман қилди худога хизмат,
Садағанг бўлайин Расул Муҳаммад,
Оtingдан айланай Қозиол ҳожот,
Ўлимнинг кечин бер, имонга кувват,
Аввал берган бош давлатинг — тансаҳат,
Шайтондан имонни сақланг саломат,
Ҳазрати Нўғой, Эр Бахшойиш ё мадад,
Мазгилинг Фазира шайхи Худойодод,
Мерғанларнинг пири Жамшиду Аҳмад,
Рахм алаб, ёр бўлинг ночор қуллара.
Умматим дент, ё Муҳаммад Мустафо
Бировларинг шери даргоҳ, Босафо,
Садағанг бўлайин канизи даргоҳ,
Мазгилинг Машҳадда имоми Ризо.
Парпи ота мададкор, бир ҳиммат гузар,
Берса Новқа бунда мадад Бормозор,
Оқтош тирғишилдири, бири Ёрмозор,
Ҳазрати Миркулол, биридир Қўчкор,
Авлиё, анбиё бўлинг мададкор,
Бў сўзни айтиб шунқор ҳожатин тилар,
Бир каромат айланг, азиз чилтанлар.
Тор зинданда худо деди, жилади,
Кулоч ёйиб ҳожатини тилади.
Холиқсан, каримсан, қаҳрингдан қутқар,
Қодир обло, ўзингдадир ихтиёр,
Шохизинда, эр Дониёр, пайғамбар,
Хўжай Зумрати, Хўжай Аҳрор,

Бобо якка пирсиз, эр Хўжамозор,
Эшони сулиқ Сўфи Оллоёр.
Манчил билан Хўжа Исҳок, бўлинг ёр,
Кадамжойинг дейди Шахрисабз шаҳар,
Садағанг бўлайин, Ҳазрати Лангар,
Хўжа Юсуф Ҳамадоний, бўлинг ёр,
Хўжа Аҳмад, Башир, Хўжайи Чорчинор,
Комил пирлар, бўлинг энди мададкор,
Бир назар айласа азиз чилтанлар.
Бу сўздайтиб Ҳаким ўғлон туради,
Бунинг йиғлагани қабул бўлади,
Жамъи азизларнинг руҳи келади,
Чилтан келиб кўп тарбият қилади.
Зиндан бўлганига етти йил ўтди,
Энди олди бошдан ғаму кулфатди,
Бекнинг оти бир ағанаб турибди,
Қўл очиб чилтанлар дуо килибди.
От қўйруғи боз кирқ қулоч бўлибди.
От қўйругин у зинданга солибди,
Ҳакимбек белига бойлаб олибди.
Жонивор зўр уриб шу замон тортди,
Бойчиборга пирлар берди қувватди,
Ҳакимбек у замон зиндандан чиқди.
Дунёни кўргандай бўлиб қолади,
Ҳакимбек отини тавоғ қилади.
Иккови айрилиб етти йил ўтган,
Устида абзали эскириб битган,
Абзали бир-бирига қовиб ҳам кетган.
Айил-пуштанини отнинг бўшатди,
Тери, шилтасини энди ушатди.
Ялангочлаб жониворни қашлабди,
Қашлагани отга ёқиб қолибди,
Ўқраниб бул айлаиб турибди,
От билан топишиб шукур қилибди,
Қалмоқ халқи бул узокдан кўрибди,
От олдинда кўрди, бирор турибди.
Қалмоқлар ботмайди, бўйлаб қаради,
Боролмайди, бул узокдан кўради,
Бир-биридан кўрдингми деб сўради.
«От олдиндаги одамдай балодир,
Мазмуни Алпомиш чиқиб қолади,
Чикмаса, отнинг олдидағи ким бўлади?!»
Қалмоқлар тўлигиб кўркиб қолади,
Шаҳарда тўплиғиб анча юради,
Кўрмаганга кўрган хабар беради,
Аравакаш яқин келиб қолади.

Мехнат кўриб жуда азобни тортган,
Беш юз аравага тошини ортган,
Қичаб юриб бари йўлни тўзитган,
Яқинласа Алпомиш чиқиб ётган.
Кўрди шундай отини эгарлаётган.
Омон-эсон чиқиби шундай полвон.
Чоҳ бошида Алпомиши кўради,
Билса, Зил тоғида деган айдаҳор,
Зинданнинг бошидан пайдо бўлади.
Бирдан кўриб ғалжирашиб қолади,
Отни ташлаб бари қочиб боради,
Қалмоқшоҳга бориб хабар бермакчун,
Айтар сўзин билолмайин боради.
От-арава чўлда қолиб кетади,
Пиёдалаб шоҳ қошига етади.
Энди ўлдик деди, шоҳга боради,
Қалмоқшоҳга булар хабар беради:
— Зиндандан Алпомиш чиқиб қолиби,
Кўрдик бизлар от эгарлаб турибди,
Аравакаш кўриб хабар бериби,
Қалмоқ юрти ғалагул бўп юриби:
Қарасанг, бир дамда келиб қолади,
Билгин, қалмоқ, юртинг вайрон бўлади,
Айдаҳордан чўртта ёмон балоди(р),
Харакат қил, ким баробар бўлади.
Уни кўриб келган биздай хизматкор,
Беваҳм бўп турма, шоҳим, муқаррар.
Бу сўэни эшитиб қанча амалдор,
Карнай-сурнай бўлди юртига хабар,
Йигилади шоҳдан инъом олганлар.
Шоҳига айтар у зиндан чиқиби,
Чиққанини халойиқлар кўриби,
Кўрганлари келиб хабар бериби,
Қалмоқ шоҳи анжом тузаб туриби.
Шу замонда қалмоқ подшо бўюрди.
— Лашкар тузиб энди йўлга солинглар,
Бу шаҳарнинг атрофини олинглар,
Сиёсатман кейинга қайтаринглар,
Келса қайтмай туриб уруш килинглар,
Колмай, лашкар, энди равон бўлинглар,
Менинг амрим тутиб бундан борицглар,
Ўзи кетсин, юртни кўриб туринглар.
Бу сўзларни айтди қалмоқнинг шоҳи,
Отланди анжомдор қанча сипоҳи.
Қалмоқ юртга шу овоза бўлади,
Байдоқ-байдоқ лашкар чиқиб жўнади.

Намойишига карнай тортиб,
Сиёсатга тўплар ортиб,
Шаҳарларни гумбурлатиб,
Қалмоқ лашкари жўнади.
Бари қалмоқ қўнглин бузиб,
Хар тарафга нома ёзиб,
Жўнади қалмоқ жам бўлиб,
Хар кўча аскарга тўлиб.
Жўнаётир баланд-пастда,
Саф-саф бўлган, даста-даста,
Хабар бўлиб чапараста.
Отли лашкар илгарида,
Пиёда аскар кейинида.
Ўнгу сўлни лашкар опти,
Бу шаҳардан чиқиб бўпти.
Кейин қулогига теккан,
Сўғин келиб қўшилаяпти.
Ҳали келган йўқ-ку ботир,
Лашкар қўниб, тикиб чотир.
Саф-саф бўлиб лашкар турди,
Шаҳар қўримоқчин бўлди.

Алномиши кўриб, Алномиш ҳам бу лашкарни билиб, ёв-ярогини илми каромат билан чилтланлар бериб, уруш-ярогини гамлаб, отланиб, қалмоқларнинг устига бу сўзларни айтиб кела берди:

Икки дунёда раҳбарим,
Марди майдоним, ё Али,
Иzlaram сиздан шафоат,
Чобук суворим, ё Али.
Йигит пири Шоҳимардон,
Мадад берса шери Яздон,
Тиларман қодир худодан,
Бу майдонда бергин омон.
Очилгайми менинг баҳтим,
Бузарман қалмоқлар раҳтин,
Сенинг чиққан тоҷу таҳтинг,
Ё сеники, ё меники.
Йўқдир, қалмоқ пойимларинг,
Кўп юракда войимларинг,
Ўрдадаги ойимларинг,
Ё сеники, ё меники.
Хафа фалак солма зулм,
Бемаҳал етмасин ўлим,
Сўраб ётган катта элинг,

Ё сеники, ё меники.
Кўрганда колмас тоқатим,
Кўп бўлди менинг меҳнатим,
Сўраб ётган сенинг юртинг,
Ё сеники, ё меники
Бек Ҳаким зиндан бўлади,
Эгам бизни кутқаради,
Майдонда кимлар ўлади,
Бу савашда ким қолади,
Қолган бу ишни кўради.
Фамингни егин, қалмоқлар,
Юртинг ўртада қолади.
Бу сўзларни айтиб қайсар,
Саф-саф бўп турди қалмоқлар,
Бедов отга қамчи уриб,
От қўйди шундай айдахор.
Ярашиққа тикиб чотир,
Ёлғиз от кўйгандир ботир,
Хитойчалар патир-путур,
Отилиб майдон ичинда.
Кўрганларнинг ақли элтиб.
Боз кўрсам деб бўлиб интик.
Бу майдонда қора милтиқ,
Отилиб майдон ичинда.
Бедовга заррин айиллар,
Бу ишга душман қойиллар,
Шобғон милтиқ, жазойиллар,
Тўп бузар майдон ичинда.
От чопади алвон-алвон,
Бандам деса қодир мавлон,
Шундай килиб бек Ҳакимхон,
Кон тўкар майдон ичинда.
Қилич келиб алаб-алаб,
Олтин коса гулгун шароб,
Ичилиб майдон ичинда.
Бу майдонда бедов отлар,
Айдахордай катта тўплар,
Ишқирав майдон ичинда.
Бир-бирига келиб ғолиб,
Ботир уришмоққа толиб,
Ҳаким ёлғиз уруш килиб,
Чиккан зиндандан қутулиб.
Кўринг бундай валломатди,
Мингандир Бойчибор отди,
Ҳаким бекдир, тикка чопса
Оғир сафни узиб кетди.
Нечовга солиб қиличди,

Чапараста кесиб бошди,
Ёлғизман деб қараб турмас,
Алпомиш танҳо савашди.
Бир нечанинг ақли шошди,
Ота боладан адашди,
Кўп қалмоқ билан уришди.
Заҳмат ўтиб жондан кечган,
Киличидан қонни сочган,
Кўп қалмоқ билан санчишган,
Ўликларга ражир тушган,
Қалмоқ билан кўп суришган,
Ёлғиз юрибди Ҳакимхон,
Ён-ёғида кўпдир душман,
Сира парво қилмас султон,
Бермасман дейдику омон.
Қалмоқ келар тўгиб босиб,
Кайтмас майдонда савашиб,
Мард йигит дарёдай тошиб,
Бир нечанинг ақли шошиб.
Кайтма дейди қалмоқ бари,
Ўртага олар чувуллашиб,
Кайтмай саваш қилинг, дейди,
От қўя бер баринг, дейди,
Агар кайтсанг шўринг, дейди,
Ўласан бунда баринг, дейди.
Сўз айтиб қалмоқнинг шойи,
Ажаб кирғин бўлди жойи.
Илгарида соп ботирлар,
Совут-қалқон кийган қайсар,
Уруш майдонин ахтариб,
Булар бекка дучор бўлар.
Қўринг Алпомиш ишини,
Қандай ботир чиқиб қолса,
Қўймай кесади бошини.
От остида калла қолди,
Балки қалмоқ ўлжа бўлди,
Қора ерга қон тўкилди,
Қалмоқлар ўйланиб қолди,
Ўнгу сўлни туман олди.

— Билмаймиз бу қандай кунди(р),
Омон қолмоқ гумон бўлди,
Бизга охир замон бўлди,
Ёлғиз ўзбак ёмон бўлди,
Танҳо солди бу кирғинди.
Ёлғиз, кўп лашкардан қайтмас,

Бунга ўтмас тифу олмос.
Хеч парво қилмайди шағалмас(т),
Хеч одам баробар келмас,
Адо қилмай сира қўймас.
Баримизни кирмай тинмас.

Шуйтиб титрайди қўп душман,
Хар дара ўликка тўлган,
Бу орага қон тўкилган,
Қон билан корилиб қолган,
Қайтмай Ҳаким қилиб майдон.
Кесилди душманнинг боши,
Сел бўлди қалмоқ кўз ёши,
Шулдир Ҳакимбекнинг иши.
Қалмоқ кўпдир, тоб беролмас,
Бунга рўбарў келмас,
Қўлида бор кескир олмос,
Сермаганда жон кутулмас.
Нечовларин чопиб ўтди,
Қалмоқ юртини бўзлатди,
Бундай юртни изиллатди,
Жуда қалмоқни қўркитди,
Ушлаганин беркитди,
Ҳаким шундай чопиб ўтди,
Нечовлар ярадор ётди,
Бир хили бўлиниб кетди.
Майдон бўлса кўнглин хушлар,
Қўлида ўткир қиличлар,
Ғанимнинг сирини фошлар,
Шундай бўлди бу урушлар.
От қўйишар якка-якка,
Тутуни чиқиб фалакка,
Сигиниб карим самадга,
Танҳо чопар қўп қалмоққа.
Хар тарафдан қамсаб келар,
Келганига қилич солар,
Қанчасини олдига солиб,
Етганининг бошини олар,
Кочиб-кувиб уруш қиласар,
Бунда ажаб қирғин бўлар.
Неча вактлар уруш бўлди,
Жуда майдон туруш бўлди,
Ботирларга хўб иш бўлди,
Кўринг бундайин полвонди,
Сулатгандир неча танди,
Қалмоқларни тўплаб олди,

Күп қалмоқлар қочиб берди.
Тоб бермас сиёсатига,
Тоқат қилиб туролмайды,
Ҳакимбекнинг файратига.
Кочиб бораётир шошиб,
Шошгандан бир-бирин босиб,
Кейин қолсак ўлдик, дейишиб,
Бир балога қолдик, дейишиб,
Кочқинчи шаҳар борди.
Дўкондорлар анг-танг қолди,
Олд-ортига қарамайин,
Кочқинчилар ўта берди,
Бир нечалар сўраб қолди,
«Урушларинг қандай бўлди?»
Бир нечалар жавоб айтиб,
«Биздайин қочган қутулди,
Кейин қолган бари ўлди.
Қарамай ийқин дўконди,
Тоза қувиб келиб қолди».
Кўринг энди Қалмоқ юртди,
Бир тўплаб бўлиб қолди,
Кочқинчига шаҳар ичи,
Колмай кўча тўлиб қолди.
Айтганидай қайсар Ҳаким
Ортин тўплаб келиб қолди,
Кочганини солиб қолди,
Теккан қалмоқ ўлиб қолди,
Жазосини кўриб қолди.
Қўлда қилич яланроҷди (р),
Шаҳарга яқин етишиди,
Тагин келиб қалмоқ билан
Шаҳар ичра аралашиди.
Ошиқ фаҳми оқшом кеча,
Холин билмайди бир неча,
Конга тўлди ҳар бир кўча,
Бек Алномишнинг зарбидан
Колмади расталарда косиббачча.
Тош кўрмаган гоҳ кўчалар,
Тош ўрнига бош кўргандир,
Сув кўрмаган гоҳ кўчалар,
Сув ўрнига қон кўргандир.
Ўлик айқашиб қолгандир,
Ададсиз қалмоқ ўлгандир,
Жуда ҳам тўплаб қиргандир,
Ачиниб бунда келгандир,
Етти йил азоб кўргандир,
Шутиб ўчини олгандир.

Ўлдирганди кўринганди,
Чорси, регистон борганди,
Мурдалар каш-каш бўлганди (р).
Килиб майдонда хурушни,
Кўрсатади шундай ишни,
Қайтмайин қилиб урушни.
Майдонда ирғитди отди,
Кўп қалмоқни изиллатди,
Ёвга отини қаратди,
Раббим деди, қилич тортди,
Аламларни кесиб ўтди,
Неча туғларни йикитди,
Қалмоқца ишни кўрсатди,
Юрак-бағрини доғлатди,
Хотин-қизини изиллатди,
Зўрлигин полвон кўрсатди.
Қулоқ сонг бекнинг тилига,
Душман чиқолмас йўлига,
Оралайди қайсардай бўп
Бунда қалмоқнинг элига.
Қалмоқлар қолмасини билди,
Адади йўқ, қийраб қолди,
Шундай ўсал ўйин бўлди.
Сурхайл йўлиқиб қолди,
Эна, деди бу бек Ҳаким,
У айёрни ушлаб олди.
Неча сўзни ундан сўрди,
Ўларини кампир билди,
Гапирмакка тили бўлмай,
Ияги шақирлаб қолди.
Қилич билан бошга солди,
Уриб икки бўлак килди,
Шоҳнинг дарвозасига илди,
Ҳаким шунча қирғин қилди,
Алпларнинг авлодидан,
Регистонга бирор келди.
Отини ўйнатиб турди.
— Ўзбак шундай қиласанми,
Сен ҳаммани қирасанми,
Қўяр деб ҳам индамасам,
Сира кетмай юрасанми?!
Анқа полвон дейди мени,
Жазонгни берарман сени.
Мен алпларнинг авлодиман,
Сенга бермасман-ку омон,
Мен энди майдонга келдим,
Кутулиб кетмагинг гумон.

Улмай туриб илгаридан,
Кета берсанг бўйми сен ҳам.
Чиқиб қалмоқнинг элидан,
Кутулморинг мушқул бўлди
Анқа полвоннинг қўлидан.
Бу сўзни эшитди Ҳакимхон,
Яқинлаб борди шу замон.
— Нима дейсан аҳмоқ душман?
Тентак бўп чиқдинг элингдан,
Хеч иш келмайди кўлингдан.
Бек Алломиши дейди мени,
Ким тентак қип юборди сени.
Холинг билиб жўн юрмаган,
Умрида майдон кўрмаган,
Ўз ўйинда лофчи бўлиб,
Сен бачагар эл кулдирган.
Жондан кечсанг, мана майдон,
От чачасидан қизил қон,
Армон билан ўлдинг душман,
Хоҳи юр, хоҳи пушаймон.
Ботирман деб элда юрган,
Кўчада одам кулдирган,
Ботирсан сен, тентак қилган,
Ўлар вактинг яқин келган,
Ажал сени шердил қилган,
Шуйтиб сен майдонга келган.
Бу сўзни айтди Ҳакимхон,
Сўз айтади қалмоқ душман:
— Ўзбак, сендан кам эмасман,
Сира дамингни емасман,
Мен сени одам демасман,
Холинг билгин, кетгин, ўзбак,
Мен сенга омон бермасман,
Ўлдирмай сира қўймасман.
Ўз юртингни кўролмассан,
Мендан омон қололмассан.
Аввалдан индамай турдим,
Қоражон дўстисан билдим,
Шуйтиб сени ҳурмат килдим.
Бекор кўп одамни қирдинг,
Холинг билиб кетгин, ўзбак,
Бу Анқага дучор бўлдинг,
Қочмасанг, бил, тайин ўлдинг.
Бу сўзни айтди Анқа полвон,
Сўзига кулди Ҳакимхон,
Бойчиборга қамчи уриб,
Кошига борди ул замон.

Анқа отга қамчи чатди,
Калтак билан солиб ўтди,
Хакимга кор қилмай кетди.
Сууриб кескир пўлатди,
Отни кимсиб сермаб ўтди,
Онинг бошин олиб кетди,
Анқа полвонни сулатди,
Дўстаман бўп ерда ётди,
Бир лофт билан ўлиб кетди.
Кўп ўлгандир қалмоқ гачча,
Холин билмай ўлди неча.
Нечовлар майдонда турди,
Киличнинг дамида ўлди,
Қалмоқ шоҳи яқин келди.
Тойчи қалмоқ юриш қилди,
Ўзи тушиб уруш қилди,
Ботирлари гирдин олди,
Бир-бирига найза солди.
Неча найза ғорат берди,
Шундай ажаб уруш бўлди,
Қалмоқшоҳнинг билмаганин билдириди,
Қалмоқнинг шоҳини Ҳаким ўлдириди,
Колганини айтганига кўндириди.

Бек Алпомиш Қалмоқшоҳни ўлдириб, қалмоқларнинг захра-
сини олиб, сиёsat қилиб юриб эди. Бир ерда Кайқубод йўликиб
қолди — Кайқубод, сен зинданда бизга кўп хизмат қилдинг.
Қалмоқшоҳни ўлдиридим, шу юрга сени подшоҳ қилиб, Қалмоқ-
шоҳнинг кизи Товкани сенга олиб бериб кетаман. Қалмоқлардан
давлат қайтди, навбат бизга етди. Сенинг ўлдирганинг ўрол,
сўйганинг ҳалол. Қалмоқларнинг кўзича сен мендан зўр бўлгин,
қандай сиёsat қилиб гапирсанг, мен кўнглимга оғир олмайман, —
деди.

Бу сўзни айтиб, қалмоқларни замлаб турди, билмаган киши
бўлиб, таёгини судраб, Кайқубод бориб қолди. Буларнинг ваъда-
сидан қалмоқларнинг хабари йўқ эди. Кайқубод сиёsat қилиб,
Ҳакимбекка қараб, бир сўзни айтиб турибди:

Ёш ўғлонсан, сенинг ишларинг бекор,
Қалмоқшоҳ нимага бўлди гуноҳкор,
Армон билан ўлган қанча қалмоқлар,
Хар билагим енгга сифмас, зўрабор,
Менинг билан ҳеч ким бўлмас баробар,
Мунча фавго бир ўзингга не даркор?!
Ёлизсан-ку, қиласиган ишим бор.
Кайқубоднинг айтган сўзи бул бўлар,
Аччиғлансан мен қиласман ишингни,

Танимайсан мендайғаччоқ¹ кишиңгни,
Таёқ билан қилайнми ишиңгни?!
Шундай қилиб ётир әнди сиёсат,
Билса ҳам билмамиш бўлди валломат.
Гапига қалмоқлар ҳайрон қолади,
«Шўрли чўпон нега бундай қиласди,
Бир урса бу бойқиш тайин ўлади,
Холин билмай сиёсат қип келади».
Кўтарилиб Кайқубод дўклаб туради:
Одамман деб ўз бошиңга юрибсан,
Одамингга ўйлиқмай маст бўлибсан.
Бу сўзларни айтар Кайқубод ночор,
Нима гуноҳ сенга қилди қалмоқлар.
Тўкибсан қўзидан селоб ёшини,
Сен кесибсан Қалмоқшоҳнинг бошини,
Сулайтиб талайнинг гавда-лошини,
Сен кўргин-да мендай чўпон ишини.
Аччиғлансам билганимдай қиласман,
Оtingни олиб сени бойлаб оларман,
Ўлмай кетгин, сенинг ишиңг қиласман.
Қалмоқнинг юртида сенга нима бор,
Сенга жуда ҳазил бўпти қалмоқлар,
Янги хабар билиб келди мендай зўрабор,
Яхшиликман айтган сўзим шул бўлар.
Кайқубод сенинг холинг билади,
Ёлриз дейди, жомбослигинг қиласди,
Бўлмаса қўлингдан нима келади,
Бу Кайқубод қаттиқ кунни солади.

Бу сўзни эшитиб, Алпомиш Кайқубодга бир сўз айтиб турган
екан:

Мунча ҳам қилмагин менга сиёсат,
Сени қўриб қолмас танимда тоқат,
Зўрлигинг оламга машҳур, Кайқубод,
Сенинг зўрлигингни қалмоқ билмади,
Билиб сени бунда писанд қилмади.
Сенинг зўрлигингни ўзим биламан,
Зўрлигингга қойил бўлган тўраман,
Сени орқа қилиб бунда юраман,
Орт-сиртингдан кўп ҳимоят қиласман,
Бу хизматни сеники деб турман.
Нима деб зарб қилсанг, мен ҳам кўнайин,
Зўрлигингга сенинг қойил бўлайин,
Нима десанг айтганингни қиласин,
Шоҳ қизи Товкани олиб берайин,

¹ Мендейин, мендайчанги.

Шул шаҳрига сени подшо қиласан,
Мен ҳам сенинг хизматингда турайн.
Фанимни ўртайди бул сиёсатинг,
Хар кимча бор бул Кайқубод файратинг.
Шомиён қайтариб, дўқлаб келасан,
Аччиғлансанг тоғни талкон қиласан,
Сиёсатман бежой дўқлаб келасан.
Бу сўзларни айтиб турган валломат,
Қалмоқлар устида неча аломат,
Бу сўздайтиб тури номдор Кайқубод:
— Ёш ўғлонсан, сен ҳам мени биласан,
Ўзингни сен менга яқин қиласан.
Сенинг сўзинг қуловимга олайин,
Товка ойимни дарров оп бер, кўрайин,
Бўлмаса мен билганимдай қиласан,
Хозир сенга омон бериб турайн,
Қанча қалмоқларни нобуд қилибсан,
Қани сенинг охирингни кўрайин.
Бу сўзларни айтиби Кайқубод,
Алпомиш югуриб қиласади хизмат,
Хайрон қолди қараб турган жамоат.
«Бу қандай гап бўлди, чўпон азамат,
Юртдан ўтган ботир қиласади хизмат.
Товба денглар, бу иш қандай аломат.
Илгаридан Кайқубодни билмабмиз,
Зиндондан чикканда хабар бермабмиз.
Биз бурундан шоҳга куёв килмабмиз,
Кайқубодни олдимизга солмабмиз.
Чўпон деб билмабмиз бундай кишини,
Энди кўрдик Кайқубоднинг ишини.
Кайқубод бунчалик, англамай қолдик,
Биз ишни ўтказиб пушаймон қилдик,
Айтганига қўниб ўлмайин қолдик.
Ўзбак бизга ўзбаклигин қилиби,
Кайқубод олдинда забун бўлиби,
Хўп дейди, югуриб хизмат қилиби».
Бу сўзни ўйлаб шивирлашиб юриби.
Кайқубоднинг айтганини билади,
Кайқубодни подшо қилмоқ бўлади,
Ҳаммаси хуш кўриб, ани холади,
Кайқубод зўр дейди, ахмок бўлади,
Бек Ҳакимнинг айтганини қиласади.
Билмай турганига ани билдириди,
Майдон қилди, кўп қалмоқни ўлдириди,
Қолганини ихтиёрга қўндириди,
Кайқубодни мунда подшо кўтариб,
Қалмоқнинг юртида тахтга миндириди.

Эр Кайкубод мунда подшо бўлади,
Етим-новча қанча чўпон келади,
Келиб Кайкубодни шундай кўради,
Жўралари қуллук бўлсин қиласди,
Тахтга чиқиб бир-бирини сўради,
Товкани айтдириб Ҳаким келади,
Алпомишдай бекдан хабар борган сўнг,
Ўрдада Товкада тоқат қолмади,
Борган хизматкорман бирга жўнади.
Бек Алпомиш йўлга қараб турар, деб,
Хаялласам менга интиқ бўлар, деб,
Ўз кўнглида юрар мени олар, деб,
Хаялласам балки кўнгли қолар, деб.
Хабар эшитгандан туриб жўнади,
Канизларман бирга-бирга келади.
Келаётир кўнглин хушлаб,
Ўн канизи йўлни бошлаб,
Ўн канизи пўш-пўшлаб,
Ўн канизи зулфак ташлаб,
Неча қизлар ўйин бошлаб,
Бир-бирининг вақтин хушлаб.

Товка пойтахт остига, Алпомишнинг қошига келди. Алпомиш
Товкага қараб, бу сўзни айтиб турибди:

Сўзимни эшитгин гул юзли дилбар,
Неча вақт зиндонда бўлдинг хизматкор,
Сўраганим хизматингнинг ҳурмати,
Сўрамасам, сенда қанча ихтиёр?!
Хурмат қилиб сенга айтар арзим бор,
Юрт әгаси кўргин Кайкубод номдор,
Отангнинг ўрнига подшо бўлдилар,
Қандай бўлса шоҳни қилгин ихтиёр.
Ўз жонингга зинҳор қилма зулмни,
Унутма аввалдан харидорингни,
Бериб юрган ул ҳам қалин молингни,
Қабул тутгин аввал кўрган ёрингни,
Миндириб ушлатган сагирларингни,
Қараб кўргин подшо бўлган зўрингни,
Қабул қилгин кўй боқар чўпонларингни.
Серкани оп бориб, въъда қиласан,
Кўнгли борди, пулни туртиб берасан,
Ул олмоқчин, сен тегмоқчин бўласан,
Бир-бирингга етолмайин юрасан,
Энди билдим, сен уялиб турасан,
Биринг қочсанг, биринг қувиб кўрасан,

Бек Кайқубод хоннинг ақлин оласан,
Энди нега сен индамай турасан,
Ота давлатинда ўйнаб-куласан,
Гапнинг тозасини шундай биласан.
Кайқубодга сенинг тегмагинг даркор,
Икковинг ҳам бир-бирингга интизор,
Ошиқларнинг сўзи шундай жапс келар.
Сени излаб келган олис элидан,
Чикиб келган Чин-Мочин мазгилидан.
Сенинг ишқинг буни чўпон қилганди (р),
Қабул қилиб сура бергин давронди.

Шунда бу сўзни Алпомишдан эшитиб, Товка ойим ўпкалаб,
бир сўз айтиб турган экан:

Кечакундуз яратганга фифон қип,
Зиндан ичра ўлар дедим ғаминг еб,
Сенинг учун қўйруфима қўсов еб,
Бегижон, умидим сендан шулмиди?
Дол гарданга тилла ҳайкал тоққаним,
Ошиқни қўйдириб қошим қоққаним,
Куйиб кетди зиндан ичра боққаним,
Бегижон, умидим сендан шулмиди?
Рахминг келмай кўзда қонли ёшима,
Хафа фалак оғу қўшди оshima,
Понза рўмол пириллайди бошима,
Машат ўсма хўп ярашар қошима,
Бегижон, чиқмадинг қордай тўшима,
Мен қойил бўлмадим сенинг ишингга,
Бегижон, умидим сендан шулмиди?
Ўз юртингга олиб борсанг, бўлмайми,
Бир хизматкор мендай ойим юрмайми,
Мени элтиб чўри қилсанг, бўлмайми,
Йўқса, хоним, бошимни олсанг, бўлмайми,
Бегижон, умидим сендан шулмиди?
Товка ойим сенинг ҳолинг билади,
Ёмон кунда кўп хизматлар қиласди,
Охирда хизмати тухмат бўлади,
Сендей хоним ёмон калга унади.
Туриб ўйланг, шунга тексам бўлами,
Шуни билан Товка умр кўрами,
Хоним, шу гап ўзингга эп бўлами?!
Бу сўзни айтиб Товка хафа бўлади,
Алпомишдан гина қилиб туради.
Эр Қайқубод подшо бўп шундай қаради,
Ойдай Товка қабул қilmай туради,
Сўйласа, сўзига қулоқ солади,

Бу ишларни эр Кайқубод билади,
Бек Алпомиш буни зўрлаб туради,
Тегмайман, деб Товка хафа бўлади.
— Зўрламагин, қандай қабул қиласин,
Шу калга текканча мен ҳам ўлайнин,
Ўлдирмасанг, сира бунга кўнмайман.
Бу ишларни билди номдор Кайқубод,
Подшо бўлиб муна юртда туради,
Бирор корсон иссиқ сув келтиради,
Бошини корсонга солиб туради.
Қотган жумур ивиб тушиб қолади,
Асли кал эмасди, шундай бўлади.
Жумур қоплаб сурати кал юради.
Асли ўзи Чин-Мочиндан келади,
Товканинг ишқида кал бўп юради,
Жамоли оқшомни ёруғ қиласин,
Кокиллари оч белига келади.
Товка ойим кўнмай шундай каради,
Кайқубоднинг жамолини кўради,
Кўрган вақтда бу ишқибоз бўлади,
Товка ойимнинг онги кетиб қолади,
Товканинг кўнглига шу гап келади:
«Курсин Алпомиш, қўпол, балоди^(р),
Кўнглимдаги Кайқубоддай тўради^(р).
Устима кийганим яшил-кўк эди,
Мени деб ўз юртидан кеб эди,
Аввалдан-охир кўзима босганим,
Ростин айтсам, Кайқубоддай бек эди.
Давлатимдан адрес-кимхоб, кияман,
Хақдан келган ишга бўйним ияман¹,
Алпомишга теккин деса, куяман,
Юрт эгаси Кайқубодга теяман².
Боғбон бўлиб қизил гулни тераман,
Давлатидан шолдам кийиб юраман,
Ростин айтсам Кайқубодга тегаман,
Ота юртда ўйнаб-кулиб юраман.
Илгаридан ўзим ошиқ бўламан,
Ноз қилиб неча сўз айтиб кўраман.
Ҳазиллаб айтганим оғир олмасин,
Гина килиб мендан кўнгли қолмасин.
Бу сўзларни айтар мендай ойимча,
Изимни кўзига суртар бир неча,
Кўнглимдаги Кайқубоддай беквачча,
Ўйнаб-кулсак икковимиз ҳар кеча.

¹ Эгаман.

² Тегаман.

Жилва қылсақ, бекнинг ақлин оламиз,
Кўл ушлашиб сайил боққа борамиз,
Қочиб-кувган ерларимиз кўрамиз,
Шундай бўлиб ўйнаб даврон сурасиз,
Дунёнинг кўтига шуйтиб урамиз,
Канизларни биз хизматга соламиз,
Кайқубоддай бекни қабул қиласиз».

Бу сўзни шул замон Ҳакимбек билди,
Кайқубод жамоли ақлини олди,
Кайқубодга Ҳакимбек тўғри қилди,
Қиркин кизи билан Товка ўтири.
Подшо бўлиб унда Кайқубод турди,
Билса ҳам билмамиш бўлиб ўтири.
Шундай қараб энди қизларни кўрди,
Алпомишига қараб энди гапирди:
— Бу қизлар нима сабабли келди,
Не ҳожати бордир, нега ўтири?
Хаёл қип сўрадим бир арзга келди,
Хон Алпомиш анга дардин гапирди:
— Шоҳнинг кизи сизга интиқ бўлиби,
Сизни ихтиёр қип бунда келиби,
Айтганини эр Кайқубод билиби,
Товкайимни базур қабул қилиби,
Бек Алпомиш никоҳ қийиб бериби.
Эр Кайқубод бунда даврон суради,
Никоҳ қийиб Товкайимни олади,
Шу кун ўтиб энди кеч бўп қолади,
Кеч бўлди, ўрдага бирга боради,
Бек Алпомиш пойтахтда туради.
Товкаман Кайқубод сухбат қуради,
Тонг отганча бирга ўйнаб кулади,
Жойи орастада шундай туради,
Бир-биридан бунинг кўнгли тўлади,
Икковининг кўнглидаги бўлади.
Худонинг тақдирни шундай келади,
Чўпон бўлиб шоҳнинг қизин олади.
Шоирлар айтади шундай маърифат,
Тари келган бунга айёми давлат,
Товка билан ўйнаб-кулиб кўп сухбат.
Банда кўнар худо қилган ишига,
Кайқубод кўл солар кордай тўшига.
Эрта-мертан тонглар отиб келади,
Ойдай Товка бу ўрдада қолади,
Эр Кайқубод пойтахтга жўнади,
Келиб пойтахтга чиқиб туради,

Алпомишман бир ерда ўтиради.
Катта-кичик қолмайин жийдиради,
Нофора-сурнайин ҳам қўйдиради,
Хар тарафга чопиб жарчи боради,
Энди замон Кайқубодга қолади.
Эълон килиб юртга хабар беради,
Юрт Кайқубодники бўлди, билади,
Хаммага халойик маълум беради,
Қалмоқшоҳ ўрнини чўпон сўради,
Мамлакатни бибишчилик қилади,
Алпомишдан одамлар хавф қилади,
Кайқубод ишига рози бўлади.
Хаммани чакиртиб йигиб олади,
Товқойимга тўй бошламоқ бўлади,
Халойик, юртларга хабар боради.
Юрт-умаро келди шундай йифилиб,
Келганлар шул замон бир-бирин кўриб,
Оёқ остда қолиб эди Бойсари,
Хар на бори давлатидан айрилиб,
Одамларман бу ҳам қўшилиб келади,
Бойсарини бек Алпомиш кўради,
Кулоч ёйиб тахтдан тушиб жўнади,
Бир-бирини кўриб бўзлаб жилади.
Кайқубод Бойсари хизматин қилган,
Ўғли бўлиб маконида кўп юрган,
Неча йил қўй бокиб уйида юрган.
Бойсарини кўриб қўзин ёшлади,
Ота деди, оёғига ташлади,
Бойсарининг билагидан ушлади,
Ота деди, бунинг кўнглин хушлади.
Алпомишни босиб энди бағрига,
Бойсарининг йиғлаб кўнгли бузилди,
Қайта бошдан жигар-бағри эзилди:
— Етди бир облога менинг нолам, деб,
Яна обод бўлар кулбахонам, деб,
Шукрилилло, кўрдим сендай болам, деб.
Худойим бергайдা барчага дармон,
Иш бўлмас қудратли хақдан бефармон,
Омон-эсон сени кўрдим Ҳакимхон,
Кетди юрагимдан менинг юз армон.
Сен кетган сўнг қонлар йиғлаб қолганман,
Барча давлатимдан жудо бўлганман,
Кўп йиғлаб кўзимни хаста қилганман,
Шукрилилло, муродимга етишиб,
Кайта бошдан, болам, сени кўрганман.
Шундай бўлди менга хақнинг фармони,
Энди кетди Бойсарининг армони.

Бу сүзларни хон Бойсари айтади,
Нече йиллар менда йўқди ихтиёр,
Хамма нарсам менинг олди қалмоқлар,
Мен ҳам сендан бу юртларда хору зор.
Талон килиб олган ҳарчанд молимни,
Хеч қалмоқ сўраган йўқди ҳолимни,
Кўрдим мен ҳам сендан жону дилимни,
Эсима олмайман кирдикоримни.
Элда колган унда қариндошларимни,
Кўрсам бир муштипар Барчиндай ночоримни.
Мусоғир бўп бу элларда юрарман,
Мен ҳам насиб этса, бориб кўрарман.

Бу сўзларни хонга Бойсари айтди,
Бир-бирига айтган сўзи бас бўпти.
Бойсарини пойтахтга чиқариб,
Эр Кайқубод иззат билан турибди,
Тонг отганча югуриб хизмат қилибди.
Бойсарининг шундай ҳолин билибди,
Олиб у Кайқубод хатни кўрибди,
Подшоликка ўтган шўрли молини,
Ул хатдан ўчириб унга берибди.
Шу Бойсари қадимгидай бўлибди,
Мол бокар барига хабар берибди,
Молига Бойсари эга бўлибди,
Бор давлати бу қўлига келибди,
Худо таги бу ёзганга берибди,
Қариганда шодмонликни кўрибди.
Эли-халқ йиғилиб бунда турибди.
Нече кун тўй бериб бу ерда турди,
Эли-халқ Кайқубод ишини кўрди.
Тўй тарқади, элат мазгилига қайди,
Бойсари ҳам туриб уйига кетди,
Шаҳар ичи хизматида турибди,
Бек бўлиб Кайқубод ишни қилибди.
Халқ эшиштан бундай беклар сўзини,
Кучук босмас йўлбарс-шернинг изини,
Сарғайтирган душманларнинг юзини,
Кайқубод олгандир шохнинг қизини.
Мунда сухбат охир бўлиб колади,
Куннинг ўзи айни пешин бўлади,
Кайқубод ўрнидан сачраб туради,
Алномишнинг кўлин бойлаб олади.
Юр бўёкка, деди, туртиб хайдади,
Пешин вактда боз зиндонга тайлади.
Муни кўриб ҳамма ҳайрон қолади,

Чўпонхоннинг иши қандай бўлади?!
Шунча юртнинг додин берган Алпомиш,
Кайкубоддан бундай зарбни кўради,
Шуйтиб ҳукмини жори қилади.
«Бу хонимиз жуда муғум, балоди(р),
Қандай душман бўлса додин беради».
Хеч бир одам буни синааб билмади,
Шу ҳиллани бунда беклар қиласди.
Колган қалмоқ мазгилига боради.
Яна оқшом сахар вақтда етишиб,
Қалмоқлар бу ишга акли шошиб,
Кетди мазгилига бари ўйлашиб.
Хайрон қолди, мазгилида маслаҳат:
«Кайкубоднинг иши ажаб аломат.
Хеч буни одам синааб бўлмади,
Алпомиш бу хонга ҳарба қилмади,
Қайта бошдан яна чоҳга тайлади».
Қалмоқ юрти бари қойил бўлади.
Синосиб бўп энди одамлар ётди,
Эл тинчиди Кайкубод туриб кетди,
Зиндоннинг бошига у замон етди,
Бориб чоҳда Ҳакимбекни кўрибди.
От-анжоми билан бориб у хонни
Зиндондан чиқариб энди олгандир,
Қалмоқ бари сўнгра сени қўймас, деб
Маслаҳатман шу ҳиллани қўлгандир.
Бу қалмоқлар яна диндан қайтар, деб,
Булар кўпdir, хўп зўрликни қилас, деб,
Зўрлик қилиб сендан юртни олар, деб,
Шундай қилсанг бари ботмай қолар, деб,
Сенга қасд қиломас, қойил бўлар, деб
Шу ҳиллани мунда беклар қип эди,
Қалмоқ бари айтганидай бўп эди,
Душман бўлса тоза қўрқиб қоп эди,
Алпомишдан Кайкубод баланд деб эди.

Шуйтиб зиндондан чиқариб олиб, бир-бириннинг ҳолини сўра-
шиб, хўшлашиб, Алпомиш бу сўзни айтиб турган экан:

Мен кетарман энди юртимни излаб,
Бу жароҳат менинг бағримни тузлаб,
Гоҳ ерларда кетсам бўтадай бўзлаб.
Неча ой, неча кун йўлда юрарман,
Ўлмасам бир куни элга борарман,
Элда бўлсам сени сўраб турарман,
Қалмоқ қайтса, хабар берсанг, келарман.
Кўп қилган қалмоқлар менга зулмни,

Мен биламан сенинг бунда ҳолингни,
Сўраб тургин адолатман элингни.
Бурилмайман, мен юртимга кетаман,
Кўнглимда борини сенга айтаман.
Хазон бўлмай боғда гуллар сўлмасин,
Обло сенинг ақли-хушинг олмасин.
Мен кетган сўнг айтган сўзим қолмасин.
Бир кун боргин Бойсарининг қошига,
Насиҳат қил, кетсин денги-дўшига.
У кургурнинг гапман ақлин олгайсан,
Алдаб-сулдаб уни йўлга солгайсан,
Менинг айтган сўзим шундай билгайсан.
Ўз юртима мен ҳам бекман, тўраман,
Ота-энам мен эсима оламан,
Етти йил бандилик заҳмин кўраман.
Ким бор, ким йўғини борсам биламан,
Элидан айрилган лочин бўламан,
Парвоз қилиб мазгилима қўнаман,
Ҳар на бор сўзимни айтиб бераман.
Мард тушмасин айрилиқнинг ҳилига,
Бойсарини юбор Қўнфиrot элига,
Бориб юрсин яна ўзин тёнгига.
Кетсин, Бойсарининг бунда кими бор,
Эр Кайқубод сенга сўзим шул бўлар,
Албатта Бойсарини элига юбор.
Оҳ тортганда кўздан оқкан ёш энди,
Узок йўлда бордир қариндош энди,
Биз кетармиз Бойсин музофотига,
Эр Кайқубод, қадрдоним, хўш энди.

Бу сўзни Алпомишдан эшитиб, Кайқубод ҳам бир сўз айтиб турган экан:

Фалак урмай боғда гуллар сўлмасин,
Кетганингни бу қалмоқлар билмасин,
Оқшомлаб кет, сира қалмоқ билмасин.
Қалмоқ билса, билмаганим билдирап,
Қаватимда кўп қалмоқдан амалдор,
Диндан қайтиб, мени бадбаҳт ўлдирап,
Оқшом юр, кўрмасин сира бадбаҳтлар.
Подшо бўп сўрайман қалмоқ элини,
Билмас қалмоқ мусофирилнинг ҳолини,
Мен биламан қалмоқларнинг феълини.
Бу сўзларни айтдим сенга валломат,
Қалмоқлар иттифоқ, қилас маслаҳат.
Бу ҳийлани билса ақлимни олади,
Қайта бошдан қаттиқ кунни солади,

Менга маълум, кўп маслаҳат қиласи.
Мени билар, сендан кўркиб туради,
Билмаса, зинданда дейди, юради.
Сор-саломат боргин сендай азамат,
Элингни кўргайсан соғу саломат.
Худойим кечиргай қилган хатонгни,
Бориб кўргин сен ҳам эна-отангни.
Зиндан ичида кора қилган дилингни,
Бегим, бориб кўргин Барчин гулингни.
Бошингда пирпирлаб шолдан желагинг,
Карчига чангалли, йўлбарс билагинг,
Майдонга кирганда қоплон юратинг,
Сен ёндириб менинг ўчган чирорим.
Омон-эсон ўйнаб-кулиб элга бор,
Элу юртинг обод бўлар кирдикор,
Жиловдоринг бўлсин имом, чилтанлар,
Аввал обло, дуюм наби бўлсин ёр,
Кетар бўлдинг, ўзингдадир ихтиёр.
Омин обло деди, облоҳу акбар,
Шу замон хўшилашиб ул файзи сахар,
Кўринмайин қайтди Кайқубод ночор,
Розилашиб жўнаб кетди зўрабор,
Алпомиш зинданда, деди қалмоқлар.
Иккови бирикиб ҳилла ишлатди,
Алпомиш оқшомлаб юртига кетди,
Кайқубод подшо бўп юрт сўраб ётди.
Хар замон қалмоқлар қиласи маслаҳатди:
«Бул ҳам бир ўлчовли Кайқубодди,
Кўлдан олсак муна қалмоқ элатди».
Қиласи қалмоқлар бул маслаҳатди,
Бир нечаси шундайин жавоб айтди:
«Бил энди Алпомиш зинданда ётди,
Қимманглар аввали бу маслаҳатди.
Маслаҳатинг бул Кайқубод билади,
Зиндандан чиқариб олиб келади,
Ундан кейин жонзод қолмай ўлади».

Кайқубод подшолик қилиб, бу мамлакатларни сўраб турди.
Қалмоқ катталари неча марта маслаҳат қилиб кўрди, Алпомиш
зинданда, деб хавфсираб юрди. Подшодан амр бўлмаса, ҳадди
йўқ бориб зинданни кўрмакка, бориб-бориб булар ҳам босилиб
кетди.

Ана энди Алпомишнинг элга қайтиб, йўлларда бу сўзларни
айтиб бораётгани:

Етти йил зинданда ётдим,
Тинмай йилаб жафо тортдим,

Шукур ҳақнинг даргоҳига,
Кўрмагандай бўлиб кетдим.
Мен зиндондан озод бўлиб,
Калмоқларга қирғин солиб,
Кайкубодни подшо қилиб,
Энди ўз элима қайтдим.
Илгарида ғамсиз бошим
Неча йил ғамхона бўлди,
Хафа фалак зулмидан
Етийил ғамликни қўрди.
Хозир ғамдан озод бўлиб,
Бораман юртим ахтариб,
Гоҳи хафа, гоҳи тошиб,
Душманман қайтмай савашиб,
Года дикқатлигим ошибб,
Бораман ўтдай туташиб.
Йўлни юриб, ақлим элтар,
Қандай бўлди ўсан эллар,
Кўрганим йўқ ул мазгиллар.
Тушда кўргандайин бўлди
Бек бўп юрган Кўннирот эллар.
Остимда назари Чибор,
Силтаб юргин сен жонивор,
Олис йўлда ўсан эллар.
Бу сўздайтиб қичар шунқор,
Калмоқнинг юртидан чиқиб
Кетганди шундайин қайсар.
Эсиз, менинг ғамсиз бошим
Фамхона бўлди, найлайнин,
Хафа фалак, зулминг билан
Гул юзим сўлди, найлайнин.
Устимиздан ўтган ойлар,
Юрагимда охувойлар,
Саржигали маҳин жойлар
Жигадор бўлди, найлайнин.
Колиб кишининг юртига,
Куйиб айролиқ ўтига,
Икки кўзим элатима
Термулиб борди, найлайнин.
Мен бораман юртим йўқлаб,
Кечакундуз бағрим дөглаб,
Бораман элни сўроқлаб,
Оҳ уриб юрдим, найлайнин.
Тоғлар азиз бўлар туман бўлмаса,
Йўллар азиз бўлар карвон юрмаса,
Боғлар азиз бўлар боғбон бўлмаса,
Мулки хароб бўлар султон бўлмаса,

Менда қарор қолмас элни күрмаса,
Сүргани ҳеч бир одам бўлмаса.
Бораман оҳ тортиб узоқ йўлларда,
Юраман мен ҳам бу сувсиз чўлларда.
Гул кетар бўлса гулистан эмранар,
Шаҳар вайрон бўлса султон тебранар,
Мол борида ҳамма одам дўст эди,
Бошдан давлат қайтса тукқан эмранар.
Эли-халқим, қандай бўлди кирдикор,
Шоҳ эдим, бундайин бўлганман ноchor.
Аскар тоғи туманмикан,
Мен билмайман бу йўлларда,
Ота-эна омонмикан?!
Кўрганим йўқ Кўнгирот эли,
Қадимгидай замонмикан?!
Қадрдон беклар бормикан,
Барчин гул бизга зормикан,
Кўргани интизормикан!,
Хамма қадрдон бормикан?!
Бу йўлларда бўлиб хуррам,
Қадрдондан ўлган бўлса,
Кўрмай қолсан менга мотам.
Бу сўзларни айтар шунқор,
Гумбурлайди тоғу тошлар,
Суриб боради Бойчибор.
Гоҳ изиллаб олиб кетди,
Чочасидан ерга ботди,
Теккан тош чақилиб кетди,
Тупрокни түёқдан отди,
Бир ўзида кўп одамдай,
Орқасини тўзон тутди.
Ўйнатди Бойчибор отди,
Неча ул тоғлардан ўтди,
Бойчиборга қамчи чотди,
Излади Бойсин элатди,
Йўлларнинг танобин тортди.
Хайвонзот қилиб файратди,
Эсига олар юрган юртди,
Кеча-кундуз бирдай кетди,
Қўрсан дейди элу юртди,
Шуйтиб Алномиш йўл тортди,
Минган оти қоқиб кетди.
Юриб келган узоқ юртди,
Неча тоғдан турмай ўтди,
Неча ой, неча кун йўлда,
Тинмайин энди йўл тортди,
Олатоққа бугун етди,

Күргандир Бойсин элатди,
Тоқقا чикиб шундай қараб турибди,
Ёйлаб ётган Бойсин юртин күрибди.
Элатини күриб күнгли бузилди:
«Етти йил бу юртдан ризким узилди,
Үлмаб эдим, тағи күрдим бу элди».
Бу сўзни айтиб тоф бошида туради,
Ўз юртини күриб күнглин бўлади.
Эли-халқи қандай бўлган билмади,
Сўрай деса хеч бир одам бўлмади,
Бу сўзни ўйлаб аста-аста боради.
Бир тўп карвон Кўнгиrot бетдан келади,
Юк ташлашиб тоқقا карвон кўнади,
Карвондан сўрай деб отни буради,
Неча гапни ўйлаб кетиб боради,
Карвонлар қошига етиб боради.

Карвонлар янги юкни тушириб, оёғини узатиб, бир хили
ёнбошлаб ётиб, шу вақти Алпомиш устига етиб, карвонларга бу
сўзни айтиб турибди:

Кўп бўлади ғамли қулда армонлар,
Хар шаҳарни кезиб юрган карвонлар,
Мард йигит майдонда килади хуруш,
Мудом беклар билан қилсанг ўтириш,
Жаҳази абжўшдан, хатаби кумуш,
Безаб кўйган нори-норчанг кимники?
Жафо тифи ул кун жондан ўтади,
Хафтада Хаштархон¹ бориб қайтади,
Жабр килсанг ўн ботмонни тортади,
Бежаб кўйган нори-норчанг кимники?
Бу жаҳазни кўриб бундан қайтади,
Мени тақдир шу кулфатта элтади,
Мол боққанини даҳмарда деб айтади,
Даҳмардалар, нори-норчанг кимники?
Давлатим бор, шоли-шолдам ўрадим,
Йўл устида бурилиб сендан сўрадим,
Оғир олма, мен сизларга қарадим,
Бу туюнинг эгасин сендан сўрадим.
Кумушдандир қарчиганинг чегаси,
Олтингандир кировканинг ёқаси,
Ким бўлади норчаларнинг эгаси?
Жавоб бергин мол эгасин билайн,
Кўп ҳаяллаб мен ҳам йўлдан қолмайин,

¹ Астрахон.

Эшитай, карвонлар, буни билайин,
Нече вақтлар ғарип қылган худойим,
Жавоб бер, карвонлар, турмай жүнайин.
Сенга еттай менинг сўйлаган тилим,
Яқин ямас, узоқ йўлда мазгилим.
Мазгилима мен ҳам кетиб бораман,
Мол эгасин билсан, йўлга кираман,
Хаялласам, мен ҳам йўлдан қоламан.

Бу сўзни эшитиб, карвонлар ҳам Алпомишга қараб, жавоб айтиб турган экан:

Юрган йўлинг адир эмас, жўнағар,
Найза текста оқ бадандан қон оқар,
Бирор ўнга, бирор сўлга юради,
Савол сўраб бизда нима ишинг бор?
Каторга тиркадик лўк билан норча,
Устига юкладик қирмизи парча,
Биздан гапни сўраб ишларинг қанча?
Ўз йўлингга бора бергин бир неча.
Халак бўлиб сен бурилиб келасан,
Йўлдан қолсанг, бунда нима қиласан,
Мол эгасин сен ҳам нима биласан,
Кета бер, мард ўғлон, йўлдан қоласан.
Остингда ўйнайди араби тулпор,
Ўзинг айтдинг, юрадиган йўлинг бор,
Кета бергин, бизда нима ишинг бор?
Бекор одам йўқдир сенга гапирав,
Бизнинг қошимизда сенга нима бор?
Мол эгасин бурилиб сўраб келасан,
Биз билмаймиз, қайси юртдан бўласан,
Авваласи сўраб нима қиласан?
Эр йигитсан, бундайғачоқ бўлмагин,
Ўзимиз чарчаган, гапга солмагин,
Кета бергин, энди йўлдан қолмагин.
Сен ҳам бир-бирорни юрган фарзанди,
Биз билмаймиз қай шаҳарнинг жўмарди,
Биз билан бўлмасин йўловчи дарди,
Карвонлар бунга қаттиқ гапиради.
Биз чарчаган, бунча ҳалак қиласан,
Не ишинг бор, кўп айланиб турасан,
Қайда жойинг бўлса, энди борасан,
Бунча сўйлаб бизни нима қиласан,
Туянинг эгасин қайдан биласан?

Бу сўзни эшитиб, Алпомиш яна бир сўз деб турган экан:



Козининг олдинда шабгир нойиби,
Йигитга панд берар отнинг майиби,
Сўраганнинг хеч бўлмайди айиби,
Ким бўлади нори-норча сойиби?
Мол эгасин менга хабар берасан,
Тилинг тортгин, сен гуноҳкор бўласан.
Сўрасам, кўнглингга оғир оласан,
Мол эгасин менга маълум қиласан.
Карвонлар, кўнглингга оғир олмагин,
Яхши юргин, асло ёмон бўлмагин,
Жонинг борда ёмонликни қилмагин,
Холинг билмай, бундай менман бўлмагин,
Бирор сўз сўраса, айб билмагин.
Олмос пўлат белга қайраб чаламан,
Мени билсанг оша юртдан келаман,
Элни кезган бир йўловчи бўламан,
Ким яхши, ким ёмон англаб биламан,
Менман кишини мен ҳам бошин оламан,
Туяning эгасин сўраб биламан.
Чўлни кеэган мен бойбачча бўламан,
Ким йўлиқса шундай сўраб кўраман,
Сўзимни қайтарсанг, бошинг оламан,
Айтсанг мол эгасин, ўзим биламан,
Яхши жавоб айтсанг, кетиб бораман.

Бу сўзни эшитиб, карвонлар бир-бирига қараб, шунинг билан
ўрлашиб ётмоғимизни худо буюрдими, тўғри жавоб айтиб, ўтка-
зив юборайик, деб бу сўзни айтиб турган экан:

Ҳаво ёғса чиқар ернинг мияси,
Карвонни ҳоритар йўлнинг қияси,
Бедавлатнинг бошга урап кияси,
Ёри ўлган қизнинг чиқар чияси,
Бузилмасин азаматнинг уяси,
Нори-норча Ултонбекнинг тяси.
Шундай бўлди бизга ҳакнинг фармони.
Кўп бўлади жафоли қул армони,
Биз бўламиз Ултонбекнинг сарбони,
Ултон шоҳим Кўнғирот элнинг султони,
Айлантириб сўрай бердинг бемаъни,
Туяning эгаси Кўнғиротнинг хони.
Сўрадинг, сўзингга жавоб берамиз,
Ултонбек Кўнғиротда бизнинг тўрамиз,
Нима ишни қилганингни кўрамиз,
Молнинг эгасидан хабар берамиз.
Ададсиз элатин сўраб турибди,
Канча одам хизматида бўлибди,

Хар кимдан бегимиз жуда ғолибди(р),
Овозаси юрт-оламга борибди,
Эшитган етолмай, интиқ бўлибди,
Ҳамма эли хоҳлаб катта қилибди.

Бу сўёни карвонлардан эшитиб, Алпомиш ҳам карвонларга
қараб, бир сўёй айтиб турган экан:

Калма-شاҳодат мусулмоннинг тилига,
Азamat бош берар диннинг йўлига,
Унолтуруғ Бойсин – Кўнғирот элига,
Илгарида пайдо бўлди Довонбий.
Довонбийдан пайдо бўлган Алпинбий,
Алпинбийнинг ўғли эди Бойбўриман Бойсари,
Бойбўрининг ўғли Ҳаким қайсари,
Бек Алпомиш эди Кўнғирот беклари,
Ул сабабдан мен сўрадим, карвонлар.
Неча марта Кўнғирот элга келганман,
Яхши-ёмонини англаб билганман,
Алпомишман билла-билла юрганман,
Шундай бекман мен қадрдон бўлганман,
Катта кичисини англаб қолганман,
Хеч хабарим бўлмади Ултон дегандан,
Ё ердан чиқдими, тушиб осмондан?
Ул сабабдан мен сўрайман, карвонлар.
Устима кийганим яшил-кўқ эди,
Бундай кунда маған қўнгил тўқ эди,
Хон Алпомиш чалқиб юрган бек эди,
Ултон деган сира беги йўқ эди.
Мен сўрайман қайси элдан келибди,
Қайси юртдан келиб беклик қилибди,
Кўнғирот одамига бир гап бўлибди,
У Ултонни қайтиб катта қилибди.
Мендайин йўловчи ҳайрон бўлибди,
Карвонлар Ултонни таъриф берибди.
Унга қурбон мендай йўловчи жони,
Олис юртда мендай марднинг макони,
Ҳамиша Алпомиш Бойсиннинг хони,
Бу гапинг, карвонлар, бўлди бемаъни.
Ултон деган элга катта бўлами,
Алпомиш беклигин шунга берами,
Шу гапинг ақлга тўғри келами,
Хеч замонда Ултон катта бўлами?!

Бу гапни Алпомиш айтди, карвонларга пича ботиб кетди.

Карвонлар айтди: – Жуда ҳам гаранг қилди, энди шуни сўқиб-
пўқиб қутулмасак, гапи адо бўлмайдиган балога йўликдик, ёзи-

миз тун қотиб, йўл юриб келиб эдик. Бу гапни ўйлаб, карвонлар яна бир сўз айтиб турган экан:

Ундей деб чиқарма сен ҳам довшингни,
Танимайсан ундейғачоқ кишиңгни,
Ултон шоҳим билса кесар бошиңгни,
Кўп сўйлаб сен чиқармагин довшингни,
Укасини.....Алпомишиңгни,
Билса, Ултон шоҳим қиласр ишиңгни.
Кўп яшасин, Ултон шоҳим ўлмасин,
Алпомиш отиман ўчсин, келмасин,
Яхши одам асло ёмон бўлмасин,
Кет, йўловчи, сўзингни хон билмасин.
Бу сўзингни билса одам буюрар,
Қайда борсанг, сени қувиб етади,
Агар кўрса, бойлаб ҳайдаб кетади,
Бошиңг кесиб сени дорга тортади,
Холинг билиб тўғри юрсанг, қайтади?!
Шундайин туккушлаб сўраб юрмагин,
Карвонлар сўзини ҳазил билмагин.
Сен билмайсан хон Ултоннинг ишини,
Одам демас келса юз лак кишини,
Кесиб тури гуноҳкорнинг бошини,
Танимаймиз бизлар Алпомишини,
Алпомиш деганнинг қиласр ишини.

Бу сўзни эшитиб, Алпомиш: — Эса мен ўзимни танитиб кўяйин, — деб олмос пўлатга қўл узата берди. Карвонлар бир-бирига аланглашиб: — Э, бу йўловчи бир бало қиласр? Бу бачағарга бир гап бўлами? — деб тўп-тўп бўлиб, хаёли қоча берди. Шунда бу сўзни айтиб, Алпомиш ҳам яқинлаб бора берди:

Нима деб чиқардинг, карвон, довшингни,
Танитиб кўяйми Алпомишиңгни,
Қилич уриб мен кесайми бошиңгни,
Сулатай, карвонлар, гавда лошиңгни?!
АЗоб кўриб ширин жоним бу танда,
Ўз тилингдан энди бўлдинг шарманда,
Етти йилдан бери ётдим зиндонда.
Худойим сақлагай бандани омон,
Мўмин қулга эгам бўлгай меҳрибон,
Етти йил бўлганман мен ҳам саргардон,
Янги чиқиб келдим бунда зиндондан,
Ўзга эмасман-ку, билгин Ҳакимхон,
Армон билан ўлар бўлдинг бул замон,
Энди сенга сира бермайман омон.
Зарбимдан титради қалмоқи душман,

Бу карвонлар қилаётир пушаймон,
Пушаймонга наф топмайди ул замон,
Жуда ҳам туташиб кетди бу султон.
Шу замон қимси迪 Бойчигор отди,
Филофдан суурди кескир пўлатди,
Бу килични карвонларга кўрсатди,
Карвонларнинг жони чиқиб ҳам кетди,
Қимсиниб Ҳакимхон яқинлаб етди,
Бу сўзларни ўйлаб кўнглида айтди:
«Хазон урмай боғда гуллар сўлмасин,
Карвонларнинг бирори ҳам қолмасин,
Колгани Ултонга хабар бермасин,
Келганимни бадбахт қуллар билмасин,
Яна билиб беклигини қўймасин.
Омон берсам, булар элга боради,
Боргандан Ултонга хабар беради,
Қадимгидай у хизматкор бўлади».
Бу сўздайтиб ўйнатди Бойчигорни,
Кўнглига олиб қанча губорни.
Ўлдирмоқчин бўлди карвон қулларни.
Карвонлар билмади, бундан бехабар,
Вакти етиб неча сўзни лоф урар.
Ўларини билиб карвон йиғлади,
Билмай сўйлаб гуноҳкор бўп қолади,
Хар қайси ҳар ёққа қочиб боради,
Бошин олиб борар кўзини ёшлаб,
Қочиб бораётир пасқамга ташлаб,
Карвонларнинг жуда ақили шошди,
Ажал етса, ўлар вакти етишди,
Бир нечаси ажаб жарларга тушди,
Шундай бўлиб бу ёзганлар жилашиди.
Гап ботиб Ҳакимбек писанд қилмади,
Қочган шўрни ўз холига қўймади.
Карвонларга шундай газаб қиласди,
Кўринганин етиб бошин олади.
Карвонларга зўрлигини билдири,
Кўринганин сира қўймай ўлдирди.
Карвонлар ўлигин бул санаб кўрди,
Жиранда-жарлардан топиб ўлдирди,
Ўз тилидан гуноҳкор бўп ўлганди,
Кирк бир карвонни нобуд қилганди,
Билмай сўйлаб бул бойқишлир ўлганди,
Туя-анжом бул беэга қолганди.
Англамайди бундай марди майдонди,
Шердай бўлиб энди йўлга кирганди.
Ким душман бўлса, бошин олади,
Ҳамманинг кўнглидан чиқсан тўради(р),

Яхши сўйлаганга омон беради,
Бунинг келганини элда ким билади,
Мазгили эсига тушиб боради,
Буни ўлдириб тўра йўлга юради.
Бораётир шунда давлатли шунқор,
Йўл юради, ой коронги, кун губор,
Кистаб юрса баланд йўллар хонавор,
Яйлов жойларини кўрди Бойчибор,
Сувлук тишлаб кишинай берди жонивор.
Хайвонзоднинг шундай вақти хуш бўлар,
Юрган ерларини кўриб муқаррар,
Суриб ташлаб, энди кишинаб жонивор,
Бойчиборнинг довушини эштиб,
Тўп-тўп бўлиб тўқайдаги йилқилар,
Давр олишиб кишинай берди ҳайвонлар.
Бойчибор довушини булар билади,
Кишинаганда тўқай садо беради.
Бораётган Кўнғирот элнинг тўраси,
Обод бўлса марднинг кулбахонаси,
Тарлон бия Бойчиборнинг энаси.
Чиборнинг довушин тўқайдада билди,
Банди кетган Чибор эсига келди.
Ҳайвонзод кишинади, йўлларга кирди,
Қайтарсан деб бир хизматкор иярди,
Қайтмай йўлдан бия кетиб боради,
Қайтаролмай оша ночор бўлади,
Кур ҳайт тортиб бу ияриб боради.
Кўп югуриб жуда чарчаб қолади,
Кейнидан югуриб йўлда толади,
От устидан давлатли хон қаради,
Бойчиборнинг энасини кўради.
Кишинаб шундай Тарлон бия келади,
Ҳайвонлар шундайин меҳрибон, дейди,
Дийда гирён бўлиб ўпка тўлади,
Ҳакимбекнинг кўз ёши сел бўлади,
Бу сўздайтиб от устида боради:

— Менинг билан ҳамро бўлган Бойчибор,
Мендан бурун сен топишдинг, жонивор.
Солма юрагима дофу аламни,
Мендан бурун сен кўргансан энангни,
Мен ҳам бориб кўрсам сендай энамни.
Фам билан сарғайиб гулдайин дийдор,
Бир нечалар ўз ҳолидан бехабар,
Мендан бурун сен топишдинг, жонивор,
Бу сўздайтиб борар давлатли шунқор,

Бир-бирига етишганди ҳайвонлар.
Хаволаниб учган суксур шайланди,
Душманнинг ичига ғамлар жойланди,
Кўринг назаркарда Тарлон бияни,
Бойчиборни етти марта айланди.
Ўқраниб топишиб энди қолади,
Хайвоннинг тарзига Ҳаким қаради,
Бойчиборни кўриб шундай ийсиниб,
Биянинг ўрпига сутлар келади.
Буни кўриб Ҳаким отдан қўнади,
От бошидан энди югандолади,
Хайвонларга хўп томоша қилади.
— Азамат мард эдим, бўлмайин ночор,
Дўстга зор бўлмайин, душманларга хор,
Энангни ийдириб эмгин, Бойчибор.
Етти йил бандилик заҳмин кўргансан,
Энангман топишиб бунда қолгансан,
Омон-эсон сен энангни кўргансан,
Ийдириб энангни эмгин, жонивор.
Менга йўлдош бўлдинг Қалмоқ элларда,
Яқин қилдинг юриб сувсиз чўлларда,
Энанг билан сен топишдинг йўлларда,
Ўқраниб энангни эмгин, Бойчибор.
Мен ҳам борсам сендай кулбаҳонама,
Сендай бўп топишсам ғариф энама,
Сени кўриб ўт тутащди танама,
Ийдириб энангни эмгин, Бойчибор.
Оҳ уриб тўқади кўздан ёшини,
Ёлбориб худога солган ишини,
Яна ҳам бу марднинг кўнгли чўқар, деб
Бойчибор эмчакдан олди бошини.
От бошига бу юганни солади,
Чиборнинг устига миниб олади,
Келган йўлга Тарлон бия солади,
Келган йўлга ҳайдаб кетиб боради,
Тўқайистон қараб шундай жўнади.
Жиловдор қул ҳалак бўлиб келади,
Бияга етолмай чарчаб қолади,
Бияни ҳайдаб бул йўлиқиб туради.

Алпомиш бу бокиб турган йилқилар кимники, деб сўраб турибди:

Худойим сақлагай бандани омон,
Ғариф қулга эгам бўлгай меҳрибон,
Бу йўлларда қур ҳайт тортган ёш ўғлон,
Не сабабдан бундай бўлдинг саргардон?

Шовқимга ирғииди араби тулпор,
Азамат мард асли бўлмасин ночор,
Ёлғиз ўзинг бундай йўлларда абгор,
Бу йилқинг сойиби асли ким бўлар?
Кумушдандир қарчиганинг чегаси,
Олтиндандир кировканинг ёқаси,
Йилқилар эгасин сендан сўрайман,
Ким бўлади йилқиларнинг эгаси?
Худо қози, пайғамбарлар нойиби,
Урушда панд берар отнинг майиби,
Йўловчиман, сенга бурилиб қарайман,
Ким бўлади йилқиларнинг сойиби?
Бу моллар эгасин сендан сўрайман.
Сенга етгай мендайин марднинг доди,
Остида ўйнайди юз алвон оти,
Юрган еринг Бойсиннинг мамлакати,
Хабар бергинг ўзинг кимнинг авлоди?
Авлоди-аждодинг сўраб билайнин,
Йилқингнинг эгасин айтгин, кўрайин,
Ким бўлар, аниғин тоза билайнин,
Ёш ўғлон, жавоб бер сендан сўрайин.

Бу сўзни эшитиб, ул хизматкор қул ҳам Алпомишга қараб,
бир сўз айтиб турган экан:

Эй ўйловчи, билмаганим билдирма,
Дўст йиғлатиб, душманимни кулдирма,
Давлатинг бор, адрас-кимхоб кийдирма,
Мол эгасин сўраб, мени куйдирма.
Фалак уриб боғинг гули сўлганди,
Шум фалак бошига савдо солганди,
Бу моллар эгаси йўқ бўп қолганди.
Мол эгаси дединг, қолдим сарғайиб,
Кимга айтай мен ҳам дардимни ёриб,
Бу моллар аслини билсанг бесойиб,
Сўраб келсанг мол эгаси ўлгантир,
Бу моллар беэга бўлиб қолгандир.
Обло менинг ақли-ҳущим олмаса,
Муножотим ҳаққа қабул бўлмаса,
Фарибликда ҳеч ким хабар олмаса,
Айтай десам молда эга бўлмаса.
От ўйнатиб бу устима келасан,
Йилқининг соҳибин сўраб турасан,
Йўқ нарсани сўраб нима қиласан?
Фариб бўлиб бизлар жафо кўрганмиз,
Эгасиз молларни боқиб юрганмиз.

Бу сүзни эшитиб, Алпомиш ҳам бир сүз айтиб турган экан:

Мендай беклар элда юрган тўрами,
Сўрадим кўнглингга бир гап келами,
Хеч замонда беэга мол бўлами?
Сен эшитган менинг айтган тилимни,
Сен кўрибсан чўлда бундай зулмни,
Хеч замонда беэга мол бўлами?
Савоби эгаси бордир молингни.
Бу сўзларни айтдим, ёш ўғлон, саған,
Эгам бўлсин ҳар ғарибга меҳрибон,
Савоби эгасин билдири бу замон.
Айролик ўтига бағри пораман,
Йўлларни, кўлларни кезиб кўраман,
Янги келиб сенга дучор бўламан,
Савоби эгасин сўраб тураман.
Хазон бўлмай боргнинг гули сўлмайди,
Сўлган гулга сира булбул кўнмайди,
Хеч замонда беэга мол бўлмайди,
Бу йўловчи аниқламай кўймайди.
Мен ҳам қолмай ўтай юрган йўлимдан,
Не сўз келса қайтартмагин тилингдан,
Менга хабар бергин сиру ҳолингдан.

Бу сўзни Алпомишдан эшитиб, ул хизматкор қул ҳам бир сўз
айтиб турган экан:

Хаким деган менинг мирзам бор эди,
Каторда гуркураб юрган нор эди,
Элатида белгили қайсар эди,
Даҳ деганда қирқ мингига дориди,
Ул ғайрати ҳар кимсача бориди,
Юртдан ўтган шундай зўрабориди.
Кашал элда у Бойсари қолганди,
Бойсарини излаб сафар қилганди,
Армон билан қалмок қўлга олганди,
Эшитдик қалмоқлар зиндан қилганди(r),
Зиндан ичра чириб хоним ўлганди(r),
Неча марта бунда хабар келганди,
Ўлганини эли-халқи билганди(r),
Кўролмадик Кашал кетган полвонди,
Шу полвондан бирор сафир қолганди(r),
Хали ул фарзанди ёшлиқ қилганди,
Шул вақтида қуллар эга бўлганди(r),
Ўсли ёш, қуввати келмай турганди,
Ҳамма ҳам ҳисобин топмай қолганди(r),
Ҳамма давлат Ултонтозга борганди,

Элга бекнинг қадри ўтиб қолганди(р),
Не одамлар аттанг дейишиб юрганди,
Не гўзаллар қаттиқ жафо кўрганди(р),
Аттанг кўролмадик шундай половонди.
Йўловчи, эшитгин сўйлаган тилди,
Эгам осон қилгаймикан мушкулди,
Ёлғиз сафир ҳали кўп ёшлиқ қилди,
Бесоҳиб деганим маъниси шулди(р),
Кулга бериб кўйди шундайин элди,
Катта-кичик кулнинг сўзин гапирди.
Баҳорда очилган борнинг гулиман,
Мен ҳам бир-бировнинг жону дилеман,
Отимни сўрасанг, Жиловдор дейди,
Асли ўзим Култой кулнинг улиман.
Кашал бориб Алпомиш ўлиб кетди,
Бу вақтда навбат Ултонга етди,
Алпомишман қадрдон бўп юрганнинг
Барин опкеп Ултон хизматга сопти.
Бу юртни Ултонтоz сўраб туради,
Барча одам айтганига кўнади,
Нима деса югуриб хизмат қилади,
Кўнмаганда нима илож қилади,
Тақдир-қисмат шундай бўлиб қолади,
Хозир бекнинг мулки вайрон бўлади,
Ўғли ўшдир, жойин тутмай қолади,
Қадрдонлар ҳолин кўриб жилади,
Йўликканда Ултон азоб беради,
Сафир-да, тан бериб элда юради,
Бесоҳиб деганим шундай бўлади.

Бу сўзни Жиловдор қулдан эшитиб, ҳеч нимани билмаган
киши бўлиб: — Алпомиш ўлган бўлса, ажаб бўпти, Ултонтоz
бек бўлса, ўзларингдан бўпти. Жуда сизларга жойди, қандай
бўлса, ўз-ўзинг-да! — деди. У қул туриб айтди: — Менинг отам
Култой Алпомиш билан кўп қадрдон эди, билган одам айтар
эди. Култой Алпомишнинг қули дер эди, билмаган одам Алпо-
миш Култойнинг ўғли дер эди. Шундай одам Қалмоқ юртда
ўлиб кетди, навбат Ултонтоzга етди, бу бўлса бизларни хиз-
матга урмай жўнатмайди, кейинидан нолиб юрибмиз, балога
қолиб юрибмиз, гапнинг рости укағарни кўролмай ўлиб юриб-
миз, — деди. Бу сўзни эшитиб, Алпомиш: — Дуода бўл, мир-
занг келиб қолар, — деб ўта берди. Кўлни ёқалаб бора берди,
караса, оқ чодир, кўқ чодир, зангори чодирлар тикиб, йилки-
боқадиганларнинг устидан қарайдиган, тўқсон тўқайдаги йилки-
нинг устидан ҳабар оладиган ҳар куллар ётириб аймашиб, бир
хиллари ёнбошлаб, бир хиллари дўстаман бўлиб ётибди. Булар-
га ҳам бир тўқилиб ўтайин, деб бурилиб бориб, улар ҳам бул

йўловчини кўриб, узатган оёгини йифмай, бекни одам ўрнида
кўрмай, қандай одам, деб парво қилмай турди. Шунда буларга
караб, Алпомиш бир сўз айтиб турган экан:

Ярашикка тиккан бунда чотирлар,
Оёгин узатиб ётган ботирлар,
Бирор коса қимиз берсанг қўлингдан,
Ичиб мен ҳам қолмай юрган йўлимдан.
Ташна бўлдим оша юртдан келаман,
Неча кундан бери йўлни оламан,
Бирор коса қимиз сўраб тураман.
Йўловчидан эшит сўйлаган сўзни,
Бирор коса бизга берсанг қимизни.
Остимда хориган мингандан бул отим,
Кўп йўл юриб ошиб кетди меҳнатим,
Қизиқ экан, ботир, сенинг сухбатинг,
Сувсаганман, қолмас менинг тоқатим.
Дилтанг бўлиб мен ҳам отимни бурдим,
Сизларни кўриб ҳам бурилиб келдим.
Ҳамманг ётган хўп йилқичи номдорсан,
Мендай йўловчининг кўнглини оларсан,
Албатта бор, менга қимиз берарсан,
Бу ерларда шоҳлик шавкат қиласан,
Ҳар қайсинг ҳам чодир тикиб турарсан,
Хизматингга қанча одам соларсан,
Қимиз бериб менинг кўнглимдоларсан,
Ҳар қайсинг шердайин даврон сурарсан.
Мен отима аччик қамчи чаламан,
Мен сизларни кўриб шодмон бўламан,
Хаяллатсанг, мен ҳам йўлдан қоламан,
Қимиз берсанг, ичиб ўтиб бораман.
Яркиллаб кўринган беклар чотири,
Сизлар ҳам бир бу мамлакат ботири,
Қимиз сўраб мендай йўловчи тури.

Бу сўзни эшитиб, ул куллар ҳам бир сўз деб турган экан:

Бизлар кўрдик, оша юртдан келасан,
Бир ишнинг бошида сен ҳам юрасан,
Отинг терли, узок йўлдан келасан.
Сабош кўрсанг, ширин жондан кечарсан,
Душманларга кафан-тўнин бичарсан,
Қимиз десанг, отдан тушиб ичарсан.
Бу ётганлар сени писанд қилмайди,
Отингни ушлаб, сенга қимиз бермайди,
Сенинг учун бу одамлар турмайди,
Хеч қайсиси сенга хизмат қилмайди.

Сўз айтасан бунда ётган ботирга,
Кимиз ичсанг, тушгин ана чотирга.
Йўловчи билмайсан хўп сўйлар сўзни,
Унча-мунча деб айтмагин сен бизни,
Керак бўлса, тушиб ичгин қимизни.
Сени билдик, бунда чарчаб келасан,
Корнингнинг ўлчовин ўзинг биласан.
Билмаймиз биз келаётган юртингни,
Сўраб ҳалак бўп юрмаймиз отингни,
Қайси элдан бўлса хўп элатингни,
Ўзинг бойла миниб келган отингни.
Кимиз сўраб ҳалак бўлиб турасан,
Корнингнинг ўлчовин ўзинг биласан,
Кимиз ичсанг, кайфинг тўғри қиласан,
Бу сўзларни айтди шунқорга қуллар,
Алпомиш молига бари хизматкор,
Буларнинг сўзига табассум килар,
Ўйлаб турса гоҳда кўнгли бузилар.
Отдан тушиб Бойчиборни бойлади,
Шундай бир чодирга кириб қаради,
Чодирга кирди-да, шунқор қаради,
Сава-кўннак бари шундай тўлади(р),
Барини бир бошдан ичиб бўлади.
Отин миниб энди қайсар жўнади,
Ўзларига қимиз керак бўлади,
Кимиз турган ул чодирга келади,
Сава-кўннак бари бўшаб қолади:
— Билмаймиз, йўловчи қандай балоди(р),
Шунча ҳам қимизни ичиб боради,
Йилқичилар бари ҳайрон қолади,
Одам насли муни ичса ўлади.
Хеч идишда қимиздан нишон қолмади,
Сувсаган деб булар парвой қилмади,
Элларини, кўринг энди, Ҳакимбек
Яйловларин кўриб кетиб боради.
Чўлу кўлда ётган молни кўради,
Барининг эгасин шундай сўради.
Ўз мулкида хеч бир одам билмади,
Йўловчи деб хеч ким таниб қолмади,
Бир нечалар кўриб писанд қилмади.
Азаматлар олмос бойлар дастига,
Душман тушар кам давлатнинг қасдига,
Яқинлади Бобир кўлнинг устига.
Ўзининг бу ўсган элларин кўриб,
Бораётир нечовларга йўликиб,
Яркиллаган Бобир кўлини кўриб,
Бобир кўлда, яйлов жойларда юриб,

Бораётир шундай шунқор ох уриб,
Хозир билмас эли қандайин бўлиб,
Бек Алпомиш назар солиб қаради,
Бобир кўлдан энди ўтиб боради,
Этагида кўп тяяни кўради.
Синглисинг устига яқин боради,
Туя боққан ерларини кўради,
Беҳад ётган кўп галани кўради,
Синглисинг устига яқин келади,
Синглиси эканин билмай боради.

Қалдирғоч ойимнинг туя боқиб юрган ерига етишди. Алпомишнинг ўзига энчи бир қора нори бор эди, етти йилдан бери чўкиб, аза тутиб ётар эди, бекнинг келаётганини билиб, галадан чикиб, бўзлаб йўлга равона бўлди. Бул туя боқиб юрган Қалдирғоч ойим, бекнинг синглиси, устида жарамали кийими йўқ, аъзойи бадани кўринади, туяning кейининдан эргашиб, ҳала, деб туяни қайтаролмай, бу сўзларни айтиб бораётир:

Ҳала, дейман, бесоҳибнинг туяси,
Қачон келар бу туяниң эгаси,
Кумушдантир қарчигайнинг чегаси,
Олтиндантир кировканинг ёқаси,
Бесоҳиб дегани оғзим бормайди,
Ўлмаса Ёдгоржон бўлар эгаси.
Ҳала, дейман, манглайимдан кун ўтди,
Мени тақдир шундай кулфатга элтди,
Бадбаҳт қуллар мени чўлда хор этди,
Ҳала, дейман, товонимдан ер ўтди,
Фалак жабри менинг бағримни йиртди.
Подшоларнинг қатнаб юрар элчиси,
Элчиларнинг бўлар экан тилчиси,
Ҳала, дейман, бек оғамнинг энчиси,
Айронлик ўтига бағрим доғлади,
Туяга ияриб бўзлаб йиглади,
Қўнғирот элнинг шоҳ чинори қулади.
Ҳала, дейди, ой Қалдирғоч боради.
Туяга етолмай мунглиқ йиглади.
Худо деб йиглайди чўлда мувойиб,
Юри акасининг кўкини кийиб,
Ҳала, дейман, ҳов кора нор, бесоиб.
Кора нор ул замон йўлга кирдими,
Кашал кетган бекнинг исин олдими,
Шулар оға, эмиқдошим келдими,
Ё бўлмаса бирорнинг исин олдими,
Шайтиб чўкиб ётган сабил йўлга кирдими?
Оёгин босолмай мунглиқ боради,

Бормай деса, ул куллардан құрқади,
Хар тарафға күз юбортып қаради,
Чочлари ёйилган кетиб боради.
Армон қилиб яратғанга жилайин,
Кеттган акам келдимикан худойим.
Бошиндаги заррин нобот жигам, деб,
Бедовга ярашган олтин түқам, деб,
Ҳаким оғам ҳолим қўриб йиғласа,
Мен олдига чиксам шундай оғам, деб.
Ҳаким оғам менинг ҳолим сўрарди,
Душманларнинг жазосини берарди,
Полвон акам Кўнғирот элда бўлганда,
Мени нега чўлда сарсон киларди.
Бу сўздайтиб йиғлаб кетиб боради,
Хала, деб туяга шундай қаради,
Келаётган ёллиз отлини қўради,
Йўловчи деб муни гумон қилади.
Шу йўловчи мени кўрмасин, дейди,
Чангалнинг остига ўзин олади.
Устикон эмраниб, бағри силинар,
Аъзойи бадани шўрнинг кўринар,
Чангалнинг остига ўзи яшинар,
Бул ахволда бўлиб қолди муштипар,
Яқинлаб келгандир Ҳақимбек шунқор,
Алпомиш олдига чиқсан қора нор.
Келаётиб эди шундай валломат,
Эли-халқим кўрсам дейди саломат.
Етти марта бу қора нор айланиб,
Бўзлаб қилди бек Ҳақимни зиёрат.
Ҳайвоннинг меҳрини шунқор кўради,
Кўнгли бузилиб норни қайтариб,
Келган йўлга ҳайдаб кетиб боради.
Қарамас мард йигит баланд-пастига,
Бориб қолди синглисининг устига.
Синглисины бу ахволда кўради,
Эли-халқим шундай бўлган экан, деб
Кўнгли бузилиб шунқор йиғлади.
Дийди гирён бўлиб ўпка тўлади,
Синглисига қараб савол сўради:
— Танимайсан бу йўловчи кишини,
Олайнми шу туюнинг бошини,
Сен эшиггин мендай бекнинг нолишини,
Тўкарман сел қилиб кўздан ёшиңгни,
Ёлбориб худога солган ишини,
Шу туюнг-ғу жуда сени ҳоритди,
Олайнми қора норнинг бошини.
Сенга сопти айролиқнинг ҳилини,

Эшит сен ҳам йўловчининг тилини,
Туя эгаси довлаб келса хунини,
Йўловчи беради норнинг пунини.

Бу сўзни синглиси чангалнинг остида ётиб эшишиб, Қалдир-
гоч ойим Алпомишга қараб, бу сўзни айтиб турган экан:

Қўй, йўловчи, билмаганим билдирма,
Ханжар урмай бафрин қона тўлдирма,
Кўй, йўловчи, қора норни ўлдирма.
Айронлик савдога бафри пораман,
Нор ўлган сўнг гуноҳкор бўп қоламан,
Ултонтозга нима жавоб бераман,
Йиғлаб чўлда ўз кунимни кўраман,
Бу дунёдан шуйтиб ўтиб бораман.
Нор ўлган сўнг тўкар кўздан ёшимни,
Ултон кесар зулм билан бошимни,
Йиғлатади қавми-қариндошимни,
Қузгуналрга емиш килар гўшимни.
Нор ўлган сўнг билса ҳайдаб кетади,
Бу бошима аччиқ қамчи чатади,
Бошим кесиб, мени дорга тортади,
Мендай мунглик қонлар йиғлаб ўтади.
Зулм билан билмаганим билдирап,
Ҳар на деса айтганига кўндирап,
Кўнғирот юртда ҳеч ким бўлмас баробар,
Туянинг эгаси Ултон зўрабор,
Туя учун билса мени ўлдирап,
Албатта элатда бирор билдирап,
Сен, йўловчи, бундан кетмагинг даркор.
Мен қўрқаман Ултонтознинг зулмидан,
Не иш келсин мендай мунглик кўлидан,
Бу чўлларда мен ҳам юрган хору зор,
Ҳеч ким бўлмас бунда элатда раҳбар,
Ҳамма одам Ултонтозга хизматкор,
Нор учун бўлмайин мен ҳам гуноҳкор,
Гуноҳимни тилай олмас одамлар.
Мунглиқман, ғарибман, айтар арзим бор,
Кета бергин, Ултон билса ўлдирап.

Бу сўзни синглисидан эшишиб, билдираган киши бўлиб,
синглисига қараб, бу сўзни айтиб турибди:

Сен ҳам бир яхшининг кўрар кўзисан,
Балки кўрар кўзи, сўйлар сўзисан,
Чангалнинг остига ётган мунглиғим,
Кўнғирот элда ўзинг кимнинг қизисан?

Устингга кийганинг яшил-кўклиди,
Кўнғирот элда ҳеч раҳбаринг йўқлиди.
Кўк кийибсан, сен биронни йўқлайсан,
Ултонбекдан нега қўркиб жиласан.
Ҳазон бўлиб боғда гуллар сўлганми,
Ултон Кўнғирот элга тўра бўлганми,
Абгор бўлиб қора кийиб юрибсан,
Сенинг бирор суюнганинг ўлганми?
Мунглиқсан, муштипар, хозор қиласан,
Ўзинг тўхтатолмай ўқсиб турасан,
Ултон деб кўнглингни вайрон қиласан,
Бунча йиғлаб, хаёлингни бўласан,
Бир мунглиқсан, қаттиқ кунда коласан,
Асли ўзинг қайси уруғдан бўласан,
Ултон дейсан, сен ҳам хозор қиласан,
Гапирсанг, кўзингта ёшни оласан,
Мунчя йиғлаб чўлда жабр кўрасан.
Ултон сенга оша жабр қилганми,
Кўнғиротнинг ютида даврон сурганми,
Илгариги Кўнғирот беги ўлганми,
Ултонтозга навбат тегиб қолганми,
Кўнғиротнинг эгаси шулар бўлганми,
Барча одам айтганини қилганми,
Барча одам етагига юрганми?!
Сени кўриб менинг кўнглим бузилди,
Кўп йиғлама, менинг бағрим эзилди
Жуда, мунглук, хафа билдим ўзингди,
Туриб сендан гап эшиитмак лозимди(р).

Бу сўзни эшиитиб, синглиси бир сўз айтиб турган экан:

Мен ҳам бир-бировнинг кўрар кўзиман,
Оғзиндаги сўйлайдиган сўзиман,
Аслим билсанг, чин деганинг ўзиман,
Кўнғирот элда Бойбўрининг қизиман.
Фарид бўлиб бу чўлларда юрибман,
Туя боқиб, тақдиримдан кўрибман.
Бек Алпомиш деган акам бор эди,
Кашалнинг юртига сафар қилганди,
Эшиитамиз бориб зиндан бўлганди,
Ўлди деб хабари бунда келганди,
Бориб кўролмадик унда зинданди.
Яна бир тирик деб хабар келганди,
Шувакқача ҳеч бир хабар бўлмади,
Энди билдиқ, эмиқдошим ўлганди(р).
Ўлмай омон бўлса мунда келарди,
Келиб бу ютидан хабар оларди.

Тирик бўлса душман бундай қиласми,
Ўзи бўлса юртинг қулга берарми?!
Сен эшитгин мендай мунглик сўзини,
Ултон босди шундай шернинг изини,
Тўй бериб олмокчи сарвинаозини,
Хозир кўндиrolмай чечам ўзини.
Барчин сулув кеча-кундуз жайлади,
Тўрам деб акамни эсга олади.
Хар куни кошига одам боради,
Барчиной деб кўп насиҳат беради,
Ултонтоzни қабул қилмай туради,
Кетган бекдан ҳали умид қилади.
Ултон бек бўп юртда зулм қилади,
Акамнинг ўлгани маълум бўлади,
Кўнмаганда Барчин нима қилади,
Бориб-бориб айтганига кўнади,
Бул иш бўлса, кунимиz қандай бўлади?!

Бу сўэни эшитиб, синглисига қараб, Алномиш бу сўэни айтиб турган экан:

Мени билсанг Қалмоқ элдан келаман,
Шу акангнинг бир хабарин биламан.
Ўлгани йўқ, ҳали аканг омонда,
Неча йиллар бирга әдик зиндонда,
Сен қолибсан мунда қайфу-туманда,
Аканг келар, қуллар бўлар шарманда.
То ўлганча яратганга рост бўлдим,
Ўз феълимдан чўпу хасдан паст бўлдим,
Аканг билан мен зиндонда дўст бўлдим.
Акангнинг хабарин шундай биламан,
Ким сўраса, хондан жавоб бераман,
Аканг эмас, унинг дўсти бўламан.
Аканг ҳам зиндондан озод бўлганди(r),
Қалмоқларнинг жуда додин берганди(r),
Йиғлама, кўрарсан шундай полвонди.
Аканг мени ул хабарчи қилганди,
Акангнинг элчиси, дўсти келганди.
Кўп бўлибсан бундай йиғлаб дармонда,
Азоб кўрган ширин жонинг бу танда,
Аканг келар, қуллар бўлар шарманда.
Кўп йиғлама, сенинг аканг омонди(r),
Солар душманларга охир замонди,
Сен кўрарсан Кашал кетган полвонди.
Хар ким ўз шаънига бекди, тўради(r),
Шу йўл билан сенинг аканг келади,
Акангнинг хабари шундай бўлади,
Кеч қолганда иккى кунда келади,

Йўловчи шундайин жавоб беради.
Акангнинг юртни аввал кўраман,
Келарини тоза аниқ биламан,
Элни кўриб, Кўнғирот элга бораман,
Дўст-душманин билиб жавоб бераман.

Бу сўзни эшитиб, синглиси бу сўзларни айтиб турган экан:

Қайси юртдан бунда килдинг сафарни,
Кашалда акамдан бердинг хабарни,
Хафа қилма мендайин муштипарни.
Мард бўлсанг, номарднинг ишин қилмагин,
Кўп яшагин, бу дунёда ўлмагин,
Яхшилик кўр, ёмонликни кўрмагин,
Акам бўлсанг, менга ҳилла қилмагин.
Илоҳим қурисин йўлнинг қияси,
Бузилмасин элда марднинг уяси,
Чикиб қолди Бойбўрининг чияси,
Келармикан тағин элнинг эгаси?!
Бу сўзни, йўловчи, ҳазил билмагин,
Акам бўлсанг, менга ҳилла қилмагин,
Сўз айтиб сен азмойиш қип турмагин.
Акам бўлсанг, сўра менинг ҳолимни,
Хазон қилма тар очилган гулимни,
Юр, бориб кўрсатай Ёдгор улингни,
Сафир қолган сенинг жони-дилингни.
Менинг ғариб юришима қарагин,
Акам бўлсанг, ахволимни сўрагин,
Акам бўлсанг, кўрар кўзим, чирорим,
Акамни айтдинг, эзилгандир юрагим.
Бу сўзни Қалдириоҷ айтиб туради,
От устида Ҳаким ўйлаб кўради.
Акангман, деб агар ўзин билдирса,
Юраги ёрилиб тайин ўлади.
Бирор майдон фикр қилиб туради,
Синглисига бу жавобни беради:
— Акам дема, аканг келиб қолади,
Отнинг бошин шундай йўлга буради,
Шу йўл билан сенинг аканг келади,
Шу гапдайтиб шунқор кетиб боради,
Синглисига қарамайин боради.

Йўловчи кетдими, деб Қалдириоҷ ойим чангалининг остидан
чикиб каради, кўз кўрим ерда кетиб боради, қараса, остидаги
миниб бораётган оти, орт-сиртидан кўрди: «Акамнинг миниб
кетган Чибор отига ўхшайди». Кўриб, таниб, кейинидан пою
пиёда югуриб, бу сўзни айтиб бораётир:

Йўллардан ўтган йўловчи,
От тизгинин тортиб менга қара-чи,
Сақлаб туриб менинг ҳолим сўра-чи.
Қалмоқ юртдан мунда қилсанг сафарни,
Йўл юриб кўрмагин сира хатарни,
Йифлатмагин мендайин дарбадарни,
Бек акамдан бериб ўтдинг хабарни.
Менинг кўзим ўйилмаса, танидим,
Полвон акам миниб кетган Чиборни.
Йўловчи, эшитгин сўйлаган тилни,
Эгам бунда онсон қилсин мушкулни,
Менинг кўзим кўр бўлмаса, танидим,
Барчин чечам тикиб берган шол жулни.
Қийғир деган қуш ўлтирас кияда,
Не кўриб кечириб фоний дунёда,
Отни таниб чопди пою-пиёда.
Бораётир шундай ақили шошиб,
Чопиб бораётир ўпкаси шишиб.
Бек Алномиш шундай бурилиб қаради,
Келаётган синглисини қўради,
От жиловин тортиб қараб туради,
Ой Калдирғоч энди етиб боради.
От тизгинин бул бўйнига солади,
Узангига бошин уриб жилади,
Шул менинг акамнинг минган оти, деб
Оёғига кўп ўралиб жилади.
Ул Ҳакимбек туриб ўйлаб кўради,
Акангман, деб агар ўзин билдирса,
Бу ҳам сира айрилмайин қолади.
Ўйлаб туриб шундай ишни қиласи,
Жиловин кўлидан силкиб олади.
— Бу чибор от ўзимизга хоназод,
Аста-аста менга қиласан тухмат.
Буни билиб мунглиқ бўзлаб жилади,
«Акам бўлса, нега бундай қиласи?!
Акам бўлса, албатта маълум беради»,
Бошка одам дейди, кўнглин бўлади,
Хафа бўлиб туяга қайтиб жўнади.
Синглисинг бундай аҳволин кўриб,
Боради бек Ҳаким кўнгли бузилиб,
От ёлига кўзнинг ёши тўкилиб.
Рози бўлиб худо қилган ишига,
Фалак титрар юрганда нолишига,
Остидаги Чиборини ўйнатиб,
Бориб қолди кўп кўйнинг бошига.

Шунда чўпонларга қараб, бу кўй кимники, деб сўраб турибди:

Дахмардалар, мен билмайман ўйингни,
Хабар бергин боқиб юрган қўйингни.
От ўйнатиб бул устингга келайнин,
Чўлни ёйлаб ётган, чўпон, сўрайин,
Қўйингнинг эгаси кимдир, билайнин?
Хар қайсинг беҳаддан молни боқасан,
Даврон шул, деб бу чўлларда юрасан,
Қўй эгасин менга хабар берасан.
Жафо тифи бу кун жондан ўтади,
Фалак зулми шу кулфатга элтади,
Чорвадорни дахмарда, деб айтади,
Чорвадорлар, боқкан қўйинг кимники?
Савлат билан ўнгу сўлга қарадим,
Бу чўлларда қўй семиртмак муродинг,
Мол билан чўлларда сенинг қувватинг,
Мен билмайман ётган қўйнинг ададин.
Мен сўрайман боқиб юрган молингни,
Билмайман, чўпонлар, сенинг ҳолингни,
Элда юрган сенинг кирдикорингни,
Элда ном кўтарган зўраборингни.
Остимда ўйнайди бул мингган отим,
Олдинга яқиндир Бойсин элатинг,
Сендан сўрар мендайин валламатинг,
Дахмардалар, боқкан қўйинг кимники?
Мен ҳам бир юртларнинг юрган тўраси,
Кандай бойдир бу қўйларнинг эгаси.
Чўлда юриб ганг бўп ўзим келаман,
Билмайман, сизлардан сўраб тураман,
Эгасини айтсанг сўнгра биламан,
Ким бўлади боқкан қўйнинг эгаси?
Йўловчига оша малол келмасин,
Кўп туриб бу ерда йўлдан қолмасин,
Хабар бергин, бул йўловчи жўнасин.

Бу сўзларни эшитиб, чўпонлар бир сўз деб турган экан:

Аввал моллар Бойбўридай бийники,
Сўнгра билсанг Алпомишдай бекники,
Хозиргиси Ултонтоздай қулники.
Билмаймиз Ултоннинг нима ўйи бор,
Бизлар чўпон, Ултонтозга хизматкор,
Укағарнинг жуда ҳам кўп қўйи бор.
Ултонтознинг ўзи шундай балоди(р),
Муна элда кўп гапларни билади,
Қўй эгаси бек Алпомиш ўлади,
Шунча қўй бариси Ултонга қолади.
Ултон хўжайинимиз, бек бўп сўрар,

Кўп ҳисобдон, маҳмадана баччағар,
Кўйларнинг ҳисобин бизлардан олар,
Култой бўлар устимиздан хабардор,
Биздан сўраб хонга жавоб шул берар,
Анигин билсанг, шул бобома бор.

Беадад ёйилиб ётган кўп кўй, учу қуйругини киши билиб бўлмайди, чўпонлар бунда ётди, қўйни ёқалаб юриб кетди, кўй чўлни тутиб ётиби, бу беадад кўйга хайрон қолиб бораётиби. Етти йил зинданда ётиб, бу давлатлар эсдан чиқиб кетган эди. Бу ададсиз қўйларни қўриб: «Бир одамда шунча мол», — деб ҳайрон қолиб, йўл юриб бораётиб эди, қаради, бир марди калон, муйсафид киши қўйларнинг четида: «Армон билан фарзандим-дан айрилдим», — деб йиглаб туриби. Кўриб Алпомиш таниди. Култой деган қадрдан кули. Бобосига караб, танимаган киши бўлиб, бу сўзларни айтиб турган экан:

Не сабабдан, бобо, бўзлаб йиғлайсан,
Кариганда бўтадайин бўзлайсан,
Ох урасан, жигар-бағринг тузлайсан,
Болам дейсан, сен бирони излайсан.
Шум фалак бошингга савдо солдими,
Хаёлингга неча гаплар келдими,
Яқин ҳолда сенинг кўзинг ўлдими,
Ўлган боланг ё эсингга келдими?!
Тоза очилиб сенинг гулинг сўлдими,
Кариганда бир қиёмат бўлдими,
Хабар бергин, сенинг улинг ўлдими?!
Не сабабдан, бобо, бўзлаб йиғлайсан?
Йўловчиман, мен бурилиб сўрайин,
Йиғладинг, бойисин, бобо, билайн.
Кариганда, бобо, абгор бўлибсан,
Кўзинг ёшли, бежой йиглаб турибсан,
Суянчидан айрилиб, фариб бўлибсан,
Йиғлаганинг, бобо, сендан сўрайин.
Олис юртдан кўпdir менинг меҳнатим,
Чарчаб келаётir бул минган отим,
Сен жиладинг, қолмади-ку тоқатим,
Ўлдимикан бир суянган фарзандинг,
Кўнгиrot музофотида кўрган кулфатинг,
Ёнингда хеч кишинг, йўқdir улфатинг.

Бу сўзни эшитиб: — Менинг йиғлаганим, ўғлим эмас эди, Бойбўрининг ўғли эди, икковимиз шундай қадрдан эдик, билмаганлар Алпомиш Култоннинг ули дер эди, билганлар Култой Алпомишнинг кули дер эди, шул Кашал бориб ўлиб кетди.

Шунча давлат қулларга қолиб кетди. Шу әсимга тушиб, йиғлаб туриб әдим, — деди.

Алпомиш туриб айтди: — Бобо, Алпомишни күрсатсам, нима берар әдингиз?

Култой айтди: — Укангнинг қорнини берар әдим, күрсам, ўзим ҳам таниб олар әдим.

Алпомиш айтди: — Мен кимга ўхшайман.

— Сен бир гўрга ўхшайсан, сенинг ўхшаганинг билан қачон ишим бор менинг, сендай неча одамлар Алпомиш қелаётир, суюнчи бер, деб неча саркаларимни алдаб еб кетган. Алпомиш деб борсак, Култой аҳмоқ бўй бизга бир нима беради, алдаб бир саркасини оламиз, деб кепсан, — деди.

Бу сўзни эшигиб: — Хайр бобо, мени танимадингиз. Алпомишининг нима белгиси бор эди? — деди.

Култой айтди: — Алпомишининг белгиси шул эди, ўнг эгнида Шоҳимардан пирнинг беш панжасининг доғи бор эди, чап эгнида ўзимнинг беш панжамнинг белгиси бор эди.

Эгнини кўрсатди. Сийпалаб панжанинг доғини билиб, фарзандим сен экансан, деб айрилмай қолиб, бу сўзни айтиб, иккови топишиб ётириб:

Бу сўзни айтиб Култой кўзин ёшлиди,
Болам деб устига ўзин ташлади.
Муна тоғда бўқтарилган қормисан,
Қаторга тиркалган лўйча-нормисан,
Эли-юрга, болам, интизормисан,
Кўярар кўзим, юрт эгаси бормисан?
Худойим сақлагай бандани омон,
Фарид қулга эгам бўлгай меҳрибон,
Юрт эгаси келдинг, энди, Ҳакимхон,
Болам, деб бағрига босди ул замон,
Кетгандай бўй қолди ғам билан туман.
Кўзларимдан кетди равшан,
Топилмади саройи бўстон,
Дўйстлар бўлди менга душман,
Ўтган ишга мен қилмайин пушаймон,
Кўярар кўзим, жоним болам, бормисан?
Ота-энанг қаттиқ кунда қолганди,
Ултонтоуз суюги бузук бўлганди,
Ул қурғур наслига тортиб қолганди(р),
Шуларни ҳам хизматига согланди,
Шукур қиласай, кўрдим сендай полвонди.
Омон-эсон сендай кўзим келганди,
Энди кўргин ўз юртингда давронди,
Неча марта Ҳакимбекдан айналди,
Юрт эгаси, жоним болам, бормисан?

Сен кетдинг, бизлар бўтадай бўзлаб,
Боролмадик Қалмоқ юртини излаб,
Энди юргин душман бағрини тузлаб,
Мехрибоним, жоним болам, бормисан?
Худойим бергайда барчага дармон,
Иш бўлмас құдратли ҳақдин бефармон,
Сени кўриб кетди мендан юз армон,
Қувват энди, менга келганди дармон,
Бу юртингда душман қиласар пушаймон,
Душман қуллар бўлар ер билан яксон,
Соф-саломат элга келган сен султон.
Яхши кунлар бўлиб хор-а,
Юрагим неча садпора,
Ахволимни, болам, сўра,
Кўр бўлган тарзима қара.
Бу сўздайтиб йиғлаб босиб бағрига,
Етишдинг, жон болам, қуллар даврига,
Сен ҳам мундан ўз элингга борасан,
Ул қулларнинг қилган ишин кўрасан,
Болам, кўрсанг чидаёлмай қоласан.
Сен билмайсан қуллар оша зўрабор,
Ҳаммаси ҳам бўлиб кетди хукмдор,
Ултоннинг гапиман зўр бўлди булар.

Бу сўзларни айтишиб, иккови бир-бири билан топишиб:

— Кани, бобо, элда қандай гап бор? — деди. Қултой айтди: — Сени катайиб келган десам, ҳали ҳам шу ердаги бўшлигинг қолган йўқ экан. Энди гап шул, ўттиз кунча бўлди. Ултонтоz тўй бериб, хотинингни олмоқчин бўлиб ётири. Энди бориб ўлдира берасан-да, энди гап шул-да! — деди.

Бу сўзни эшишиб, Алпомиш айтди: — Бобо, сиз мен бўлиб боринг, мен сиз бўлиб борайин, ким дўст, ким душман, ўз кўзим билан кўрайин, бироннинг чоригига бирор тойиб, ўлиб кетмасин, — деди.

Қултой айтди: — Шуйтсанг, шуйт, ўғлим, сенинг келган вақти хушлигингга қулларнинг тўйига бориб, бир кўпкари чопиб қолайин.

Шунда тушиб Бойчиборни Қултойга берди, Қултой Алпомишнинг кийимларини кийиб, Бойчиборни миниб, чўпка либосда, дуппа-дуруст мўйсафиб бўлиб, отланиб, қулларнинг тўйига жўнаб кетди. Алпомиш Қултойнинг кийимларини кийиб, елкасига жанда-жундани қўйиб, кебанакни устидан елбагай кийиб, сиртидан белини бўғиб, тумоқ, чориқларини кийиб, оқ саркани сўйиб, гўшт билан шўрвасига тўйиб, терисидан кесиб соқол, бурун қилиб, учини қайчилаб қийиб олдида, кўл бор эди, кўлнинг ёқасида эди, шундай энкайиб кўлга қаради, сувнинг ичидаги

ўзини кўрди: худди-мудди жасади букуртоб Култойнинг ўзи бўпти. Таёгини ушлаб, Култой жасадли бўлиб, тўйга кета берди. Бир қатор уйнинг олдидан ўтиб бораётуб эди, шунда бир келинчак чиқиб қаради, Култойни кўриб, бул учта эчки кўшиб кўйиб эди, шу эчкilarимни сўрайман, деб чопиб бораётур. Келинчак-нинг Алномишга қараб, айтиб турган сўзи:

Бобо, эшит менинг айтган сўзимни,
Тўйга бораяпсан, билдим ўзингни.
Сабр қилсанг, бобо, айтар арзим бор,
Чарчаб чопиб келди мендайин ночор,
Сизга тайинлаган учта эчким бор,
Омон-эсон юрибмикан жонивор?
Ярашикка ловдон рўмол ўрайман,
Бобо, кунда мен ҳам йўлга қарайман,
Сизни кўриб, мен эчкимни сўрайман.
Мендай санам мунда фифон этдими,
Эчкилар семириб, кочиб кетдими?
Бобо, қайтинг, уйга меҳмон қилайн,
Уйга сизни эргаштириб борайин,
Бобо, юринг шўрва қилиб берайин,
Эчки сўраб, ҳаққатига қонайин.
Чўпонлар устидан сардор бўласан,
Эчкиларни кунда кўриб юрасан,
Ўлса-йтса, бобо, хабар берасан,
Маларойнинг айтган сўзин биласан,
Хизмат қилганини жуда кўрасан,
Қайтинг, бобо, бир дам сўнгра борасан,
Югуриб мен ҳалак бўлдим, биласан,
Эчкимдан аниқлаб хабар берасан.

Бу сўзни эшитиб, Алномиш билди: «Култойнинг олдига бу келинчак эчки кўшган экан. Мени Култой фаҳмлади», — деб ўшҳлиги келиб: — Эчкиларинг семириб, баҳрини очиб юрур, такани кўйиб, кўчкордан кочиб юрур, йилда эгиз-сегиз туриб, уч эчкинг юз ўн тўртта бўлди, — деди.

Кам фаҳм, ҳеч нарсага тушумайдиган аёл юз ўн тўртта деганига думоги чоғ бўлиб, кўнгли кўтарилиб: — Оғизингизга мой, уйга юринг, — деб тармашиб кўймай, уйига эргаштириб борди. Борса, уйида нон йўқ. — Бобо, ўтиринг, нон йўқ экан, мен муна қўшникидан элак олиб келиб, мен сизга бир патир қотириб, устига мой солиб берай, — деди. Элакка жўнаб кетди, борса, беш-олти хотинлар уни-буни гапириб ўтирибди. «Элакка борган хотиннинг эллик оғиз гапи бор», дегандайин, у хотинлар билан ўрлаша кетди. Гап кўпайиб, Култой эсидан чиқиб кетди. Култой кориндаги мойни, копдаги қуртни, уйдаги керакли нар-

сасининг барини эрмак қип еб қайтди. Келинчак ҳам элакни олиб келаётиб эди, Култойни кўриб қолди: — Ха, қайтинг, бобо, — деб порт бўлиб қолди. «Култой» айтди: — Энди тўйга кеч бўлди, уйингдан уни-муни еб, тузингни тортдик, — деб қайтди. — Эса, қайтарда келинг, — деб тайинлаб қолди.

Элакни олиб уйига борди. Борса, уйида аён-жинс бўлиб, ҳеч нима қолмапти. Ўйланиб қолди: «Култой бўлса, Култойнинг мунча овқатни ҳал қиласидиган қуввати йўқ эди, бу бир алпнинг иши-да. Нима бўлса, Алпомиш келдимикан?» — деб фикр қилиб қолди.

Ана энди Култой бўлиб, тўйга Алпомишнинг кетиб бораётган ери:

Таёгини судраб «Култой» боради.
Худо насиб қилса анинг уйини,
Мен кўрайин Барчин сулув бўйини,
Томоша қилайин ёрим тўйини.
Ким билади «Култой қулнинг» ўйини,
Қизиқ бўлар қилиб ётган тўйини,
Борсак бўлар у ерларда ўйини.
Бу сўзни айтиб «Култой» боради,
Кизу жувон бари йўлга тўлади,
Хотинларман бирга кетиб боради.
Кўп хотинлар дастархонин орқалаб,
Йўлда «Култой» билан ҳамроҳ бўлади,
«Култой» қулга кўп миннатдор бўлади,
Аламжон йўл тўйхонанинг ораси,
Хом семиз хотинлар чарчаб қолади:
— Бобо, хизмат қилсанг қандай бўлади.
Яхши хотин йўлиқсин деб дуо қилайик.
Дастархонни биз орқангга солайик.
Бобожон, кўтаргин салт бўп юрайик,
Сизман йўлдош бўлиб тўйга борайик,
Миннатдор бўп жуда дуо қилайик.
Кариганда адрас-кимхоб кийсин, деб
Ҳақдан келган ишга бўйини эйсин, деб,
Бобомнинг душмани ўтдай куйсин, деб
Жамъи хотинчувлаб дуо қилайик,
Киндиккинанг иссик ерга тейсин, деб.
Бу сўздайтиб кўп миннатдор бўлади,
Хотинлар «Култой»нинг ақлин олади,
Дастархоннинг барин йигиб ул замон,
«Култой» қулнинг орқасига солади,
Кебанакка йигиб ани кўтариб,
Хотинларман бирга-бирга боради.
Хотинларман ҳангома қип йўл тортди,

Бирор майдон ияриб қичаб кетди.
Рўпарай хотинлар кейин қолади,
«Култой» шундай хўп ҳаллослаб юради,
Югуриб-елиб, ҳарчанд қичаб қўради,
Ангишлаб бу «Култой» кетиб боради.
Кўринг энди «Култойди»,
Неча қирлардан ошди,
«Култойдан» тоза адашди,
Етолмай хотинлар жуда қарғашди.
Худой урди «Култойди»,
Икки энаги бултайди,
Йиглатган Маларойди,
Еб келган у ерда қурутман майди,
Бу хотинлар ҳеч қорасин кўрмайди,
Қайтиб қуруқ борамиз деб ўйлади.
Шу ойнасада «Култой» қичаб боради,
Неча қирдан нари хотинлар қолади,
«Култой» бораётуб шундай қаради,
Бир поданинг ётоғини кўради,
Чашманинг бўйнига бориб қолади,
Энди бориб «Култой» шунда қўнади,
Дастархонни «Култой» очиб қўради.
Тўйга қилган бари қатлама, куймоқ —
Барисини ейиб адо қиласди.
«Култой» кулдан бўғирсок ҳам қолмади.

Товоқда бор нимарсаларнинг барини еб, қурутиб, дастархон, товоқ қолди. Подачининг қилган тезагидан олиб келиб, ўзлариникидай қилиб товоқقا солиб, кўпига кўп, озига оз ўраб, қадим орқасига солганда қандай бўлса, шундай қилиб, барини қаторлаштириб, ўзи кетди жўнаб.

Хотинлар гоҳ қайтар бўлиб, гоҳ борар бўлиб, шул чашманинг бўйнигачай келди, дастархон, товоқларини кўриб, бобосини дуо қилиб қолди: — Илойим бир яхши семиз кампир йўликсин, бизни уялмасин, деб шу ерга кўйиб кетибди, — деб чашмадан сув ичиб, ҳар қайсиси ўз товоғини олиб, қадимгидай бошига кўйиб, бу булоқнинг сувидан иргиб ўтаётуб эди, бирори қаттиқроқ иргидими, тарс этиб дастархондан тезак тушшиб қолди. Бу хотиннинг дастархонидан тезак тушганини кўриб, ўзга хотинлар айтди: — Бунинг кундоши бор-да, тўйга бориб, дастархондан таппи чиқиб, шарманда бўлсин, деб қўшиб ўраган-да. Бир хотин: «Бизники ҳам тапни бўлиб юрмасин», — деб очиб қўрди, очиб қўрса, бариники таппи. «Култой»ни қарғаб, саросима бўлиб, товоқларни қайтарда олиб кетамиз, деб ариқнинг ёқасига кўмиб, дастархонларни кўйлакнинг ичидан белига бойлаб: «Тўйга қуруқ келибсизлар деган одам бўлса, «Култой» шундай қилди, деб айтамиз», — деб (йўлга тушди).

Энди булар ҳам тўйга бора берсин, эндиги гап боронағи
Бойчиборни миниб кетган кўхна Култойдан. Култой Бойчиборни
миниб, тўйга борди. Борса, Ултонтоз Алпомишнинг бор вақтига
таассисб солган, Барчинга баҳмал ўтов тикиб берган, ҳар ким
улоқни олиб бориб солса, Барчиннинг баҳмал ўтовига олиб
бориб солади. Шунча Бойчиборни калта қантариб, отнинг сояси-
га ташлаб: — Куллар, улоғингни чиқар, — деб ёнбошлаб, кул-
лар улоқ чиқарди, қулларнинг тўйига араласиб, Култойнинг
кўпкари чопиб ётгандаги сўзи:

Ошиқ фаҳми оқшом кечা,
Холин билмайди бир неча,
Йифилишган сатта норча,
Кўпкарини чопиб ётири
Ўн икки мингча бойвачча,
Санаб кўрган одам йўқдир,
Тахминан ўн икки мингча,
(Уст)-устига ташлаб турур
Кўсам сарка, олапоча.
Кўринг энди Култой мардди,
Чибор отга қамчи чатди,
Урган қамчи симдай ботди,
Йигинни кок ёриб кетди,
Йигин-тўдани нуратди,
Бу бобонг қилди файратди,
Не одамлар ҳайрон қопти,
Улоқни олиб жўнаб кетди,
Болалар, хисоб бўлдими, деб
Чангороқдан ташлаб қайтди.
Мундай кунда кўнглин хушлаб,
Урди қамчини қулочлаб,
Бойчибор борди анфишлаб,
Боз устига улоқ ташлаб.
Ҳакқа етгай айтган доди,
Ултонтознинг жийрон оти
Улоқни олиб жўнай берди,
Култой факир бошин бурди,
Бойчиборга қамчи урди.
Жапс бўлиб ёнбошдан етди,
Ушлади кейинги путди,
Узанги ташлаб беркитди,
Ёнбош тушиб бирни тортди,
Ултонтознинг жийрон отин
Ўмма қип нуратиб кетди,
Жамъи қуллар йифилиб етди.
Мехмон, қайдан келасан, деб,

Нима уруг бўласан, деб,
Буйтиб чопма, ўласан, деб,
Кечга солим оласан, деб,
Бекнинг отин сен йиқитдинг,
Кариганда ўласан, деб,
Зўрнинг тўйин биласан, деб,
Бундай ишни қиласан, деб
Чопди Култойнинг улогин.
Душманлар мени билсин, деб,
Солганим соврин бўлсин, деб
Дамба-дамда улоқ ташлар,
Маррага етиб қайтарар.
Чатоқлашиб юру Култой,
Хеч солим бермайди қуллар.
Култой отини буради,
Йигинда суриб юради,
Кулларман тараф бўлади.
Ултонни парвой қилмади,
Сира кўзига илмади,
Чатогин Култой қўймади.
Дамба-дам улоқни олар,
Култой узанги қайтарар,
Ўласан деди кўп қуллар.
Култой кўпкарида донгдор,
Остига мингани тулпор,
Тир келолмайди одамлар,
Улоқдолиб Култой кетар,
Юлдуздай бўп оқиб ўтар,
Хеч ким кўл сололмай кетар,
Култой шундай иш кўрсатар,
Бир нечалар ҳайрон қолар.
Устида яхши лиbosлар,
Гап қиб ётади одамлар:
«Қайси элдан келган бу чол,
Остидаги оти тулпор,
Чол ҳам бўлса кўп зўрабор,
Кўп чатоқ қилади қуллар,
Парвой қилмайди баччағар».
Култой йигинда шағалмас,
Айтганини қилмай қўймас,
Гапирганман қулоқ солмас,
Гап деганин кўнглига олмас.
Бойчиборга камчи урди,
Алпомиш келгани шулди(р),
Култой ай-хайлаб маст бўлди,
Кўп улоқни Култой олди,

Хеч ким буни билмай қолди.
Йигинда ўзар Бойчибор,
Устида Қултой зўрабор,
Ай-ҳайлаб чиқарди номдор.

Бахмал ўтовга улоқни ташлаб, қайтган вақтида орт-сиртидан
Бойчиборни кўриб, Барчин таниб, Ёдгор ўғлига қараб, бир сўз
айтиб турган экан:

Мен йиғлайман яратганга зори-зор,
Не килса, ҳукми бор кудратли жаббор,
Тўйхонага отанг келгандир, Ёдгор.
Сувда бўлар сулув ўтнинг суйруги,
Биз билан бўларми ҳакнинг буйруфи,
Чўлтонглаб кўринди Чибор қуйруфи.
Фамли бўмай оҳу фифон этмайди,
Ёби от туёқдан отган турпоги
Сира ҳам бир чатанидан ўтмайди,
Богонада бир Чибор от кеп эди,
Уй гирдидан, болам, тўзанг кетмайди.
Тўйхонага, болам, отанг келганди(р),
Ким яхши, ким ёмон, англаб билганди(р),
Иншоолло, кўрармиз шундай полвонди.
Мард йигит майдонга кирса желлидир,
Тўқайдай йўлбарснинг изи беллидир.
Отанг йўлбарс, тўйхонада юргандир,
Ким яхши, ким ёмон, англаб билгандир,
Дўсту душманларни синааб кўргандир,
Отанг шуйтиб билдирмайин юргандир,
Кашал юртга кетган отанг келгандир.
Хазон бўлса боғда гуллар сўлгандир,
Бу ўчган чирорим ёниб қолгандир,
Мен билувда душман куллар ўлгандир,
Болам, элга қайсар отанг келгандир,
Отанг келиб оти мунда юргандир,
Ҳозир ўзин билдирмайин тургандир.
Кепти Қалмок элдан соғу саломат,
Билмаганлар қиласр эди маломат,
Душман кўрса энди солар қиёмат,
Бек отанг келиби соғу саломат.

Бу сўзни энасидан эшитиб, Ёдгор: — Бу қулларининг бир
жонига тегайин, агар отамнинг келгани рост бўлса, қулларни
ўлдирайин, ётган вақтида ҳам ингранса, айириб олади, агар
отамнинг келгани ёлғон бўлса, бу қуллардан бундай зулм кўриб
юрганча, ўлганим ҳам ўнграй келади, — деди. Шунда кўнглини

хушлаб, бир қайки таёкни кўлига ушлаб, қулларнинг кўпкарига ташлаб ётган саркаларини кувиб, четта чиқариб кетди. Саркани кувиб бораётib эди, Алномиш Қултой суратли бўлиб келаётib эди, олдидан чиқа кетди, Ёдгорни кўриб, бир сўз айтиб турган экан:

Баҳорда очилган боғнинг гулисан,
Сен ҳам бир-бировнинг жони-дилисан,
Сарка ҳайдаган болам, кимнинг улисан?
Бу элларда қайси уруғдан бўласан,
Сарка ҳайдаб, болам, қайда борасан?
Жамолинг ўҳшатдим осмонда ойга,
Ўзингни менгзайман бўз қарчигайга,
Қошингни ўҳшатдим эгилган ёйга,
Ўзингни менгзайман минг қўйли бойга,
Бойваҷча сифатлим кимнинг ўғлисан?
Бино бўлдинг қайси гавҳар донадин,
Сендай фарзанд бино бўлмас энадин,
Парвоз қилдинг қайси мазгилхонадин,
Баланд парвоз қўзим, кимнинг ўғлисан?
Шундай бўлди менга ҳакнинг фармони,
Сени тукқанларнинг борми армони,
Сени қўриб кетди бобонг дармони,
Наслинг одам десам, беҳишт фильмони,
Фильмон сифат болам, кимнинг ўғлисан?
Қариганда худо дейман, жилайман,
Кўз юборти атрофима қарайман,
Авлоди-аждодинг сендан сўрайман,
Хабар бергин, болам, кимнинг ўғлисан?
Қийғир деган қуш ўлтурад қияда,
Не қўриб кечирдинг фоний дунёда,
Тарзинг кўрса, шоҳлар юрар пиёда,
Файратинг бор Рустамдан ҳам зиёда,
Қайсар сифат болам, кимнинг ўғлисан?

Бу сўзни эшитиб, Ёдгорнинг кўнгли бузилиб, бу сўзни айтиб турган экан:

Жафоларга тушган танда жон эдинг,
Кул ичинда меҳрибоним сен эдинг,
Сен ҳам мени унутдингми, бобожон?
Тофу тошнинг бошин чалган туман-а,
Мендай сағир-шўрга охир замон-а,
Бек отам Қашалга кетган вақтнinda,
Энамнинг бўйида қопман гумона,
Сен ҳам мени унутдингми, бобожон?
Баҳорда очилган боғнинг гулиман,

Мен ҳам бир-бировнинг жони-дилиман,
Сен ҳам мени унудингми, бобожон,
Кашал кетган Алпомишнинг улиман.

Бу сўздайтиб сафир Ёдгор каради,
Кўпкаридан икки отли келади,
Келётган отлиларни қўради,
Кўнгли бузилиб Ёдгор йиғлади.
Армон билан ўлдим, ғаминг е, деди,
Қаддингдан, бобожон, берман ке, деди,
Сафир Ёдгор бобосига не деди:
— Бобо, раҳбар бўлгин мендай гўдакка,
Мени олгин, бобожон, кебанакка,
Мени берма бу икки бадиракка.
Гап эшитгин, бобо, айтган тилимдан,
Кариганда ҳазар қилма ўлимдан,
Жон бобожон, мени берма қўлингдан,
Айириб қол муна икки қулингдан.
Жон бобожон, мени берсанг қўлингдан,
Бу бадбаҳтлар килар менинг ишимни,
Кўздан тўкар бунда селоб ёшимни,
Зулм билан кесар куллар бошимни,
Ғазаб билан дорга тортар лошимни,
Ўрни учиб қолар Алпомишнингни,
Жон бобожон, мени берма қўлингдан.
Бу сўздайтиб сафир Ёдгор туради,
Кўпкаридан икки отли келади.
Сиёсатман бу Ёдгорга етишди,
Бу сафир Ёдгорнинг ақили шошди,
— Бобо, — деди,
«Култой» кулнинг белбоғига тармашди.
Аччири кеп улар отидан туҳди,
Бу энағар оша ҳаддидан ошди,
Бизлар билан бу бекликка талаҳди,
Куллар келиб Ёдгор билан ушлаҳди.
Ҳазон бўлиб боғда гуллар сўлиби,
Олло бунинг ақли-хушин олиби,
Ажал етиб, паймонаси тўлиби.

Фарзанд-да, кўриб «Култой»да тобу тоқат қолмади, кулларга туриб айтди: — Мунинг ҳам бир замонда отаси бор эди, худо қилди, етим бўлди, етим билан сагирни ура берармикан? Муни қўй, ўз вақти хушлигингни кўр, — деб билагидан ушлаб турди.
Алп-да, панжаси билагини янчиб бораляпти, кўзи ёшга тўлиб, билагини айириб ололмай ётибди. «Култой»нинг кўнглига кел-

ди: «Мабода зўрлигимдан англаб юрмасин», — деб билагини бўшатди, булар ҳам минди бедов отди, икковига икки саркани ўнгартди. «Одам одамни синааб бўлмайди экан, «Култой»нинг зўрлиги ҳар кимсача бор экан», деб жўнаб кетди. «Бобосига» қараб, Ёдгор бу сўзни айтди:

Гап эшитгин, бобо, айтган тилимдан,
Ҳазар қилмадинг-ку, бобо, ўлимдан,
Айириб қолгансан икки қулингдан,
Култой бўлсанг,
Мундай ишлар келмас эди қўлингдан.
Кашал кетган менинг отам бўлмагин,
Отам бўлсанг, менга ҳилла қилмагин.
Баланд тоғнинг бошин чалганди туман,
Худойим сақлагай бандани омон,
Ёмон кунда менга бўлдинг меҳрибон,
Отам дедим, сендан қилдим мен гумон,
Отам бўлсанг, менга ҳилла қилмагин,
Яхшилик кўр, ёмонликни кўрмагин,
Кўп яшагин, кўп йилгача ўлмагин,
Душманга билдириб, сиринг бермагин,
Отам бўлсанг, менга ҳилла қилмагин.
Олдингда жиланиб мендай фарзандинг,
Бошимда кўп ғаму кулфатим,
Култойга келмайди, бобо, жасадинг,
Аскар тоғни откудай бор файратинг,
Ҳар кимсача бордир бул ҳукуматинг,
Кашал кетган менинг отам бўлмагин.
Тўкарман кўзимдан селоб ёшимни,
Бобо, бежой билдим қилган ишингни,
Сен эшитгин йиғлаган нолишими.
Кашал кетган менинг отам бўлмагин,
Отам бўлсанг, мени хафа қилмагин,
Билмамиш бўп, ота, бунда турмагин.

Бу сўзни эшитиб, «бобоси» ҳам Ёдгорга қараб, бир сўз айтиб турган экан:

Кўздан ёшим мунчоқ-мунчоқ тизилди,
Устихон эмраниб, бағрим эзилди,
Хафа қилдим, қайтай, сендай кўзимди,
Отам дема, менинг кўнглим бузилди.
Ҳақ таоло мени қилган саргардон,
Фамли кулга эгам бўлсин меҳрибон,
Отам деб бобонгни айтма, Ёдгоржон,
Отангнинг мазгили қоронғу зиндан,
Отанг эмас, болам, Култой бобонгман.

Ешлик қилиб хаёлингни бўлмагин,
Лодон кўнглинг ҳар бир йўлга солмагин.
Отам деб бобонгдан гумон қилмагин.
Отанг Кашал юртда гариф қолгандир,
Қалмоқлар қўлида зиндан бўлгандир,
Отанг қайда, гарифликда қолгандир,
Қалмоқлар юртида отанг ўлгандир,
Лодон болам мендан гумон қилгандир,
Отам десанг, кўнглима гап келгандир.
Ўлиб кетган отанг қайдан келади,
Култой бобонг қандай отанг бўлади.
Кариганман, болам, қаддим букилиб,
Оҳ тортганда кўзда ёшим тўклиб,
Отанг кетган оша юртга
Билмайман қандай бўлиб,
Сендей лодон болам бул гумон қилиб.
Отанг бўлса, сенга раҳбар бўлмайми,
Сени суйиб бу бағрига олмайми,
Ул кўтариб тўйхонага бормайми,
Эр қип ётган Барчин гулни кўрмайми,
Душман қуллар бундай тўйда ўлмайми?!
Бек отангни қалмоқ айлаган зиндан,
Чириб ўлган қалмоқ юртда саргардон,
Отанг ҳам ҳаддили жуда зўр полвон,
Отам деб сен гумон қилма, Едгоржон.
Отам десанг, отанг ёдима келар,
Кўхнарган дардларим янгира,
Отам деб гапирма, сафир Ёдгор.

Бу сўзни эшишиб: «Мен ҳам билмайман экан. Култой бобом-нинг адаптовур кучи бор экан. Мунинг билан овлоқда бир сирлашиб кўрайин, қандай бўлса, энамни бермайман, Ултонтозга ўзим қанча чатоқ қилиб ётибман, мунинг бир кўнглини билиб қўяйин», — деб бу сўзни айтиётган экан:

Оҳ урганда кўзда ёшим бўлар сел,
Сирлашайнин, жоним бобо, берман кел
Ултонтоз дер билмаганим билдириди,
Ханжар урмай, бағрим қона тўлдириди,
Нечовларни айтганига кўндириди.
Қанча қўйни, қанча сўқим сўяди,
Беваю бечора қолмай тўяди,
Бу орада ўттиз кунча бўлиби,
Гул энама узмай совчи қўяди.
Асли ўзим добонбийлик тўраман,
Гул энамни қандай бунга бераман,
Гул энамни Ултонтозга берган сўнг,

Не бет билан Күнгирот элда юраман?!
Солма юрагима дөгү аламни,
Хафа құлма, бобо, мендай болангни,
Ултонтозга қандай берай энамни.
Ултонтоз зўрлигин маълум қилади,
Узилмай энама одам келади,
Энам қабул қилмай, ўрлаб туради,
Ҳамма қулнинг сўзин маъқул қилади,
Энам кўнмай, жуда ўрлаб туради,
Ҳисоб бергин, бобо, қандай бўлади?

Бу сўзни эшитиб, «бобоси» бир сўз деган экан:

Ултонтоздири Кўнгирот элда зўрабор,
Муни билан ҳеч ким бўлмас баробар,
Англагин албатта, болам, муҳрдор,
Муҳрдорман ўрлашмаклик не даркор?
Солма юрагингга дөгү аламни,
Кунинг учун берасан-да энангни.
Мен биламан добонбийлик тўрасан,
Кунинг учун шул энангни берасан,
Шул энангни Ултонтозга бермасанг,
Билгин, болам, қийнов билан ўласан.
Мундайғачоқ, қўзим, лодон бўлмагин,
Ултонбекман кўп ўрлашиб юргагин,
Ултоннинг қўлида фариб ўлмагин,
Бермайман, деб сира айта кўрмагин.
Биласан Ултонтоз элга тўради(р),
Хукуми ҳаммага маълум бўлади,
Зўрлик билан шу энангни олади,
Сағирсан, қўлингдан нима келади,
Ултоннинг сўзига ҳамма кўнади,
Кўпдан чиққан одам аҳмоқ бўлади.
У Ултонтоз билгин энди айдахор,
Зарбидан титрайди Бойсиндай эллар,
Тақал қилмай сен энангни беракўр.
Мехрибон бўп Ултон ақлин ола бер,
Қаватида бирга беклик қила бер,
Нима деса, айтганига кўна бер,
Сенга айтган насиҳатим шул бўлар.
Сен бузмагин, энанг қилар ихтиёр,
Энангни ҳам шунга тегмаги даркор.
Кўнгирот элда унаб турган одамлар,
Катта-кичик, бари бу сўзни билар,
Энанг Ултонтозга тегса, тинч бўлар.
Бир чеккаси сенда ҳам бор ихтиёр.

Бу сўзни эшитиб, Ёдгор бир сўз айтиб турган экан:

Дардли қул дардимни кимга ёрайин,
Ҳасратимдан элдан эл ахтарайин,
Гул энамни Ултонтозга берганча,
Ултонтознинг қийновинда ўлайнин,
Хар на бўлсан, жоним бобо, бўлайнин,
Ўлганимча тўйни бузиб кўрайин.
Гар кўлимдан келса, ўрлаб турайин.
Мен ҳам энди бермайманда тураман,
Бошимни кесганча ўрлаб кўраман,
Жоним борида Ултонтозни демайман,
Айтган сўзин қулогимга олмайман.
Мен ҳам сира билганимдан қолмайман.
Мен ҳам қайтай, ҳали ёшлик қиласман,
Сафирлигим яратгандан кўраман,
Ажал етса, ахир бир кун ўламан,
Мен энамни қандай бунга бераман.
Майли Ултон кўздан тўксин ёшимни,
Зўрлик қилса, кессин тандан бошимни,
Йиглатсин элимда қариндошимни,
Зўр бўлса, қилағўйсин ишимни.
Ўлдирмаса, мен бермайман энамни,
Бошим кесиб, дорга тортсин танамни.
Ултон жуда бизга изза беради,
Кўрмаган кунларни менга солади,
Хозир билдим, юртга эга бўлади,
Сафир деб баччағар қачон кўнглим сўради,
Бизни жуда ерман яксон қиласди.
У бизларни одам сонда кўрмади,
Фарид деб ҳолимни сира билмади,
Нокаслик қилди-да, писанд илмади,
Яхши қараб, бизга назар солмади,
Баччағарнинг катталиги қолмади,
Ёдигорнинг кўнглидагин билмади.

Шунда Ёдгордан бу сўзни эшитиб: — Баракалла, ўғлим, энадан бўлсанг, шундай бўл, — деди. — Мен ҳам кўйдан келаётирман, мен ҳам шу баччағарнинг тўйига борайин, кўлимдан келганча бузиб кўрайин, деб келаётирман, сен нораста гўдак, биз ёши етган «чол», икки ёрти бирикса, бутун деган гап бор. Нима бўлса, болам, борлашиб тўй бузмокни «бобонгдан» кўр, — деди.

Ёдгор ҳеч кимдан мундай илиқ сўз эшитган эмас эди, «бобо-сидан» бу сўзни эшитиб, жуда хўрозданиб, айрилмай қолди. «Култой» туриб айтди: — Икковимиз даладан борсак, Култой билан Ёдгор ваъдалашган деб юрар, сен кўпкари тарафдан бор,


мен тўйхона тарафдан борайин, ҳамма вақт мен чатоқ ки-
лайнин, — деб иккови икки тарафдан бораётир.

«Култой» бу сўзни айтиб, тўйхона тарафга бораётгани:

Чечан банда гапни гапга улади,
Култойдайдан Ёдгор қувониб боради,
Иккови ваъдани шундай қиласди,
Хар на деса, айттанига кўнади.
«Култой» ҳам бу замон бундан жўнади,
Таёни қўлида кетиб боради,
Тўйхонага «Култой» бундан жўнади,
Кўрган одам «Култой» дейишиб боради,
Алпомиш эканини ким билади?
Ултонтоуз хонни бориб кўрай, деб,
Килиб ётган шавкатини билай, деб,
Болам дейин, унинг ақлин олай, деб,
Билдиримайин тоза синааб кўрай, деб,
Ултонбекка қулли бўлсин қиласди, деб
Бу сўздўйлаб «Култой» кетиб боради.
Қулоқ солинг сўзининг мазасига,
Жаҳон титрар «Култой» овозасига,
Шу замонда таёғини судираф,
Энди борди Кўнғирот дарвозасига.
Дарвозадан ичкарига киради,
Катта-кичик ҳалойикқа қаради,
Оқ сут берган энасини кўради.

Энаси ариқнинг бўйида тўйга сўйган қўйларнинг қорин-ға-
жок, ичак-чавоқ, каллаларини тозалаб ўтирибди. Шунда энасини
таниб, таниса ҳам танимаган киши бўлиб: — Кунтуғумш енга,
омонсизми? — деди. Энаси мундай қаради, қараса, Култойнинг
довуши Алпомишнинг довушига ўхшади. Култойга қараб, бу
сўзни энаси айтиб турган экан:

Хой дединг банди-бўрним бўшади,
Соф суягим жой-жойидан бўшади,
Довушгинанг Алпомишга ўхшади,
Култойман деб, болам, мени алдама.
Сени қўриб ичим ўтдай куяди,
Кувраб кеттган эмчакларим ияди.
Оҳ урганда кўздан ёшим сел бўлди,
Болам, кетганингга етти йил бўлди,
Сендан қолиб кўрган куним шул бўлди,
Кўз ёshima ёқаларим хўл бўлди,
Култойман деб, болам, мени алдама.
Козилар олдинда шабгир нойиби,
Йигитта панд берар отнинг майиби,



Келдингми, жон болам, элнинг сойиби?
Кумушдандир қарчиганинг чегаси,
Олтиндандир кировканинг ёқаси,
Келдингми, жон болам, юртнинг эгаси?
Етти йиллик бандилик заҳмин кўрдингми,
Шукур қиласай, болам, озод бўлдингми,
Туя боққан Қалдирғочни кўрдингми,
Мунглиқнинг холидан хабар олдингми?
Бобир чўлда шўрли йиғлаб юрганди,
Бир бурилиб шундан хабар олдингми?
Култой бўлиб мени алдаб турдингми,
Хийла билан, болам, ақлимдолдингми,
Кўрар кўзим, омон-эсон келдингми,
Дўсту душман, элатингни кўрдингми?
Култойман деб, болам, мени алдама.
Сени кўриб қолмас менинг тоқатим,
Ёлғиз болам, сенсан менинг роҳатим,
Култой қулга ўҳшамайди келбатинг,
Шундай бўлди беклик қилган элатинг,
Ёлғиз кўзим, бошимдаги давлатим.
Куллар менга мунча қилган зулм, деб,
Энди менинг тар очилган гулим, деб,
Шукриллло, келди жони-дилим деб,
Сўз айтаман сени кетган улим, деб.
Култой бўп энангга раҳбар бўласан,
Сен менинг ҳолимни сўраб турасан,
Жоним болам, менга хийла қилмагин,
Хийла қилма, менинг болам бўласан.
Хафа қилма алам кўрган энангни,
Ёнган ўтга солма, болам, танамни,
Сен бориб кўргайсан Барчин санамни,
Култойман деб, болам, мени алдама.

Бу сўзни энасидан эшитиб: — Енга, сиз миён хатанамой бўп қолибсиз. Алномиш келса, Алномиш бўп келар эди-да, наинки Култой бўп келса, — деди. Бу сўзни эшитиб энаси: — Не билайн, менинг ҳам кўзим хаста бўлиб қолган, — деди. Энаси бунинг билан бир сирлашайин, деб бу сўзни айтиб турган экан:

Ох урганда кўздан ёшим бўлар сел,
Сирлашайин, жоним қайним, берман кел.
Жон қайним, эшиитгин айтган тилимди,
Хеч хабари борми ёлғиз улимди?
Дала-даштда сен юрасан, Култойжон,
Алномиш ўлгани энди билинди.
Ёлғиз фарзанд оёғидан йитарми,
Бойбўридан шундай давлат қайтарми,

Елғиз болам бедарак бўп кетарми,
Бунда юрти вайрон бўлиб ётарми,
Барчин келин қулга тегиб кетарми,
Не катталар қонлар ютиб ётарми?!
Давлатидан адрас-кимхоб киймасин,
Давлатли деб Ултонтозни суймасин,
Кариганда бий бобосин йифлатиб,
Барчин келин Ултонтозга теймасин.
Сен ҳам бундан тўйхонага борасан,
Тўйда юриб Барчинойни қўрасан,
Менинг сўзим унга маълум қиласан,
Барчин гулга насиҳатни берасан.
Яхши одам кўнар тангри ишига,
Қулоқ сол енгангнинг бул нолишига,
Мен қўрқаман Ултонтознинг зулмидан,
Боролмайман Барчин келин қошига.
Баримиз суюниб бунга қолганмиз,
Алпомиш ўрнига Барчин деганмиз.
Қайси юртда ул Алпомиш ўлади,
Кетиб баримизни сарсон қилади,
Бу Барчин ҳам қўлдан кетиб боради.
Ҳар на десанг, айтганингга кўндиргин,
Хафа қилмай Барчинойни кулдиргин,
Қандай бўлса Ултонтозга тегмасин,
Шу сўзимни Барчинойга билдиргин.
Айронлиқ ўтига бағрим доғлатиб,
Алпомиш деб фирофинда йиғлатиб,
Ултонтозни сира қабул қилмасин.
Элда юриб бўтадайин бўзлайди,
Кариганда у қаерни излайди?!
Алпомиш деб жигар-бағрин тузлайди.
Ёлғиз улдан жудо бўлиб қолган-да,
Барчинга суюниб кунлар қўрган-да,
Қариганда улдан жудо бўлган-да,
Ултон уни хизматига соглан-да!
Хозир Ултон элимизга тўради(р),
Баримизга кўп бир азоб беради,
Зўрлик билан Барчинойни олади,
Барчин кетса, бобоси йиғлаб қолади,
Йиғлаганда нима илож қилади,
Бир облонинг қилганига кўнади,
Тақдирига банда рози бўлади,
Бу сўзларни енганг айтиб туради.
Сен ҳам, билдим, бугун қўйдан келасан,
Ўз-ўзингда тўйда чалқиб юрасан,
Деганимни Барчинга билдирасан,
Чакириб оп кўп насиҳат берасан,

Барчинни сўзингга қўндирасан.
Қайта бошдан бий бобоси ўлмасин,
Алпомиш ўлгани маълум бўлмасин,
Ултонтозга сира ихтиёр қилмасин,
Насиҳат қил, зўрлаганман қўнмасин.
Бобосининг етагида бўлади,
Хизмат қилиб бийнинг кўнглини олади,
Барчинни ҳам зўрлаб йўлга солади.

«Култой» бу сўзни эшитиб: — Енга, ишингиз бўлмасин, йўли-
киб уни ўзим созлайман, — деди. — Қадрдонсан-да, созлай-
кўр, — деб энаси ҳам тайинлаб қолди. Тўйхонага ўтиб борди, Ул-
тонтозни кўрди. Ултонтоз тахт устида ўтирибди. Отаси Бойбўри
султон хизмат қилиб, эгнида қора меш, туйда сув ташиб турибди.
Бир нечалар хушомадга Бойбўрини Ултонтозга ёмон етказиб, сув-
лик меши билан койиб-сўкиб, гижиги турибди. Буни «Култой» кў-
риб, Ултонтозга насиҳат бериб, бу сўзни айтиб турибди:

Устингга кийганинг яшил кўк бўлар,
Подшолар бўшшаттан хурма тўп бўлар,
Ҳар ўлкада сендай беклар кўп бўлар,
Отасини урган фарзанд оқ бўлар,
Урма дейман Бойбўридай бийингни.
Кариганда гангитмагин бошини,
Кўздан тўкма мунинг селоб ёшини,
АЗоб берма бундай катта кишини,
Эйнига ортибсан сувли мешини,
Худо олган полвон Алпомишини.
Кариганда килган экан хизматди,
Кўхна бийга таъзир бермак уятди(^р),
Сабил қилган муна Бойсин элатди.
Полвони Кашалда ўлиб ҳам кетди.
Кариганда шўйтиб қилди хизматди,
Кариганда йифлатма валломатди,
Кариганда хизматингни қиласи,
АЗоб берсанг, ҳамма сенга кулади,
Отасини урган қандай бўлади.
Қора¹ бўлиби-ку, сенга хизматкор,
Бир нечалар ўз ҳолидан бехабар,
Бунга азоб бермаклигинг не дакрор,
«Култой» қулнинг айтган сўзи шул бўлар,
Яхши сўзман буни билмаклик даркор,
Ўғлидан айрилиб бўпти хору зор.

¹ Карол.

Бу сўзни Ултонтозга айтиб, отасига қараб ҳам бир сўз айтиб турган экан:

Мирзамсан, эшитгин айтган сўзимди,
Кўп еб эдим мен ҳам сенинг тузингди,
Сен тургин, менга хизмат лозимди(р),
Худо олган сенинг полвон қўзингди,
Қариганда хизмат қилган ўзингди(р).
Сенга сўз айтади Қултойдай ночор,
Мен турганда, Сизга хизмат не даркор,
Қулингман-да, мен бўлайин хизматкор,
Қултой қулнинг эътиқоди шул бўлар,
Мирзамсан, мешингни бергин, кўтарай.
Кўтарган мешингни сендан тилайнин,
Бу азобдан сени халос қилайнин.
Кўп еганман, тузингдоқлаб турайин,
Тўйхонага мен кўтариб борайин,
Сенинг учун ўзим хизмат қилайнин.
Азамат мард эдинг, бўлгансан ночор,
Сувли мешинг менга бермоғинг даркор,
Қариганда абгор қилганди қуллар,
Қартайганда бежой қипти хизматкор.
Яна баҳор бўлса очилар гуллар,
Гулистонда масти бўп сайрап булбуллар,
Булутлар масти (бўлса), чалқийди қўллар,
Сенинг учун мен бўлайин хизматкор.
Мен ҳам Қултойидим, ҳолим билайнин,
Қариганда сенинг кўнглинг сўрайин,
Мешни бергин, мен кўтариб юрайин.
Тўйхонага ўзим элтиб берайин.
Юрагингда бордир аламли дардинг,
Юртдан кетган бир сувланган фарзандинг,
Сени кўриб қолмади-ку тоқатим,
Сен тургин, бўлсин менинг хизматим,
Қариганда шундай бўпти меҳнатинг.

Бу сўзни эшитиб, Бойбўри ҳам «Қултой»га қараб, бу сўзни айтиб турган экан:

Фалакнинг гардиши, облонинг иши,
Облонинг ишига кўнмайми киши,
Ҳак деб чикар, ғамли қулнинг довуши,
Эйнима ортилган бу сувли меши.
Худонинг тақдири шундай бўлади,
Нима қиласа, банда бунда кўнади,
Кўнмаганда, нима илож қиласи,
Сендай Қултой келиб мешни сўради.

Кариганда мен билмайман ишимни,
Шум фалак гангитди азиз бошимни,
Сенга берсам мен ҳам сувли мешимни,
Турган қуллар менга таъзир беради.
Азоб бериб, балки мени уради,
Бир нечалар ахволима кулади,
Азали тақдирим шундай бўлади.
Қўйгин, Култой, ўзим қиласай хизматди,
Ёлғиз фарзанд ўз оёғидан йитди,
Суйганин оп эди, ул йўқ бўп кетди.
Раҳбар бўлиб, Култой, қилма хизматди.
Худо солди бизга бундай кулфатди,
Хозир биздан қайтган қанча давлатди.
Оҳ, урганда кўзда ёшим сел бўлди,
Кўз ёshima ёқаларим хўл бўлди,
Неча вакт сўрадим бек бўлиб элди,
Охирида кўрган куним шул бўлди.
Култой, ўз уруғимни мендан сўрама,
Кўпнинг бири бўлгин, менга қарама,
Мешни сенга берсам, булар кўяма?!
Кетгин, Култой, лодон кўнглинг бўлмагин,
Ўз-ўзингдан гапни сотиб олмагин,
Кўп айналиб менинг кўнглим бўлмагин,
Мешни сўраб сен ҳам ишдан қолмагин.

Бу сўэни эшитиб, «Култой» яна бир сўз айтиб турган экан:

Чечанликдан гапни гапга улайин,
Кўнгилда борини айиб турайн,
Мешингни бер, бу қулларни синайин,
Таъзир берса, ўзим жавоб берайн.
Кеча-кундуз ҳаққа фифон этарман,
Умрим ўтиб мен ҳам кўйда ётарман,
Мехнат килиб юриб бунда етарман,
Таъзир берса, ўзим жавоб айтарман.
Ахволингни кўриб кўнглим бузилди,
Дийда гирён бўлиб бағрим эзилди,
Шу сўзларга жавоб айтмай не бўлди?
Бу сўздайтиб мешни энди тилади,
Бойбўри инжилиб базўр кўнади,
Билмайди бу қуллар қандай қилади,
Култой кўймай миннатдор бўп сўради,
Ноилож ўйланиб мешни беради.
Шу замонда «Култон» кўнглин хушлади,
Икки қўллаб энди мешни ушлади,
У мешни эйнига қоқиб ташлади.
Бу мешни кўтариб «Култой» жўнади,

Ким дўст, ким душманин шуйтиб билади,
Отасига меҳрибонлик қиласди.
Тўйхонада халойиқлар қаради,
«Култой» жуда шундай хизмат қиласди,
Бойбўрининг мешин олиб келади,
Бу тўйда одамлар гап қип туради.
«Бу «Култой»га не бир бало бўлади,
Бойбўрининг мешин олиб келади.
Бекнинг сўзин наъма-сима қиласди,
Бек Ултонтоз билса, «Култой» ўлади,
Жўн юрмай, баччагар бундай қиласди,
Балони ўзига сотиб олади,
Ултон билса, билганидай қиласди.
Барча одам шундай сўйлаб туради,
Қариганда Култой айниб ўлади,
Хон кўрса, каттиқ азоб беради».
Бораётиб «Култой» буни билади,
Билса ҳам бир билмамиш бўп боради,
Эшитмаган киши бўлиб жўнади,
Тўйхонага энди етиб қолади.
Фанимлар сирини бундай фошлади,
Ким фариб бўлса, кўнглини хушлади,
Тўйхонага энди мешни ташлади.
Хизматкорлар ўртага олиб қолади,
Меши билан кўп сув олиб боради,
Ошпазлар қозонга сувни солади,
Хар қайсиси ўз ишида бўлади,
Балли, бобо, дейди, савол қиласди,
«Култой» қарамайди, бундан жўнади,
Ултонбек олдига қайтиб келади.

Келиб, тўйни қуллуқ бўлсин қиласди. Ултонтоз қуллук бўлсими
ни олиб: — Бобо, кўйдан келган экансиз, — деди. «Култой»
туриб айтди: — Ўғлим, кўйда юриб, сени тўй бераётir, Алпо-
мишнинг хотинини олаётir, деб эшитдим, нима бўлса, замон
ўзимизники бўлиб қолди, деб кўйда ҳам тургим келмади. Ултон-
бекнинг тўйига борайн, инқиллаб паловига тўяйин, ўнггайи
келса, тўппи, рўмолини олайн, деб сола бердим. Ултонтоз
туриб айтди: — Бобо, келсангиз, яхши келибсиз, ошпазларнинг
ичига боринг, бир қозонга ўт ёқкич бўлинг, ошнинг кўтини-
бетини еб, хўб қорнингизни тўйғизиб олинг.

«Култой» туриб жўнаб кетди. Ошпазларнинг ичига оралаб
кетди. Кирқ ошпаз кирқ қозонни осиб ошни пишириб ётибди.
Хар йигитлар ўт ёқкич бўлиб турибди. «Култой» хар қайсига
тегинаётиди. — Бобо, сенга бир гап бўлдими? — деса, — Замон
ўзимизники бўп қолди, — дейди. Бир йигитнинг елкасидан олди,
олиб туриб ерга бир урди. — Мен нима қилдим, — деб энтикиб

колди. — Ўғлимнинг тўйида ўзим ўт ёқаман, — деб сирикни кўлига олди. Бир қозонга ўт ёққич бўлди. Ҳамма ошни пиширмак билан бўлиб ётди. Бул бу ёққа ўтди, у ёққа ўтди, бир қозон ошни пишмай туриб қуритди.

Алпомиш бор вақтида озод қилган Фармонқул деган қули бор эди. Кўрди, бу қул тўйга баковул бўлиб турибди. Бу вақтида Ёдгор тўйхонани оралаб кела берди. Баковул капкирни сермаб юборди: — Энагар, тўйхонада сенга нима бор? Капкир Ёдгорнинг бети-оғзига тегиб, оғзи қонаб, чиркиллаб йиғлаб колди. Муни кўриб, «Култой» баковулга қараб, бир сўз айтиб турган экан:

Шамол турса, шобирлайди шотерак,
Ёдигорга зулм қиласан, бадирак,
Бир иликман гўштинг адо бўлами?!
Алпомиш боринда раҳбар бўлганди,
Ўлагин отаси озод қилганди.
Хазон бўлиб боғда гуллар сўлами,
Обло сенинг акли-хушинг олами,
Алпомиш арвоҳин ҳурмат қилмадинг,
Бир иликман гўшинг адо бўлами?!
«Култой» қулнинг сўзин сен ҳам биласан,
Ёдигорга нега зулм қиласан,
Писанд қиласан, бунга азоб берасан,
Гўштга тўйиб, кўтарилиб турасан,
Ёдигорни жуда бежой урасан.
Бу ерда сен бир нокаслик қиласан.
Катталиктининг иши шундай бўлами,
Бехуда етимга азоб берами,
Берган билан гўштинг адо бўлами?
Ёдгорнинг қўйини сўйиб оласан,
Шунинг орқасидан катта бўласан,
Мол эгасини сен ҳам нега урасан,
«Култойнинг» сўзини шундай биласан.

Бу сўзни айтиб, бир катта иликни олиб, Ёдигорга ушлатиб юборди. Ёдгор иликни кўлига ушлаб, бир ёғини оғзига тишлаб, энасининг қошига кетди. Бир неча девонбегилар айтди: — «Култой» жуда юртни бузди, Ёдгорнинг қўлидан иликни олиб қўйинглар. Бир нечаси айтди: — Кел-е, «Култой» ҳам ўзимизнинг каттамиз-да, катталиқ қилиб бир иликни олиб берди. Бир иликни Ёдгороқ еяқўйсин.

Бу сўзни эшитиб, баковулнинг хотини келиб, баковулга қараб, бир сўз деб турган экан:

Сендай бойкиш нега менман бўласан,
Мен билувда эрта чошқа ўласан,

Ёдиоргага нега зулм қиласан?
Эртан сен ҳам күп азобни күрасан.
Сен эшитгин мендай мунглиқ тилини?
Нега урдинг Алпомишининг улини?
Танимайсан мунда келган кишини,
Ким күттарди Бойбўрининг мешини?!
Билсанг куялар берибётири ошини,
Эртан чошка кесар қулнинг бошини.
Билмай кўтарилиб, менман бўласан,
Хозир гўштга тўйганинг биласан,
Мен билувда эртан чошка ўласан,
Элга йўлбарс оралади, баковул.
Эртан сендаи шўрли бундан ўтади,
Қилган ишинг бу олдингга қайтади,
Қўлинг бойлаб, сени ҳайдаб кетади,
Бошинг кесиб, сени дорга тортади,
Шўрли ёзган, тўғри юрсанг нетади,
Менманлигинг бу бошингга етади.
Эртан сени билганидай қиласи,
Бола-чақанг ебир-есир бўлади,
Сендаи менманларнинг бошин олади,
Кул битганга қиёмат бўп қолади,
Йўлбарс келиб, юртига оралади.

Бу сўзни эшитиб, баковул ҳам бир сўз айтиб турган экан:

Сен, синглигар, ёш вактингдан шум бўлдинг,
Алпомиш келганин қаёқдан билдинг?!
Довшингни астароқ чиқар, синглигар,
Ултон шоҳим билса, сен тайин ўлдинг.
Магар билса кўздан тўкар ёшингни,
Йиғлатади қовми-қариндошингни,
Билса қилас энди сенинг ишингни,
Зулм билан Ултонбек кесар бошингни,
Укасини... Алпомишингни,
Синглигар, астароқ чиқар довшингни.
Кўп яшасин, Ултон шоҳим ўлмасин,
Алпомиш отиман ўчсин, келмасин,
Сенинг бу сўзингни шоҳим билмасин,
Ўзи яхши, ёмонликни кўрмасин.
Агар билса, билмаганинг билдирап,
Дўст йиғлатар, душманингни кулдирап,
Ёш бошингдан тўйхонада нима бор,
Тур йўқол, синглигар, энди уйга бор,
Ултон шоҳим билса, сени ўлдирап.
Ёш бошингдан гап етаклаб юрасан,

Тўйхонада неча гап гапирасан,
Синглигар, сен бир балони қиласан,
Билиб қолса, Ултонбекдан ўласан.
Үлган Алпомишни оғзингга оласан.
Билса агар, ўтга солиб кўйдирар,
Оғзингга кўроғошинлар қўйдирар,
Алпомиш деб гапирса, ўлдирар,
Бу гаплардан сен, синглигар, бехабар.
Йўқ гапни бор қилиб олиб келасан,
Йўқолгин қошимдан, нима қиласан,
Неча сўзни бунда бошлаб турасан,
Юрт сўраган Ултонбекни биласан,
Кета бер, синглигар, тайин ўласан.

Бу сўзни баковулдан эшитиб, таги хотини бир сўз айтиб турган экан:

Худо дейин, яратганга жилайин,
Кичикликдан фариб қилган худойим,
Алпомиш келганин қайдан билайин.
Ўз элинда шоҳлик фамин еб эди,
Бойбўрига қайсинг раҳбар бўб эдинг?
Ким кўтарди Бойбўрининг мешини,
Ул сабабдан билдим Алпомишини.
Эшиггин сен мендай мунглиқ тилидан,
Меш кўтарар келмас Култой кўлидан,
Шутиб умид қилдим бийнинг улидан.
Хеч ким билмас элга келган султонди,
Ўз кўзиман билар элда душманди,
Эли-юртин шундай қилиб кўрганди(^р),
Култой бўлиб ҳийла билан келганди(^р),
Танимайсан элда юрган полвонди.
Келибди юртига соғу саломат,
Устида бор неча турли аломат,
Эрта чошка душманларга қиёмат,
Билмадинг, элга келган азамат.
Култой бўлиб юрган кетган полвонди(^р),
Хозир билсанг жонсиз¹ бўлиб юрганди(^р),
Туриб ўйла, Ултонтозинг ўлганди(^р),
Бу юртнинг соҳиби этиб келганди(^р),
Эртан чошка қиласар бежой майдонди.
Билган душманларга бермайди омон,
Шошмай кўриб юрган, билсанг, бул султон,
Эртан чошка бўлар коронги туман,

¹ Жосус.

Чангалидан қутулмайсан сен омон,
Хар ишдан Ёдгорни урганинг ёмон,
Токат қилиб туролмайди мусулмон,
Эртан килар бунда охират замон,
Элига саломат келган у султон.

Бу сўзни хотинидан эшишиб, баковул ҳам яна бир сўз айтиб турган экан:

Кўзингдин тўкилган селоб нур бўлди,
Қултой бобонг танимайин кўр бўлдинг,
Сен, мегажин, ёш вактингдан ўр бўлдинг,
Кетгин энди, ўладиган шўр бўлдинг.
Қора зулфинг эшилгандир тол-тол,
Хар толига берса етмас дунё мол,
Айтган сўзга сен, синглиғар, қулоқ сол,
Магар душман келса бўлади поймол.
Ёш вақтингдан тўйхонада нима бор,
Сен ўлиб, мен бўлмайин чиқимдор,
Тур йўқол, синглиғар, энди уйга бор.
Мендайин номдорнинг кўнглин бўласан,
Кетмайсан, хали ҳам сўйлаб турасан,
Мунча сўйлаб, тўйда нима қиласан,
Кет энди, синглиғар, тайин ўласан.
Ултонбекдир Кўнғирот элда зўрабор,
Буларнинг кўлида қанча ҳам юртлар,
Элнинг каттакони шундай муҳрдор,
Осилади кунда қанча гуноҳкор,
Сен гапни кўпайтма, тургин, синглиғар,
Аяб кўймас, билса, сени ўлдирад.
Аёлсан-да, бир лодонлик килмагин,
Гап қувиб сен бу ерларда турмагин
Даркор эмас, бундай сўзни билмагин,
Уйга кеттин, ўз йўлингдан қолмагин.
Сен аёлсан, юрган битта муштипар,
Билмаса, шохима бирор еткирад,
Тўйгарчилик, жуда одам кўп бўлар,
Эшиштан сўнг сени ҳам хайдаб борар,
Пойхатхтда сени қамаб кўп сўрас,
Ўз тилингдан бўлма энди гуноҳкор,
Кет, синглиғар, қандай бўлса, уйга бор.

Бу сўзни баковул айтиб, хотинини койиб юборди.

Ёдгор энасининг олдига иликни ушлаб кулиб кириб борди.
Энаси кулиб борганини кўриб, вақти хуш бўлиб, бир сўз айтиб турган экан:

Мен йиғладим яратганга зори-зор,
Зоримни эшитса құдратли жаббор,
Дуоғүйинг(менман), энанг муштипар,
Не сабабдан кулиб келдинг, Ёдигор?
Йўқса, болам, бир лодонлик қилдингми,
Ё бирордан бир илиқ сўз билдингми,
Ул сабабдан лодон болам, қулдингми?
Хаволаниб учтан суксур шайлансин,
Хар ерда душманнинг қўли бойлансин,
Фанимнинг ичига ғамлар жойлансин,
Жасадингдан мендай энанг айлансан.
Не сабабдир, кулиб келдинг, Ёдигор,
Сени кўриб менинг кўнглим бўлинар.
Қизларнинг ичида менман ўдаға,
Карчиға күш эркин қўнар ходага,
Баччалар молини ҳайдар подага,
Ўлим навбат етар шоху гадога,
Жасадингдан мендай энанг садаға.
Не сабабдан кулиб келдинг, Ёдгоржон?
Мен билмайман, болам, кулган ўйингни,
Кўриб кувонаман сенинг бўйингни.
Ярашиққа понза рўмол ўрайман,
Гул тарзим сарғайиб сенга қарайман,
Кулганингни, болам, сендан сўрайман.
Сенинг отанг Кўнғирот элда бек эди,
Сенга ҳеч ким раҳбар бўлган йўқ эди,
Неча йил кийганим бекнинг кўкиди,
Сендай болам сира кулган йўқ эди,
Азиз бошинг, болам, сарсон бўп эди,
Хар кўрганда энанг ҳайрон қоп эди.
Сенсан кўрар кўзим, болам, меҳрибон,
Сенинг ахволингни энанг сўраган,
Не сабабдан кулиб келдинг, Ёдгоржон?

Бу сўзни эшитиб, Ёдгор ҳам энасига қараб, бир сўз айтиб турган экан:

Энажон, қулоқ сол айтган тилима,
Балки эркин бўлдим Кўнғирот элима,
«Қултой» бобом илик берди қўлима,
Ул сабабдан кулиб келдим олдинга.
Неча йилдан бери мен ҳам саргардон,
Бошимдан кетгандай қайгули туман,
Кўнглима кўрққандай бўлди кўп душман,
«Қултой» бобом менга бўлди меҳрибон.
Ул баковул уриб таъзир беради,
Қараб туриб «Қултой» бобом кўради,

Баковулни койиб изза беради,
Йиғлама деб манглайимни силади,
Барча одам индаётмай туради,
Менга гүштли илик олиб беради,
Вақтим хуш-да, эна, қулгим келади,
Эл ичинда менга раҳбар бўлади.
Манглайимни силаб, кўнглим сўради,
Бошдан оёғимга жуда қаради,
«Култой» бобом шундай ишни қилади,
Ёдгоринг кўнгли шодмон бўлади,
Шутиб вақти хушди, кулиб келади.
Хаёлима «Култой» бобом зўрабор,
Бобома ботмади-ку кўп қуллар,
Индамади неча турган амалдор,
Бобом «Култой» шундай ишларни қилар,
Мехрибон бўп кўп кўнглимни кўтарар.
Болам дейди, менга раҳбарлик қиласар,
Кулганим боиси, эна, бул бўлар,
Вақти хушдир, кулиб келди Ёдигор.

Бу сўзни Ёдгордан эшитиб, энаси бир сўз айтиб турган экан:

Култой бобонг ўз кунини кўролмас,
Култой бобонг сенга илик беролмас.
Култой бўлиб болам, отанг келганди,
Мунгайганда аҳволингни кўрганди,
Култой бўлиб тўйхонада юрганди,
Кўриб сенга меҳрибонлик қилганди,
Болам, сенга отанг илик берганди,
Иншоолло, кўрармиз шундай полвонди.
Хазон бўлса боғда гуллар сўлганди,
Сўлган гулга булбул келиб кўнганди,
Кашал юртга кетган отанг келганди,
Етти йил Қалмоқда банди бўлганди,
Омон-эсон ундан озод бўлганди,
Эли-юртинг ҳозир келиб кўрганди,
Иншоолло, кўрармиз шундай полвонди.
Сенинг отанг элда зўрабор эди,
Бу юртда белгили бир қайсар эди,
Қаторинда чирқиллаган нор эди,
Қўнгиротда бир танҳо шунқор эди,
Душман кўрса, оч бўридай дориди,
Ўзин билсанг, мисли айдаҳор эди,
Болам, сенинг шундай отанг бор эди.
Даврон сурар эди Бойсин элига,
Душман киркиб чиколмайди йўлига,
Олмос қилич олар эди қўлига,

Кон қуярди душманлар мазгилига.
Билсанг, отанг шундай зўрабор эди,
Шул-эрнинг боласи бул Ёдгор эди,
Неча йилдан бери элда хор эди,
Шу зўрнинг қадами бунда дориди,
Мендай энанг унга интизор эди,
Жоним болам, қайсар отанг бор эди.

Бу сўзни айтиб, Ёдгорнинг вақтини хушлаб турди. (Энди) бу тўйда қулларнинг ёйандозлик ўйин бошлаб ётган ери:

Қулларнинг бари йигилилар,
Хўп гургумали тўйни қилас,
Барча халойиқ йигилар,
Катта-кичик келган эллар,
Элни дувлатиб тўй берар,
Неча қуллар сардор бўлар,
Қирқ кунгачайин ош берар.
Нишона бойлади қуллар,
Маст бўлиб ётириб баччафар,
Элга томоша кўрсатар,
Ҳар қайсиси ёйни отар,
Нишонани кўзлаб тортар.
Бу йигинни «Қултой» кўриб,
Одамларман бориб туриб,
Хўп замон деб ҳайрон қолиб,
Қизу жувонлар йигилиб,
Тўйгарчилик ўйин килиб,
Ҳамма бирдай ўйнаб-кулиб.
Эли-халқнинг ақлин олар,
Ҳамма «Қултой»дан бехабар,
Барчинойга одам келар,
Теккин деб насиҳат қилас,
Тегмайман деб ўрлаб туарар.
«Билгин, Ултонбек зўрабор,
Қўлда қанча мамлакат бор,
Барчиной, қилгин ихтиёр
Сенинг бу ўрлигинг бекор».
Сўз айтар неча одамлар,
Кулок солмайди зулфақдор.
Қайтиб бундан одам бориб,
Ултонтозга тўғри бўлиб,
Тегади деб жавоб бериб,
«Устидаги яшил кўкди,
Барчиной сизни хожлабди».
Айтиб юрур бекор сўзни,
Аҳмоқ гапга кўтартмалаб,

Шердай қилиб Ултонтозни,
Барчин билмас бундай сүзни,
Тенг күрмайди Ултонтозни.
Барчинойнинг кўнглин билди,
Узилмасдан одам келди,
Келганларга озор берди.
«Ким сизларни ахмок қилди,
Кўлидан келганин қилсан,
Хоҳламайман ундаи қулди,
Эли-халқ, сизга не бўлди?»
Бу сўзни Барчин айтди,
Бир неча уялиб қайтди.
Одам шундай бўлиб ётди,
«Култой» мард ишни кўрсатди.
Кулларнинг ёйини олиб,
Кўзлаб нишонани отди,
Шиқирлатиб ёйни тортди,
Бу ўйинга йифилган ёй,
Хаммаси ҳам синиб кетди.
Кўп одам ҳайрон бўп ётди.
«Култойда бу қандай файратди,
Тортган ёйи синиб кетди,
Култойда йўқ бу қувватди(р).
Ўзимиизга маълум Култой,
Яқинда куч бердими худой?
Бу Култойда бир бало бор,
Ҳеч ким бўлолмас баробар».
Янги кўрган халойиклар
Хайрон қолиб бари сўрап.
«Бобо, ишинг қандай бўлар,
Ёй тортувни қайдан билдинг?
Қанча ёйларни синдиридинг,
Сен кимдан таълим олдинг?
Ёйандазликни не билдинг?»
Ҳамма «Култой»нинг қошига,
Сўраб ётири ўз бошига,
Қойил бўп «Култой» ишига.
«Култой» бобом жавоб берар,
Шундай қип анга гапирав.
«Билмайсан, «Култой» зўрабор
Илгаридан хўп ҳаваскор,
Добонбийнинг парли ёйини
Тортиб бул «Култой» ўрганар,
Арпа кўлда бирга юрган,
Ўн тўрт ботмон ёй тортганда,
Алпомиш ҳам ҳайрон қолар».

«Култой»: — Мен сизларга бурунги кучимни айтай, Алномишининг Алпинбий бобосидан қолган, ўн тўрт ботмон биричдан бўлган (ёйи бор эди). Арпалининг кўлида ётиб, Алпомиши билан икковимиз ёй тортишар эдик. Ўн тўрт ботмон ёйни кўтариб тортар эдик, ёйининг ўки яшиндай бўлиб кетар эди. Аскар тонгнинг катта чўққиларини юлиб ўтар эди. Алпомишнинг ёйининг ўқидан менинг ёйимнинг ўки ўтар эди, — деди.

Бу сўзни эшишиб, турган одамлар айтди: — Бобо, сиз қариганда айнибсиз, энди кўтарилима-лоппи бўпсиз, ўн тўрт ботмон деганингиз, бир оғир нарса.

«Култой» айтди: — Айтовор биз оғир-енгилини билмас эдик, биз уни чивинча ҳам кўрмас эдик.

Куллар айтди: — Шу Алпомишнинг ёйининг қаерда қолгани билмаймиз, билсак, олиб келиб бериб, тортириб кўрас эдик.

«Култой» туриб айтди: — Сизлар билмасанглар ҳам, мен биламан, етти йил бўлди Алпомиши бориб бандиликдан ўлиб кетганига. Алпомиши кетганда, Арпалининг кўлида қолиб эди, шундан бери ажриқ босиб ётгандир.

Шунда қуллар одам буюрди. Ёйининг бор эканини кўрди, кўп кўш хўқизларни хайдаб борди, ёйни кимирлата олмади. Шунда Ултонтоуз сиёsat килиб, бу сўзларни айтди:

Баринг ҳам Кўнғиротда даврон сургансан,
Алпомишман бир сухбатда тургансан,
Шунинг билан хўб ўтириш қилгансан,
Алпомишман элда бирга юргансан,
Беклик қилиб баринг инъом олгансан,
Кўхна беклар, шернинг ишин кўргансан.
Ултонбекнинг айтган сўзин биласан,
Кўхна беклар, баринг хизмат қиласан,
Бу ёйининг ҳадисин баринг биласан,
Биринг қолмай, Арпалига борасан,
Ўн тўрт ботмон ёйни тортиб келасан,
Шундай Ултонбекка хизмат қиласан,
Хабар қилиб баринг қолмай юрасан,
Ултонбекнинг ҳукумини кўрасан,
Элда қолган кўхна беклар, ўласан.
Кўнғирот элда даврон суриб ётарман,
Қиличима қирмиз қонлар котарман,
Ҳаммангни Арпали ҳайдаб кетарман.
Арпали қўлига ҳайдаб борайин,
Кани сенинг тортмаганинг кўрайин,
Кўрмаган кунларни сенга солайин,
Зўрлигимни мен ҳам маълум килайин,
Ўн тўрт ботмон ёйни олиб қелайин,
Култойга тортқозиб ёйни кўрайин.
Менинг сўзим хўб муҳтасар билинглар,

Биринг қолмай чаққон бўлиб юринглар,
Эътиқодман жуда гайрат қилинглар.
Мендай бекнинг гапин ҳазил билмагин,
Баринг боргин, бировинг ҳам қолмагин,
Бекорига бунда қолиб ўлмагин,
Азоб кўриб қаттиқ кунда қолмагин,
Ёйга бормай, сира уйда турмагин.

Қадрдон беклар бу сўзни эшитиб, энди қандай бўлди, деб
барини ваҳм босиб қолди. Уйда туриб, қадрдон бекларга қараб,
Ултонтознинг зулм қилганини билиб, бул бекларнинг дилтанг
бўлганини кўриб, Барчин бир сўз айтиб турган экан:

Эшит, беклар, менинг айтган ноламни,
Вайрон қилмай бунда қулбахонамни,
Сизлар учун берай сафир боламни,
Қайтай, хафа қилма мендай санамни.
Қадрдонсан, беклар, эшит тилимни,
Куллар қаттиқ қилди сенга зулмни,
Сизлар учун берай сафир улимни.
Хайдаб боринг парли ёйнинг қошига,
Эгам раҳм қилсин кўзда ёшига.
Болам рози бўлар тангри ишига.
Хазон бўлса боғда гуллар сўлдирап,
Сўлган гулга булбулларни қўндирап,
Норимнинг юкини норчам келтирап,
Нор юки ҳар қандай отни ўлдирап,
Эр боласи шер-да, сафир Ёдигор,
Отасининг ёйин Ёдгор келтирап.
Мунглиқман, эшитгин сўйлар тилимдан,
Ёйга борсанг, умид узгин жонингдан,
Ёй оп келмак келмас сенинг қўлингдан,
Худойим сақласин ноҳақ ўлимдан.
Ярашиқقا мен зулфимни тарайин,
Сизлар учун Ёдгоржонни берайин,
Беҳуда барингни нобуд қилмайин,
Ёдигорни ўлдирганин кўрайин,
Оғир ёйдир, билсанг ул ҳам зўрабор,
Ҳайбати, салмоғи унинг анча бор
Сизларнинг қандайин қувватинг келар,
Қўзғай олмас тўрт юз, беш юз одамлар,
Ёйга бориб зулм билан ўлманглар,
Ёдгорни оп бор, ўз бошинга борманглар.

Барчиндан бу сўзни эшитиб, Ултонтоз айтди: — Энди бизга
кўнгил қўйди, энасини шу жувормак Ёдгор бузиб юриб эди,

бунинг ўзбошимчалиги кўнглига урди. Бул Ёдгорни ўлимга буюрди, — деди.

Ёдгорнинг бошига қамчи уриб ҳайдай берди. Ултонтозга караб, Барчин бу сўзни айтди:

Сен зшитгин менинг айтган сўзимни,
Олмадай сўлдирма гулдай юзимни,
Хам қайнимсан, ҳам мирзамсан, Ултонжон,
Зулм килиб урма сафир кўзимни.
Кулоқ соп эшитгин айтган нолага,
Худойим яратмиш бағри порага,
Мунглиқ чечанг йиглаб тушди орага,
Зулм қип боламни урма, садаға.
Бу сафирга бундай қилма зулмни,
Зулмман ҳайдама жону дилимни,
Хафа қилиб, урма сафир улимни.
Мен йиглайман яратганга зору зор,
Отаси бек эди-ку, Ёдгор хору зор,
Бу зулмга кўнглан сафир Ёдгор.
Зулмман боради шу замон Ёдгор,
Дуо қилиб йиглар энанг муштипар,
Отангнинг пирлари бўлсин мададкор,
Отангнинг кучини берсин парвардигор.
Хулкар бориб тарозига таялди,
Хизмат қилган хон олдидан жой олди,
Дуо қилиб йиглаган энанг аёлиди(р),
Йигла, болам, тор сийнангнинг доғига.
Гапга кулоқ солмас бу замон қуллар,
Бу ишни бошқарган мендайин дилбар,
Жоним болам, бўлиб келгин хизматкор,
Ўлмасин отангман қадрдан беклар,
Файрат қилиб ёйга боргин, Ёдгор,
Сенинг билан бирга қанча амалдор.
Бу сўзларни Барчинойим айтади,
Ёдгорнинг бошига қамчи чатади,
Сиёсат қип Ултон ҳайдаб кетади.
Барчин бу сўзни Ултонтозга айтади:
— Кулоқ сол, енгангнинг айтган нолишига,
Болам рози бўлди тангри ишига,
Аччик қамчи урма Ёдгор бошига.
Аччикланиб қарамагин бетига,
Аччик қамчи урма Ёдгор этига,
Кашал юртдан бек отаси келган сўнг,
Кур ҳайтлаб тушарсан қўйнинг кетига.
Бахорда очилган боргнинг гулисан,
Хозир бир-бировнинг жини-дилисан,
Яхшиликни тенг кўрмайсан ўзингга,

Ростин десам, шу сафирнинг қулисан.
Шамол турса шобирлайди шотерак,
Энанг чўри, асли ўзинг бадирак,
Нозанин бошимда пир-пирлар желак,
Мунча ғалва ҳам сиёсат не керак,
Яхшиликни тенг кўрмайсан ўзинга,
Мунча ҳам ҳаддингдан ошма, бадирак.
Яхши сўзман қанча сўйлаб кўраман,
Ўзим хафа, лодон кўнглим бўламан,
Муна беклар учун ўғлим бераман,
Шуйтиб сенга миннатдор бўп турман.
Мен яхши гапирдим, сира билмадинг,
Ёдигорни урарингни кўймадинг,
Ёмонлик қип, яхшиликни билмадинг,
Отасин арвоҳин ҳурмат қилмадинг,
Бетинг-кўзим деган гапни билмадинг,
Аслинг бузук, менманликдан қолмадинг.
Бу сўзларни айтар шундай гажакдор,
Сиёсатман ҳайдай берди бу куллар.
Куллар жуда Ёдигорни кўп урар.

Энасининг сўзи билан шердил бўлиб, Ёдгор ҳам бир сўз
айтиб турган экан:

Биз авлоддан давлат қайтган,
Давлат энди қулга етган,
Зарбингдан ер билан яксон,
Ёдгор бўлди жуда сарсон,
Ура бер, ура бер, навбат сендадир.
Мен ийғлайман ғамли кунда зори-зор,
Не қилса, ҳукми бор, қудратли жаббор,
Қўлингда қолгандир сафир Ёдгор.
Шу вақтида билганингни қилиб қол.
Нима бўлса навбатингни олиб қол.
Ўлмасам мен камолимга келарман,
Отамнинг тахтига бир кун минарман,
Бирин-бирин баринг дорга иларман,
Шундай кунда қасосимни оларман,
Ура бер, ура бер, навбат сендадир.
Бу сўзларни сафир Ёдгор айтади,
Айтган билан ёш бола-да, қайтади.
Рахми келмас кўздан оққан ёшига,
Кор-ёмғирдай қамчи урди бошига,
Рози бўлди худо қилган ишига,
Йиғлаб тушди бу қулларнинг қошига.
Куллар бу Ёдигорни ҳайдаб жўнади,
Ёдигор ахволини кўрган жилади,

Қадрдонлар бу сўздайтиб боради:
«Сенинг отангиди Кўнгирот тўраси,
Фарид бўлган қадрдоним боласи,
Шу ерлар отангнинг майлисхонаси»
Бу сўздайтиб бирга-бирга боради;
«Бу азобга энанг сабаб бўлади.
Давлат кўнса бир чибиннинг бошига,
Семурғ кушлар салом берар қошига,
Банда кўнар худо қилган ишига».
Ёдгорни куллар хайдаб жўнади,
Бобо «Култой» бирга-бирга боради,
Кулнинг қилган зулумини кўради,
Ёдигорга кўп тасалли беради.
«Култой» бобом, дейди қуллар биргалаб:
«Култой» билан бирга-бирга борсак, деб,
Каттамиз, деб буни иззат қилсак, деб,
Кўна амалдорнинг додин берсак, деб,
Хайдаб бориб парли ёйга солсак, деб,
Кейин қайтганини бошин өлсак, деб
Бир нечаси Арпа кўлин кўрсак, деб,
Ултонбек даврида даврон сурсак, деб,
Ултонбекни жуда иззат қилсак, деб,
Хамиша шундай бўлиб элда юрсак, деб,
Барчинойни хонга олиб берсак, деб,
Бекнинг тўйин жуда қизик қилсак, деб,
Бир нечамиз тўлпи-рўмол олсак», деб.
Бу сўздайтиб вақтин хушлаб боради.
Хозирги Ултонтоз элнинг тўраси,
Анча ердир Арпа кўлнинг ораси,
От чопса гумбурлаб тогнинг дараси,
Хали кўринмайди кўлнинг қораси,
Фарид бўлган Алномишининг боласи.
Хеч ким кулоқ солмас марднинг тилига,
Бораёттир шундай узоқ йўлига,
Йўл тортиб боради Арпа қўлига.
Куллар жуда кўп шумликни ўйлади.
Ёдигорни согландир шундай олдига.
Хеч ким қарамайди баланд-пастига,
Сипохилар мингдан отнинг устига.
Ёдгор борар бунда бағри эзилиб,
Гоҳ ерларда кетар кўнгли бузилиб,
Отли билан йўлда барғобар юриб,
Бораёттиб не гўзаллар оҳ уриб,
Худо деди, яратганга йиғлади,
Арпа кўлга энди яқин боради,
Ярқиллаган Арпа кўлни кўради.
Фалак титрар Ёдгорнинг нолишига,

Хайдаб борди парли ёйнинг қошига.
Фамли кунда тортар эди оҳувой,
Бандам десин, раҳм айласин бир худой,
Ўн тўрт ботмон бричдандир парли ёй.
Ўн тўрт ботмон брич ёйни қўради,
Отаси эсига энди келади,
Шул-ку бул отамнинг парли ёйи, деб
Кўнгили бузилиб Ёдгор жилади.
Дийда гирён бўлиб ўпка тўлади,
Отасин эсига Ёдгор олади.
Ҳар кимнинг бетига сафир қаради,
Тортгин дейди, куллар зулм қиласди,
Ёдгорнинг бошига қамчи уради.
Ёдигорга таёқ ўтиб боради,
Раббим дейди, ёйга чангаль солади,
Гиришин эгнинга энди олади.
Ўн тўрт ботмон бричдандир парли ёй,
Чирпиллаб гириши ботиб боради,
Ёдигор сафир кўп безовта бўлади.
Тортмоққа Ёдгорда дармон қолмади,
Ўз холига бадбахт куллар қўймади,
Ёдгорнинг бошига қамчи ташлади.
Шундай бўлди бунга ҳақнинг фармони,
Кўп бўлди юракда ғами, армони,
«Қултой» — қараб турган Кўнгиротнинг хони,
Кўп зулмни қилди куллар бемаъни.
Торт дейди, Ёдгорга жабр қиласди,
Тортмоққа Ёдгорда дармон бўлмади,
Куллар жуда кўп сиёсат қиласди,
Ҳар кимга термилиб туриб қолади.

Ёдгор ҳар кимга қараб, термила бергандан кейин, Ёдгорга
қараб, «Қултой» бу сўзни айтиб турибди:

Эр боласи шерсан, сафир Ёдигор,
Ҳар кимга термилиб турмогинг не даркор?!
Ҳар на бўлса пирга қилган эътиқод,
Худо, деб инграпиб тортгин, Ёдигор,
Отангнинг кучини берсин ҳақ парвардигор,
Мададкоринг бўлсин имом, чилтанлар,
Дўсту душман ичиди бўлдинг шармисор,
Сўғинингдан яратган қудратли жаббор,
Ўзинг паноҳ берсанг, бунга на гап бор,
Доно эгам ўзингдадир ихтиёр,
Шу гўдақдан бўлгин, эгам, хабардор,
Ўзингга топширдим, ҳақ парвардигор.
Бу сўзларни «Қултой» айтиб туради,

Хожатини бир облодан тилади,
Худо қылганига рози бўлади.
Кўп зулм Ёдгорга айлади қуллар,
Фарзанди-да, «Қултой» жуда интизор,
Аввал обло, дуюм наби бўлди ёр,
Ином, чилтан келиб бўлди мададкор.
Шоҳимардон пири назар солдилар,
Комил иирлар бунга қувват бердилар.
Ҳомиллашди келиб ўн икки Аҳмад,
Ёдигорга худо берди кўп қувват.
Пирлардан етишди шундай каромат.
Ёдгор шу замонда қаддин ростлади,
Қараб турган мўмин кўнглин хушлади.
Пирим, деди Ёдгор тортди чирпиниб,
Ўн тўрт ботмон ёйи бунда қўзғалди,
Парли ёйдан ажириқлар узилди,
Қараб турган мўмин кўнгли бузилди.
Ўзин ростлаб кўлдан тортиб жўнади,
Бу сафирга қуллар ҳайрон қолади,
Нечовлари гумон қилиб боради.
«Мунинг ўзи шундай сафир болади(р),
Ўғли отасидан баланд бўлади,
Ўлдирмасак, бу давлатни олади,
Мунинг билан ким баробар бўлади,
Сағал кунда бизга бало бўлади,
Ултонбегинг муни нима қилади?!

Хисобин қилмаса, ўзи ўлади».
Маслаҳатни қуллар қилиб боради.
Жафо тиги жондин ўтиб,
Айронлик бағрин йиртиб,
Ўн тўрт ботмон ёйни тортиб,
Қайсарнинг ўғли жўнади.
Боғдочилган гулдай бўлиб,
Чаманда булбулдай бўлиб,
Кўрганларнинг кўнгли тўлиб,
Душманларга келиб ғолиб,
Ўн тўрт ботмон ёйни олиб,
Ўзини бул йўлга солиб,
Қайсарнинг ўғли боради.
Тоғ Аскарин чалиб туман,
Эгам берди бунга омон,
Неча душман бўлиб ҳайрон,
Ёдгор шердай бўлиб шул замон,
Қайсарнинг ўғли жўнаган.
Ўн тўрт ботмон ёйни тортиб,
Овоза оламга кетиб,
Орқасига қамчи ботиб,

Ёдгор ёлғиз йўлга кириб,
Бир неча ҳисобин йитириб,
Ёдгор ишини битириб,
Отасин ёйин келтириб,
Кайсарнинг ўғли боради.
Жаҳон титрар Ёдгор овозасига,
Қулоқ солинг бу сўзнинг мазасига,
Ўн тўрт ботмон парли ёйни судираб,
Келиб қолди Қўнғирот дарвозасига.
Ох урганда хаста кўнглин хушлади,
Неча душманларнинг сирин фошлади,
Тўйхонага олиб келиб ташлади.
Тўйхонага шул овоза бўлади,
Ўн тўрт ботмон ёйни олиб келади,
Шу замон Барчин гул келиб қолади.
Боласининг килган ишин кўради,
Ёдигордин неча марта айланиб,
Ёдгорнинг бетидан Барчин сужди.
Бир облога етди менинг нолам, деб,
Обод бўлар мунда кулбаҳонам, деб,
Бўйингдан садаға мендай энанг, деб,
Отасин ўрнини босар ўғлим, деб.
«Қултой»нинг кўнглига сўзлар жой тутиб,
Қўнғирот элда кўп томоша кўрсатиб,
Бу ёйнинг қошига келгандир етиб,
Шул замон парли ёйни тебратиб,
Кўпдир томошамон, ён-ёқни тутиб,
Файратини одамларга кўрсатиб,
Қўринг энди «Қултой» мардди,
Ул чинорни ўқقا тутди.
Бек «Қултой» қилди файратди,
Файрати файратга етди,
Тўкирлини туман тутди,
Ўтдайин тутаниб кетди.
Шиқирлатиб ёйни тортди,
Ёйнинг ўқи чиқиб кетди,
Яшиндай бўп шу замонда,
Қўринг у чинорга етди,
Бу чинорнинг бир шохини
Ёйнинг ўқи юлиб кетди,
Ўқقا учган чинор шохи
Даҳсаилик ерни тутди,
Балки шу сўзлар бўп кетди.
Қўриб қуллар ҳайрон копти,
«Қултой» ишини кўрсатди,
Овозаси юртга кетди.
Эмиш-мемиш гап бўп ётди,

«Култой» қандай ёйни отди»,
Бир нечалар йўқ бўп кетди.
«Култой» эмас, бу балоди(р),
Бул бир бало қилади,
Курсин Ултонтознинг тўйи,
Бу ерда турган ўлади».
Бир нечаси гумон қилар,
«Алпомиш тайин келади,
Култойда не жон бўлади».

Таги ҳар қайсиси ҳар ишда бўлиб ётди, чокдан ўлан кечаси бўляяпти. Илгари Ултонтознинг энасини Бодом чўри дер эди, бу вактларда Бодом бикач дейди. Хадди одам йўқ, Бодом чўри деган кишининг тилини қирқади. Илгари Алпомишнинг бор вактида қовун кўриб, кўчкор боқиб, ҳар ерда ухлаб қолиб, тилини алаҳаққа чўкиб, соқовтоб бўлиб қолган эди. Бодом бикач: — Мен қайиганда кўйган боламнинг тўйи, ўзим бий хизмат қилайн, — деб бир айри инган туюни миниб, бу сўзларни айтиб, қизларни ўланга хабар килиб юрур:

Пас-пасгина пас кўчалай,
Пастлаб учай мусичалай,
Қўнғиётда чечан баччалай,
Бизнигига қолмай тўйга.
Майд йигитнинг бўлса уйи,
Жийин бўлай қилган тўйи,
Хабайчиди дувогўйи,
Бизнигига қолмай тўйга.
Тўй кип ётган добилбозлай,
Той биқинли сайбинозлай,
Хайип бий-бийини излай,
Қолмай бойинг чечан қизлай.
Боябейинг хуйдай бўлиб,
Ҳаммалайнинг бийдай бўлиб,
Тиши гавҳай дуйдай бўлиб,
Қолмай бойинг йўлга тўлиб.
Кийгани гуйгун қиймизлай,
Қўзи чўлпон юлдузлай,
Қўнғиётнинг чечан қизлай,
Ақли ясо тамизлай,
Қолмасин-да ёши-қайи,
Бойсинди хотин-қизлай,
Бизнигига қолмай тўйга.
Айтольмайди бойкиш тилди,
Оралади Бойсин элди,
Юриб шундай хабар килди
Ўнолтурур Қўнғирот элди,

Бир неча тушуниб қолди,
Бир хили сўзини билмай,
Қандай деб анграйиб қолди,
Бир нечалар мазақ килди.
Бекнинг энаси айтувчи,
Оралади ётган элни,
Ҳамма ерга қўймай борди.
Элга маълум мунинг сўзи,
Тўйга айтиб юру ўзи.
Ҳар элнинг устига бориб,
Кизу жувонларни кўриб,
Тўйга дейди соқовсираб,
Ҳаммасига хабар қилиб:
«Ўғлимдий элнинг тўяси,
Хабайчи бийдинг энаси».
Бу элни оралаб юриб,
Қайтиб келди элни кўриб,
Киз-жувонга хабар қилиб.
— Боғда очилай гул-фумчалай,
Гулга яшган нечалай,
Ойдай бўлган қиз баччалай,
Балх уйиб бойинглай тўйга.
Катта-кичик қолмай бойинг,
Хон Ултоннинг тўйин кўйинг.
Бугун никоҳ кияй кеча,
Йифилиб сатта ойимча,
Қолмай бойинг чечан бачча.
Олай бугун Байчин гулди,
Боймаган аймонда қолди,
Бодомнинг хабайи шулди,
Бул томоша қизиқ бўлди,
Бизникига қолмай тўйга.

Шунда ўлан кечаси бўлди, ҳар қизлар келаётир, ориги
эчкидай диркиллаб, семизи иркиллаб. Туя боқиб юрган ердан
Қалдирғоч ойим ҳам келди. Қалдирғочнинг келгани: «Бугун
никоҳ оқшоми эмиш, мен чўлда туя боқаман, кул ҳам бўлса,
бало-да. Никоҳ қийиб олгандан кейин ўрдага кириб кетади,
ундан кейин кўрмак қайда, шу бугун бир кўриб қолайин»,
деб келган эди.

Бодом бикач ўлан айтиладиган уйга, қизларнинг ўртасига
үтқизиб, икки кўлига икки чироқни бериб, бошига ҳам бир
чироқ қўйиб, Қалдирғоч ойимни шундай қилиб туриб эди,
Ёдгор даладан кириб келди. Ёдгорга Қалдирғоч бир сўз айтиб
турган экан:

Кулоқ сол, Ёдгоржон, айтган нолишима,
Келиб эдим қавми-қариндошима,
Бу йифинда чирок турар бошима,
Не сабабдан кулиб келдинг қошима?
Бирорлардан бир илик сўз билдингми,
Йўқса менинг ахволима кулдингми?
Оҳ урсам эзилар фарид юрагим,
Акамнинг ўрнига колган чирофим.
Жоним болам, энди ёшлиқ қилдингми,
Бул йифинда туришимни кўрдингми,
Жоним қўзим, эй, лодонлик қилдингми,
Не сабабдан кулиб келдинг, Ёдгоржон?!
Қўнфиrot эли — бари менинг элатим,
Келиб бунда ҳосил бўлмас муродим,
Сағир Ёдгор, бор суянган қувватим,
Қайтадан кўзғалди-ку кўнарган дардим,
Не сабабдан кулиб келдинг, фарзандим?
Туя боқдим, чўлда юрдим зор йиғлаб,
Айронлик ўтига бағримни доғлаб,
Мен ҳам келдим куйган жойни сўроғлаб.
Келдим бунда ҳеч ким раҳбар бўлмади,
Қалайсан деб мендан хабар олмади,
Сендан ўзга ҳеч суюнчим бўлмади,
Не сабабдир кулиб келдинг, Ёдгоржон?
Хафа қип аммангнинг кўнглин бўласан,
Тарзинг кўрсам вақти хушдай юрасан,
Яхшилик сўз хабарини биласан,
Хабар бергин, болам, нега куласан?

Бу сўзни эшитиб, Ёдгор энасига қараб, бир сўз деб турган
екан:

Сўзимни эшитгин, энам, меҳрибон,
Устимиизда қўп гап бўлди ҳар алвон,
Шу аммадан хабар олсанг бўлмайми?
Ўлиб кетган бек отамнинг арвоҳин,
Жоним энам, ҳурмат қилсанг бўлмайми.
Чирогин кўкларга урсанг бўлмайми,
Биринг ўлсанг, баринг ўлсанг бўлмайми?
Ўзинг ўлмай кулга ихтиёр берганча,
Қуллар келиб сенинг бошинг олганча,
Жоним энам, хизмат қилсанг бўлмайми?
Хазон уриб боғда гуллар сўлдими,
Обло сенинг ақлу ҳушиңг олдими
Замон жуда қулники бўп қолдими
Бор ихтиёр қулларники бўлдими?!
Кулу чўри ажаб ишни қилибди,
Эна, қара, бу иш қандай бўлибди,

Аммамнинг бошида чироқ турибди,
Бириң ўлсанг, баринг ўлсанг бўлмайми?!
Бу сўзларни айтди сагир Ёдигор,
Ўрнидан тургандир Барчин зулфакдор.
Жафолар согландир тандаги жонга,
Хазон бўлса зоғлар қўнар гулшанга,
Чирорини олиб отди осмонга.
Барчин сулув шундай ишни қилади,
Уйнинг ичи қоронги бўп қолади,
Жами қизлар шибир-шибир қилади:
«Бодом бикач кириб келса даладан,
Қалдирғоч чочини бир-бир юлади,
Кўрмаган кунларни бунга солади,
Бодом келса билганидай қилади».
Бу сўзни эшитиб мунглиқ жилади,
Худо қилганига рози бўлади,
Тақдирга тан бериб бунда туради.
— Юрагимда кўпdir қайfu-войимлар,
Кимнинг ақли бўлса гапни пойимлар,
Мен эдим-ку ўрдадаги ойимлар,
Чўлда бўлдим тuya бокар дарбадар,
Шибирлашма, товба дегин ё қизлар.
Биздан даврон ўтди, биз ҳам кўрганмиз,
Жойимизга биз сифинди бўлганмиз,
Тақдирда борини шундай билганмиз,
Бир гап ўйлаб бу тўйларга келганмиз,
Тўйга келиб қаттиқ кунда қолганмиз,
Ёдгоржонни кўриб хурсанд бўлганмиз.

Бодом бикач даладан кириб келди. Караса, уйнинг ичи қоронги бўлиб қолибди. Булай-улай койиш килайн деса, Барчиннинг зеҳни койиб турибди, келин бўллар деган умид билан бўлакдан чироқ ёқиб, созигарчилик қўлдан кетмасин, деб: — Қизлай, ўлан босланглай, — деб ўтира берди.

Шу вақтда «Култой» даладан кириб келди. Бодом бикач: — «Култой» сен нима қип жуйиссан, — деди. «Култой»: — Енга, сен ҳарипдошсан-да, Ултонбекнинг тўйида сен билан уч-тўрт оғиз ўлан айтишайин деб келиб эдим, — деди. Бодом бикач: — ўлан айтишсанг, сенинг тенгингинг бизлай бўпмизми? Кулми, қўтонми, подачими, чўпонми, сомонхонадами, тезакхонадами, айтишабий-да, — деди. «Култой» айтди: — Енга, сен тенгингни танимайсан экан, сенинг тенгингинг мен-да, сен енга бўлсанг, биз қайни. Мен орtingдан кумбалов берсам, кимнинг иши бор. Енгаси билан қайниси олғи-берги қип ётириб дейди, қўяди. Бодом бикач: — Жасовлон қизлайдинг ичинда айнимай ўл, — деб қойиниб колди.

Бу сўзларни «Култой» билан Бодом бикач айтиб турди.

Иккови бир-бири билан жуда ҳазилкаш эди. Ул Бодом ёзган мунинг Алпомиш эканини билган йўқ. Кадимги ҳазиллашиб юрган ўзимнинг Култойим, деб кўнглига келган йўқ. «Култой» жасадли бўлиб бу хам ўзини билдирган йўқ. Шуйтиб иккови ўлан айтишмоқчин бўлиб, Бодом бикач: — Қайиганда қўйган боламнинг тўйининг ўланини ўзим бошлайнин, — деб ўлан бошлиб турган ери:

Б одом б икач:

Кўй ёйилайкан дейдинг добонинда, ёй-ёй,
Дон қолмайди оқ бўғдой сомонинда, ёй-ёй,
Айтқанғинанг келсин-да Култой қайним, ёй-ёй,
Ўлан айтқин Ултонбек замонинда, ёй-ёй.

«К у л т о й»:

Ўрга тортиб ёйилар қўйинг, Бодом, ёр-ёр,
Нов теракдай улашган бўйинг, Бодом, ёр-ёр,
Кариганда келинли бўлақобсан, ёр-ёр,
Куллук бўлсин, енгажон, тўйинг, Бодом, ёр-ёр.

Б одом б икач:

Сойи-сойи сайкалай қўиди бошлай, ёй-ёй,
Қалам қошли енгалай ўлан бошлай, ёй-ёй,
Кизик-қизик айтинглай, қиз-келинлай, ёй-ёй,
Кизиб кетса, Ултонбек тенга ташлай, ёй-ёй.

«К у л т о й»:

Сари кўсам саркалар қўйни бошлар, ёр-ёр,
Қалам қошли енгалар ўлан бошлар, ёр-ёр,
Кизик-қизик айтманглар, қиз-келинлар, ёр-ёр,
Алпомишдан қолган молни Ултонтоz кимга ташлар, ёр-ёр.

Б одом б икач:

Үйнинг кўйки тувилик, узук бўлай, ёй-ёй,
Кизнинг кўйки билазук, узук бўлай, ёй-ёй,
Кизик-қизик айтинглай, қиз-келинлай, ёй-ёй,
Бу ўланнинг охии қизик бўлай, ёй-ёй.

«К у л т о й»:

Үйнинг кўрки туурлик, узук бўлар, ёр-ёр,
Кизнинг кўрки билазук, узук бўлар ёр-ёр,
Кизик-қизик айтманглар, қиз-келинлар, ёр-ёр,
Бу ўланнинг охирни бузук бўлар, ёр-ёр.

Бодом бикач: — «Қултой», сенга бий бало бўлдими, гапни айнитиб айтасан, — деди. «Қултой» айтди: — Енга, кўнглингга оғир олма-да, мен қойим айтаётирман. — Ундай бўлса гўйга, — деб тагин бошлай берди.

Б о д о м б и к а ч:

Кайданг келдинг, Култойқул, қайдан келдинг, ёй-ёй,
Кўк қайғадай қангиллаб қўйдан келдинг, ёй-ёй.

«Қ у л т о й»:

Хови сенинг, енгажон, равишингга, ёр-ёр,
Зебодайин бу майин довушингга, ёр-ёр,
Дуппа-дуруст одамни қарға дейсан, ёр-ёр,
Кўк қарғалар уя қўйсин кувушингга, ёр-ёр.

Б о д о м б и к а ч:

Андияма, Култойқул, мандияма, ёй-ёй,
Саккуч деган кўпақдай сандияма, ёй-ёй,
Оқ чангалинг тубига чийиб келдим, ёй-ёй,
Ичиб олсанг, чувчунинг қондияма, ёй-ёй?!

«Қ у л т о й»:

Андирингдан, енгажон, мандирингдан, ёр-ёр,
Кулча ёпиб нон еган тандирингдан, ёр-ёр,
Дуппа дуруст одамни кўпак дейсан, ёр-ёр,
Кўпак итлар тортсинг-да, чандирингдан, ёр-ёр,
Оқ чангалинг тубига сийиб келсанг, ёр-ёр,
Оқ чангалинг путоги қичувини қондира ма, ёр-ёр.

Б о д о м б и к а ч:

Ўлан айтган хўб қойим тилим бойди, ёй-ёй,
Хови менинг бековим элим бойди, ёй-ёй,
Оғзингга келган сўзни қайтаймайсан, ёй-ёй,
Йут эгаси бек Ултон улим бойди, ёй-ёй.

«Қ у л т о й»:

Ўлан айтган хўб қойим тилинг бордир, ёр-ёр,
Энди айтайин
Хов каерда бир қовим элинг бордир, ёр-ёр,
Тез бозорга солганда кирқ танга олар, ёр-ёр,
Кирқ тангалик Ултонтоз қулинг бордир, ёр-ёр.



Бодом бикач:

Кўй ёйилай Кўнғиёт этагига, ёй-ёй,
Қизлай юймас йигитнинг этагига, ёй-ёй,
Сен ўзингни одамман дема, Қултой, ёй-ёй,
Тенгламайман ковусим патагига, ёй-ёй.

«Култой»:

Кўй ёйилар Кўнғирот этагига, ёр-ёр,
Бизлар юрмас қизларнинг этагига, ёр-ёр,
Тенгламасанг, тенглама ковушингнинг патагига, ёр-ёр,
Хўрозимни қамайин катагингга, ёр-ёр.

Бодом бикач:

Мен ўзим дайё бўлсам, тошай эдим, ёй-ёй,
Тошган куни толлайдан ошай эдим, ёй-ёй,
Собожодай тилингни тиқиллатиб, ёй-ёй
Сендайлайди мен лойдан ясай эдим, ёй-ёй.

«Култой»:

Енгажон, сен дарё бўлсанг, тошар эдинг, ёр-ёр,
Мен биламан толлардан ошар эдинг, ёр-ёр,
Мендайларни сен лойдан ясар эдинг, ёр-ёр,
Ботбофима келганда шошар эдинг, ёр-ёр.

Бодом бикач:

Ўлан айтиб Қултой сен кўпни ўла, ёй-ёй,
Ўз тилингдан сен ёзиб қолма, ёй-ёй,
Не бўлса-да тилингни тойтиб сўйла, ёй-ёй.

«Култой»:

Мен ҳам айтар сўзимни билиб сўйлаб, ёр-ёр,
Гуноҳкорман тилимни тортиб сўйлаб, ёр-ёр,
Қултойкулга, енгажон, тегиб қўйма, ёр-ёр,
Мен сўрайин кўнглингди, тобинг борми, ёр-ёр.

Устида турган девонбеклар буни кўриб: — «Қултой» қурғур
кўйда юриб қойим айтмоқни машқ қилган экан, бекнинг энасини
беобрў қилиб, енгиб, босмалата берди. Қандай бўлса, бекнинг
энаси беобрў бўлмасин, ёш бола-да, енгилса ҳам билинмайди.
Барчин билан айтиштирасак, қандай бўлар экан? Мабодо Ултон-
бекнинг кўнглига гап келиб юрмаса? — деди: Бир нечаси айт-
ди: — Бориб олдидан ўтиб келсак, қандай бўлар экан?

Тўрттаси бориб, Ултонбекка арз қилиб, Барчин билан
«Култой»ни айтиштирасак, деб сўради. Ултонтоз: — Айтдира
беринглар, — деб жавоб берди. Булар келиб «Култойни» ўр-
нидан турғизиб: — Сиз жуда бало экансиз, мана келинингиз
 билан айтишинг, — деб одамлар Барчинга тўғрилаб
кўйди:

Барчин билан «Култой»нинг ўлан айтишиб турган ери:

«К у л т о й»:

Тогда андиз, ёр-ёр,
Сувда қундуз, ёр-ёр,
Ол ўланни, юборди
Қайнағангиз, ёр-ёр.
Барчин келин, ёр-ёр,
Тўқинганинг гиламдир,
Қарчин келин, ёр-ёр,
Тикиб берган белбоғинг
Адо бўлди, ёр-ёр,
Белбоғликка ярайми
Чарчин келин, ёр-ёр.

Б а р ч и н:

Ўлан айтиб банди бўрним бўшатма-чи, ёр-ёр,
Соф суягим жой-жойидан шовшатма-чи, ёр-ёр,
Довушингни алпима ўхшатма-чи, ёр-ёр.

«К у л т о й»:

Аёл деган бундай аҳмоқ бўламикан, ёр-ёр,
Ўлган одам тирилиб келамикан, ёр-ёр.

Б а р ч и н:

Хазон бўлса боғда гуллар сўлар дейман, ёр-ёр,
Сўлган гулга булбул келиб қўнар дейман, ёр-ёр,
Ўлган алпим тирилиб келар дейман, ёр-ёр,
Ёдигоржон отали бўлар дейман, ёр-ёр.

«К у л т о й»:

Давлатингдан кимхоб-адрас кийдинг, ёр-ёр,
Хақдан келган ишларга бўйнинг эйдинг, ёр-ёр,
Ўлиб кетган алпингдан умидинг бўлса, ёр-ёр,
Ултонтоздай кулларга нега тейдинг, ёр-ёр.

Б а р ч и н:

Давлатимдан адрес-кимхоб киёлмадим, ёр-ёр,
Хакдан келган ишга бўйним эёлмадим, ёр-ёр,
Тегмай кеткур бу бошим қайдан тегдим, ёр-ёр,
Едигорни ўлимга қиёлмадим, ёр-ёр.

«К у л т о й»:

Муна элда давлатли деб суюғойғин, ёр-ёр,
Ултонтоздай қайнингга төяғойғин, ёр-ёр.

Б а р ч и н:

Муна элда давлатли деб суюманми, ёр-ёр,
Тегмак тува изувига сияманми, ёр-ёр,
Фифон қилиб қамли куллар кўп қақшайди, ёр-ёр,
Ўлан айтган, Ёдгоржон, кимга ўхшайди, ёр-ёр.
Бобосининг олдига борар бўлур, ёр-ёр,
Бобосига қинғирлик қилас бўлур, ёр-ёр,
Тумогини бошидан олар бўлур, ёр-ёр.

«К у л т о й»:

Фариблиқда хаста кўнглим бузиб турман, ёр-ёр,
Кўздан ўшим мунчоқ-мунчоқ тизиб турман, ёр-ёр,
Тумогингни ол дема, Барчин келин, ёр-ёр,
Тонг отқали ўлан айтиб қизиб турман ёр-ёр.

Б а р ч и н:

Ҳарфдош айтган сўзин билар бўлур, ёр-ёр,
Айтиб-айтиб ҳарфдош қизиган сўнг, ёр-ёр,
Тумогини бошидан олар бўлур, ёр-ёр.

«К у л т о й»:

Тонг отганча сабр сақлаб турар бўлур, ёр-ёр,
Сен эртанги файратим кўтар бўлур, ёр-ёр.

Б а р ч и н:

Ишда фикр бўлгаича тишда талов, ёр-ёр,
Шу вақтда тумогин олар бўлур, ёр-ёр.

«К у л т о й»:

Тар очилган баҳорда гул бўлибди, ёр-ёр,
Азал тақдир бизларга шул бўлибди, ёр-ёр,

Тумоғингни ол дема, Барчин келин, ёр-ёп,
Қаринганда қайнағанғ кал бўлибди, ёр-ёп.

Б а р ч и н:

Тар очилган баҳорда гул бўлган йўқ, ёр-ёп,
Азал тақдир бизларга шул бўлган йўқ, ёр-ёп,
Шукрилилло, қайнағам кал бўлган йўқ, ёр-ёп.

«Қ у л т о й»:

Ёд этаман, йиғлайман, мен олломди, ёр-ёп,
Ол болангни деганда, ол болангди, ёр-ёп,
Калла катта болангта қўлим толди, ёр-ёп.

Б а р ч и н:

Ҳаққа етгай йиғласам айтган нолам, ёр-ёп,
Қўкайлари кесилган сафир болам, ёр-ёп,
Отасининг келганин ўғлим билди, ёр-ёп,
Исин олиб олдидা ухлаб қолди, ёр-ёп.

«Қ у л т о й»:

Ўлан айтиб кўнглингни хушлаймисан, ёр-ёп,
Фаним сирин ҳар ерда фошлаймисан, ёр-ёп,
Ол деганда болангни сен олмайсан, ёр-ёп,
Тухматига ўғлингни ташлаймисан, ёр-ёп.

Б а р ч и н:

Хазон бўлса боғда гуллар сўламикан, ёр-ёп,
Сўлган гулга булбул келиб кўнамикан, ёр-ёп,
Отасининг олдига ўғли борса, ёр-ёп,
Хов шул ҳам тухмати бўламикан, ёр-ёп.

«Қ у л т о й»:

Хатнинг боши алиф билан бе бўлади, ёр-ёп,
Ол деганда болангни сен олмайсан, ёр-ёп,
Шу тухмати бўлмайин не бўлади, ёр-ёп.

Б а р ч и н:

Кечакундуз мен тортдим оҳувойди, ёр-ёп,
Ёд этаман, йиғлайман бир худойди, ёр-ёп,
Сафир деган шундайин зигир майди(р), ёр-ёп,
Бир соатда бул ҳам безор бўлғайди, ёр-ёп.

«К у л т о й»:

Ой Барчиним, ёр-ёр,
Гул Барчиним, ёр-ёр,
Ақлинг бўлса, ўйла-да,
Бил Барчиним, ёр-ёр,
Ултонтозга текканча,
Ўл Барчиним, ёр-ёр.

Б а р ч и н:

Уй демайин қайнаға,
Буй дейсана, ёр-ёр,
Булбул кўнар тўқайнинг
Жийдасина, ёр-ёр,
Ултонтозга текканча,
Қора ерга тей дейсана, ёр-ёр.

«К у л т о й»:

Биздан қолган қўзилар
Кўй бўлибди, ёр-ёр,
Бунда қолган Барчиной
Бўй бўлибди, ёр-ёр,
Бўй қиз бўлиб жуда ҳам
Тўй бўлибди, ёр-ёр,
Биздан қолган қулуналар
От бўлибди, ёр-ёр,
Биздан қолган Барчиной
Ёт бўлибди, ёр-ёр.

Б а р ч и н:

Ўйлай-ўйлай Барчиной
Ўй бўлибди, ёр-ёр,
Хозир гумон қилибсиз,
Ёт бўлибди, ёр-ёр,
Сизи билан айтишиб,
Мот бўлибди, ёр-ёр.

Ана энди бу сўзларни айтишиб, ўлан охир бўлди, эрта-мертан тонг отди, кун чошқа ҳаддига етди, шибир-шибир гап бўп ётди, икки одамнинг боши бириккан ерда: «Шу Култой Алпомиш», — деб юрибди. Шу вақти Бойчиборни миниб юрган қадимги Култой йўлиқди. Култойга туриб айтди: — Бобо, қулларга чакириб, менинг келганимни билдиринг. Култой айтди: — Баччагарлар жуда ошиб кетган экан. Алпомиш келди, дегандан ўртага олиб,

уриб ўлдириб қўймаса, — деди. — Қўрқмай айта беринг, мен ўзим хабардор бўламан, — деди. Шу вақтгачайин Бойчиборни миниб юрган эди, қандай меҳмон, деб ҳеч ким таниган йўқ эди. Бу сўзни эшитиб, пойтахт остига бориб, Бойчиборни якжилов килиб, кулларга чақириб, бу сўзни айтиб туро:

Бугун қадр кечалари,
Боғдочилар гунчалари,
Қўнғирот элнинг баччалари,
Чувулла, Алпомиш келди.
Бу устинда яшил кўклар,
Бундай кунда кўнгли тўклар,
Ҳар ким бир-бирини йўқлар,
Отилмаган хурма тўплар,
Отил-ҳа, Алпомиш келди.
Баҳорда очилган гуллар,
Гулга маст бўлган булбуллар,
Етти йил даврон сурган куллар,
Қоч энди, Алпомиш келди.
Кетади қайғу-тумани,
Ўлади қанча душмани,
Эшитгин, куллар, бемаъни,
Келиб қолди Қўнғирот хони,
Ўл энди, Алпомиш келди.
Тар очилган тоза гули,
Ул ҳам чаманнинг булбули,
Обод бўлар Бойсин эли,
Меш кўтарган хон Бойбўри,
Бойбўрининг жони-дили,
Пешвоз чиқ, Алпомиш келди.
Беҳуда тўқма кўз ёшинг,
Бизни куйдирган нолишинг,
Оч кўзингни, кўтар бошинг,
Қўнғирот элда қариндоши,
Пешвоз чиқ, Алпомиш келди.
Рухсат олмай шикор кетган,
Етти йил зинданда ётган,
Қалмоқ юртини бўзлатган,
Омон-эсон элга етган,
Пешвоз чиқ, Алпомиш келди.
Чўлларда гангиган боши,
Қўпдир йиғласа койиши,
Ой Қалдирғоч эмишдоши,
Пешвоз чиқ, Алпомиш келди.
Келгандир Қўнғирот тўраси,
Қўпдир бағрида яраси,
Банданинг йўқдир чораси,

Оқ сут берган бул энаси,
Пешвоз чик, Алпомиш келди.
Онсот бўлгай-да бул мушкули,
Сўйлаганда кизил тили,
Гумона қолгандир ули,
Пешвоз чик, Алпомиш келди.
Неча вакт бўтадай бўзлаб,
Душманларнинг бағрин тузлаб,
Адашган бир-бирин излаб,
Пешвоз чик, Алпомиш келди.
Кетар кўнглидан губори,
Минганим хоннинг Чибори,
Элга келгандир шунқори,
Обод бўлар кирдикори,
Ўн саккизда тул бўп қолган
Ҳакимбекнинг Барчин ёри,
Пешвоз чик, Алпомиш келди.
Келибди давлатли шунқор,
Қултой шундай берди хабар,
Аланглашиб қолди қуллар,
«Энди қандай бўлди кунлар?»
Бир-биридан хабар олишиб,
Чувуллашиб, кўп адашиб,
Бир тўполон бўлиб ётири
Мундай гапга тўйхоналар.
Бу сўзларни бунда Култой айтади,
Бир аломат ғалофул бўп ётади,
Алпомиш ўзини маълум этади.
Устидан кийимни чечиб отади,
Жамоли ярқиллаб бекнинг кетади,
Бек келгани маълум бўлиб ётади.
Белига ярашган заррин пўтаси,
Худойим кечиргай қилган хатоси,
Во болам, деб қулоч ёйиб келади
Шу замонда Бойбўридай отаси.
Элига келгандир шундай тўраси.
Яратганга етгай марднинг ноласи,
Келиб қолган шўрлиларнинг боласи,
Болам, дейди, қулоч ёзиб келади
Шу вактида оқ сут берган энаси.
Кетмасин бекларнинг номусман ори,
Бир облога етгай банданинг зори,
Энди обод бўлса бекнинг кирдори,
Тўрам дейди, қулоч ёйиб келади
Бунда қолган бекнинг Барчиндай ёри.
Оҳ тортса, тўқилар кўзидан ёши,
Фам билан чиқади бекнинг довуши,

Ака дейди, кулоч ёйиб келади
Туя боққан Қалдирғоч эмикдоши.
Келип бары мунда бекни күради,
Навбат-навбат босар эди бағрига,
Бир-бирининг йиғлаб холин сўради.
Адашганлар бу топишиб қолади,
Хар бир қуллар ҳар хизматга жўнади,
Хар қайсиси ўз ишида бўлади.
Калма-шаҳодат мусулмоннинг тилига,
Азамат бош берар диннинг йўлига,
Хабар кетди ўн олтуруғ элига,
Эли-халқقا шундай хабар бўлади,
Ўн олтуруғ Кўнгирот эли билади.
Эли-халқقا бул овоза бўлади,
Катта-кичик ҳар тарафдан келади,
Келип бекни зиёрат қип кўради.
Хар йўлларга одам сифмай келади.
Тахт устига ишорат қип жўнади,
Тахт устига давлатли хон минади.
Муни кўриб Ултон кўнглим бояғи,
Бек бўлмай ўлай деб бойқиши жилади,
Бу ишига кўп пушаймон қиласи.
Ўйлаб турса менинг кўнглим бояғи,
Қайда қолди йилки боққич таёғи?!
Ултонтоz ўзини ҳар ерга урди,
Алпомишни кўриб ҳоли танг бўлди.
Элга келган Алпомишдай тўради,
Ултон қилган ишни Ёдгор билади,
Ёдгор сачраб ўрнидан туради,
Ултонтоz олдига етиб боради.
Дод деганда эшитмайди тилини,
Боғлаб олди Ултонтоzнинг қўлини.
Ултонтоzнинг урганини ўлади,
Сен баччағар, мени қандай қилдинг, деб
Юр отам олдига, деди, ҳайдади.
Ултонтоzдир, кейин тортар бўлади,
Бормайман, деб қингирликни қиласи,
Нега бормайсан, деб Ёдгор уради,
Кечакурган, бугун қайтиб қолади,
Шундай қилиб туртиб ҳайдаб боради,
Ёдгор зўрлигини маълум қиласи,
Пойтахт остига яқин боради.
Ултонтоzдир, шундай бўйлаб қаради,
Тахт устида Алпомишни кўради,
Кўрган вактда бўғими бўшаб боради,
Қуллук деб тўнқайиб салом беради.
Ултонтоzни бек Алпомиш кўради,

Хар иши ўзига маълум бўлади,
Бекни кўриб Ултон ерга қаради.
Ултонтозни хон гуноҳкор килади,
Ясовул қўлига муни беради,
Ултонтозни бундан ҳайдаб жўнади,
Кунда қилиб Ултонтозни қамади.
Давлат қайтса, киши шундай бўлади,
Ултонтоз бу қамовли туради,
Тақдирда борини шўрли кўради,
«Бошимга менманлик бало бўлади».
Катта-кичик ҳалойиклар йиғилиб,
Ҳамма бирдай бу давлатда туради,
Шул вақтида Қоражонни сўради:
— Нима бўлди, алп Қоражон келмади,
Мундай кунда мендан хабар олмади,
Келиб мени жоним дўстим кўрмади?!
Ҳамиша менга ҳамдам бўлган,
Пойгаларда хизмат қилган,
Тўқсон алпнинг додин берсан,
Тор зинданда хабар олган,
Бек дўстим, деб йиғлаб юрган,
Кўринмади алп Қоражон.
Бул жоним онинг қурбони,
Мен бўлдим элнинг сultonни,
Ул менинг азиз меҳмоним,
Йўқдир менинг Қоражоним.
Гулдай очилиб сўлдими,
Ё паймонаси тўлдими,
Ажали етиб ўлдими,
Бир ёқда овда бўлдими,
Мендан бехабар қолдими,
Ақлини обло олдими,
Қайда бўлур Қоражоним?

Бу сўэни эшитиб, турган ҳалойиклардан Ҳакимбекнинг сўзи-
га жавоб берди: — Ў, сиз кетгандан кейин Ултонтоз юрга эга-
бўлди, сиз билан бирга юрган одамларнинг барини хизматга
солди. Қоражонни ҳам элга қўштиrmай, Олатоғдан жой берди.
Келиб одамларга кўриниш бериб, аралашмоққа Қоражоннинг
ҳадди йўқ эди. Ултон бек бўлганда амри шул эди, муҳрлаб
қўлига коғоз қилиб берган эди. Бир одамга ёнашиб, гаплашга-
нингни кўрсам, ўз гуноҳинг ўзинг билан, бошингни кесиб, дорга-
тортаман, деган эди. Шу хат Қоражоннинг қўлида бор. Ул
сабабли ҳеч кимнинг кўзига тушмайди, маконида ажали етса,
ўлгандир, ажали етмаса, шу Олатоғда юргандир.

Бу сўэни одамлардан эшитиб, Алпомиш бир сўз айтиб турган
экан:

Энди билдим дўстим фариб бўлибди.
Ўзи сарсон, мени билмай қолибди,
Эса дилтанг бўлиб унда юрибди,
Калласи ганг бўлиб ёзган қолибди.
Хаялламай бир бедовни мининглар,
Ёллиз бормай, учта-тўртга бўлинглар,
Коражонга оту сарпой олинглар,
Шундай қилиб Коражонга боринглар,
Бориб Коражонга хабар қилинглар,
Менинг келганимни хабар беринглар.
Бу сўзларни айтар давлатли шунқор,
Албатта бу сўзни билдириш даркор,
Билмай юрган қайғу-ғамда бехабар,
Қошима етишсин Коражон номдор.
Коражон ҳам бирга ўтирган қурдошим,
Менинг жуда ҳолим билган сирдошим,
Улуғдир, хўп менинг узанги йўлдошим,
Коражонни кўрсам битади ишим,
Ултонтозни бек қилган қариндошим.
Бу сўзларни қайсар Ҳаким айтади,
Бир неча бекларга сўзи ботади.
Қилар ишни бунда ҳар ким билади,
Коражонга оту сарпой олади,
Тўрт одам бўй Олатоққа жўнади,
Карамайди, кичаб кетиб боради,
Бекнинг сўзин борса ўрин қиласди,
Мол бокар кўриб хайрон қолади,
Не гап эканин ҳеч ким билмади,
Олатоққа кичаб ўтиб боради.
Юртга келган элнинг валламати,
Шундай бўлган Алпомиш сиёсати,
Колмади-ку хизматкорлар тоқати,
Терлаб бораёттир остинда оти.
Олатоққа энди бориб қолади,
Коражоннинг мазгилини кўради,
Коражон жойига шундай боради,
Алп Қоражон ул буларни кўради.
«Ултонтоздан менга ясовул келиб,
Бир бало қиласди булар ҳам туриб.
Ултонтоз амрини тутиб келганди,
Бир ишнинг бошида булар юрганди,
Бир хизматга от терлатиб келганди».
Коражон билмади бундай юрганди,
Коражонга энди етиб борганди.

Коражон буларни кўриб, нима гап, деб сўради. Борган одам-лар Алпомишнинг келганини билдириб, бир сўз айтиб турибди:

Хақ таоло бергай омон,
Бир эгам бўлди меҳрибон,
Келиб қолди Ҳаким султон,
Дарров отлангин, Қоражон.
Келиб сени кўп сўради,
Алломиш йўлга қаради,
Хон сенга интиқ бўлади,
Шўйтиб от чопиб келади.
Сенинг билан сирдош бўлган,
Қалмоқ юртида кўп юрган,
Бир-бириңгнинг ҳолин билган,
Бек Алломиш элга келган,
Бекнинг дўсти, хон Қоражон.
Қўринмайди баланд-пасинг,
Қўнглингдан кетар шикасинг,
От-сарпой берган дўсинг,
Отлангин, турма, Қоражон.
Эшигтгин сен айтган сўзни,
Ҳаяллаб тўхтатма бизни,
Бориб қўрсанг добилбозни,
Сенга бизлар айтдик арзни.
Бу сўзни айтди хизматкор,
Чоғланди Қоражон шунқор,
Қайтадан кўнгли очилар,
Кийиб сарпой, отин минар,
Қоражон бунга қўшилар,
Тўртов эди бешов бўлар,
Боради Қоражон қайсар.
Бошдан кетган аломатди,
Қоражон қилиб файратди,
Жуда қистар минганди отди,
Қўрсан дейди валламатди.
Олатоғда умри ўтган,
Алломиш деб жафо тортган,
Ииғлаганда қонлар ютган.
Ўзин юртидан айрилган,
Исломнинг динига кирган,
Ўз-ўзидан юз ўғирган,
Алломишман Қўнғирот келган,
Охир куни шундай бўлган.
Келди, дейди Алломишхон,
Бораётган Қоражон полвон.
Жафоларга тушиб энди танда жон,
Фарип қулга эгам бўлгай меҳрибон,
Олатоғда кўп вақт бўлиб саргардон,
Сарпой кийиб келаётир Қоражон.
Қоражонбек шундай бўйлаб қаради,

Кўзиман кўрмаса, нима билади,
Кўнғирот юрти ободдай кўринади,
Коражон кеп Бойсинга оралади,
Коражон бориши маълум бўлади,
Алпомишига бирор хабар беради.
Тахтидан шул замон бул пастга тушиб,
Кўхна бўлган амалдорлар етишиб,
Пешвоз чиқиб шундай шунқор қаради,
Келаётган Коражонни кўради,
Коражон отидан ерга қўнади.
Кирғий деган қуш ўлтирас қиёда,
Кўп ишни ўтказди фоний дунёда,
Бир-бирига юрди пою пиёда.
Икки алп бир-бирини шундай кўради,
Айронлик ўтига бафри поради,
Бир-бирига кулоч ёйиб жўнади.
Фариб қулга эгам бўлган меҳрибон,
Бир-бирига энди яқин боради.
Бошидан кетгандай коронги туман,
Кўришганди икки полвон шул замон:
— Эттийил мазгилим коронги зиндан,
Мендан баттар сен ҳам бўлибсан сарсон,
Сени ҳам қўймабди бу элда душман,
Эшитиб сўнгра кўп қилганман пушаймон,
Сени кўриб кетди юракдан армон,
Дўстим эдинг, жуда менга меҳрибон,
Ёмон кунда хабар олган Коражон,
Омон-эсон келиб сени кўрдим мен,
Хамдам бўлган Коражонбек бормисан?!
Бир-бирини кўриб кўзин ёшлади,
Сўрашиб шул замон вақтин хушлади.
Йифилишган бунда Кўнғиротдай эллар,
Коражон, Алпомишига бирга бу номдор,
Пойтахтга олиб жўнар одамлар,
Қанча одам пўшт-пўштлайди, хизматкор.
Элу ҳалқлар шундай зўрни кўради,
Тахт устига энди беклар жўнади,
Қанча саркардаман бул ўтиради,
Ўтириб бир-бирин ҳолин сўради,
Айтмаса ҳам айтганча бўп қолади,
Ўтган ишни иккови ҳам билади,
Бойбўрини сўраб одам келади,
Келган одам куллук бўлсин қиласи,
Келган одам бунда кетмай туради,
Худонинг ишига рози бўлади,
Энди бугун кунлар кеч бўп қолади.

Кун кеч бўлиб, йиғилиб қилди маслаҳатди, қуллук бўлсинга
келган одамларнинг олдига таом тортди. Қилди зиёфатди, югу-
риб қилиб хизматди, шуйтиб оқшом ўтди. Эрта-мертан тонг отди,
тўй тарафдусида бўп ётди:

Олтин отиб, олтин қовоқ оттириб,
Шу замонда оқ ўтовлар ёптириб,
Намойишга катта тўплар оттириб,
Элу ҳалқقا тўй овоза бўлади,
Алпомиш келганин маълум қиласи,
Ошпази, новвойи қолмай жўнади,
Келиб бунда бари жам бўп қолади,
Раста-растада қилиб қозон қуради.
Шу бугун бошлади Қўнғиротда тўйди,
Сўйиб ташлай берди сўқимман кўйди,
Хар тарафдан чавандозларни жиёди.
Бек Алпомиш ўзи шундай тўради,
Элу ҳалқقا тўкиб ошни беради,
Бир аломат, ажойиб тўй бўлади,
Беваю бечора тўйиб боради.
Ошга тўйиб, кўпкарига боради,
Теваракда яёв ҳам бориб туради,
Етолмаган узок йўлдан қаради,
Оти зўри тикка суриб боради,
Юрт йигилган, катта йигин бўлади,
Алпомишман алл Қоражон туради,
Катта-кичик, ҳамма ҳам йигилади.
Бек Алпомиш қараб қўнглин хушлади,
Хар ерда ғанимнинг сирин фошлади,
Чавандозлар жуда кизиқиб кетди,
Ўртасига баковулни ташлади.
Давлатли қул адрес-кимхоб кийдирди,
Хақдан келган ишга мўйнин эйдирди,
Кимки ғаним, хони-монин куйдирди,
Зўрлигини шуйтиб маълум қиласи.
Тўй бериб чавандоз вактин хушлади,
Боз устидан Бодом чўрин ташлади,
Чавандозлар кўштақим бўп ушлади.
Хар қайси шердай бўп отни уради,
Душман бўлган бари ёзган ўлади.
Шуйтиб эли-ҳалқка ҳукмин билдириди,
Кирқ кунгача кунда уриб Ултонни,
Кирқ кундан кей Ултонтоzioni сўйдирди.
Кўрсатди шундайин элда ишини,
Жаллодга кестириб Ултон бошини,
Шуйтиб дорга тортди анинг лошини,
Карға-кузун еб кетганди гўшини.

Бек Алпомиш элга келган түради,
Кирк кеча-кундуз тинмай түйни беради,
Кирк кундан кей түйлар охир бўлади.
Жавоб олиб чавандозлар боради,
Бир нечалар кўп солимни олади.
Обод қилиб келиб ётиришахрани,
Омон-эмон кўриб кирдикорини,
Никоҳ қийиб олди Барчин ёрини,
Кўнгилдан чиқариб чер-ғуборини.

Шу куни кеч бўлди, ётди. Эрта-мертан тонг отди, тонг отган-да уч-тўрт отли Бойбўрининг давлатхонасига етди. Келиб Барчинни сўраб турибди. Алпомиши кўриб, Алпомишига арзини айтаяпти:

Кўп бўлади айтган сўзнинг хатоси,
Хон Бойсари Барчин гулнинг отаси.
Хазон бўлиб боғда гуллар сўлгандир,
Аввал обло унинг ақлин олгандир,
Барчин келиб, қалмоқ юртда қолгандир,
Қайта бошдан ҳақ меҳрибон бўлгандир,
Кетган давлатининг барин олгандир,
Қайтиб элатим деб излаб юргандир,
Мехнат тортиб кўп ишларни кўргандир.
Элатим деб юртин излаб юргандир,
Неча одам унга ҳамро бўлгандир,
Қалмоқ юртдан ўтиб мунда келгандир,
Кўкқамиш кўлига келиб қўнгандир,
Бурунгидай юртни ёйлаб тургандир,
Барчинойга жуда интиқ бўлгандир.
Оҳ урганда сўйлайдиган сўзим, деб,
Балки менинг кўрадиган кўзим, деб,
Барчин ойим менинг ёлғиз қизим, деб.
Бойсари амриман бизлар келамиз,
Отасин Барчинга маълум қиламиз,
Барчинойни бизлар сўраб турамиз,
Кўрсак, бизлар суюнчини оламиз,
Бойсарининг қизин сўраб турамиз,
Мехнат қилиб Кўкқамишдан келамиз,
Бойсари ҳурмати, хизмат қиламиз,
Йўлиқсак, Барчинга жавоб берамиз.

Бу сўзни эшитиб, буларни отдан тушириб, зиёфат қилиб, сарпой-инъомлар бериб, буларни жўнатди. Яна катта-кичикларни йиғиб, соп номдор бийлардан ўн кишини Бойсарини олиб келгани буюрди. Бул Кўкқамиш ўзининг яйлови, элдан уриб чикадиган яқин ери. Бу ўн киши Бойсарини олиб келгани

жүнаб кетди, йўлга тушиб йўл торти. Бориб Бойсарига кўри-
ниш бериб, Бойсарига неча насиҳатларни айтиб, Бойсари ҳам
буларнинг сўзини кулогига тутиб, бурунги кек, аччиқ гинала-
рини ташлаб, ўлмай қариндошига келганига шукур қилиб, бу-
ларнинг сўзини маъкул билиб, Барчинни кўрмакчин бўлиб,
канча шоҳлик шавкат билан ўн одамни олдига солиб, Кўнғи-
ротта яқинлашиб келди. Буларнинг ҳам келаётганини билиб,
олдига одам чиқиб, бу нима гап, деб Барчиной қараб, отаси
 билан энасини кўриб, пою-пиёда олдига чиқиб, бу сўзни айтиб
 бораётир:

Юрагимдан кетган доғу аламми,
Бу кўрганим ё ўнгимми, тушимми,
Келаётган оқ сут берган энамми?!
Белига боғлаган заррин пўтамми,
Қалмоқ юртда қолган менинг отамми?!
Бу сўздайтиб борар қулочин ёзиб,
Кўзидан мунчоқдай ёшини тизиб,
Кетди отасининг кўнглини бузиб,
Бойсарининг мунда бағри эзилиб.
Барчинни кўрганди, бўғни бўшади,
Яёв бўлиб бари отдан тушади.
Ёлғиз қизин бул Бойсари кўради,
Барчинни кучоклаб номдор жилади.

– Отам менинг учун жафо кўрган, деб,
Қалмоқлар юртида изза бўлган, деб,
Мен келган сўнг қонлар ийғлаб қолган, деб,
Эшитганма дўсту душмандан бу юртда,
Қалмоқлар юртида отам ўлган, деб.
Кўнглимнинг чироги равшан бўлибди,
Ўлан отам қалмоқ юртдан келибди,
Келиб бунда бул мунглукни кўрибди,
Ўчган чирогим қайтадан ёнибди,
Душманлар ер билан яксон бўлибди,
Кечакундуз шукур айтай худога,
Худо менинг тилагимни берибди.
Неча йил ийғлатди мендай санамни,
Бунда вайрон қилган кулбаҳонамни,
Энди олди канча доғу аламни,
Аввал кўрдим ўлди деган тўрамни,
Боз кўрдим отам билан энамни.
Етти йил қуриди танамдан дармон,
Шукрилилло, кўрдим яна қайтадан,
Кариганча сурсам бу элда даврон,
Иншоолло, кутулдим фаму кулфатдан,
Энди бўлсан бунда Кўнғиротда даврон.

Бу сўздайтиб бир-бирини кўради,
Барчинни кучоқлаб энди жилади.
Кўкқамиш кўлида кулбахонаси,
Барчинни кучоқлаб йиғлар энаси:
— Кўнғирот қараб қайтдинг Барчин зулфакдор,
Сен кетган сўнг вайрон бўлди ул жойлар,
Неча йил сандираб бўлдик дарбадар,
Бу ишларни солди ҳақ парвардигор.
Неча вақт бизларга бўлди қиёмат,
Бизга тангри бир кун қилди шафоат,
Қайта бошдан келди қадимги давлат,
Отангман ўтириб қилдик маслаҳат,
Элга келдик тағи соғу саломат,
Неча гапдир, устимиизда аломат.
Кўкқамишга бир кун келиб қўнибмиз,
Омон-эсон, болам, сени кўрибмиз,
Шу азобни кўрмагандай бўлибмиз.
Худойим бергайдা барчага дармон,
Иш бўлмас кудратли ҳақдин бефармон,
Омон-эсон сен келдингми, Ҳакимжон,
Ҳакимни бағрига босиб ул замон.
Бир-бирини кўриб ақили шошди,
Адашганлар бир-бириман топишди,
Кўнглидан гинани қанча сўрашди,
Бойбўриман бул Бойсари кўришиди.
Оғайни-да, меҳри тоблаб қолади,
Бир-бирининг йиғлаб ҳолин сўради,
Қанча кулфат ўтиб кетган бошидан,
Ул азобни кўрмагандай бўлади.
Алпомиш келибди, шукур қиласи,
Ҳаммасига Ҳаким сабаб бўлади,
Катта-кичик қариндошлар келади,
Ҳаммаси бир-бирин келиб кўради,
Сабил бўлган элин обод киласи,
Барчин энасини бирга олади,
Шу замон ўрдага қараб юради.
Хизматкорлар Барчиннинг хизматида,
Тонг отганча туриб иззат қиласи,
Бир-бирининг жуда ҳолин сўради,
Ётмайди, меҳмондан хабар олади,
Барчиндан барининг кўнгли тўлади.
Барчин сулув ақли расо, доноди,
Ўзи аёл, кўп ишларни билади,
Билмаганни бул ҳам йўлга солади,
Энаси Барчиндан рози бўлади.
Кўрган кун эсига тушганда армон,
Оҳ тортса танидан қурийди дармон,

Эсига олса күнгли майлис¹, паришон,
Қанча заман озод бўлган шул замон,
Ўйнаб-кулар, сира қолмади армон,
Қайтадан Кўнгиротда бўлгани даврон.
Пойитахтга бегу хонлар жийилди,
Карнай-сурнай тортиб қилди ўйинди,
Созанда, нағмагар – бари жийилди.
Хар қайси ўз машқига ўйин қиласди,
Кизу жувон томошага келади,
Пойитахтда вақти хушлик бўлади,
Томошамон саф-саф бўлиб туради,
Кўча-раста бул одамга тўлади,
Кўролмаган баланд ердан қаради.
Бир неча шоирлар айтиб туради,
Бекнинг давлатидан инъом олади,
Кизу жувон аралашиб қолади.
Қизик дейди, қочар-писар бўлмади,
Ҳаммаси ҳам томошага келади,
Бек келганин шуйтиб маълум қиласди,
Бир кеча, бир кундуз ўйин қиласди,
Шу замонда энди жавоб бўлади.
Бу ўйинни жавоб бериб тарқатди,
Томошамон бари мазгилга қайтди,
Келган бари пойитахтга йирилиб,
Ўтириб бир ўпка-гинани айтди,
Кўтариб кўнглидан қанча гинани,
Булар ҳам туриб мазгилига қайтди.

Шуйтиб ўз юртини шункор кўрибди,
Омон-эсон мунда элга келибди,
Гунохкорлар Ҳакимбекдан ўлибди.
Шундай қилиб кўрди ўсган шаҳрини,
Ўзи қайтиб олган Барчин ёрини,
Шуйтиб топган мурод-мақсадларини,
Фозил шоир айтар билганларини.
Бу сўзларнинг бири ёлғон, бири чин,
Вақти хушлик билан ўтсин кўрган кун,
Эслаб-себлаб айтган сўзим бўлди шул.
Хой десанг, келади сўзнинг маъқули,
Шоир бўлар билинг одам фақири,
Шуйтиб адo бўлди гапнинг охири.

¹ Маъюс.

ИЗОХ ВА ЛУФАТЛАР

Ушбу изоҳ ва луғатларни тузишда атоқли олим Ҳоди Зарифнинг айрим достонларга илова килинган луғатларидан фойдаланилди ҳамда сўзларнинг фақат «Алпомиши» достонидаги маъноларигина изоҳланди.

Абгор бўлмоқ — хароб бўлмоқ.

Абжил — энчил.

Абжӯш — қўйма, етти марта эритиб қуйилган каттиқ жисм.

Тожикча хафт жўш — етти эритма.

Авбаҳолам — аввалам бор.

Адавур — анча, талай, кўп.

Ажнос (айнос) — тартиб, пайт, хил.

Айвон — қаср, сарой.

Аймашиб — чирмashiб, ўралиб.

Айролиқ — айрилик, хижрон.

Айтувчи — хабарчи.

Алам — байрок.

Алпози сўз — алпози «алфоз» сўзининг бузилган шакли. Алфоз — сўз, сўзлар.

Бу ерда кераксиз сўз маъносида.

Анг — ов, овланадиган жонзод.

Ангнимоқ — кузатмоқ, пойлаб турмок.

Ангшиштамоқ — кишинамоқ; отнинг кишинаб, гижинглаб ирфиши.

Арна — дарёдан ажралган кўлча, сел ювган сой.

Аташтиримоқ — унаштирумок.

Ақирмоқ — хайкирмоқ, каттиқ кичкирмоқ.

Аҳли қубур — қабр аҳли, ўликлар.

Байдоқ — байрок.

Бардор-бардор — кўтар-кўтар.

Бақан — келинни узатиб бораётганда, йўлни тўсиш учун ишлатиладиган аркон.


Бақан солмоқ — келинни узатиб келаётганда, келин сепидан улуш (совфа-салом)


олиш учун йўлни тўсиш одати.

- Бежо — ёмон; жойиз эмас, ножүя, ноўрин.
- Белдоев — ўтовнинг белидан ўраб боғланган арқон.
- Беллик — отнинг белини эгар урмаслиги учун бел чўққисининг икки ёнибосидан кўйиладиган кигиз ёки мато.
- Берман — бери томон.
- Бесоҳиб — эгасиз.
- Бешкирти — болаларни ёшлигига аташтириш, никохлаб кўйинш одати.
- Бидоҳат — бидъят.
- Билмамиш — билмагандай.
- Бирдон — овланган жонзод солинадиган хўржинсимон халта.
- Бирич — бронза. Мис, кўрёшин, алюминий, қалайи каби маъданлар эритмасидан хосил қилинган қотишма.
- Бикитрма — пиистирма. Панада биқиб (писиб) турган одам.
- Бой — эр.
- Булдираб (билидираб) — милдираб.
- Бурум — ўрим, соч ўрими.
- Бўлжал -- мўлжал.
- Бўгча-бўй — аёлларга тегишили ўй-рўззор, кийим-кечак, нардоз-андоз буюмлари.
- Газа — тоннинг икки чўққиси ораси.
- Газзоб — каззоб, ёлғончи, фирибгар.
- Гала — бокувга ҳайдалган туялар тўпи.
- Гана-гана — баъзи-баъзи.
- Ганг бўлмоқ — гангимок.
- Гумгумадор (гургумадор) — катта, дабдабали.
- Гуппи — ховликма, мактанчок.
- Гуппон — еб ётган; семириб кетган.
- Гурос-гурос — тўп-тўп.
- Давр — отнинг белидан сафрисигача ёпиладиган ёпик.
- Давриқмоқ — ховрикмок.
- Дарбанд — тог орасидаги тор йўл.
- Дарманда бўлмоқ — дучор бўлмок.
- Дархон — эркин; солик ва тўловлардан озод этилган шахс ёки уруғ аъзолари.
- Даҳмарда — кўй-мол бокувчи хизматкор; чўпонлар бошлифи; чорвадор.
- Дотқа бўлмоқ — шикоят кильмок.
- Дурмак-дурмак — тўда-тўда.
- Дўстаман — мукка, муккаси билан.
- Дўнмоқ — айланмоқ; қайтмоқ.
- Дўёнилоқ — тўқнашмоқ, дуч келмок.
- Елбагай — сарпоҷан, бели боғланмаган; тўнни киймай, елкага ташлаш.
- Елмаст (жемлас) йигит — этилган йигит.
- Ёзган — гуноҳли, ёзикли; кулфатли.
- Ёқмоқ — суртмоқ.
- Жабдуқ — от асбоблари.
- Жайнамоқ — яйрамоқ, яшнамоқ.
- Жайрагир — яшамагур.
- Жапсан — ўтовнинг увук ва керагалари туташган ерда кўйилган туйнук.
- Жарии — жарима.
- Желак — яктак; бола тўни катталигидаги яктаксимон аёллар ёпинничи.
- Жериб қолмоқ — каттиқ иссиқламоқ.
- Жийирмоқ — буриштирмок. Куйруганини жийирмок — думини қайирмок.
- Жингил (жингил) — юлгун; дарё бўйида ўсадиган майдоңда дараҳт.
- Жиранда — сел ювшини натижасида хосил бўлган чуқурлик.
- Жига — уқпар ва кимматбахо тошлар билан безатилган, бош кийимга такиладиган зийнат буюми.
- Жигадор — жигали; саройда жигаларни сакловчи амалдор.
- Жовлик — ялпи, ёппасига.
- Жодирим бўлмоқ — ажралмок.
- Жойли (ёйли) — текис, ёзик, ёйилган.

- Жонсиз — жосус.
- Жузя — гайридинлардан олинадиган солик.
- Жумийтмоқ — кулокни чимириб, орка томонга кия қилмок.
- Жуммоқламоқ — қалавасимон қилиб ўраб бойламок.
- Жўрамоқ — йўймоқ, тушнинг таъбирини айтмоқ.
- Занг — расм, одат.
- Зилванг — оғир, зил-зил.
- Зинкийиб — какқайиб; тик туриб.
- Иза — этак. Тог изаси — тог этаги
- Изи-чув — кий-чув.
- Изгор чўл — ҳадсиз, чексиз, кенг чўл.
- Ийир — даволи ўсимлик тури.
- Ийсингмоқ — иймоқ, елинга сут тўлмок.
- Илкисдан — тўсатдан.
- Илкув-силкув — туртки, турткиласмок.
- Интиқ — интизор.
- Иркильмоқ — хавфсираб тортилмоқ, тўхталмок.
- Истара — ранг-рўй, кўриниш.
- Исфиҳон — исфиҳоний қилич, қескир тиф.
- Ит ўйқалиш — беихтиёр равишда одатдаги холатдан бошқа бир холатга кириш.
- Ит ириллар — чимилдикка кираётган күёвнинг ит ҳолатига кириб олдини тўсиш одати. Одатда буни кекса кампирлар бажариб, кўёвдан совға-салом олгач, йўл беради.
- Ияртмоқ — эргаштиримоқ.
- Ийтмоқ — йўқолмоқ; адашмоқ.
- Йўл айрит — айрилиш, йўлнинг икки ёки бир неча ёкка айрилиб кетадиган ери.
- Кабир — катта, улуф.
- Каж — эгри, тескари, терс.
- Калта бақай — оёғи қисқа. Бақай — бақалок.
- Камип үлди — никоҳ тўйи одати. Чимилдикка кираётган күёв йўлинни икки кампир ўзини ўлганга солиб тўсиб олади. Кўёвдан совға-салом олгач, йўл беради.
- Карк — ёввойи түя.
- Касратки — калтакесак.
- Кашмири — айёр.
- Кебанак — астарни кигиз, авраси юнг чўпонлар чакмани.
- Кия — гуноҳ.
- Куёв улоқ — никоҳ тўйи одати. Тўйнинг эртасига күёвнинг жўраларига күёв томонидан бериладиган улоқ ёки бирор жондор. Куёв жўралар ё кўпкари ташкил этади, ёки жондорни сўйиб, зиёфат уюштиради.
- Кузан — катталиги юрмондай чўл ҳайвони.
- Кўкай — дил, калб. Кўкай кесмок — дил оғритмоқ.
- Кўнак — қимиз сақланадиган идиш.
- Кўрганли бойлар — тўқ, бадавлат бойлар.
- Кўтоҳлик — гуноҳ. Кўтоҳ — қисқа.
- Лангар тўймоқ — оғирлик солиб вазиятни сакламок.
- Ланка — доғ; таъна, маломат.
- Ловдон рўмол — қизил ипак рўмол.
- Лодон — нодон.
- Лоловлашмоқ — чувиллашмоқ.
- Лозимат — лозимлик.
- Лопти — бехудага мақтанувчи.
- Лот — кўчма маънода ўч, қасд, қасос.
- Лўкча — эркак ёш түя.
- Мегажин — урочи чўчқа.
- Майна — мия.
- Марол — кийинк.
- Менгзамоқ — ўхшатмоқ.

- Менман** — манман, мактанчок.
Мини йўқ — тенги йўқ, бебаҳо.
Мия — ўсимлик тури.
Музтар — иочор.
Мугойиб — арабча «мугнб», «муғиба» сўзларининг бузилган шакли бўлиб, тирик бева маъносида; мунглик.
Наза қўлмоқ — кўнгил чўқтирмоқ, хафа қилмоқ.
Назаркарда — пирнинг назари тушган, эгали; илоҳий кучлар томонидан кўрик-ланадиган.
Нар-мода — ҳезалак.
Наркас — нарғиз.
Наҳ урмоқ — камситмоқ.
Нишон қўймай олмоқ — ҳеч нарса қолдирмай олмоқ.
Новос — бокишига кўйилган ёш мол.
Носоқу сўз — кўпол, вайсанки сўз.
Обдол талагандай — девона талагандай.
Овлоқ — чекка, хилват.
Орқа-ўриш — суюнчик.
Палас — қўқиган, тўэзиган.
Парқин — от кўлтиғи; афсонавий тулпор қаноти ва қаноти жойлашган ер.
Понза рўмол — юпқа ипак рўмол. Ҳоди Зариф бу терминни Россиянинг Пенза шаҳри хунарманд аёллари тўқиб чиқарган гулдор тивит рўмолнинг тарқалиши билан пайдо бўлган бўлса керак, деб хисоблади.
Поримас — таъсир этмас.
Равза — гулзор, боғ, жаниат. Бк ерда муқаддас қабр, азиз-авлиёлар қабри.
Рўмол ўрамоқ — чақалокларни бир-бирига унаштириб қўйиш одати.
Салдорли — салмоқли, оғир, залварли.
Само — садо, товуш.
Сангров — анков.
Сағсиндиримоқ — сафни бузмоқ, енгмоқ.
Селайиб — сулайиб, ҳолсизланиб.
Селанглаб — аланглаб.
Селтаймоқ — қуруқ қолмоқ, маҳрум бўлмоқ.
Сермамоқ — кесиб силтамоқ.
Серпилмоқ — тортилмоқ, орқага тисарилмоқ.
Силинмоқ — шилинмоқ.
Собилмас — ҷарчамас.
Совлиқ — она қўй.
Совуқ оёқ — доим ёмонлик қиласидиган, ёмонлик билан машғул одам.
Сова — кимиз солинадиган идиш.
Созигарлик — муроса.
Солим — кўпкарида улокни олиб чикиб, маррага етказган кўпкаритозга бериладиган совфа, солимга кўйилган бир нарса, жондор ёки пул.
Соли сувга кетган — бўшашибган, суст, шашти кайтган.
Соққаси (сўққуси) — зарби.
Сурсат — солик тури.
Сўмламоқ — мўлжалламоқ, чўтламоқ.
Табгил — тадбир, мўлжал; табдил.
Табгири — таъсир. Табгиридан адашмоқ — шошиб қолмоқ.
Таккон — табиб.
Таммай — танбех.
Тараф — душман.
Тари-тармоқ — тез пишар донли ўсимликлар.
Таркаш — пиёла ва косаларни сафарда синишидан саклаш учун теридан ёки ёрочдан қубба шаклида ишланган филоф.
Тенгсалмоқ — тебраммоқ, чайкалмоқ.
Тилга энмоқ — тили чиқмоқ, гапира бопшамоқ.
Тиклаб — тикилиб караб.

- 
 Тир келадиган — тенг келадиган, баробар бўладиган.
 Том — пахса ёки синч девор билан ўралиб, усти ёпилган уй; уйнинг устн.
 Томир бўлмоқ — қариндош, куда-кудағай бўлмоқ.
 Томошибон — томошибон.
 Топиш қилмоқ — топширмок.
 Тортимли — залворли; ёкимли.
 Тува — тугул.
 Турбат — тупрок, ер; қабр; улуг зотларнинг қабрлари устига қурилган мақбара;
 зиёратгоҳ.
 Тублиеиб — тўпланиб.
 Тулоқсиндан — бирдан, қўнигисдан.
 Тўримоқ — диккат билан муромоқ.
 Тўсат-тўсат — тўда-тў...
 Тўта — киска. Тўталаб — ўрталаб.
 Тўқиз товоқ — бўлгуси келинга бисот юбораёттандаги хар бир буюмдан тўқиз-
 тўқиз килиш одати.
 Улгу — нусха, нишона.
 Урри — ўғри.
 Уюр — бокувга ҳайдалган йилқилар тўдаси.
 Хаса — сара, наслли. Хаса тулпор — сара тулпор.
 Хонавор — ҳавор, текис.
 Хун довламоқ — ўлдирилган кишининг хунини талаб қилмоқ.
 Хўрач — кичкина, митти.
 Чакас — ов кушини қўндириб қўйиладиган мослама.
 Чалқаромон — чалқанча.
 Чалқимоқ — тўлиб-тошмоқ.
 Чангароқ — кора уй ва ўтовнинг тепасидаги гардиши.
 Чана — от оёғининг пастки кисмидаги түёққа томон ўғсан сочоқ кил.
 Чак-чак учирив — чак-чак отиб, бир-бирига қараб сайраб.
 Чегишиб — чикишиб, келишиб.
 Чер — дард-алам, қайғу.
 Чийир — из.
 Чинграган чўл — иссиқда қақраган чўл.
 Чирпа — чиппа.
 Читмоқ — чимирмоқ.
 Чиганоқ — тирсак.
 Човлаб қолмоқ — семиз молнинг семизлиқдан чарчаб юролмай, оёғини босолмай
 колишига човлаб қолиш, дейдилар.
 Чупурон — тоғижика «Чукбурон» сўзининг бузилган шакли. Бу ерда суннат тўйи.
 Чори — тўрт яшар кўй.
 Чоримоқ — чирмаб боғламоқ.
 Чўйда — бошнинг орқа суяги.
 Чўйбир — хашаки, оддий, от.
 Чўзарив — чўкириб.
 Чўнтоқ — ёли, думи киска от.
 Чўтгун ер — ўтлок ер.
 Чўпонларнинг маҳмаданаси — чўпонларнинг бошлиғи, сўзамоли.
 Чўчанглатиб — ликиллатиб.
 Шагалмас — жўшким; қайфи ошган.
 Широлга — овланган куш ёки ҳайвондан бериладиган тортиқ.
 Шобир — товуш, шарпа.
 Элибой — чорвадор.
 Энчи — фарзандга атаб ажратилган бош мол.
 Этана бўлмоқ — куйиб-пишмоқ, меҳрибонлик қилмоқ.
 Эшонсиниб — Эшон санаб, эшонга ўхшаб.
 Юракчойди — юрак олдириб қўйган.
 Ют — ёмон, зарарли, оғат, фалокат.
 Яланг қатори — хамма қатори.

- 
Янгилма — адашма.
Үзавон — ўзиңа.
Үлтим ўти — гунохи.
Үр — чукур ёр.
Үр — ўжар. **Үрлик** — ўжарлик.
Үргиб — урчиб.
Үрол — бошланғыч, кириш. Гапнинг ўроли — гап боши, кези келганда.
Үтирик — ёлғон.
Қаба — катник, берахм. Қаба фалак — золим фалак.
Қадим — кадам, одим.
Қайқи — ғигілан.
Каллиққа бормоқ — унаштирилғандан кейин күёвнинг яширинча қызниңгүйига бориши одати. Бундан янгалар хабардор бўлади.
Қамсамоқ — ўрамоқ, ўраб олмоқ.
Канжига — эгарнинг оркасига ёки олдига бирор нарсанни танғиши учун маҳсус боғлаб кўйилган тасма.
Қаъда — одат.
Қиз опқочи — никоҳ кечаси қизни кўшниларникига ўтказиш одати.
Қиз сўйлатар — падар вакилларнинг келиннинг розилигини сўраганда, қизни розилик беришга ундовчи кайвони.
Қирмиз — қизил.
Қирин — қирғин.
Қөйдом — ёввойи ўсимлик тури.
Қуёничиқ — касал тури.
Қулотуз — кенг дала.
Қўнгирсалжин — хавонинг ола булути бўлган мўътадил пайти.
Қўр — тўп, тўда.
Қўра — бокувга ҳайдалган кўйлар тўдаси; кўйлар қамаладиган бостирма.
Қўриқ — отни ушлаш учун ишлатиладиган аркон.
Қўтос — серёл тибет ҳўқизи. Қўтос ёлидан ясалган турсимон маҳсус безак.
Қўш — чўпонлар яшайдиган уч оёқ капа.
Ғаба — қаба, кўпол.
Ғани — бой.
Ғаним — душман.
Ғарқоб — сув остига қолиш.
Ҳарвона — түяниңг қириғи, лўки.
Ҳишишай — ёмғирли, рутубатли, нам.
Ҳут — яхши, фойдали, эзгу; ой номи.



Алпомиш: Ўзбек халқ қаҳрамонлик достони //
Айтувчи: Фозил Йўлдош ўғли, ёзиб олувчи:
М.Зарифов/. — Т.: «Шарқ», 1998. — 4006.

Сарл. олдида: Ўзбекистон Республикаси ФА
Алишер Навоий номидаги Тил ва адабиёт институти.

ББК 82.3(5У—6)

АЛПОМИШ

**«Шарқ» нашриёт-матбаа концерни
Бош таҳририяти
Тошкент — 1998**

Мухаррир *И.Шоймарданов*
Рассомлар *Қ.Башаров, Л.Башарова*
Бадиий мухаррир *Ф.Башарова*
Техник мухаррир *Г.Ломиворотова*
Мусаххих *Ж. Тоирова*

Теришга берилди 08.07.98 й. Босишига рухсат этилди 11.08.98 й.
Бичими 60х90 $\frac{1}{16}$. Офсет босма. Кудряшев гарнитураси.
Шартли босма табоги 25,0. Нашриёт хисоб табоги 26,38.
Адади 15 000. Буюргма № 2699.

**«Шарқ» нашриёт-матбаа концерни босмахонаси,
Тошкент — 700083, Буюк Турон кӯчаси, 41.**